

ЖУАН ФАЛУНЬ

(Монгол орчуулга)

Ли Хонжи

ДАФА

(Лун Юй)¹

Дафа² бол Бүтээгчийн билгүүн ухаан билээ. Энэ бол тэнгэр газар бүтсэн, орчлон ертөнц бий болсон суурь. Энэ нь хамгийн бичлийн туйлаас аугаа уудмын туйл хүртэлх бүхнийг багтаасан ба сансрын биетийн орших түвшин бүрт өөр өөрөөр илэрдэг. Сансрын биетийн гүнээс хамгийн бичил бие бодиуд анх үүсч тоо томшгүй бие бодиуд болон давхаргаас давхаргад, жижгээс том руу үелэн өссөөр хүн төрөлхтөний мэдэх гадаргуйн давхаргын атом, молекул, од гаригс, галактик болон түүнээс ч том хэмжээнд хүрдэг. Янз бүрийн хэмжээт бие бодиос янз бүрийн хэмжээт амь бодь болон уудам сансрын биет даяар тархан орших янз бүрийн хэмжээт хорвоо ертөнц бүтдэг. Өөр өөр давхаргын бие бодь дээр орших амь бодийн хувьд дараахь арай том давхаргын бие бодь нь тэдний тэнгэрт орших од гаригс нь болдог, давхарга болгоны хувьд ийм байдаг. Орчлон ертөнцийн аль ч давхарга дахь амь бодийн хувьд энэ бол хязгааргүй. Цаг хугацаа, орон зай, амь бодийн үй түмэн хэлбэр, төрөл зүйлийг мөн Дафа бүтээсэн, оршин байгаа аливаа зүйл бүгд түүнд багтана, үүнээс гадуур үлдэх зүйл гэж үгүй. Энэ бол Дафа-гийн Жэнь, Шань, Рэн³ мөн чанарын өөр өөр давхарга дахь бодит илрэл юм.

Хүн төрөлхтөний орчлон ертөнц ба амь бодийг судлах арга хэдий хөгжсөн ч зөвхөн доод давхаргын орчлон ертөнц болох хүмүүний орших энэ орон зайн хэсгийг л судалдаг. Өнө эртний хүн төрөлхтөний бий болгосон олон соёл иргэншлийн үед өөр од гаригсыг судалж байсан. Гэвч хэдий

¹ Лун Юй- Оршил.

² Дафа-Аугаа Ном.

³ Жэнь, Шань, Рэн - Үнэн, Нинжин, Тэвчээр.

өндөрт нисч, хэр хол явсан ч хүмүүний орших энэхүү орон зайнаас гарч чадаагүй. Хүн төрөлхтөн хэзээ ч орчлон ертөнцийн үнэн илрэлийг жинхэнэ танин мэдэх боломжгүй. Хэрэв хүн төрөлхтөн орчлон ертөнц, цаг хугацааны орон зай болон хүний биеийн нууцыг тайлъя гэвэл Ариун номоор бясалгаж гэгээрэх, амь бодийн түвшнээ дээшлүүлэх нь цорын ганц л зам юм. Бясалгалын явцад бас ёс суртахуун дээшилдэг, жинхэнэ нинжин ба харгис, сайн ба мууг ялгаж чаддаг болоход, хүн төрөлхтөний энэ давхаргаас гарахад орчлон ертөнцийн үнэн бодит байдал болон өөр өөр түвшний, өөр өөр орон зайн амь бодийг харж, бас харилцаж чаддаг болно.

Хүн төрөлхтөний судалгаа шинжилгээ нь амьдралын нөхцөлийг сайжруулах нэрийн доор явагдах технологийн өрсөлдөөн бөгөөд энэ нь ихэнх тохиолдолд бурханыг үгүйсгэж хүн төрөлхтөн өөрийгөө зөв барьж байх ёс суртахуунаа алдах нөхцөл нь болдог. Ийнхүү өнө эртний хүмүүний соёл иргэншил олон удаа устгагдаж байсан. Хүн төрөлхтөний судалгаа шинжилгээ нь зөвхөн энэ материаллаг ертөнцөд хязгаарлагддаг, арга нь зөвхөн тухайн зүйлийг таньж мэдсэний дараа судалдаг замаар явагддаг. Хүмүүс Бурханыг үгүйсгэдгээс болж энэ орон зайд харагдахгүй, мэдрэхүйд өртөхгүй боловч бодитоор оршдог, хүн төрөлхтөний бодит амьдралд илэрч байдаг сүнслэг үзэл, сүсэг бишрэл, бурханлаг үг, ид шид гэх мэт зүйлийг хөндөж зүрхэлдэггүй.

Хэрэв хүн төрөлхтөн ёс суртхуундаа суурилан өөрийн зан үйлдэл, үзэл бодлоо сайжруулж чадвал хүний нийгмийн энэ соёл иргэншил урт удаан хугацаанд оршин тогтнож болох бөгөөд бурханы ид шид хүмүүний нийгэмд дахин илэрнэ. Урьд өмнө хагас бурханлаг, хагас хүмүүнлэг соёл иргэншил хүн төрөлхтөний нийгэмд удаа дараа оршиж байсан нь хүн төрөлхтөний амь бодь, орчлон ертөнцийн

талаархи танин мэдэхүйг дээшлүүлж байсан. Энэ дэлхийд дэлгэрч буй Дафа-д хүн төрөлхтөн зохих дээдлэл хүндлэлтэй хандвал тэр хүмүүс, тэр үндэстэн эсвэл улс орон аз жаргал, алдар хүндийг хүртэх болно. Сансрын биет, орчлон ертөнц, амь бодь бүхий л зүйлсийг орчлон ертөнцийн Дафа бүтээсэн. Дафа-гаас эсрэг болсон амь бол жинхэнэ муудсан амь. Дафа-д нийцсэн аливаа хүн жинхэнэ сайн хүн, түүнд сайн хариу, урт нас, удаан жаргал ирнэ. Дафа-д уусч чадсан бясалгагч бол гэгээрэгч - Бурхан.

Ли Хонжи
2015 оны 5 сарын 24

ГАРЧИГ

НЭГДҮГЭЭР ЛЕКЦ	1
Хүнийг дээд түвшин лүү жинхэнэ дагуулах нь.....	1
Өөр өөр түвшинд өөр өөрийн Ном байдаг.....	7
Үнэн, Нинжин, Тэвчээр бол сайн, муу хүнийг цэгнэдэг цорын ганц шалгуур.....	12
Чигон бол өнө эртний соёл.....	16
Чигон бол бясалгал.....	22
Бясалгаад яагаад гон өсдөггүй вэ?.....	26
Фалунь Дафагийн онцлог.....	36
ХОЁРДУГААР ЛЕКЦ	46
Тэнгэрийн мэлмийн асуудал.....	46
Далдыг харах ер бусын чадвар.....	62
Өнгөрсөн болон ирээдүйг харах ер бусын чадвар.....	65
Таван мах бодид оршихгүй, Гурамсан ертөнцөөс гарах нь.....	71
Хүсэх асуудал.....	77
ГУРАВДУГААР ЛЕКЦ	89
Би бүх сурагчдаа шавиа гэж үздэг.....	89
Буддын системийн чигон ба Буддын шашин.....	90
Нэг номоор тууштай бясалгах.....	96
Ер бусын чадвар ба Гон хүч.....	100
Урвуу бясалгал ба Гон зээлдэх.....	102
Сүнс шүглэх.....	110
Сансарын хэл.....	119
Багш сурагчиддаа юу өгсөн бэ?.....	122
Энергийн орон.....	131
Фалунь Дафагийн сурагч бясалгалыг яаж тараах вэ.....	133

ДӨРӨВДҮГЭЭР ЛЕКЦ	137
Алдах ба олох	137
Нүглийн хувиралт	139
Зан чанараа дээшлүүлэх	152
Энергийг адислах	160
Шуангуаныг байршуулах	164
ТАВДУГААР ЛЕКЦ	175
Фалунь дүрс	175
Чимэнь бясалгал	179
Буруу аргын бясалгал	181
Эр эм хос бясалгал	185
Амь бие, сэтгэлийн хос бясалгал	188
Номын бие (Фашэнь)	190
Аравнайлах	191
Жу Юу Кэ (Ид шидийн анги зүйл)	201
ЗУРГААДУГААР ЛЕКЦ	203
Бясалгалын солиорол	203
Бясалгахад буг чөтгөр үймүүлэх нь	215
Өөрийн сэтгэлээс чөтгөрийн үймүүлэл үүсэх нь	224
Эзэн бодол хүчтэй байх ёстой	231
Сэтгэл заавал зөв байх ёстой	232
Ушу чигон	241
Гайхуулах сэтгэл	246
ДОЛДУГААР ЛЕКЦ	252
Амь хороох асуудал	252
Мах идэх асуудал	258
Атаархах сэтгэл	266
Өвчин эдгээх асуудал	274
Эмнэлгийн эмчилгээ ба чигон эмчилгээ	281

НАЙМДУГААР ЛЕКЦ	288
БИГҮ МАЦАГ	288
ЧИЙ ХУЛГАЙЛАХ	291
ЧИЙ ХУРААХ	295
ХЭН БЯСАЛГАНА ТЭР ГОН ОЛЖ АВНА	299
ТЭНГЭРИЙН ЭРГҮҮЛЭГ	308
БАЯРЛАХ СЭТГЭЛ	321
ҮГ ЯРИАГАА БЯСАЛГАХ	324
ЕСДҮГЭЭР ЛЕКЦ	327
ЧИГОН БА БИЕЙН ТАМИР.....	327
БОДОЛ	330
АРИУН АМГАЛАН СЭТГЭЛ	339
ТӨРӨЛХИЙН СУУРЬ	346
УХАМСАР.....	349
ТӨРӨЛХИЙН АУГАА СУУРЬТАЙ ХҮН	357

Нэгдүгээр лекц

Хүнийг дээд түвшин лүү жинхэнэ дагуулах нь

Би, Ном болон бясалгал заах бүхий л явцад нийгэмд болон сурагчиддаа хариуцлагатай хандаж ирснээр гарсан үр дүн маань сайн байгаа бөгөөд нийгэмд бүхэлд нь үзүүлсэн нөлөө ч бас чамгүй сайн байгаа. Хэдэн жилийн өмнө олон чигон багш бясалгал заадаг байсан. Тэдний заасан нь бүгд өвчин эдгээх, бие эрүүлжүүлэх түвшинд харьяалагдах зүйлүүд. Мэдээж тэдний бясалгалын аргыг муулж байгаа юм биш, би зөвхөн тэднийг дээд түвшний зүйлийг заагаагүй гэж хэлж байгаа юм. Би орон даяарх чигон-ы байдлыг мэдэж байгаа. Одоо, дотоодод болон гадаадад жинхэнэ дээд түвшинд хүрэх чигон-ыг би ганцаараа зааж байна. Дээд түвшинд хүрэх чигон-ыг яагаад хэн ч заадаггүй байсан бэ? Учир нь энэ бол маш том ээдрээтэй асуудлыг, маш гүн түүхийн эх сурвалжийг, өргөн цар хүрээтэй хурц асуудлуудыг хамаардаг. Үүнийг ердийн хүн зааж чадахгүй, энэ нь маш олон чигон бясалгалын зүйлсийг хөнддөг. Ялангуяа манай маш олон чигон бясалгагч өнөөдөр энэ ч бясалгалыг сураад, маргааш нөгөөг ч сурч өөрийн биеэ замбараагүй болгодог, цаашид дээш бясалгаж чадахгүй нь зайлшгүй. Хүмүүс нэг гол замаар дээш бясалгаж байхад тэр хажуугийн салаа замаар бясалгадаг, энийг бясалгахад тэр нь саад болно, тэрийг бясалгахад энэ нь саад болдог. Энэ бүгд түүнд саад болж цаашид бясалгаж чадахгүйд хүргэнэ.

Бид эдгээр асуудлыг бүгдийг нь зохицуулж өгнө, сайныг нь үлдээж мууг нь хаяна, тэгснээр чамайг үүнээс хойш бясалгаж чадахыг чинь батална. Гэхдээ чи энэ Дафа-г

үнэхээр сурахаар ирсэн байх ёстой. Хэрэв чи янз бүрийн зууралдсан сэтгэлтэй ирж ер бусын чадвартай болох, өвчнөө эдгээх, зүгээр онол сонсох, эсвэл ямар нэгэн муу зорилгоор ирсэн бол бүгд болохгүй. Учир нь энэхүү зүйлийг ганцхан би хийж байгаа гэж хэлсэн. Ийм боломж олон гарахгүй, би ч үргэлж ингээд заагаад байхгүй. Миний лекцэнд сууж биечлэн сонссон хүн бол... би хэлбэл, чи энэ цаг үеийг туйлын үнэ цэнэтэй байсныг ирээдүйд ойлгоно. Мэдээж бид хувь тавиланд итгэдэг, энд байгаа хүн болгон хувь тавилангаараа сууж байгаа.

Та бүхэн боддоо, дээд түвшинд хүрэх бясалгалыг заах нь ямар асуудал вэ? Энэ нь хүнийг аварч байгаа хэрэг биш үү? Хүнийг аврах гэдэг нь зөвхөн чи өвчнөө эдгээх, биеэ эрүүлжүүлэхийн тулд биш, харин жинхэнэ бясалгах юм. Тэгвэл жинхэнэ бясалгал нь сурагчдаасаа зан чанар өндөр байхыг шаарддаг. Энд сууж байгаа хүн Дафа-г сурахаар ирсэн, тэгвэл чи өөрийгөө жинхэнэ бясалгал хийж буй хүн гэж үз, чи зууралдсан сэтгэлээ орхих ёстой. Чи янз бүрийн хүсэл зорилготой ирж бясалгал, Дафа-г сурах бодолтой бол чи юу ч сурахгүй. Та бүхэнд үнэнийг хэлье, бясалгалын бүхий л явц нь тасралтгүйгээр хүний зууралдсан сэтгэлийг орхих явдал юм. Энгийн хүний нийгэмд хүмүүс хувийн ашиг сонирхлын төлөө хоорондоо тэмцэлдэн булаалдаж, нэг нэгнийгээ хуурч мэхэлдэг, хохироодог. Ийм сэтгэлийг бүгдийг нь хая. Тэр тусмаа өнөөдөр бясалгал сурч байгаа хүн эдгээр сэтгэлийг бүр ч орхих ёстой.

Би энд өвчин эдгээхийг ярихгүй, бид нар ч өвчнийг эдгээхгүй. Гэхдээ жинхэнэ бясалгадаг хүн, чи өвчтэй биетэй бол бясалгаж чадахгүй. Би чиний биеийг ариусгаж өгнө. Биеийн ариусгалыг зөвхөн бясалгалыг жинхэнэ сурахаар, Номыг жинхэнэ сурахаар ирсэн хүнд хийж өгнө. Бид нэг зүйлийг онцолдог, чи тэр сэтгэлээ, өвчний бодлоо орхиж чадахгүй бол бид юуг ч хийж өгч чадахгүй, мөн чамд туслах

ямар ч арга байхгүй. Яагаад вэ? Яагаад гэвэл энэ орчлон ертөнцөд ийм зарчим байдаг, энгийн хүний асуудал нь Буддын номоор яривал бүгд хувь тавилангийн холбоотой байдаг. Жирийн хүн төрөх, хөгшрөх, өвчлөх, үхэх жамаар л оршдог. Урьдны хийсэн муу үйлээс үүссэн нүгэл нь өвчин, гай зовлонгийн шалтгаан болдог, ийнхүү зовох нь үйлийн үрээ төлж байгаа хэрэг бөгөөд үүнийг хэн ч дураараа өөрчилж болохгүй. Хэрэв өөрчилбөл өртэй байсан ч түүнийгээ төлөхгүй байж болно гэсэнтэй адил, бас үүнийг дураараа хийж болохгүй, тэгвэл муу зүйл хийсэнтэй адил болно.

Зарим хүн өвчтөнг эдгээх, өвчнийг арилгах, биеийг эрүүлжүүлэхийг сайн зүйл хийж байна гэж үздэг. Миний харж байгаагаар энэ бүгд өвчнийг үнэхээр эдгээдэггүй, хойшлуулдаг эсвэл хувиргаж өгдөг, харин үүнийг авч хаядаггүй. Жинхэнэ энэ гай зовлонгоос салъя гэвэл нүглийг арилгах ёстой. Хэрэв өвчнийг хэн нэгэн үнэхээр эдгээх юмуу нүглийг бүр мөсөн арилгаж чадвал, жинхэнэ ингэж хийж чадвал энэ хүний түвшин нь доогуур биш юм. Тэр аль хэдийн нэг зарчмыг олж харсан, өөрөөр хэлбэл энгийн хүний зарчмыг хамаагүй эвдэж болохгүй. Бясалгалын явцад, бясалгагч энэрэнгүй сэтгэлийн улмаас зарим сайн зүйлийг хийх, хүнд тусалж өвчнийг эдгээх, биеийг нь эрүүлжүүлэхийг бол зөвшөөрнө, гэхдээ бүрмөсөн эдгээж өгч болдоггүй. Хэрэв энгийн нэг хүний өвчнийг бүрмөсөн арилгах юм бол, бясалгадаггүй энгийн хүн ямар ч өвчингүй болоод гараад явна. Тэр хүн үүдээр гараад энгийн хүн хэвээр үлдэнэ. Тэр бас л өөрийн ашгийн төлөө энгийн хүнтэй адил тэмцэлдэн булаалдана, яаж түүний нүглийг хамаагүй арилгаж өгч болох юм? Үүнийг туйлаас зөвшөөрөхгүй.

Тэгвэл яагаад бясалгаж байгаа хүнд хийж өгч болдог вэ? Яагаад гэвэл бясалгадаг хүн хамгийн нандин хүн, тэр

бясалгах бодолтой, иймээс гарсан энэ бодол нь хамгийн нандин юм. Буддын шашинд Буддын мөн чанарыг ярьдаг. Буддын мөн чанар гарахад гэгээрэгчид түүнд тусалж болно. Энэ нь ямар учиртай вэ? Үүнийг хэлбэл, би дээд түвшинд бясалгал зааж байгаа учраас дээд түвшний зарчимтай холбогддог, үүдэн гарах асуудал нь маш том. Энэ орчлон ертөнцөд, бидний харж байгаагаар хүний амь энгийн хүний нийгэмд үүссэн биш. Хүний жинхэнэ амь орчлон ертөнцийн орон зайд үүсдэг. Учир нь энэ орчлон ертөнцөд амийг бий болгодог маш олон янз бүрийн бие бодь байдаг, эдгээр бие бодь хоорондын харилцан үйлчлэлийн дүнд амь үүсч болдог. Өөрөөр хэлбэл хүний хамгийн анхны амь орчлон ертөнцөөс эх сурвалжтай байдаг. Орчлон ертөнцийн орон зай нь угаасаа өгөөмөр энэрэнгүй бөгөөд Үнэн, Нинжин, Тэвчээр гэсэн мөн чанарыг агуулдаг. Хүн анх төрөхдөө орчлон ертөнцтэй адил чанартай, гэхдээ амь бодь их хэмжээгээр үүсэхэд нийгмийн хамтын харилцаа бий болдог. Энэ дунд зарим хүн магадгүй амиа хичээсэн сэтгэлтэй болж аажмаар тэдний түвшин унаж ирнэ. Энэ түвшиндээ байж чадахгүй болж тэд доош унана. Харин нөгөө түвшиндээ дахин муу болж тэнд мөн л байж чадахгүй үргэлжлэн доошоо унана, эцэст нь хүн төрөлхтний энэ түвшинд унаж ирдэг.

Бүх хүн төрөлхтний нийгэм нэг л түвшинд байдаг. Энд унаж ирсэн бол ер бусын чадвараар харахад, эсвэл аугаа гэгээрэгчийн үүднээс харахад, тэдгээр амь бодь уг нь устгагдах ёстой. Гэвч аугаа гэгээрэгчид нигүүлсэнгүй сэтгэлийн улмаас тэдэнд дахин нэг боломж өгсөн, тэгээд ийм нэг онцгой орчин, онцгой орон зайг бүтээсэн. Мөн энэ орон зайны амь бодь орчлон ертөнцийн бусад орон зайн амь бодьтой ер адилгүй. Энэ орон зайны амь бодь нь өөр орон зайн амь бодийг харахгүй, мөн орчлон ертөнцийн үнэн байдлыг харж чадахгүй, иймээс эдгээр хүмүүс төөрөлтөнд унасантай адил. Эдгээр хүмүүс өвчнөө эдгээх, гай

зовлонгоосоо салах, нүглийг арилгах бодолтой байвал заавал бясалгаад үүссэн эх үндсэндээ буцах, үнэнд хүрэх ёстой. Янз бүрийн бясалгалд бүгд ингэж үздэг. Хүн үүссэн эх үндсэндээ буцах, үнэнд хүрэх нь хүн болсны жинхэнэ зорилго юм. Тиймээс хүн бясалгахыг хүсвэл, түүний Буддын чанар нь гарч ирсэн гэж үздэг. Энэ бодол нь хамгийн нандин юм, яагаад гэвэл тэр хүн үүссэн эх үндсэндээ буцах үнэнд хүрэх хүсэлтэй, энгийн хүний энэ түвшнээс гарахыг хүсч байна.

Магадгүй та бүгд Буддын шашинд ийм нэг яриа байдгийг сонссон байх: Буддын чанар гарч ирэхэд арван зүгийн ертөнцийг доргиодог. Хэн ч харсан түүнд тусална, ямар ч нөхцөлгүйгээр тусална. Хүнийг аврахад Буддын системд ямар ч нөхцөл ярьдаггүй, ямар ч хариу хардаггүй, ямар ч нөхцөлгүйгээр тусална, тиймээс бид сурагчиддаа маш олон зүйлийг хийж өгч болно. Харин энгийн нэг хүний хувьд зөвхөн энгийн хүн байх бодолтой, өвчнөө эдгээх хүсэлтэй бол болохгүй. Зарим хүн би өвчнөө эдгэрсний дараа бясалгана гэдэг. Бясалгахад ямар ч нөхцөл ярьдаггүй, бясалгахыг хүсвэл зүгээр л бясалга. Гэвч зарим хүн өвчтэй биетэй, эсвэл зарим хүний биеийн мэдээлэл нь маш их замбараагүй байдаг. Зарим хүн ердөө чигон-оор хичээллэж үзээгүй, бас зарим нь хэдэн арван жилээр чигон-оор хичээллэсэн ч чий-н түвшиндээ эргэлдсээр л байдаг, дээш бясалгаж чаддаггүй.

Тэгвэл яах вэ? Бид биеийг нь ариусгаж өгнө, түүнд дээд түвшин лүү бясалгах боломж олгоно. Хамгийн доод түвшинд бясалгахад ийм нэг явц байдаг, энэ нь чиний биеийг бүрэн ариусгах юм. Чиний бодол санаанд байгаа бүх муу муухай зүйлийг, биеийн эргэн тойронд байгаа нүглийн оронг, мөн чиний биеийг өвчлүүлж байгаа хүчин зүйлс бүгдийг цэвэрлэнэ. Цэвэрлэхгүй бол, ийм их бохирдсон хар биетэй, мөн муу бодол санаатай байхад яаж дээд түвшин

лүү бясалгах юм? Бид энд чий-гээр хичээллэхгүй, доод түвшний эдгээр зүйлээр чи хичээллэх хэрэггүй. Бид чамайг дээш нь түлхэж өнгөрүүлнэ, чиний биеийг ямар ч өвчингүй эрүүл байдалд хүргэнэ. Түүнчлэн доод түвшинд бий болох ёстой бүх суурь зүйлийг бид чамд бэлнээр нь суулгаж өгнө, ингэснээр бид маш дээд түвшинд бясалгана.

Бясалгалд чий-н гурван үе шат байдаг. Гэхдээ жинхэнэ бясалгалд (чий-н дасгалыг оролцуулахгүйгээр) зөвхөн хоёр гол түвшин байдаг: Нэг нь Гурамсан ертөнцийн номын бясалгал, нөгөөх нь Гурамсан ертөнцөөс гарсан номын бясалгал юм. Энэ Гурамсан ертөнцийн ном, Гурамсан ертөнцөөс гарсан ном нь хийдийн доторх хүний орчлонгоос гаднах, хүний орчлон доторх гэсэн зөвхөн онолын зүйлээс маш өөр юм. Биднийх бол хүний биеийн бясалгалын хоёр гол түвшин дэх жинхэнэ өөрчлөлт юм. Яагаад гэвэл Гурамсан ертөнцийн номыг бясалгах явцад хүний бие ариусна, тасралтгүйгээр цэвэршинэ, улмаар Гурамсан ертөнцийн номын хамгийн дээд хэлбэрт хүрэхэд хүний бие дээд энергийн бие бодиор бүрэн солигддог. Мөн Гурамсан ертөнцөөс гарсан номын бясалгал үндсэндээ Буддын биеийн бясалгал болдог, энэ бие нь дээд энергийн бие бодиор бүтдэг, бүх ер бусын чадвар дахин шинээр гарна. Бидний ярьж байгаа нь энэ хоёр гол түвшин юм.

Бид хувь тавилангаар учирдаг гэж ярьдаг, энд сууж байгаа хүн болгонд би энэ зүйлийг хийж өгч болно. Бидний энд одоо зөвхөн хоёр мянга гаруй хүн л байна. Би үүнийг бас хэдэн мянга эсвэл түүнээс ч олон хүнд, тэр ч байтугай арван мянгаас дээш хүн байсан ч бүгдэд нь хийж өгч чадна. Өөрөөр хэлбэл, доод түвшинд чи хичээллэх шаардлагагүй болсон гэсэн үг. Би чиний биеийг ариусгаж өгсний дараа чамайг түлхэн дээшлүүлнэ, чиний биенд бясалгалын цогц систем суулгаж өгнө, чи шууд дээд түвшинд бясалгах болно. Гэхдээ үүнийг зөвхөн жинхэнэ бясалгах гэж ирсэн

сурагчдад өгнө, чи энд сууж байгаа ч чамайг бясалгадаг хүн гэж хэлж болохгүй. Чамайг үзэл бодлоо үндсээр нь өөрчилж чадвал бид үүнийг өгч болно, мөн үүгээр хязгаарлагдахгүй. Би та бүгдэд ямар зүйл өгсөн бэ гэдгийг хожим та нар ойлгох болно. Бид нар энд өвчин эдгээхийг ярихгүй, харин бид сурагчдын биеийг нийтээр нь засч өгнө, чамайг бясалгах чадвартай болгоно. Чиний бие өвчтэй бол, чамаас үндсэндээ гон⁴ гарахгүй. Тиймээс та бүгд өвчнөө эдгээх гэж над дээр ирэхийн хэрэггүй, би ч тийм зүйл хийхгүй. Миний гарч ирсэн гол зорилго маань дээд түвшин лүү хүнийг дагуулах, жинхэнэ дээд түвшин лүү хүнийг дагуулах л юм.

Өөр өөр түвшинд өөр өөрийн Ном байдаг

Урьд олон чигон багш чигон-д эхлэл шат, дунд шат, дээд шат байдаг гэж ярьдаг байсан. Энэ бүгд бол чий, бүгд чийгээр хичээллэх тэр түвшний зүйл юм, гэвч үүнийг эхлэл шат, дунд шат, дээд шат гэж ангилсан. Жинхэнэ дээд түвшний зүйлийг манай ихэнх чигон бясалгагч огт мэдэхгүй, үндсэндээ ямар ч ойлголт байхгүй. Үүнээс хойш бидний тодорхой ярих зүйл бол дээд түвшний Ном юм. Би бас бясалгалын нэр хүндийг сэргээхийг хүсч байна. Би хичээл дээр бясалгагчдын хүрээн дэх зарим муу үзэгдлийг ярина. Бид яаж үүнд хандах, яаж эдгээр үзэгдлийг авч үзэх талаар би бүгдийг нь ил тодорхой ярина. Түүнчлэн бас дээд түвшинд бясалгал ном заахад өргөн цар хүрээтэй олон асуудлууд холбогддог, мөн маш хурц асуудлууд холбогддог, эдгээр зүйлийг би бас ил тодорхой ярихыг бодож байна. Зарим нь өөр орон зайнаас ирж бидний энгийн хүний нийгмийг үймүүлдэг, ялангуяа бясалгалын орчныг үймүүлдэг, би үүнийг бас ярина, түүнчлэн энэ асуудлыг сурагчиддаа шийдэж өгнө. Эдгээр асуудлыг шийдвэрлэхгүй

⁴ гон- бясалгалаар гаргадаг энерги

бол чи бясалгаж чадахгүй. Үндсээр нь шийдвэрлэнэ гэвэл, бид заавал та бүгдийг жинхэнэ бясалгадаг хүн гэж үзнэ, тэгвэл хийж болно. Мэдээж, чиний үзэл бодлыг гэнэт өөрчлөхөд амаргүй, үүнээс хойших хичээлийн явцад чи аажмаар өөрийнхөө үзэл бодлоо өөрчилнө, мөн та бүхнийг анхааралтай сонсохыг хүсч байна. Миний бясалгал заах нь бусад бясалгал заадаг хүнийхтэй адилгүй. Зарим хүн бясалгал заахдаа зөвхөн тэр бясалгалын онолыг товчхон ярьдаг, дараа нь зайнаас мэдээлэл дамжуулна, тэгээд ямар нэг дасгал хөдөлгөөн заагаад л гүйцээ. Хүмүүс аль хэдийн ингэж бясалгал заалгаад дасчихсан байдаг.

Жинхэнэ бясалгал заахад Ном (Фа) эсвэл Дао (Бумба)-г ярьдаг. Арван удаагийн лекцээр би дээд түвшин дэх зарчмыг бүгдийг нь тодорхой ярина, тэгвэл чи бясалгаж чадах болно, эс бөгөөс чи үндсэндээ бясалгах ямар ч аргагүй. Бусад хүмүүсийн зааж байгаа нь бүгд өвчин эдгээх, бие эрүүлжүүлэх түвшний зүйл юм. Чи дээд түвшин лүү бясалгахыг хүсвэл, дээд түвшний Номын удирдамжгүйгээр бясалгаж чадахгүй. Чи сургуульд сурч байгаатай адил: Чи бага сургуулийн номыг дээд сургуульд үзвэл мөн л бага сургуулийн сурагч хэвээр байх болно. Зарим хүн маш олон бясалгалыг сурчихсан гэж үздэг, ийм ч бясалгал, тийм ч бясалгал гээд олон үнэмлэх гэрчилгээтэй болчихсон, гэхдээ түүний гон бас л дээшлээгүй байдаг. Тэд эдгээрийг чигон-ы үнэн утга учир, чигон-ы бүх зүйл нь гэж үздэг. Гэхдээ тийм биш юм, энэ нь чигон-ы зөвхөн өнгөцхөн ойлголт, хамгийн доод түвшний зүйл юм. Чигон нь зөвхөн эдгээр зүйл биш, энэ бол бясалгал, маш өргөн хүрээтэй гүн гүнзгий зүйл юм, мөн өөр өөр түвшинд өөр өөрийн гэсэн Номтой байдаг. Иймээс бидний өнөөдрийн мэдэж байгаа чий-гээр хичээллэх зүйлтэй адилгүй, чи үүнийг хэр их сурсан ч адил. Жишээ нь чи Английн бага сургуулийн хичээлийг сурсан ч, Америкийн бага сургуулийн хичээлийг сурсан ч, Японы бага сургуулийн хичээлийг сурсан ч, мөн Хятадын бага

сургуулийн хичээлийг сурсан ч бага сургуулийн сурагч хэвээрээ л байна. Чигон-ы доод түвшний хичээлийг ч хичнээн их сурах тусам, улам ихээр мэдэх тусам чамд улам гай болно, чиний бие аль хэдийн замбараагүй байдалд орсон.

Би нэг асуудлыг онцлон хэлмээр байна, манай бясалгалд гон зааж Ном ярина. Зарим сүм хийд дэх лам хувраг нар, ялангуяа Даяан шашинд (Зэн буддизм) магадгүй өөр санаа бодолтой байх. Ном ярмагц тэд сонсох дургүй болдог. Яагаад вэ? Даяан шашинд ингэж үздэг: Номыг ярьж болохгүй, Ном ярьчихвал энэ нь ном биш болно, ярих ном байхгүй, зөвхөн оюун санаагаараа олж мэдэх ёстой гэдэг. Иймээс Даяан шашинд өнөөдрийг хүртэл ямар ч ном ярьж чадахгүй. Даяаны Бодьдарма, Шагжамүнигийн⁵ ярьсан нэгэн үгээр энэ зүйлийг үндэслэн заан тараасан. Шагжамүни тогтсон Ном байдаггүй гэж ярьсан. Тэр Шагжамүнигийн ярьсан энэ үгэнд үндэслэн Даяаны шашныг үүсгэсэн. Бид бол энэ бясалгалын үүд мухардалд орсон гэж хэлнэ. Яагаад мухардалд орсон бэ? Анх Бодьдарма энэ үүдээр ороход түүнд өргөн юм шиг санагдсан, хоёр дахь хамба ороход тийм өргөн санагдаагүй, гурав дахь хамба дөнгөж багтаж орсон, дөрөв дэх хамбад аль хэдийн их нарийн болсон байсан, тав дахь хамбад бараг орох нөхцөлгүй болсон, зургаа дахь хамба Хүйнэн нь мухарын эцэст хүрч цааш явах аргагүй болсон. Өнөөдөр ч Даяаны ном очиж сурвал чи битгий юм асуу, ямар нэг юм асуувал тэр эргээд чиний толгойн дээр саваагаар цохино, “савааны хашираа” гэнэ. Үүний утга нь чамайг битгий асуу, өөрөө ухамсарла гэсэн үг. Чи ингэж хэлнэ: Би юу ч мэдэхгүй, энд сурах гэж ирсэн, юуг нь ухамсарлах юм? Яагаад чи намайг цохиж байгаа юм?! Энэ бол мухарт тулсан гэсэн үг, цааш ярих юмгүй болсон. Бодьдарма хэлэхдээ:

⁵ Шагжамүни-түүхэн дэх Будда, Сиддарта Гаутама гэж бас нэрлэгддэг.

Зөвхөн зургаа дахь хамба хүртэл уламжлагдаад дараа нь болохгүй болно гэсэн. Хэдэн зуун жил өнгөрлөө, гэхдээ одоо хүртэл зарим хүмүүс Даяаны номлолыг бодол санаанаасаа тавьдаггүй. Шагжамүнигийн “Тогтсон ном байхгүй” гэсний жинхэнэ утга нь юу вэ? Шагжамүнигийн байсан түвшин нь Рулай⁶ юм, түүнээс хойш олон лам хувраг Шагжамүнигийн хүрсэн түвшинд, түүний оюун санааны цар хэмжээнд хүрч чадаагүй, түүний ярьсан номын жинхэнэ агуулгыг, хэлсэн үгийн үнэн утгыг тэд ойлгоогүй. Тиймээс дараа нь хүмүүс үүнийг ингэж ч нэг тайлбарлаж, тэгж ч нэг тайлбарлан маш замбараагүй болгосон. Тэд “Тогтсон ном байхгүй” гэж хэлснийг битгий ярь, ярьчихвал ном биш болчихно гэж ойлгосон. Үнэндээ ийм утгатай биш. Шагжамүни бодь модны доор гон нь нээгдэж гэгээрсэний дараа, шууд Рулай түвшинд хүрээгүй. Тэр 49 жилийн турш номоо заан тараах явцад өөрийгөө үргэлж дээшлүүлж байсан. Тэр түвшин дээшлэх тутамд, эргээд харахад өөрийнх нь дөнгөж ярьсан ном буруу байсан. Дахин дээшилсний дараа түүний ярьсан ном нь бас л буруутсаныг олж мэдсэн. Тэр дахин дээш ахихад энэ байдал давтагдсаар байсан. Бүх л 49 жилийн турш тэр ингэж тасралтгүйгээр дээшилж байсан. Түвшин нь дээшлэх болгонд өөрийнхээ урьд ярьж байсан номыг танин мэдэхүйн хувьд маш доогуур түвшинд байсныг олж харсан. Мөн түвшин болгоны ном нь, тэр түвшинд л илрэх хэлбэр гэдгийг тэр олж мэдсэн, мөн түвшин болгонд өөрийн гэсэн Ном байдаг, гэвч тэдгээрийн аль нь ч орчлон ертөнцийн туйлын үнэн биш. Дээд түвшний Ном доод түвшний Номтой харьцуулахад орчлон ертөнцийн мөн чанарт илүү ойр, тиймээс тэр тогтсон ном байхгүй гэж хэлсэн.

⁶ Рулай- Буддын системд гэгээрлийн хутаг олсон, Бодьсадва болон Архадаас дээш түвшинд хүрсэн гэгээрэгч

Эцэст нь Шагжамүни бас ингэж ярьсан: Би энэ насандаа ямар ч ном яриагүй. Даяаны шашинд үүнийг бас л ярих ном байхгүй гэж ойлгосон. Шагжамүни амьдралынхаа өтөл насанд Рулай түвшинд хүрсэн байсан. Тэр яагаад ямар ч ном яриагүй гэсэн бэ? Тэр чухамдаа ямар асуудлыг үүгээр илэрхийлсэн бэ? Түүний хэлсэн үгийн утга нь: Би энэ Рулай түвшинд хүрчихээд орчлон ертөнцийн хамгийн эцсийн ёс, хамгийн эцсийн Ном юу болохыг харж чадаагүй. Иймээс тэр хойч үеийнхэндээ өөрийнх нь ярьсан үгийг туйлын үнэн, өөрчлөгдөшгүй үнэн гэж бүү бодоосой гэсэн, эс бөгөөс хойч үеийнхнийгээ Рулай түвшинд эсвэл Рулайгаас доош түвшинд хязгаарлалчихна, мөн тэд бүр дээд түвшинд нэвтэрч чадахгүй болчихно. Хожим хойч үеийнхэн нь энэ үгийн жинхэнэ утгыг ойлгож чадаагүй, хэрэв номыг ярьчихвал энэ нь ном биш болно гэж ойлгосон. Үнэндээ Шагжамүнигийн ярьсан нь бол: Өөр өөр түвшинд өөр өөрийн гэсэн ном байдаг, түвшин болгоны ном нь орчлон ертөнцийн туйлын үнэн биш, гэхдээ тухайн түвшний ном тэр түвшиндээ удирдах нөлөөтэй байдаг. Тэр үнэндээ энэ зарчмыг л хэлсэн юм.

Урьд өмнө маш олон хүн, ялангуяа Даяаны шашинд үргэлж ийм нэгэн буруу үзэл, хэтэрхий туйлширсан ташаа ойлголттой байсан. Чи заалгахгүйгээр бас удирдуулахгүйгээр яаж өөрөө бясалгах юм? Буддын шашинд маш олон Буддын домог түүх байдаг. Магадгүй зарим хүн тэнгэрийн оронд очсон хүний тухай уншсан байх, тэнгэрийн оронд очоод тэнгэрийн “Алмаазан судар”-ын үг болгон нь эндхийн “Алмаазан судар”-аас өөр, бас утга нь ч мөн адилгүй байсан. Яагаад энэ “Алмаазан судар” энгийн хүнийхээс өөр байсан бэ? Зарим хүн ингэж ярьдаг: Диваажингийн судар нь доод газрынхтай юугаараа ч адилгүй, үндсэндээ ижил зүйл биш болсон. Зөвхөн үг нь адилгүй төдийгүй бас утга санаа, агуулга нь бүгд өөр болсон, өөрчлөлт гарсан. Үнэндээ бол адилхан нэг ном өөр

өөр түвшинд өөр өөрөөр хувирах болон илрэх хэлбэртэй бөгөөд бясалгагчийг мөн өөр өөр түвшинд өөр өөрөөр удирдах нөлөөтэй байдаг.

Та бүгд мэднэ, Буддын шашинд “Баруун ариун орны диваажинд аялсан тэмдэглэл” гэдэг товхимол байдаг. Түүнд нэгэн хувраг бясалган суухад сүнс нь Баруун ариун орны диваажинд очиж байдлыг нь харсан. Тэр тэнд нэг өдөр болоод буцаж ирэхэд хүн төрөлхтөнд аль хэдийн зургаан жил өнгөрсөн байсан. Тэр харж чадсан уу? Харсан, гэхдээ түүний харсан зүйл нь жинхэнэ үнэн байдал биш байсан. Яагаад вэ? Түүний түвшин хангалттай өндөрт хүрээгүй учраас тэр харсан байдал нь зөвхөн түүний байгаа түвшинд харуулах ёстой Буддын номын илрэл байсан. Учир нь тийм нэг тэнгэрийн орон бол номын бүтцийн илрэл юм, иймээс тэр үнэн байдлыг харж чадаагүй. Миний ярьж байгаа энэ “Тогтсон ном байдаггүй” гэдгийн учир нь ийм л юм.

Үнэн, Нинжин, Тэвчээр бол сайн, муу хүнийг цэгнэдэг цорын ганц шалгуур

Буддын шашинд хүмүүс Буддын ном гэж юу болохыг үргэлж судалсаар ирсэн. Зарим хүн Буддын шашинд ярьсан номыг Буддын ном бүхлээрээ гэж үздэг, үнэндээ тийм биш. Шагжамүнигийн 2500 жилийн өмнө ярьсан ном нь зөвхөн маш доод түвшинд байсан энгийн хүмүүст буюу дөнгөж хүй нэгдлээс гарсан маш энгийн үзэл бодолтой хүмүүст ярьсан ном юм. Тэр номын төгсгөлийн үеийг ярьсан, энэ бол өнөөдөр юм. Орчин үеийн хүмүүс тэр номоор аль хэдийн бясалгаж чадахгүй болсон. Номын төгсгөлийн үед хүрээ хийдэд байгаа лам хуврагууд хүнд аврал үзүүлэх нь байтугай өөрсдийгөө аврахад ч хэцүү болсон. Шагжамүнигийн тэр үед заасан ном нь тухайн үеийнхээ нөхцөл байдалд тааруулж заасан ном юм. Мөн тэр

өөрийнхөө байгаа түвшинд мэддэг Буддын номыг бүгдийг нь яриагүй, үүнийг бас өөрчлөхгүйгээр үүрд хадгалж үлдээх боломжгүй.

Нийгэм хөгжөөд л байна, хүн төрөлхтний үзэл санаа улам нарийн төвөгтэй болж, тэр замаар бясалгахад амаргүй болсон. Буддын шашны ном Буддын номыг бүхэлд нь ерөнхийлж чадахгүй, энэ нь зөвхөн Буддын номын өчүүхэн хэсэг л юм. Буддын системд бас маш олон аугаа номууд хүмүүсийн дунд дамжиж ирсэн, үеэс үед зөвхөн нэг л шавьд заан уламжлагдаж ирсэн. Өөр өөр түвшинд өөр өөрийн ном байдаг, өөр өөр орон зайд бас өөр өөрийн гэсэн ном байдаг. Энэ бүгд бол өөр өөр орон зай, өөр өөр түвшин дэх Буддын номын янз бүрийн илрэл юм. Шагжамүни Буддын бясалгалд 84 мянган номын үүд байдаг тухай ярьсан, харин Буддын шашинд Даяаны шашин, Ариун орон, Тианьтай, Хуэянь, Тантрын шашин гэх мэт зөвхөн арав гаруй номын үүд л байдаг, эдгээр нь Буддын номыг бүхэлд нь төлөөлж чадахгүй. Шагжамүни өөрийнхөө номыг бүгдийг нь заан тараагаагүй, зөвхөн тэр үеийн хүмүүсийн хүлээн авах чадварт таарсан хэсгийг л заасан юм.

Тэгвэл Буддын ном гэж юу вэ? Энэ орчлон ертөнцийн хамгийн үндсэн мөн чанар болох Үнэн, Нинжин, Тэвчээр бол Буддын номын хамгийн дээд илрэл, жинхэнэ үндсэн Буддын ном юм. Буддын ном өөр өөр түвшинд өөр өөрийн илрэх хэлбэртэй, өөр өөр түвшинд өөр өөрийн удирдах нөлөөтэй байдаг. Түвшин нь улам доогуур байх тусам улам их төвөгтэй хэлбэрээр илэрдэг. Агаар, чулуу, мод, шороо, төмөр ба ган, хүний бие болон бүх бие бодид Үнэн, Нинжин, Тэвчээр гэсэн мөн чанар оршдог. Эрт дээр үед таван мах бодийг орчлон ертөнцийн бүх зүйлсийг бий болгосон гэж ярьдаг байсан, мөн энэ бүгд бас Үнэн, Нинжин, Тэвчээр гэсэн мөн чанартай. Бясалгадаг хүн аль нэг түвшинд бясалгаад хүрвэл, зөвхөн тэр түвшин дэх

Буддын номын бодит илрэлийг ойлгодог, энэ нь түүний бясалгасан бүтээлийн орон⁷, бясалгасан түвшин нь юм. Дэлгэрэнгүй хэлбэл, Ном бол маш их аугаа. Маш дээд түвшинд авч үзвэл тэр нь их хялбархан, яагаад гэвэл Ном пирамид хэлбэртэй адил байдаг. Хамгийн дээд цэгт энэ нь зөвхөн гурван үгэнд хураангуйлагддаг: Үнэн, Нинжин, Тэвчээр. Энэ нь өөр түвшингүүдэд илрэхдээ туйлын нарийн төвөгтэй болдог. Хүнээр ярьвал, Дао-гийн номонд хүний биеийг жижиг орчлон ертөнц гэж үздэг. Хүн бодит биетэй, гэвч зөвхөн бодит биетэй байх нь бүрэн төгс хүн болчихгүй, заавал хүний зан ааш, төлөв, хувийн шинж чанар, бас сүнстэй байх ёстой, тэгээд бүрэн төгс биеэ даасан өөрийн гэсэн зан чанартай хүн болж бүтдэг. Бидний энэ орчлон ертөнц бас адил, Тэнгэрийн заадас галагтик, бусад галагтикууд, мөн амь ба устай. Орчлон ертөнц дээрх бүх зүйлс бол материйн оршин буй хэлбэр нь юм. Түүнчлэн үүнд бас Үнэн, Нинжин, Тэвчээр гэсэн мөн чанар оршдог. Янз бүрийн бие бодийн бүх бичил хэсгүүд бүгд энэ мөн чанарыг агуулдаг, туйлын жижиг бичил хэсгүүд хүртэл энэ мөн чанарыг агуулдаг.

Үнэн, Нинжин, Тэвчээр энэ мөн чанар бол орчлон ертөнцийн сайн мууг цэгнэдэг шалгуур юм. Юу нь сайн, юу нь муу юм? Үүгээр л цэгнэдэг. Бидний урьд нь ярьж байсан буян бас адил. Мэдээж өнөөдрийн хүн төрөлхтний нийгэм дэх ёс суртахууны шалгуурт аль хэдийн өөрчлөлт гарсан, ёс суртахууны шалгуур нь бүгд гажсан. Одоо зарим хүн Лэй Фэнгээс⁸ суралцвал, магадгүй түүнийг мэдрэлийн өвчтэй гэж хэлнэ. Гэхдээ тавь, жараад оны үед хэн түүнийг мэдрэлийн өвчтэй гэж хэлэх юм? Хүн төрөлхтний ёс суртахууны хэм хэмжээ маш ихээр уруудсан, нийгмийн

⁷ Бүтээлийн орон- Буддын бясалгалын түвшин: Архат, Бодьсадва, Рулай гэх мэт

⁸ Лэй Фэнг- 1960 оны үеийн Хятадын ёс суртахууны үлгэрлэгч хүн

байдал өдөр тутамд доройтож байна. Хүмүүс зөвхөн хувийн ашиг сонирхлын хойноос хөөцөлдөн өөрийн өчүүхэн ашиг хонжооны төлөө бусдыг хохирооно, тэд хоорондоо тэмцэлдэн булаалдахдаа ямар ч муу аргыг хамаагүй хэрэглэнэ. Та бүгд боддоо, ингэж цааш үргэлжлэхийг нь зөвшөөрөх юм уу? Зарим хүнийг муу зүйл хийхэд нь түүнд муу зүйл хийж байна гэж хэлбэл тэр чамд үнэмшихгүй, тэр үнэндээ өөрийгөө муу зүйл хийж байна гэдэгтээ үнэмшихгүй. Зарим хүн уруудсан ёс суртахууны шалгуураар өөрийгөө цэгнэдэг, өөрийгөө бусад хүнээс илүү сайн гэж үздэг, учир нь цэгнэдэг шалгуур нь өөрчлөгдсөн. Хүн төрөлхтний ёс суртахууны шалгуур яаж өөрчлөгдсөн ч энэ орчлон ертөнцийн мөн чанар нь өөрчлөгдөхгүй, энэ бол сайн муу хүнийг цэгнэдэг цорын ганц шалгуур юм. Тэгвэл бясалгаж байгаа хүний хувьд орчлон ертөнцийн энэ мөн чанарын дагуу өөрийгөө шаардах ёстой, энгийн хүний шалгуурын дагуу өөртөө хандаж болохгүй. Хэрэв чи өөрийнхээ үүссэн эх үндсэндээ буцах, үнэнд хүрэх, бясалгаж дээшлэх хүсэлтэй байвал, энэ шалгуурын дагуу өөртөө хандах ёстой. Хувь хүний хувьд хэрэв орчлон ертөнцийн Үнэн, Нинжин, Тэвчээр мөн чанарыг дагаж чадвал тэр бол сайн хүн, энэ мөн чанараас эсрэг болсон хүн бол жинхэнэ муу хүн юм. Магадгүй ажлын газарт, нийгэмд зарим хүн чамайг муу гэж хэлнэ, гэвч үнэндээ чи магадгүй муу биш, зарим хүн чамайг сайн гэж хэлнэ, гэвч үнэндээ чи магадгүй сайн биш. Бясалгагчийн хувьд, энэ мөн чанарт уусвал чи Дао-г олсон хүн, ийм л хялбархан ёс юм.

Бумбын (Дао) системд Үнэн, Нинжин, Тэвчээрийг бясалгахдаа, гол нь Үнэн дээр голчлон бясалгадаг. Тиймээс Дао-д үнэнийг бясалгаад зан чанарыг сайжруулах гэж ярьдаг, үнэн үг ярих, юмыг үнэнчээр хийх, үнэнч хүн болох, өөрийнхөө үүссэн эх үндсэндээ буцах, үнэнд хүрэх, эцэст нь бясалгаад чин үнэнч хүн болдог. Гэхдээ Тэвчээр ч байна, Нинжин ч байна, гол нь Үнэн дээр бясалгадаг. Буддын

системд Үнэн, Нинжин, Тэвчээр-ийн гол нь Нинжинг онцлон бясалгадаг. Учир нь Нинжинг бясалгахад аугаа нигүүлсэнгүй сэтгэл гардаг, нигүүлсэнгүй сэтгэл гарахад бүх амийг гашуун зовлонтой байгааг хардаг, иймээс бүх амийг аврах хүсэл бий болно. Гэхдээ Үнэн ч байна, Тэвчээр ч байна, гол нь Нинжин дээр бясалгадаг. Бидний Фалунь Дафа энэ Номын үүдэнд орчлон ертөнцийн хамгийн дээд шалгуур болох Үнэн, Нинжин, Тэвчээр бүгдийг зэрэг бясалгана. Бидний бясалгал маш аугаа.

Чигон бол өнө эртний соёл

Чигон гэж юу вэ? Их олон чигон багш үүнийг бүгд ярьдаг, миний ярьж байгаа нь тэднийхтэй адилгүй. Олон чигон багш энэ тухай өөрсдийнхөө түвшинд ярьдаг, миний ярьж байгаа нь дээд түвшин дэх чигон-ы ойлголт юм, тэдний ойлгож байгаагаас эрс ондоо. Зарим чигон багш чигон-ыг манай оронд хоёр мянган жилийн түүхтэй гэж ярьдаг, бас зарим хүн гурван мянган жилийн түүхтэй гэдэг. Зарим хүн чигон бол таван мянган жилийн түүхтэй гэдэг, бидний Хятад үндэстний соёлын түүхтэй бараг ойролцоо. Бас зарим хүн үүнийг археологийн олдвороос үүдэн долоон мянган жилийн түүхтэй гэж ярьдаг, энэ нь хятад үндэстний соёлын түүхээс маш хол давсан. Гэвч тэд үүнийг яаж бодсон ч, энэ нь хүн төрөлхтөний соёлын түүхээс тийм их хол хэтрээгүй. Дарвины хувьслын онолоор бол хүн үүсэхдээ анх усны ургамлаас усны амьтан болж, дараа нь газар дээр, улмаар модон дээр гарч амьдрах болсон, дахин газар дээр бууж хүн дүрст сармагчин болсон, эцэст нь соёлтой, ухамсартай орчин үеийн хүн төрөлхтөн үүссэнээр бодоход хүн төрөлхтөний энэ соёл иргэншил эхэлснээс хойш 10 мянган жилээс хэтрээгүй юм. Түүнээс урагш харвал хүмүүс юм зангидан тэмдэглэл хийхийг ч мэдэхгүй, модны навч зүүж, түүхий мах иддэг байсан. Түүнээс ч бүр өмнөхийг харвал

магадгүй галтай яаж харьцахыг ч мэдэхгүй ерөнхийдөө зэрлэг, балар эртний хүмүүс байсан.

Гэвч бид ийм нэг асуудлыг олж мэдсэн, дэлхийн олон газарт маш олон эртний соёлын ул мөр үлдсэн байдаг, эдгээр нь бидний хүн төрөлхтний соёл иргэншлийн түүхээс хол давсан юм. Тэдгээр эртний үлдэцүүд нь гар урлалын талаас харахад маш өндөр түвшнийх байсан. Урлагийн талаас нь харвал тэд маш дэвшингүй түвшинд хүрсэн, орчин үеийн хүмүүс бол эртний хүмүүсийн урлагийг зүгээр л дуурайчихсан, харин тэдний урлаг нь маш өндөр гоо зүйн үнэ цэнэтэй юм. Гэвч тэдгээр нь зуун мянга гаруй жилийн өмнөх, хэдэн зуун мянган жилийн өмнөх, хэдэн сая жилийн өмнөх тэр ч байтугай зуун сая гаруй жилийн өмнөх үлдэц юм. Та бүгд үүнийг боддоо, энэ нь өнөөдрийн түүхээр хошигнож байгаа юм биш үү? Энэ бол наргиа биш, хүн төрөлхтөн өөрсдийгөө үргэлж боловсронгуй болгодог, үргэлж өөрсдийгөө шинээр таньж байдаг, нийгэм ингэж л хөгждөг, анхны танин мэдэхүй нь магадгүй туйлын зөв биш.

Магадгүй олон хүн “Өнө эртний соёл”, өөрөөр хэлбэл “Өнө эртний соёл иргэншил” гэж сонссон байх, бид энэ өнө эртний соёл иргэншлийн талаар ярья. Дэлхий дээр Ази, Европ, Өмнөд Америк, Хойд Америк, далайн орнууд, Африк мөн Антарктид тивүүд байдаг. Геологчид эдгээрийг ерөнхийд нь “Эх газрын хавтгай” гэж нэрлэдэг. Эх газрын хавтгай үүссэнээс өнөөдрийг хүртэл аль хэдийн хэдэн арван сая жилийн түүхтэй болсон. Тухайлбал олон тивүүд далайн ёроолоос гарч ирсэн, мөн олон тивүүд далайн ёроолд живсэн. Өнөөдрийн эх газрын энэ тогтворжсон байдал хүртэл хэдэн арван сая жил өнгөрчээ. Гэвч олон далайн ёроолд өндөр бөгөөд том хэмжээний эртний барилга байгууламж байгааг олж илрүүлсэн, эдгээр барилгууд нь маш гоёмсог урлан бүтээгдсэн ба бидний өнөөгийн хүн төрөлхтний соёлын үлдэц биш юм. Тиймээс тэдгээрийг

далайн ёроолд живэхээс өмнө барьсан нь лавтай. Тэгвэл хэн энэ хэдэн арван сая жилийн өмнөх тэр соёл иргэншлийг бий болгосон бэ? Тэр үед бидний хүн төрөлхтөн сармагчин ч биш байсан, яаж ийм аугаа оюунлаг зүйлсийг бий болгосон байх юм? Археологчид энэ дэлхийд байсан “Турамсан навчит хорхой” гэдэг шавьжийг олж мэдсэн, энэ нь 600 сая жилээс 260 сая жилийн өмнө оршиж байсан юм. 260 сая жилээс хойш энэ организм устсан. Америкийн нэг эрдэмтэн “Турамсан навчит хорхой”-н чулуужсан үлдэц илрүүлсэн, түүн дээр хүний хөлийн мөр зэрэгцэн гарсан байсан, тэр мөр нь гутлын маш тодорхой мөр байсан. Энэ нь түүхчдийг элэглэсэн биш гэж үү? Дарвины хувьслын онолоор 260 сая жилийн өмнө яаж хүн байх юм?

Перу Улсын Их Сургуулийн музейд хүний дүрс сийлэгдсэн чулуу байдаг, судалгаагаар тэр чулуун дээрхи хүний дүрс нь 30 мянган жилийн өмнө сийлэгдсэн болох нь тодорхойлогдсон. Гэвч энэ хүний дүрс нь хувцас өмсчихсөн, малгайтай, гуталтай, мөн гартаа дуран авай бариад оддыг ажиглаж байгаа харагддаг. Гучин мянган жилийн өмнөх хүмүүс яаж даавуу нэхэж хувцас өмсдөг байсан бэ? Бас ухаан санаанд багтамгүй нь, түүний дуран авай бариад оддыг судалж байгаа нь одон орны зохих мэдлэгтэй байсныг харуулж байна. Бид үргэлж Европын Галилеог дуран авайг анх бүтээсэн гэж үздэг, энэ нь одоогоос зөвхөн 300 гаруй жилийн өмнөх үеийн л түүхтэй, тэгвэл 30 мянган жилийн өмнө хэн дуран авайг бүтээсэн бэ? Бас өнөөг хүртэл тайлбарлагдашгүй маш олон нууцууд байдаг. Жишээлбэл: Франц, Өмнөд Африк, Альпын нуруунд байдаг олон агуйн ханан дээр сийлэгдсэн зурагнууд байдаг, тэдгээр нь тов тодоор амьд юм шиг харагддаг. Тэнд сийлэгдсэн хүний дүрснүүд гайхалтай уран хийцтэй, мөн эрдэс бодисын будгаар будагдсан байдаг. Гэвч тэдгээр хүмүүс нь орчин үеийн хүний костюм шиг хувцастай бас бариу өмдтэй, зарим нь тамхины гаанс шиг зүйл барьсан,

зарим нь гоёлын таягтай бас малгай өмссөн байсан. Хэдэн зуун мянган жилийн өмнөх сармагчингууд яаж ийм өндөр соёлын түвшинд хүрсэн байх юм?

Бүр эртний үеийн өөр нэг жишээ дурдъя, Африк тивийн Бүгд Найрамдах Габон Улсад ураны хүдэр байдаг. Энэ орон нь буурай хөгжилтэй ба ураныг өөрөө гаргаж авах чадваргүй, тэд хүдрийг өндөр хөгжилтэй орон луу экспортолдог. 1972 онд Францын нэг үйлдвэр ураны хүдрийг импортолсон. Лабораторын шинжилгээ хийсний дараа тэрхүү ураны хүдэр нь аль хэдийн боловсруулагдаад ашиглагдсан байсныг олж мэдсэн. Энэ нь маш гайхалтай санагдсан, тэгээд эрдэмтдийг судалгаа хийлгүүлэхээр явуулсан. Олон орны эрдэмтэд судалгаа хийхээр очсон. Эцэст нь энэ ураны хүдрийн уурхай нь маш том цөмийн урвалын реактор байсныг баталсан ба үүний байрлалт нь маш их зүй зохистой байсан. Бидний орчин үеийн хүмүүс хүртэл үүнийг бүтээх магадлал байхгүй. Тэгвэл энэ нь хэдийд байгуулагдсан байх уу? Энэ нь 2 тэрбум жилийн өмнө бүтээгдэж 500 мянган жилийн турш ажилласан байсан. Энэ бол ёстой одон орны тоо, Дарвины хувьслын онолоор үүнийг үндсэндээ тайлбарлах аргагүй, иймэрхүү зүйл их олон байдаг. Одоогийн шинжлэх ухаан, технологийн салбарт олж мэдсэн зүйлүүд бидний өнөөдрийн сурах бичгийг өөрчлөхөд хангалттай юм. Хүн төрөлхтний хуучинсаг үзэл нь нэг хэвийн ажиллах, бодох арга барилыг үүсгэснээс энэ нь шинэ санаа, танин мэдэхүйг хүлээж авахад бэрхшээл учруулдаг. Үнэн зөв нь илчлэгдсэн ч, хүмүүс үүнийг хүлээн авч зүрхэлдэггүй, рефлексээр түүнээс татгалздаг. Уламжлагдсан төсөөллийн нөлөөнөөс болж өнөөдөр эдгээр зүйлсийг дэс дараатай системд оруулан цэгцлэх хүн байхгүй байна. Иймээс хүний төсөөлөл нь үргэлж хөгжлөөс хоцорч байдаг. Чамайг эдгээр зүйлсийг ярихад, хэдийгээр тэр нь өргөн дэлгэрээгүй ч гэсэн аль

хэдийн илэрчихсэн байдаг. Зарим хүн үүнийг нөгөө л мухар сүсэг гэж ярьж хүлээн зөвшөөрдөггүй.

Гадаад оронд олон зоригтой эрдэмтэд тэдгээрийг аль хэдийн ил тодоор өнө эртний соёл буюу бидний энэ хүн төрөлхтний өмнөх үеийн соёл иргэншил гэж хүлээн зөвшөөрсөн. Өөрөөр хэлбэл бидний хүн төрөлхтний энэ удаагийн соёл иргэншлээс өмнө бас өөр соёл иргэншлийн үе нэг бус удаа оршиж байсан. Археологийн олдвороос харахад бүгд нэг соёл иргэншлийн үеийнх биш юм. Тиймээс хүн төрөлхтөний соёл иргэншил удаа дараагийн сүйрэлд автах бүрд зөвхөн цөөн тооны хүмүүс амьд гарч балар эртний байдлаар амьдардаг байсан. Дараа нь аажим аажмаар шинэ хүн төрөлхтөн болтлоо өсөн олширч шинэ соёл иргэншил эхэлдэг. Дараа нь дахин сүйрэлд автаж дахин шинэ хүн төрөлхтөн үүсэн бий болдог. Ингэж ийм нэг өөр өөр мөчлөгийн өөрчлөлтүүд давтагддаг. Физикчид бие бодийн хөдөлгөөн нь тодорхой зүй тогтлоор явагддаг гэж ярьдаг, бидний бүхэл орчлон ертөнцийн өөрчлөлт ч бас зүй тогтлоор явагддаг.

Бидний дэлхийн тойрог хөдөлгөөн нь энэ энгүй уудам орчлон ертөнцийн дунд, тэнгэрийн заадас галагтикийн хөдөлгөөн дунд үргэлж саадгүй байх боломжгүй, магадгүй аль нэг гаригтай мөргөлдөнө эсвэл өөр ямар нэг асуудалтай тулгарч маш том гай гамшиг учирна. Бид ер бусын чадвараар харахад бүгд яг тэгж зохицуулагдсан байдаг. Нэг удаа би үүнийг нарийвчлан шинжиж үзэхэд хүн төрөлхтөн 81 удаа бүхэлдээ сүйрч байсныг олж харсан. Зөвхөн цөөн тооны хүмүүс амьд гарч өмнөх соёл иргэншлээс үлдсэн багахан хэмжээний зүйлсийг авч үлдэн дараагийн үед шилжин орж балар эртний байдлаар амьдардаг. Хүн төрөлхтөн хангалттай өсч үржихэд улмаар соёл иргэншил дахин бий болдог. Ингэж 81 удаа ийм мөчлөгийн өөрчлөлт давтагдсан бөгөөд би үүнийг төгсгөлд нь хүртэл шалгаагүй.

Хятад хүмүүс тэнгэрийн цаг хугацаа, газрын ээлтэй нөхцөл, хүний эв нэгдлийг ярьдаг. Тэнгэрийн янз бүрийн өөрчлөлт, тэнгэрийн өөр өөр цаг хугацаа нь энгийн хүний нийгэмд нийгмийн өөр өөр байдлыг авчирдаг. Физикээр яривал, бие бодийн хөдөлгөөн тодорхой зүй тогтлын дагуу явагддаг, орчлон ертөнцийн хөдөлгөөн ч мөн адил.

Саяны та бүгдэд ярьсан өнө эртний соёл нь чигон-ыг бидний өнөөгийн хүн төрөлхтөн бий болгоогүй гэдгийг харуулж байна. Энэ нь маш өнө эртний үеэс уламжлагдан ирсэн бөгөөд бас нэг янзын өнө эртний соёл юм. Бид шашны судраас үүнтэй холбоотой зарим дүгнэлтийг бас олж болно. Шагжамүни тэр үед ингэж ярьсан, тэр олон зуун сая галавын өмнө бясалгаад гэгээрэлд хүрсэн гэсэн. Нэг галавт хэдэн жил байдаг вэ? Нэг галавт олон зуун сая жил байдаг, ийм аугаа тоог төсөөлөхийн ч аргагүй. Хэрэв үнэн байвал, энэ нь хүн төрөлхтний түүхтэй, бүх л дэлхийн өөрчлөлтүүдтэй таарч байгаа хэрэг биш үү? Мөн Шагжамүни өөрөөс нь өмнө бас өнө эртний үеийн зургаан Будда байсан гэж ярьсан, түүнд бас багш байсан гэх мэт, бүгд олон зуун сая галавын өмнө бясалгаж гэгээрэлд хүрсэн. Хэрэв эдгээр зүйлс бүгд үнэн бол, бидний өнөөгийн нийгэмд тарсан тэдгээр уламжлалт, жинхэнэ ариун бясалгалын дунд ийм бясалгах арга байгаа юу? Би үүнийг мэдээж байгаа гэж хариулна, гэхдээ тэд ховор байдаг. Одоо үед хуурамч чигон, зохиомол чигон, мөн сүнс шүглэсэн хүмүүс зарим зүйлийг дураараа зохион гаргаж хүнийг хууран мэхэлдэг, тэдний тоо жинхэнэ чигон-оос олон дахин их байдаг. Аль нь үнэн, аль нь хуурамч гэдгийг ялгахад хэцүү. Жинхэнэ чигон-ыг ялгахад хэцүү, бас тийм амар олдохгүй.

Үнэндээ зөвхөн чигон нь эрт үеэс үлдсэн ганц зүйл биш, Тайжи⁹, Хэту, Луошу¹⁰, Жоуи¹¹, Найман төлөг гэх мэт, бүгд өнө эртний үеэс уламжлагдаж үлдсэн юм. Иймээс бид өнөөдөр энгийн хүний байр суурьнаас тэдгээрийг судалж танин мэдье гэвэл яаж судалсан ч ойлгохгүй. Энгийн хүний түвшин, байр суурь, үзэл бодлын хүрээнд байгаа хүн жинхэнэ зүйлийг ойлгож чадахгүй.

Чигон бол бясалгал

Нэгэнт чигон өнө удаан жилийн түүхтэй юм бол, энэ нь чухам юунд зориулагдсан юм бэ? Би та нарт хэлье, бидний Дафа бол Буддын системийн бясалгалын ном болохоор мэдээж Будда-г бясалгана, Дао системд мэдээж Дао-г бясалгаад Дао-д хүрнэ. Би та бүхэнд хэлье, “Будда” бол мухар сүсэг биш юм. “Будда” бол самгарьд үг юм, энэ нь эртний Энэтхэг хэл. Хятадад нэвтрэх үед энэ үг хоёр ханзаас бүтсэн байсан, “Фо-Туо” гэж уншигдана, бас зарим нь үүнийг “Фу-Ту” гэж орчуулсан. Үг ам дамжин тархсаар хятад хүн нэг ханзыг нь орхиж зөвхөн “Фо” гэж хэлдэг болсон. Хятадаар энэ нь юу гэсэн утгатай вэ? Энэ нь гэгээрсэн хүн гэсэн үг, бясалгалаар гэгээрсэн хүн юм. Энэ нь яаж мухар сүсэг байх юм?

Та бүгд боддоо, бясалгалын замаар ер бусын чадвар гардаг. Өнөөдөр дэлхий дээр 6 төрлийн ер бусын чадвар нийтэд хүлээн зөвшөөрөгдсөн, гэлээ ч үүгээр

⁹ Тайжи- Дао-гийн билэг тэмдэг, арга билигийн тэмдэг

¹⁰ Хэту, Луошу- Байгаль, хүн ба ертөнцийн хувьслын талаархи Хятадын өнө эртний үеийн уламжлалт нууц дүрс зураг

¹¹ Жоуи-Хятадын эртний Жоу хаант гүрний төлөг үзэх ном (м.э.ө 1100-221 он)

хязгаарлагдахгүй. Би жинхэнэ ер бусын чадварыг арван мянгаас дээш байдаг гэж хэлнэ. Хүн энд суугаад, гар хөлөө хөдөлгөхгүйгээр бусад хүмүүсийн гар хөлөөрөө ч хийж чадахгүй зүйлийг хийж чаддаг, тэр бас орчлон ертөнцийн орон зай болгоны жинхэнэ ёс зарчмыг харж чаддаг, орчлон ертөнцийн үнэн байдлыг болон энгийн хүний харж чадахгүй зүйлийг хардаг. Энэ нь бясалгаад Дао-д хүрсэн биш гэж үү? Бас аугаа гэгээрэгч биш гэж үү? Энгийн хүнтэй адилтгаж болох юм уу? Бясалгаад гэгээрсэн хүн биш гэж үү? Гэгээрэгч гэж дуудаж болохгүй гэж үү? Эртний Энэтхэг хэлээр бол Будда. Үнэндээ ийм л юм, чигон бол үүнд л зориулагдсан юм.

Чигон-ы талаар ярихад зарим хүн өвчин байхгүй бол хэн чигон-оор хичээллэх юм? гэнэ. Чигон-ыг өвчин эдгээх зорилготой гэж үздэг, энэ бол маш өнгөцхөн ойлголт юм. Энэ нь та нарын буруу биш, яагаад гэвэл маш олон чигон багш өвчнийг арилгах, бие эрүүлжүүлэхийг л заадаг, бүгд өвчин эдгээх бие сайжруулахыг л ярьдаг. Хэн ч дээд түвшний зүйл заагаагүй. Энэ нь тэдний дасгалын аргыг муу гэсэн үг биш тэдний үүрэг бол өвчнийг арилгах, биеийг эрүүлжүүлэх түвшний зүйлийг зааж чигон-ыг дэлгэрүүлэх явдал юм. Маш олон хүн дээд түвшин лүү бясалгах хүсэлтэй байдаг. Тэд ийм бодолтой, ийм хүсэлтэй байвч бясалгалын зөв арга замыг олоогүй, эцэст нь маш их хүндрэлтэй тулгарч бас олон асуудал гардаг. Мэдээж бясалгалыг жинхэнэ дээд түвшинд заан тараахад маш том асуудал холбогддог, иймээс бид нийгэмд болон хүмүүст хариуцлагатай хандаж ирсэн бөгөөд бясалгалыг заан тараах бүхий л явцад гарсан үр дүн маань сайн байгаа. Зарим зүйлс үнэндээ маш гүн гүнзгий, ярихад мухар сүсэг мэт санагдаж магад, тийм ч гэсэн бид үүнийг аль болохуйц орчин үеийн шинжлэх ухаанаар тайлбарлая.

Бид зарим зүйлийг ярихад, зарим хүн мухар сүсэг гэж хэлдэг. Яагаад вэ? Ийм хүний баримталдаг чиг шугам бол шинжлэх ухаанд танин мэдэгдээгүй, өөрт нь хараахан тохиолдоогүй, эсвэл байж болшгүй гэж бодсон бүх зүйлсийг мухар сүсэг буюу хийсвэр зүйл гэж үздэг, энэ бол түүний сэтгэлгээ. Ийм сэтгэлгээ зөв үү? Шинжлэх ухаанд танин мэдэгдээгүй буюу энэ хөгжлийн хэмжээнээс давсан зүйлийг мухар сүсэг бишрэл, хийсвэр зүйл гэж үзэж болох юм уу? Тэр өөрөө мухар сүсэг бишрэлд автсан биш гэж үү? Хийсвэр үзэлтэн биш гэж үү? Энэ төсөөллөөр шинжлэх ухаан яаж хөгжиж, яаж дэвших юм? Хүн төрөлхтөний нийгэм ч бас урагшаа хөгжиж чадахгүй болчихно. Бидний шинжлэх ухаанд нээсэн бүх зүйлс урьд нь байхгүй байсан зүйлс, бүгдийг нь мухар сүсэг бишрэл гэж үзвэл мэдээж хөгжих хэрэггүй болчихно. Чигон бол ямар ч хийсвэр зүйл биш, маш олон хүн чигон-ыг мэддэггүй, иймээс үргэлж чигон-ыг хийсвэр гэж үздэг. Одоо нарийн тоног төхөөрөмжөөр чигон багш нарын биенд дэд авианы долгион, хэт авианы долгион, цахилгаан соронзон долгион, хэт улаан туяа, хэт ягаан туяа, гамма туяа, нейтрон, атом, металлын микроэлемент мөн бусад элементүүд байдгийг хэмжиж мэдсэн. Эдгээр бүгд бодитоор оршиж байгаа бие бодь биш гэж үү? Эдгээр нь бас бүгд бие бодь. Аливаа зүйл бие бодиос бүтсэн биш гэж үү? Бусад цаг хугацааны орон зай болгон мөн л бие бодиос бүтсэн биш гэж үү? Яаж түүнийг мухар сүсэг бишрэл гэж хэлж болох юм? Нэгэнт чигон нь Буддад бясалгахын тулд юм бол, зайлшгүй маш олон гүн гүнзгий асуудалтай уялддаг, бид бүгдийг нь ярих болно.

Чигон үүнд зориулагдсан юм бол, бид яагаад чигон гэж нэрлэсэн бэ? Үүнийг үнэндээ чигон гэж нэрлэдэггүй, тэгвэл юу гэж нэрлэх үү? “Бясалгал” гэдэг, бясалгал л юм. Мэдээж, энэ нь өөр тодорхой нэртэй, ерөнхийд нь бясалгал л гэдэг. Тэгвэл яагаад чигон гэж нэрлэсэн бэ? Та бүгд мэднэ, чигон

нийгэмд дэлгэрээд 20 гаруй жилийн түүхтэй болсон, “Соёлын их хувьсгал”-ын дунд үед дэлгэрч эхэлсэн, төгсгөл үед нь оргилдоо хүрсэн. Та бүгд боддоо, тэр үед хэт зүүний үзэл суртал ид хүчтэй байсан. Бид чигон-ы өнө эртний соёлын үеийн нэрийг дурьдахгүй, энэ удаагийн хүн төрөлхтөний соёл иргэншил хөгжлийнхөө явцад феодалын үеийг дамжсан. Тиймээс энэ нь гол төлөв феодалын өнгө аястай нэршилтэй болсон. Шашинтай холбоотой байсан бясалгалууд үргэлж шашны өнгө аястай нэртэй байдаг. Жишээлбэл: “Дао-гийн бясалгалын аугаа ном”, “Очир номлол”, “Архадын¹² ном”, “Буддын бясалгалын аугаа ном”, “Есөн удаа эргэх алтан үрлийн увьдас” гэх мэт нэртэй байсан. Хэрэв “Соёлын их хувьсгал”-ын үеэр энэ нэрсийг хэрэглэсэн бол чам руу дайрч давшлахгүй байсан гэж үү? Чигон багш нарын чигон-ыг заан тараах гэсэн хүсэл нь ариун, мөн ард иргэдийн өвчнийг арилгах, биеийг нь эрүүлжүүлэх, биеийн байдлыг нь засахад туслахыг зорьсон, энэ ямар сайн хэрэг вэ, гэвч болохгүй, хүмүүс ингэж нэрлэж зүрхэлдэггүй байсан. Тиймээс чигон-ы олон багш нар чигон-ыг заан тараахын тулд “Үрлийн ном”, “Дао-гийн жаяг”¹³ гэсэн номнуудаас хоёр ханзыг нь авч чигон гэж нэрлэсэн. Зарим хүн чигон гэдэг нэр томъёог бас судалдаг, гэвч үүнийг судлах ямар ч зүйл байхгүй. Хуучин үүнийг зүгээр л бясалгал гэж нэрлэдэг байсан. Чигон бол зөвхөн орчин үеийн хүмүүсийн үзэл санаанд нийцүүлэн гаргасан шинэ нэр томъёо л юм.

¹² Архад- Буддын системд бясалгаад Гурамсан Ертөнцөөс гарсан гэгээрлийн хутагт хүрсэн гэгээрэгч

¹³ Үрлийн ном, Бумбын жаяг- Эртний Хятадын бясалгах аргын ном

Бясалгаад яагаад гон өсдөггүй вэ?

Бясалгахад яагаад гон өсдөггүй вэ? Маш олон хүн ийм бодолтой байдаг: Би жинхэнэ чигон бясалгалыг уламжилж аваагүй, хэрэв аль нэгэн багш надад хосгүй арга барилыг заавал эсвэл тусгай хөдөлгөөнийг заавал миний гон өснө. Одоо хүмүүсийн 95% нь ийм бодолтой, энэ нь надад их инээдтэй санагддаг. Яагаад инээдтэй гэж? Яагаад гэвэл чигон бол энгийн хүний арга барил биш. Энэ нь бүхэлдээ ер бусын зүйл юм. Тиймээс дээд түвшний зарчмаар үүнийг цэгнэх ёстой. Би та бүгдэд хэлье, гон дээшлэхгүйн үндсэн шалтгаан нь гэвэл: Хүмүүс “бясалгах, дасгал хийх” гэсэн хоёр үгний зөвхөн дасгал хийхэд гол анхаарлаа хандуулаад бясалгахыг хайхардаггүй. Хэрэв чи гаднаас нь хүсвэл, яаж хүсээд ч олохгүй. Чи нэг энгийн хүний биетэй, энгийн хүний гар, энгийн хүний бодол санаатай байж дээд энергийн бие бодийг гон болгон хувиргаж бас гон-оо өсгөж чадна гэж үү? Энэ нь яаж тийм амар байх юм! Минийхээр энэ бол инээдтэй. Энэ нь юмыг гаднаас хүсч байгаатай адил, мөн гадна талаас хайж байна, хэзээ ч олохгүй.

Энэ нь бидний энгийн хүний ямар нэгэн мэргэжил шиг биш, мөнгө төлөөд сурчихдаг зүйл биш. Энэ бол ийм учиртай биш, харин энгийн хүний түвшнөөс давсан зүйл, тиймээс чамайг ер бусын зарчмын дагуу явахыг шаардана. Тэгвэл яаж шаардах вэ? Чи өөрийнхээ дотогш бясалгах ёстой, гаднаас хайж болохгүй. Их олон хүн юмыг гаднаас хүсдэг, өнөөдөр энийг хүсдэг, маргааш нөгөөг хүсдэг. Мөн янз бүрийн зорилгынхоо төлөө ер бусын чадвартай болох гэсэн зууралдсан сэтгэлтэй, зарим хүн бүүр чигон багш болоод өвчин эдгээж их мөнгө олохыг боддог. Жинхэнэ бясалгахад өөрийнхөө сэтгэлийг бясалгах ёстой, мөн үүнийг зан чанарын бясалгал гэдэг. Жишээлбэл, бид хүн хүний хоорондох зөрчлийн дунд өөрийнхөө янз бүрийн хүсэл сэтгэлээ даруу барьж байх ёстой. Хувийн ашгийн төлөө

булаацалдаж тэмцэлдээд чи гон-оо дээшлүүлнэ гэж үү? Тийм амар биш! Чи энгийн хүнтэй адил болсон биш гэж үү? Чи яаж гон-оо өсгөх юм? Тиймээс чи зан чанараа чухалчлан бясалгавал чиний гон өснө, мөн түвшин чинь дээшилнэ.

Зан чанар гэж юу вэ? Үүнд буян (нэг төрлийн бие бодь), тэвчээр, ухамсар, орхих- энгийн хүний янз бүрийн хүсэл, зууралдсан сэтгэлээс салах, зовлон бэрхшээлийг даах чадвар гэх мэт олон талын зүйл багтдаг. Хүний зан чанарын бүх талыг бүгдийг нь дээшлүүлэх ёстой, ингэвэл чи жинхэнэ дээшилнэ. Энэ нь гон хүчийг дээшлүүлэх гол учрын нэг юм.

Зарим хүн ингэж боддог, чиний ярьж байгаа зан чанар бол үзэл суртлын асуудал, хүний үзэл санааны зүйл, бидний бясалгаж байгаа гон-той холбогдолгүй. Яагаад холбоогүй гэж? Философийн түүхийн туршид бие бодь анхдагч уу эсвэл оюун санаа анхдагч уу гэсэн асуудал дээр үргэлж шүүн хэлэлцсээр, маргалдсаар ирсэн. Үнэндээ би та бүхэнд хэлье, бие бодь ба оюун санаа нь адилхан. Хүний бие судлалын шинжлэх ухаанд одоогийн эрдэмтэд хүний тархинаас гардаг бодол нь бодит зүйл гэж үздэг. Хэрэв тэр нь материаллаг орших зүйл юм бол, тэр бас хүний оюун ухааны зүйл биш гэж үү? Тэдгээр нь адилхан чанартай биш гэж үү? Миний ярьж байгаа орчлон ертөнц шиг, энэ нь бодитоор оршихоос гадна түүнд бас мөн чанар оршдог. Энгийн хүн Үнэн, Нинжин, Тэвчээр гэсэн орчлон ертөнцийн мөн чанар оршиж байгааг мэдэрдэггүй, яагаад гэвэл энгийн хүмүүс бүгд нэг давхаргад байдаг. Чи энгийн хүний энэ давхаргаас гарчихвал үүнийг мэдэрнэ. Яаж мэдрэх вэ? Орчлон ертөнцийн аливаа бие бодь, ертөнц даяар тархсан бүх бие бодь нь бүгд амьтай, бодол санаатай ба энэ бүгд бол орчлон ертөнцийн Номын өөр өөр түвшинд орших хэлбэр юм. Тэд чамайг дээш гаргахгүй, чи дээшлэх хүсэлтэй байсан ч дээшилж чадахгүй, тэд чамайг яасан ч

дээшлүүлэхгүй. Яагаад чамайг дээшлүүлэхгүй вэ? Яагаад гэвэл чиний зан чанар дээшлээгүй. Түвшин бүр өөр өөрийн гэсэн шалгууртай. Хэрэв чи түвшнөө дээшлүүлэхийг хүсч байвал заавал өөрийн муу үзэл бодол, мөн ариун бус зүйлээсээ салах ёстой, тэр түвшин дэх шалгуурын шаардлагад нийцэхэд чи дээшилнэ.

Чи өөрийнхөө зан чанарыг дээшлүүлэх тусам чиний биед том өөрчлөлт гарна. Зан чанар чинь дээшилхэд чиний бие дэх бие бодид өөрчлөлт гарах нь дамжиггүй. Ямар өөрчлөлт гарах вэ? Чи хөөцөлдөж зууралддаг тэдгээр муу зүйлээ хаяна. Жишээлбэл, нэг лонхыг муу бохир зүйлээр дүүргэж таглаад ус руу шидэхэд энэ нь усны ёроол руу живнэ. Чи дотор нь байгаа муу бохир зүйлээс заримыг нь гарга, лонхыг улам хоослох тусам тэр усанд улам дээш хөвнө. Бүр мөсөн хоосолчихвол тэр бүүр дээш хөвөөд гараад ирнэ. Бидний бясалгалын явцад хүний биед оршиж байгаа янз бүрийн муу зүйлийг хаях юм бол чи дээшилнэ. Энэ орчлон ертөнцийн мөн чанар нь яг ийм нөлөөтэй байдаг. Чи өөрийнхөө зан чанарыг бясалгахгүй, ёс суртахуунаа дээшлүүлэхгүй, муу бодол муу зүйлсийг орхихгүй бол тэр чамайг дээшлүүлэхгүй. Чи хэлдээ, эдгээр нь яагаад адил чанартай биш гэж? Би наргиан болгож нэг зүйл хэлье, хэрэв энгийн хүний янз бүрийн хүсэл сэтгэлтэй нэг хүнийг дээшлүүлээд Будда болгоё, та бүгд боддоо ийм байж болох уу? Тэр магадгүй аугаа Бодьсадваг ямар үзэсгэлэнтэйг нь харчихаад түүнд ёс журамгүй бодол төрчихнө. Атаархах сэтгэлээ орхиогүйгээс Буддатай зөрчил үүсгэнэ. Ийм зүйл байхыг зөвшөөрөх юм уу? Тэгвэл яах вэ? Чи заавал энгийн хүмүүсийн дунд янз бүрийн муу бодол санаагаа бүгдийг нь орхи, тэгвэл чи дээшилж чадна.

Өөрөөр яривал чи зан чанарыг чухалчилж бясалгах ёстой, орчлон ертөнцийн Үнэн, Нинжин, Тэвчээр гэсэн мөн чанарын дагуу бясалга, энгийн хүний хүсэл, муу санаа, муу

зүйл хийх бодлоо орхи. Чиний үзэл санааны байдал жоохон дээшлэх тутамд зарим муу зүйлс чиний биенээс хаягдана. Түүнчлэн чи бага зэрэг зовлон амсч, гай зовлон туулж, өөрийн нүглийг жоохон ч гэсэн багасга. Тэгвэл чи бага зэрэг дээшилнэ, өөрөөр хэлбэл орчлон ертөнцийн мөн чанар чамайг барих нь тийм их биш болно. Бясалгал өөрөөс шалтгаална, гон багшаас шалтгаална. Багш нь чамд гон өсгөх нэг гон механизм өгнө, энэ гон үйлчилнэ, чиний биеийн гадна орших буяны бие бодийг гон болгон хувиргана. Чи тасралтгүйгээр дээшилж, тасралтгүйгээр дээш бясалгахад чиний гон багана бас үргэлж дээш өснө. Бясалгадаг хүний хувьд, энгийн хүмүүсийн орчинд өөрийгөө бясалгах мөн хатуужуулах ёстой, мөн аажмаар зууралдсан сэтгэл, янз бүрийн хүслийг орхих ёстой. Бидний хүн төрөлхтний сайн гэж үздэг зүйлийг дээд түвшнөөс харахад ер нь муу байдаг. Иймээс хүмүүсийн сайн гэж үздэг энгийн хүмүүсийн дунд улам их ашиг олж улам сайн амьдрах тусам тэр хүн аугаа гэгээрэгчийн харснаар улам муу хүн болно. Юу нь муу гэж? Тэр улам ихийг олоход, бусдыг улам хохирооно, өөрт хүртэх ёсгүй зүйлийг авна. Тэр өөрийн нэр ашгийн төлөөх сэтгэлд автсан, тэгснээр буянаа алддаг. Чи гон-оо өсгөхийг хүссэн ч зан чанараа чухалчилж бясалгахгүй бол чиний гон үндсэндээ өсөхгүй.

Бясалгалын хүрээнд хүний сүнс үхдэггүй гэж ярьдаг. Урьд хүний сүнсийг ярихад хүмүүс магадгүй мухар сүсэг гэж хэлдэг байсан. Та бүгд мэднэ, физикийн судлалаар хүний биед молекул, протон, электрон, мөн цааш судлахад кварк, нейтрино гэх мэт байдгийг олж илрүүлсэн. Энд хүрсний дараа микроскопоор цааш харагдахгүй болчихдог. Гэвч энэ нь амины эх үүсвэр, бие бодийн эх сурвалжаас маш хол юм. Та бүгд мэднэ, атомын цөм задрахад маш их хэмжээний энергийн мөргөлдөөн ба маш их хэмжээний халалт байх шаардлагатай. Хүн үхэхэд бие доторхи атомын цөм яаж амархан устгах юм? Тиймээс бид ингэж олж мэдсэн,

хүн үхэхэд зөвхөн бидний энэ давхаргын орон зайн, энэ давхаргын хамгийн том молекулаас бүрдсэн хэсгүүд салж унадаг, харин өөр орон зайд байгаа түүний биеүд нь устаагүй үлддэг. Та бүгд боддоо, микроскопоор хүний биеийг харахад ямар байдаг вэ? Хүний бүхэл бие хөдөлж байдаг, чи тэнд суугаад хөдлөхгүй байсан ч бүх бие чинь хөдөлгөөнд байдаг. Эсүүд болон молекулууд хөдөлж байдаг, бүхэл бие элсээр хийгдсэн юм шиг сул байдаг. Микроскопоор хүний биеийг харахад ийм л байдаг, бидний нүдээр хардагаас тэс өөр. Учир нь хүний хоёр нүд чамд хуурамч ойлголтыг өгдөг, чамд эдгээр зүйлсийг харуулдаггүй. Тэнгэрийн мэлмий нээгдэхэд юмыг томруулж харж чадна, үнэн хэрэгтээ энэ нь хүний төрөлх чадвар юм, одоо үүнийг ер бусын чадвар гэж нэрлэдэг, чи ер бусын чадвараа гаргахыг хүсвэл үүссэн эх үндсэндээ буцах, үнэнд хүрэх, бясалгалаар буцах ёстой.

Бид энэ буяны зүйлсийн талаар ярья. Эдгээр нь хоорондоо ямар холбоотой вэ? Бид үүнийг дэлгэрэнгүй ярья. Хүн маш олон орон зай болгонд нэг нэг биетэй оршдог. Бид одоо хүний биеийг судлахад хамгийн том бүрэлдэхүүн хэсэг нь эс юм. Энэ нь хүний бие мах бодийг бүрдүүлдэг. Хэрэв чи эс болон молекулын хоорондох зайд юмуу эсвэл молекулуудын хооронд орших зайд орж чадвал чи өөр орон зайд орсоныг мэдэрнэ. Тэнд оршиж байгаа бие ямар хэлбэртэй вэ? Мэдээж чи үүнийг одоогийн энэ орон зайн ухагдахуунаар ойлгож болохгүй, чиний бие тэдгээр орон зайн шаардлаганд нийцэн оршихуйц хэлбэртэй байх ёстой. Өөр орон зайд байгаа биес нь томрох жижигрэх чадвартай байдаг, энэ үед чи тэр орон зайг зүйрлэшгүй аугаа уудам болохыг олж мэднэ. Энэ бол өөр орон зайн орших хялбар хэлбэр, нэгэн цагт нэг дор өөр өөр орон зай оршдог. Хүн бусад маш олон орон зай болгонд тодорхой тогтсон нэг нэг биетэй байдаг, мөн нэг тусгай тогтсон орон зайд хүний биеийн эргэн тойронд хүрээлсэн нэг орон

оршдог. Ямар орон бэ? Энэ орон нь бидний яриад байгаа буян юм. Буян бол цагаан бие бодь, урьд бид үүнийг оюун санааны ба ухамсрын зүйл гэж үздэг байсан шиг биш харин энэ нь үнэхээр бодитоор оршдог. Иймээс дээр үед настай хүмүүс буян хураах, буянаа алдах гэж ярьдаг байсан нь тун зөв юм. Энэ буян хүний биений эргэн тойронд нэг орон болон үүсдэг, хуучин Дао-д багш шавийг хайдаг, харин шавь багшийг хайдаггүй гэж ярьдаг байсан. Энэ нь ямар утгатай вэ? Багш энэ шавийн биед байгаа буян хир их болохыг хардаг, их байвал түүнд бясалгахад амар, тийм биш бол бясалгахад амаргүй, түүнд гон-ыг дээд түвшин лүү өсгөхөд маш хэцүү.

Мөн түүнчлэн хар бие бодь нэгэн зэрэг хамт оршдог, бид үүнийг нүгэл гэдэг. Буддын шашинд үүнийг бас үйлийн үр гэж нэрлэдэг. Цагаан бие бодь, хар бие бодьтой нэг цагт зэрэгцэн оршиж байдаг. Энэ хоёр бие бодь хоорондоо ямар харилцаатай вэ? Буяны энэ бие бодийг бид зовлон амсаж, хүнд бэрхшээлийг тэвчин давж, сайн үйлсийг хийснээр олдог. Харин хар бие бодь нь хүн муу хэрэг үйлдэхэд, муу зүйл хийхэд болон бусдыг дээрэлхэхэд хуримтлагддаг. Одоо үед зарим хүн зөвхөн ашиг хонжоо хөөцөлдөөд зогсохгүй, мөн хийхгүй муу зүйл гэж байхгүй болсон. Мөнгөний төлөө ямар ч муу зүйлийг хийнэ, хүний амь бүрэлгэнэ, хөлсөлж хүн алуулна, мөн ижил хүйстэн болох, хар тамхинд автах гэх мэт янз бүрийн зүйл байдаг. Хүн муу зүйл хийхэд буянаа алддаг. Яаж буянаа алддаг вэ? Нэг хүн нөгөөгөө загнаж зүхээд түүнийг давамгайлж чадсан гэж бодоход уур нь гардаг. Энэ орчлон ертөнцөд нэг зарчим үйлчилдэг: Алдахгүй бол олдохгүй, олдвол алдана гэдэг, чи алдахыг хүсэхгүй ч чамайг хүчээр алдуулна. Хэн ийм нөлөө гаргадаг вэ? Орчлон ертөнцийн мөн чанар энэ нөлөөг гаргадаг, иймээс чи зөвхөн олохыг хүсвэл боломжгүй. Тэгвэл яадаг вэ? Хүнийг загнасан, дээрэлхсэн хүн буянаа түүнд өгнө, тэр хүн хохирсон талд харъяалагдана, ямар нэг

зүйлээ алдсан, зовсон учраас түүний хохирол ингэж нөхөгдөнө. Тэр түүнийг загнаж байхад загнахын хэмжээгээр түүний өөрийнх нь орон зайн хүрээнээс хэсэг буян тасран гарч нөгөө хүний биед бууна. Тэр түүнийг хэдий их загнана төдий их буянаа түүнд өгнө. Мөн хүнийг цохих, дээрэлхэхэд бас адилхан. Тэр нөгөө хүнийг цохиход эсвэл өшиглөхөд, хэр хүчтэй цохино тэр хэмжээгээр өөрийнхөө буянаас түүнд өгнө. Энгийн хүн энэ түвшин дэх зарчмыг хардаггүй. Дээрэлхүүлсэн санагдахад тэр үүнийг тэвчиж чадахгүй ингэж бодно: Чи намайг цохьсон тэгвэл би чамаас адилхан хариугаа авна. “Пад” гээд тэр эргүүлээд нударга зөрүүлэхэд буяныг буцаагаад түлхэнэ, энэ хоёр хүн юуг ч алдаж олоогүй. Магадгүй тэр ингэж бодно: Чи намайг нэг цохьсон, тэгвэл би чамайг хариуд нь хоёр цохино, тэгэхгүй бол уур гарахгүй. Тэгээд тэр дахиад нэг цохиход, өөрөөсөө дахин нэг хэсэг буян нөгөө хүнд өгчихнө.

Яагаад энэ буянг ийм чухал гэж үздэг вэ? Энэ буяны хувиралтанд ямар учир холбогдол байдаг вэ? Шашинд ингэж ярьдаг: Буян байвал энэ насандаа олохгүй бол дараа насандаа олно гэдэг. Тэр юуг олох гэж? Их буянтай хүн магадгүй том дарга болно, маш баян болно, юу хүссэнээ авч болно, энэ бол буянаараа сольж олсон зүйл. Шашинд бас ингэж ярьдаг: Хүнд ямарч буян байхгүй бол, бие сүнс нь хоёул устана. Түүний сүнс нь устгагдана, тэр үхсэний дараа бүгд үгүй болно, юу ч үлдэхгүй. Харин бидний бясалгагчдын хүрээнд ярихад, буян нь шууд гон-д хувирч болно.

Бид нар буян яаж гон-д хувирдгийг ярь. Бясалгагчдын хүрээнд ийм нэг үг байдаг, “Бясалгал өөрөөс шалтгаална, гон багшаас шалтгаална”. Гэвч зарим хүн ингэж ярьдаг: Тогоо зуух тавиад эмийн ургамал найруулж үрэл гаргаж авах, тэд үүнийг маш чухалд үздэг. Би чамд хэлье, эдгээр нь ердөө чухал биш, чи энэ талаар их бодоод байвал энэ нь

зууралдсан сэтгэл болно. Чи үүнийг их хүсээд байвал зууралдсан сэтгэлд автсан биш гэж үү? Бясалгал өөрөөс шалтгаална, гон багшаас шалтгаална. Чамд энэ хүсэл байвал л болно. Мөн үнэхээр энэ зүйлийг багш хийж өгдөг юм, чи үндсэндээ хийж чадахгүй. Чи энгийн хүний л биетэй, чи яаж үүнийг дээд энергийн бие бодиор бүтсэн дээд зэргийн амь бодийн биед хувиргаж чадах юм? Энэ нь огт боломжгүй, ярихад л инээдтэй сонсогдоно. Өөр орон зайд хүний биеийн хувирах явц нь тун ярвигтай, их нарийн байдаг. Чи эдгээр зүйлийг хийж огт чадахгүй.

Багш нь чамд ямар зүйлийг өгөх вэ? Чамд гон өсгөх нэг гон механизмыг өгнө. Учир нь буян хүний биеийн гадна байрладаг, хүний жинхэнэ гон буянаар үүсдэг. Хүний түвшин хэр өндөр нам байх нь, гон хэр их хүчтэй байх нь бүгд буянаас хамаардаг, буянаар бий болдог. Энэ нь чиний буянг гон-д хувиргаж өгнө, дээш мушгиа хэлбэрээр өснө. Хүний түвшний жинхэнэ өндрийг тодорхойлдог гон нь хүний биеийн гадна талаар мушгирсан хэлбэрээр өсдөг ба улмаар толгойн оройд хүрч дээш нэг гон багана хэлбэртэй болж өсдөг. Энэ хүний гон түвшин хэр өндөрт хүрснийг түүний гон багана хэр өндөр байгаагаар нь нэг хараад л мэдчихнэ. Энэ бол түүний хүрсэн түвшин юм. Буддын шашинд үүнийг бүтээлийн орон гэдэг. Зарим хүн бясалгаж суухад түүний сүнс нь биенээсээ гарч тодорхой түвшинд хүрч чаддаг. Харин түүнээс өндөрт гарахыг оролдсон ч тэр чадахгүй, дээш гарахыг ч зүрхлэхгүй. Тэр бол өөрийнхөө гон баганад суугаад дээш гарч байгаа болохоор тэр өндөрт л хүрч чадна. Учир нь түүний гон багана тийм л өндөр, түүнээс өндөрт гарч чадахгүй. Энэ бол Буддын шашинд ярьдаг бүтээлийн орны асуудал юм.

Зан чанар хэр өндөр байгааг хэмжих бас нэг хэмжүүр байдаг. Энэ хэмжүүр нь гон баганатай нэг орон зайд хамт оршдоггүй, харин тэд нэг цагт зэрэг оршдог. Бясалгаад

чиний зан чанарт ахиц гарсан, жишээ нь: Хэн нэгэн чамайг хүмүүсийн дунд загнасан, чи дугараагүй тайван байсан, чамайг цохиход чи бас л дугараагүй инээмсэглээд л өнгөрөөсөн. Чиний зан чанар аль хэдийн их өндөр болсон юм. Тэгвэл бясалгагчийн хувьд чи юу олох ёстой вэ? Чи гон олж авах гэж байгаа биз дээ? Чиний зан чанар сайжирхад гон чинь бас дээшилнэ. Хэдий чинээ зан чанар өндөр байна төдий чинээ гон өндөр гэсэн үг. Энэ бол туйлын үнэн юм. Урьд зарим хүн паркад юмуу гэртээ дасгалаа хийхдээ маш их чармайн дажгүй сайн хичээллэдэг байсан. Гэвч гадагш гараад л шал өөр хүн болдог, өөрийнхөө замаар буцаад орно, энгийн хүмүүсийн дунд нэр ашгийн төлөө бусадтай өрсөлдөнө, тэмцэлдэнэ. Тэр ийм байхад гон нь өсөх юм уу? Ердөө ч өсөхгүй төдийгүй түүний өвчин ч эдгэрэхгүй, ийм л учиртай юм. Яагаад зарим хүн удаан хугацаагаар бясалгаад өвчин нь эдгэрдэггүй вэ? Чигон бол бясалгал, ер бусын зүйл юм, энэ нь энгийн хүний биеийн тамирын дасгалтай адилгүй, заавал зан чанарыг чухалчлах ёстой, тэгвэл өвчин эдгэрнэ эсвэл гон нь өснө.

Зарим хүн тогоо зуух тавиад эмийн ургамал найруулж үрэл гаргахыг ярьдаг, үүнийг гон гэж боддог, гэвч энэ бол биш. Энэ үрэл нь зөвхөн нэг хэсэг энергийг агуулдаг, энергийг бүхэлд нь багтаадаггүй. Тэгвэл үрэл гэж ямар зүйл юм бэ? Та бүгд мэднэ, бидэнд бас амь биеийг бясалгах зарим зүйлс байдаг, биенээс гон чадвар болон маш олон арга увидаст зүйлс гардаг. Ихэнх эдгээр зүйлс нь түгжигддэг, ашиглахыг зөвшөөрөхгүй. Маш олон ер бусын чадварууд байдаг, арван мянгаас дээш. Энэ нь үүсмэгцээ түгжигддэг. Яагаад тэдгээрийг байхыг зөвшөөрдөггүй вэ? Энэ нь чамайг энгийн хүний нийгэмд тэдгээрийг хамаагүй хэрэглүүлэхгүй байх зорилготой юм. Энгийн хүний нийгмийг хамаагүй үймүүлж болохгүй, мөн хамаагүй энгийн хүний нийгэмд чиний чадварыг илрүүлж болохгүй. Учир нь, энгийн хүний нийгмийн байдлыг бусниулна. Маш

олон хүн ухамсраараа бясалгадаг, хэрэв чи тэдэнд бүх чадвараа үзүүлчихвэл үнэнийг харж мэдчихээд бүгд ирж бясалгана, арван хар нүгэлтэй уучилшгүй хүн ч ирж бясалгана, үүнийг зөвшөөрөхгүй. Чамайг ингэж өөрийгээ гайхуулахыг зөвшөөрөхгүй, чи бас хүмүүсийн хувь төөргийн харилцааг, юмны жинхэнэ учир шалтгааныг харж чадахгүйгээс муу зүйл амархан хийчихнэ. Чи өөрийгээ сайн зүйл хийж байна гэж бодно, гэхдээ энэ нь магадгүй муу зүйл болчихно. Тийм учраас чамд тэдгээрийг хэрэглэхийг зөвшөөрөхгүй. Яагаад гэвэл муу зүйл хиймэгц түвшин доош унана, бас бясалгал чинь үр дүнгүй болно. Иймээс маш олон ер бусын чадварууд түгжигдчихдэг. Тэгвэл яах вэ? Гон нь нээгдэж гэгээрэх тэр өдөр, энэ үрэл нь тэсрэх бөмбөг шиг дэлбэрч бүх ер бусын чадварууд болон биен дэх бүх түгжээнүүд, бүх энергийн сүвүүдийг бүгдийг нь нээнэ. “Пад” гээд бүгдийг нь доргиож нээнэ, үрэл үүнд л хэрэглэгддэг. Лам хувраг нас барсны дараа цогцсыг нь чандарлахад сувдан чулуунууд сарира үлддэг. Зарим хүн үүнийг яс, шүд нь гэж ярьдаг. Яагаад энгийн хүнд энэ нь байдаггүй вэ? Энэ нь зөвхөн дэлбэрсэн үрэл юм, тэдгээрийн энерги нь гарч чөлөөлөгдсөн. Тэдгээр нь дотроо өөр орон зайн их хэмжээний бодисыг агуулдаг, ямар боловч бие бодит зүйлс юм. Гэвч тэр нь ямар ч хэрэггүй. Одоогийн хүмүүс үүнийг их нандин зүйл гэж үздэг. Тэдгээр нь энергитэй ба гялалзсан мөн маш их хатуу. Ийм л зүйл юм.

Гон өсөхгүй байхын бас өөр нэг учир шалтгаан байдаг, дээд түвшний номыг мэдэхгүй бол дээш бясалгаж чадахгүй. Энэ нь ямар утгатай вэ? Миний сая ярьсантай адил, зарим хүн их олон бясалгалаар хичээллэдэг. Тэгвэл би чамд хэлье, чи хичнээн их сурсан ч үр ашиггүй, чи зөвхөн бага сургуулийн сурагч хэвээрээ л байна, бясалгалын бага сургуулийн сурагч гэсэн үг. Тэдгээр нь бүгд доод түвшин дэх зарчмууд юм. Чи доод түвшний зарчмаар дээд түвшин лүү бясалгахад энэ нь чамд ямар ч удирдах нөлөө

үзүүлэхгүй. Хэрэв чи дээд сургуульд бага сургуулийн сурах бичгийг уншиж байгаа бол чи бага сургуулийн сурагч хэвээрээ л үлдэнэ. Яаж ч их сурсан энэ нь хэрэггүй, эсрэгээр бүр ч муу юм болно. Түвшин бүрт өөр өөрийн гэсэн ном байдаг. Ном өөр өөр түвшинд өөр өөрийн удирдах нөлөөтэй байдаг. Иймээс доод түвшний зарчим чамайг дээд түвшин лүү бясалгахад удирдаж чадахгүй. Бидний үүнээс хойш тодорхой ярих зүйлүүд нь бүгд дээд түвшинд бясалгах зарчмууд юм. Би өөр өөр түвшний зүйлүүдийг нэгтгэн ярина, иймээс чиний цаашдын бясалгалд үргэлж удирдах нөлөөтэй байна. Надад хэдэн ном, дуу болон дүрст бичлэгүүд байгаа. Чи тэдгээрийг нэг удаа үзэж эсвэл сонссоны дараа хэсэг хугацаа өнгөрөөд дахин үзэхэд юмуу сонсоход чамд бас л удирдах нөлөө гарна. Чи бас өөрийгөө үргэлж дээшлүүлж байгаа, мөн тэдгээр нь чамайг үргэлж удирдах нөлөөтэй, энэ бол Ном. Дээр өгүүлсэн нь гон өсөхгүй байхын хоёр шалтгаан юм. Дээд түвшний Ном мэдэхгүй бол бясалгаж чадахгүй, дотогшоо бясалгахгүй зан чанараа бясалгахгүй бол гон өсөхгүй. Ийм л хоёр учир шалтгаантай юм.

Фалунь Дафагийн онцлог

Бидний Фалунь Дафа бол Буддын 84 мянган номын үүдний нэг нь юм. Бидний энэ удаагийн хүн төрөлхтний соёл иргэншлийн түүхэнд энэ нь нийтийн дунд хэзээ ч дэлгэрч байгаагүй. Гэвч өнө эртний нэг үед дэлгэрч хүмүүсийг өргөнөөр аварсан. Би галавын төгсгөлийн хамгийн эцсийн энэ үед дахин үүнийг өргөнөөр тарааж байна. Иймээс энэ бол маш нандин юм. Би буян шууд гон болж хувирах хэлбэрийг ярьсан. Гон-ыг үнэндээ дасгал хийж гаргадаг биш, харин бясалгалаар олж авдаг юм. Олон хүн гон-оо өсгөхийг хөөцөлддөг, гэхдээ зөвхөн яаж дасгал хийхийг л анхаардаг болохоос яаж бясалгахыг чухалчилдаггүй.

Үнэндээ гон бол зан чанараа бясалгаснаас гардаг. Тэгвэл бид энд яагаад дасгал хийхийг бас заадаг вэ? Эхлээд, лам хувраг яагаад дасгал хийдэггүй тухай ярья. Тэр гол нь завилан сууна, ном судар уншина, зан чанараа бясалгахад түүний гон өсдөг. Түүний түвшин өсөхөд гон нь дагаад дээшилнэ. Шагжамүни хүмүүст дэлхий дээрх бүх зүйлийг орхи, өөрийн биеэ ч орхи гэж сургасан, иймээс биеийн дасгал хийх хэрэггүй болсон. Дао-гийн системд бүх амийг аварна гэж ярьдаггүй. Тэдэнтэй учирдаг хүмүүс нь янз бүрийн үзэл бодолтой, янз бүрийн давхаргын, зарим нь амиа их хичээсэн зарим нь арай гайгүй гэх мэтийн хүмүүс байдаггүй. Тэд өөрсдийн шавийг сонгодог, гурван шавь сонгосон бол тэдний зөвхөн нэгэнд нь л уламжлан заана. Энэ шавь нь буян ихтэй, маш сайн бөгөөд буруу хазайхгүй нь баттай юм. Тиймээс арга барилын зүйлийг онцлон зааж амь биеийг бясалгадаг. Ер бусын чадвар, увидас гэх мэтийн зүйлийг бясалгахад зарим дасгал хөдөлгөөн шаардлагатай.

Фалунь Дафа бол амь бие, сэтгэлийн хос бясалгал учраас дасгал хөдөлгөөн хийх шаардлагатай байдаг. Нэг талаар хөдөлгөөн бол гон чадварыг эрчимжүүлэхэд хэрэгтэй. Эрчимжүүлэх гэдэг нь ямар утгатай вэ? Энэ нь чиний ер бусын чадварыг өөрийн чинь хүчирхэг гон чадвараар бэхжүүлэх, улам бүр хүчтэй болгох учиртай юм. Нөгөө талаар чиний биенд бас маш олон амь бодийг хувиргаж гаргана. Дээд түвшинд бясалгахад, Дао-гийн системд, бясалгасан нялх хүүхэд гардгийг ярьдаг, Буддын системд Очирваань сүйтэхгүй бие гэж ярьдаг. Мөн их олон увидас чадварууд хувирч гарна. Эдгээр зүйлс бүгд дасгал хөдөлгөөний дүнд хувирч гардаг, дасгал хөдөлгөөн үүнийг бий болгодог. Амь бие, сэтгэлийг хос бясалгах бүрэн цогц гон аргад бясалгах ч хэрэгтэй бас дасгал хийх ч хэрэгтэй. Би та бүгдийг гон яаж бий болдгийг ойлгосон байх гэж бодож байна. Чиний хүрсэн түвшинг жинхэнэ тодорхойлдог гон бол ердөө ч дасгалаар гардаггүй харин бясалгалаар

гардаг юм. Чи бясалгалын явцад энгийн хүмүүсийн дунд өөрийн зан чанарыг дээшлүүлэхэд, орчлон ертөнцийн мөн чанарт уусахад, орчлон ертөнцийн мөн чанар чамайг барихгүй болно, чи дээд түвшин лүү ахиж чадна. Энэ буян гон-д хувирч эхэлнэ, зан чанарын түвшин дээшлэхийн дагуу гон чинь дээшилнэ, хоорондоо ийм уялдаатай байдаг.

Бидний энэ цогц бясалгал бол жинхэнэ амь бие, сэтгэлийн хос бясалгалд харьяалагддаг. Бидний бясалгаж гаргасан гон биений эс болгонд хадгалагдаад зогсохгүй мөн туйлын бичил түвшинд орших бие бодийн эх үүсвэр болсон хамгийн бичил хэсгүүд бүгдэнд нь энэ дээд энергийн бие бодь гон хадгалагддаг. Чиний гон хүч улам дээшлэхийн сацуу түүний нягтрал, сүр хүч нь улам нэмэгдэнэ. Энэ дээд энергийн бие бодь нь амь, сэтгэхүйтэй. Энэ нь хүний биеийн эс болгонд хадгалагдахаас гадна амьны эх үүсвэр хүртэлх бүгдэд хадгалагдана. Тэр аажим аажмаар чиний биеийн эстэй адилхан хэлбэртэй болдог, молекулын байрлах дэс дараатай болон бүх атомын цөмийн хэлбэртэй адилхан болдог. Гэхдээ мөн чанар нь өөрчлөгдсөн, анхны махан биений эсээр бүтсэн бие биш болсон, чи таван мах бодийн хүрээнээс гарсан биш гэж үү? Мэдээж чиний бясалгал дуусаагүй байгаа, чи бас энгийн хүмүүсийн дунд бясалгаж байгаа. Тиймээс гаднаа энгийн хүнтэй адил харагдана. Зөвхөн нэг ялгаа нь гэвэл, чи үе тэнгийнхнээсээ илүү залуу харагдана. Мэдээж эхлээд чиний биен дэх муу зүйлсийг, өвчнийг чинь хамтад нь авч хаях ёстой, харин бид энд өвчин эмчлэхгүй. Бид чиний биеийг ариусгана, үүнийг өвчнийг эмчлэх гэж хэлдэггүй, биеийг ариусгах гэдэг, зөвхөн жинхэнэ бясалгадаг хүний биеийг ариусгаж өгнө. Зарим хүн зөвхөн өвчнөө эдгээх гэж ирдэг. Маш хүнд өвчтэй хүнийг бид хичээлд оруулахгүй, яагаад гэвэл тэд өвчнөө эдгээх гэсэн бодлоо орхиж чадахгүй, эсвэл өвчтэй гэсэн бодлоосоо салж чадахгүй. Хүнд өвчтэй хүний бие нь их таагүй байхад тэр энэ бодлоо орхиж чадах уу? Тэр

бясалгаж чадахгүй. Бид дахин дахин анхааруулж байна, хүнд өвчтэй хүнийг бид хүлээж авахгүй. Энэ бол бясалгал, тэдний бодож байгаагаас маш их зайтай. Тэд өөр чигон багшийг олоод энэ зүйлийг хийлгүүлж болно. Мэдээж маш олон сурагч өвчинтэй, чи жинхэнэ бясалгаж байгаа учраас бид чамд энэ зүйлийг хийж өгнө.

Бидний Фалунь Дафагийн сурагчид нэг хэсэг хугацаанд бясалгасны дараа, гаднаас нь харахад их өөрчлөлт харагдана. Тэдний арьс нь зөөлөрч царай нь шингэрч хацар нь ягаарч, настай хүний үрчлээс нь хүртэл багасдаг, бүүр бага болдог, энэ бол түгээмэл илэрдэг байдал юм. Би энд байж болшгүй юмуу эсвэл санаанд багтамгүй зүйл ярьж байгаа юм биш, бидний энд сууж байгаа олон настай сурагч үүнийг бүгд мэднэ. Түүнчлэн настай эмэгтэйчүүдийн сарын тэмдэг ирдэг болно, яагаад гэвэл амь бие, сэтгэлийн хос бясалгалд сарын юм ирэх нь биеийг бясалгахад хэрэгтэй. Сарын тэмдэг ирнэ, гэхдээ тийм их биш. Одоогийн энэ шатанд жоохон байхад л хангалттай, энэ нь бас нэг түгээмэл илрэл юм. Эс бөгөөс, чи үүгээр дутвал яаж амь биеийг бясалгах юм? Эрэгтэй хүний хувьд хөгшин, залуугүй бүгд адилхан бүх бие нь хөнгөрсөн байдлыг мэдэрнэ. Жинхэнэ бясалгадаг хүн ийм өөрчлөлтийг мэдэрнэ.

Бидний энэ дасгал маш аугаа зүйлийг бясалгадаг, амьтныг дууриасан хөдөлгөөнтэй бусад олон дасгалтай адилгүй. Энэ дасгал асар том хүрээний зүйлийг бясалгадаг. Шагжамүни болон Лаози¹⁴ тэр үедээ ярьсан зарчим нь бүгд бидний энэ Тэнгэрийн заадас галактикийн хүрээн доторхи зарчимд багтдаг. Бидний энэ Фалунь Дафа юу бясалгадаг вэ? Бидний бясалгал бол орчлон ертөнцийн хувьслын зарчмын дагуу бясалгадаг, мөн орчлон ертөнцийн хамгийн дээд мөн чанар болох Үнэн, Нинжин, Тэвчээр шалгуураар

¹⁴ Лаози-Дао-г үндэслэгч, мээ 5-4 зуунд Хятадад амьдарч номоо тарааж байсан.

удирдуулдаг. Бид ийм нэг аугаа зүйлийг бясалгаж байгаа, орчлон ертөнцийг бясалгахтай адил.

Бидний Фалунь Дафа бусад бүх бясалгалаас өөр маш том нэг онцлогтой. Одоо нийгэмд өргөн дэлгэрсэн чигон бясалгалууд бүгд үрлийг бясалгах замаар явдаг. Үрлийг бясалгадаг чигон нь энгийн хүмүүсийн дунд гон нээгдэж гэгээрэлд хүрэхэд маш их хэцүү. Бидний Фалунь Дафа үрлийг бясалгах замаар явахгүй, бидний энэ цогц бясалгал бол хэвлийд Фалунийг бясалгадаг, би өөрөө лекцэнд суугаа сурагчдад үүнийг суулгаж өгнө. Би Фалунь Дафа ярихдаа бид та бүгдэд дараалан Фалунийг суулгаж өгнө. Зарим хүн үүнийг мэдэрнэ зарим нь мэдрэхгүй, гэхдээ ихэнх хүн мэдрэнэ. Яагаад гэвэл хүн бүрийн биеийн онцлог адилгүй. Бид Фалунийг бясалгана, үрлийг бясалгахгүй. Фалунь бол орчлон ертөнцийн хураангуй дүрс, энэ нь орчлон ертөнцийн бүх увидас чадварыг агуулсан бөгөөд өөрөө автоматаар ажиллаж бас эргэж байдаг. Энэ нь чиний хэвлийд үүрд эргэж байх болно. Чиний биенд суулгасан цагаас хойш жилээс жилд ер зогсохгүй үүрд ингээд л эргэж байх болно. Тэр цагийн зүүний дагуу эргэхдээ автоматаар орчлон ертөнцөөс энергийг татан авдаг. Тэр өөрөө бас энергийг хувирган гаргаж чиний биеийн бүх хэсгийг хувьсан өөрчлөгдөхөд шаардлагатай энергиэр хангадаг. Мөн тэр цагийн зүүний эсрэгээр эргэхдээ энергийг гаргана, биенээс хэрэггүй бодисыг гадагшлуулна, тэр нь биений эргэн тойронд сарниад алга болно. Тэр энергийг гаргахдаа маш хол цацруулж гадагшлуулдаг тэгээд шинэ энергийг дахин авчирна. Тэр цацарсан энерги нь чиний эргэн тойронд байгаа хүнд ашигтай. Буддын системд өөрийгөө аварна бас бусдыг аварна, бүх амийг аврахыг номлодог. Зөвхөн өөрийгөө бясалгаад зогсохгүй бас бүх амийг аварна гэдэг. Бусад хүнд бас ашигтай, чи санаандгүйгээр өөр хүний биеийг зохицуулж өгдөг, өвчнийг нь эдгээдэг гэх мэт. Мэдээж энерги алдагдахгүй, Фалунь цагийн зүүний дагуу

эргэхдээ энергийг хурааж авна, яагаад гэвэл энэ нь үргэлж зогсолтгүй эргэж байдаг.

Зарим хүн яагаад энэ Фалунь зогсолтгүй эргэдэг вэ? гэж боддог. Зарим хүн надаас бас ингэж асуудаг, яаж тэр эргэлдэж чаддаг вэ? Түүний үндэслэл нь юунд байна? Энергийн хуралтаар үрэл үүсдэг гэдгийг ойлгоход амархан, харин Фалунь яаж эргэдэг нь ухаан санаанд багтамгүй гэдэг. Би та бүгдэд нэг жишээ хэлье, орчлон ертөнц хөдөлгөөнд байдаг, орчлон ертөнцийн бүх Тэнгэрийн заадас болон галактикууд бүгд хөдөлж байдаг. Есөн гариг нарыг тойрон эргэдэг, дэлхий ч мөн тэнхлэгээ тойрон эргэж байдаг. Та бүгд боддоо, хэн тэдгээрийг түлхэж байна гэж? Хэн тэдгээрт хүч өгч байна вэ? Чи үүнийг энгийн хүний сэтгэхүйгээр ойлгож болохгүй, түүнд ийм л нэг эргэдэг механизм байдаг. Мөн бидний Фалунь бас адил ингэж л эргэдэг. Энгийн хүний амьдралын хэвийн нөхцөлд бясалгах асуудлыг шийдвэрлэж өгсөн, дасгал хийх хугацааг уртасгаж өгсөн. Үүнийг яаж уртасгадаг вэ? Фалунь зогсолтгүйгээр эргэж байдаг учраас тасралтгүйгээр орчлон ертөнцийн энергийг шингээн авч бас хувиргаж байдаг. Чи ажилтай байсан ч тэр чамайг бясалгаж байдаг. Мэдээж Фалунаас гадна бид чиний биенд энергийн маш олон системийг, механизмыг суулгана, тэдгээр нь Фалунь-тай холбогдож автоматаар эргэн бас автоматаар хувиргаж байх болно. Иймээс энэ гон бол бясалгагч хүнийг бүрэн автоматаар хувиргадаг. Тиймээс “гон хүнийг бясалгадаг” ийм нэг байдал үүсдэг, бас “Ном хүнийг бясалгана” гэдэг. Чи дасгал хийгээгүй байхад гон чамайг бясалгадаг, дасгал хийж байхад гон бас л чамайг бясалгадаг. Чи хоол идэж, унтаж, эсвэл ажил хийж байхад гон чамайг үргэлж хувиргаж байдаг. Тэгвэл чи юуны тулд дасгал хийж байгаа вэ? Чи дасгал хийж Фалунийг эрчимжүүлж байгаа юм, мөн миний чамд суулгаж өгсөн эдгээр систем болон энергийн механизмыг эрчимжүүлж байгаа юм. Дээд түвшинд

бясалгахад ямарч үйлдэлгүй байдаг. Мөн дасгал хөдөлгөөн механизмын дагуу явагддаг, ямар ч бодлоор удирдах, амьсгалаа зохицуулах гэх мэтийн зүйл байхгүй.

Бидний хувьд хэдэн цагт дасгал хийх, хаана дасгалаа хийх нь ямар ч ялгаагүй. Зарим хүн ингэж асуудаг, хэдэн цагт бясалгал хийхэд хамгийн сайн бэ? Хулгана цагт уу, луу цагт уу, морь цагт уу? Бид дасгал хийхэд ямар ч цагийн шаардлага тавьдаггүй. Чи хулгана цагт дасгал хийгээгүй байсан ч гон чамайг бясалгадаг, луу цагт дасгал хийгээгүй байсан ч гон бас чамайг бясалгадаг, чи унтаж байсан ч гон чамайг бясалгадаг, чи алхаж явсан ч гон чамайг бясалгадаг, ажлаа хийж байсан ч гон бас л чамайг бясалгаж байдаг. Энэ нь чиний бясалгах хугацааг их богиносгож өгсөн биш гэж үү? Та нарын олонхи нь Дао-г олох үнэнхүү хүсэлтэй, мэдээж энэ бол бясалгалын зорилго юм. Бясалгалын хамгийн эцсийн зорилго бол Дао-д хүрэх, гэгээрэх юм. Гэхдээ зарим хүний амьдрах нас нь бага үлдсэн, амьдрах хугацаа нь бясалгал хийхэд магадгүй хүрэхгүй болсон. Бидний Фалунь Дафа энэ асуудлыг шийдэж чадна, бясалгах явцыг богиносгоно. Түүнчлэн энэ нь амь бие, сэтгэлийн хос бясалгал. Чи үргэлж бясалгахад чиний нас үргэлж уртасна. Байнга бясалгах тусам амьдрах нас чинь үргэлж уртасна. Төрөлхийн суурь сайтай настай хүмүүсийн хувьд үлдсэн хугацаа нь бясалгал хийхэд хүрэлцээтэй. Гэхдээ ийм нэг нөхцөл байдаг, чиний хувь тавилангаар амьдрах наснаас уртасгасан нас нь зөвхөн чиний бясалгалд зориулагдсан юм. Хэрэв чиний бодол санаа жоохон л буруу хазайвал амь насны аюул гарна, яагаад гэвэл чиний амьдрах насны хугацаа аль хэдийн дуусчихсан байгаа. Гагцхүү Гурамсан ертөнцийн номын бясалгалаас дээш гарсаны дараа, энэ хязгаарлалт байхгүй болно, тэр үед өөр нэг байдал гарна.

Бидэнд дасгал хийх зүг чигийн талаар болон дасгалаа яаж дуусгах талаар тавих шаардлага байхгүй, яагаад гэвэл

Фалунь үргэлж эргэж байдаг хэзээ ч зогсдоггүй. Хэрэв утас дуугарах юмуу хүн хаалга цохиход чи дасгалаа дуусгалгүйгээр шууд очиж тэр зүйлийг хийж болно, чи ямар нэг юм хийхэд Фалунь тэр дороо цагийн зүүний дагуу эргэж чиний биеийн эргэн тойронд цацаргаж гаргасан энергийг буцааж хурааж авна. Хүн гараараа энергийг цуглуулж толгойн орой луугаа оруулахад хичнээн хичээсэн ч энерги алдагдана. Фалунь бол оюун сэтгэхүйтэй, тэр өөрөө эдгээр зүйлийг яаж хийхээ мэддэг. Бид бас зүг чигийг чухалд үзэхгүй, яагаад гэвэл бүх орчлон ертөнц хөдөлгөөнд байдаг. Тэнгэрийн заадас галагтик хөдөлж байдаг. Есөн гариг нарыг тойрон эргэдэг, дэлхий ч өөрөө тэнхлэгээ тойрон эргэдэг. Бид орчлон ертөнцийн ийм аугаа зарчмын дагуу бясалгадаг. Хаана зүүн, өмнөд, баруун, эсвэл хойд зүг байгаа вэ? Хаана ч байхгүй. Аль зүг рүү ч харж дасгал хийсэн бүх зүг рүү харж дасгал хийсэнтэй адил, аль зүг рүү ч харж хийсэн зүүн, өмнөд, баруун бас хойд зүг рүү зэрэг харж хийсэнтэй ялгаагүй. Бидний Фалунь Дафа сурагчийг муу зүйлээс хамгаална. Яаж хамгаалах вэ? Хэрэв чи жинхэнэ бясалгагч бол бидний Фалунь чамайг хамгаална. Миний үндэс орчлон ертөнцөд суурилсан. Хэн нэгэн чамд халдаж чадвал надад халдаж бас чадна гэсэн үг, шууд хэлбэл энэ хүн орчлон ертөнцөд халдаж чадна гэсэн үг. Миний ярьсан нь ойлгоход хэцүү санагдаж магадгүй. Чи цаашид сурахаараа үүнийг ойлгоно. Бас өөр маш гүн агуулгатай зүйлүүд бий, тэдгээрийг би та нарт хэлж болохгүй. Бид энгийнээс гүн рүү системтэйгээр дээд түвшний Номыг дэлгэрэнгүй тайлбарлана. Чиний зан чанар ариун байхгүй бол болохгүй, чи ямар нэг зүйлийг хүсвэл магадгүй асуудал гарна. Их олон хуучин сурагчийн Фалунь гажсаныг би ажигласан. Яагаад вэ? Чи өөр зүйлүүдийг хольж хичээллэсэн, чи бусдад хамаатай зүйлийг авч хүлээн зөвшөөрсөн. Тэгвэл Фалунь яагаад чамайг хамгаалаагүй вэ? Чамд өгсөн бол энэ нь чиний зүйл, чиний бодол санаагаар удирдагддаг. Чи юу хүснэ, түүнд хэн ч оролцохгүй энэ бол

орчлон ертөнцийн зарчим. Чи бясалгахыг хүсэхгүй бол хэн ч чамайг албадаж болохгүй, тэгвэл муу зүйл хийсэнтэй адил болно. Хэн чиний сэтгэлийг хүчээр өөрчилж чадах юм? Чи өөрөө өөртөө шаардлага тавих ёстой. Чи бясалгал болгоны сайн гэсэн бүхнийг сурна, хэний ч зүйлийг хүлээн авч өөрийнхөө өвчнийг арилгахын тулд өнөөдөр нэг бясалгалаар хичээллэж маргааш нь нөгөөгөөр хичээллэнэ. Чиний өвчин эдгэрсэн үү? Үгүй, өвчин зөвхөн хойшлогдсон. Дээд түвшинд бясалгахад нэг бясалгалдаа тууштай байхыг шаарддаг, ямар нэгэн бясалгалаар дагнавал тэр бясалгалаар төгс гэгээрэлд хүртлээ сэтгэлээ түүнд зориулах ёстой. Зөвхөн үүний дараа өөр бясалгал хийж болно, тэр нь өөр тогтолцооны зүйл байна. Яагаад гэвэл жинхэнэ уламжлагдан үлдсэн цогц зүйлүүд бол эрт дээр үеэс дамжин ирсэн, бүгд маш нарийн хувирах явцтай. Зарим хүн өөрийнхөө мэдрэмжээр бясалгадаг. Чиний мэдрэмж гэж юу вэ? Юу ч биш. Жинхэнэ хувьсах явц нь өөр орон зайд явагддаг, энэ нь туйлын нарийн бөгөөд төвөгтэй, жоохон ч алдаж болохгүй. Энэ нь яг нарийн тоног төхөөрөмжтэй адил, хэрэв чи дотор нь өөр сэлбэг нэмээд оруулчихвал тэр дороо эвдэрнэ. Өөр орон зай болгонд байгаа чиний биес бүгд өөрчлөгдөж байгаа, тэр нь ер бусын гайхамшигтай бөгөөд үүнд жоохон ч алдаа гарч болохгүй. Би чамд бясалгал бол өөрөөс шалтгаална, гон багшаас шалтгаална гэж дээр хэлсэн. Бусад хүний зүйлийг чи хамаагүй авч нэмбэл гадны мэдээлэл энэ номын үүдний зүйлд саад болно, чи буруу зам руу орчихно. Мөн энэ нь энгийн хүний нийгэмд илэрнэ, энгийн хүний төвөгтэй байдалд өөрийгээ оруулна. Чи үүнийг өөрөө хүссэн учраас бусад хүмүүс хөндлөнгөөс оролцож болохгүй. Энэ бол ухамсрын асуудал. Мөн нэмж оруулсан зүйл чиний гон-ыг замбараагүй болгоно, тэгээд чи цааш бясалгаж чадахгүй болно. Ийм асуудал гарна. Би та бүгдийг заавал Фалунь Дафа-г сур гэж хэлж байгаа юм биш. Чи Фалунь Дафа-г сурахгүй ч өөр чигон бясалгалуудаас жинхэнэ уламжлан авбал би бас

сайшаана. Гэхдээ би чамд хэлье, жинхэнэ дээд түвшин лүү бясалгахад нэг бясалгалдаа заавал тууштай байх ёстой. Би бас та нарт нэг зүйл хэлэх хэрэгтэй: Одоо надаас өөр жинхэнэ дээд түвшин лүү бясалгал заан тарааж байгаа хоёрдогч хүн байхгүй. Би чиний төлөө ямар зүйл хийснийг чи хожим мэднэ. Иймээс чиний ухамсар битгий дорой байгаасай гэж хүсч байна. Маш олон хүн дээд түвшин лүү бясалгах хүсэлтэй байдаг. Одоо энэ нь чиний өмнө бэлэн байна, харин чи үүнийг хараахан ухаараагүй байж мэднэ. Чи үүнийг хаа сайгүй явж хайсан, олон багш дамжин их мөнгөө үрсэн, тэгээд ч олж чадаагүй. Өнөөдөр чиний үүдэнд хүргэж өгсөн, чи магадгүй гадарлаа ч үгүй! Энэ бол чиний ухамсарлах, ухамсарлахгүйн асуудал, бас аврагдах, аврагдахгүйн асуудал юм.

Хоёрдугаар лекц

Тэнгэрийн мэлмийн асуудал

Их олон чигон багш бас тэнгэрийн мэлмийн талаар ярьдаг. Гэхдээ Ном өөр өөр түвшинд өөр өөрийн илрэх хэлбэртэй байдаг. Аль нэг түвшинд бясалгаж хүрсэн хүн зөвхөн тэр түвшнийхээ байдлыг л хардаг. Түүнээс дээд түвшний үнэн байдлыг харж чадахгүй, бас үнэмшихгүй. Иймээс тэр зөвхөн өөрийнхөө түвшинд харсан зүйлийг л үнэн гэж үздэг. Түүний бясалгал дээд түвшинд хүрээгүй байхад тэдгээр зүйлийг оршдоггүй гэж үздэг, үнэмшихгүй. Энэ бол түвшнээс шалтгаалдаг, түүний бодол дээшээ ахиж чадахгүй. Өөрөөр хэлбэл, хүний тэнгэрийн мэлмийн талаар зарим хүн ийм учиртай, зарим хүн тийм учиртай гэж ярьдаг, эцэст нь будлиантуулсан, хэн ч үүнийг тодорхой хэлж чадаагүй. Үнэндээ энэ тэнгэрийн мэлмийг доод түвшинд тодорхой ярих аргагүй. Урьд нь, тэнгэрийн мэлмийн бүтэц нууцын нууцад харъяалагддаг байсан учраас энгийн хүмүүст үүнийг мэдэхийг зөвшөөрдөггүй байсан. Тийм учраас энэ талаар хэн ч хэзээ ч ярьж байгаагүй. Харин бид энд хуучны тэр онол дээр ярихгүй. Бид орчин үеийн шинжлэх ухаан болон хамгийн энгийн орчин үеийн хэллэгийг ашиглан түүнийг тайлбарлая, мөн түүний үндсэн асуудлыг ярья.

Бидний ярьж байгаа тэнгэрийн мэлмий нь үнэн хэрэгтээ хүний хоёр хөмсөгний дундаас жоохон дээш байрладаг бөгөөд энэ нь тархины булцуут булчирхайтай холбогддог. Энэ бол гол зам. Хүний биед бас маш олон нүд байдаг. Даогийн системд биений сүв болгоныг нүд гэж ярьдаг. Даогийн системд биен дээрхи цэгийг сүв гэж хэлдэг, харин хятад эмчилгээнд үүнийг зүү эмчилгээний цэг гэдэг.

Буддын системд арьсны нүх болгоныг нэг нүд гэж ярьдаг. Иймээс зарим хүн чихээрээ юм уншиж чаддаг, гараараа юмуу дагзаараа харж чаддаг, бас зарим нь хөлөөрөө эсвэл гэдсээрээ хардаг, энэ бүгд байдаг.

Тэнгэрийн мэлмийг ярихдаа, бид эхлээд хүний энэ хос нүдний талаар ярья. Одоо зарим хүн энэ хоёр нүдээр бидний энэ хорвоо дэлхийн ямар ч матери, бүх юмсыг хардаг гэж үздэг. Иймээс зарим хүн зөвхөн энэ нүдээрээ харж чадах зүйлийг үнэн бодитой гэж үздэг явцуу үзэлтэй болсон. Тэд харагдахгүй зүйлд үнэмшдэггүй. Урьд ийм хүнийг ухамсар дорой гэж үздэг байсан ч зарим хүн тэднийг яагаад ухамсар дорой гэж хэлж байгааг тодорхой тайлбарлаж чаддаггүй байсан. Харагдахгүй бол үнэмшихгүй, үүнийг сонсоход тун зөв гэмээр. Гэхдээ арай дээд түвшнээс харахад энэ нь буруу болчихно. Цаг хугацааны орон зай болгон бүгд бие бодиор бүтээгдсэн байдаг. Мэдээж өөр өөр цаг хугацааны орон зай болгон өөр өөрийн гэсэн бие бодийн бүтэцтэй, өөр өөр амьд биеийн янз бүрийн илрэх хэлбэртэй.

Би та бүгдэд нэг жишээ ярья, Буддын шашинд хүн төрөлхтний нийгмийн бүх үзэгдлийг хуурмаг, бодит биш гэж үздэг. Яагаад хуурмаг үзэгдэл гэдэг вэ? Энд жинхэнэ бодит биет байна, хэн үүнийг хуурмаг зүйл гэх юм? Бие бодийн орших хэлбэр нь ийм байдаг, гэхдээ түүний илрэх хэлбэр нь өөр. Бидний хоёр нүд энэ материаллаг орон зайд байгаа бодит зүйлсийг одоо бидний харж байгаа тогтворжуулсан байдлаар харагдуулдаг чадвартай. Үнэн хэрэгтээ эдгээр нь ийм байдалтай биш, бидний энэ орон зайд бас ийм хэлбэрт байдаггүй. Жишээ нь, микроскопоор хүний биеийг харвал ямар янзтай байх вэ? Бүх бие нь сийрэг сул, жижигхэн молекулаар бүтээгдсэн, яг элс шиг ширхэгтэй, хөдөлж байдаг. Электрон атомын цөмийг тойрон эргэж байдаг, мөн бүх бие гүрвэлзэн хөдөлж байдаг. Биеийн гадаргуу тал нь өөгүй гөлгөр биш, бас тэгш ч биш.

Орчлон ертөнц дээрхи бүх зүйлс, ган, төмөр мөн чулуу бүгд адилхан, тэдгээрийн доторхи молекул элементүүд бүгд хөдөлж байдаг. Чи тэр хэлбэрийг бүхэлд нь харж чадахгүй, үнэндээ тэр бүгд тогтвортой биш. Энэ ширээ гүрвэлзэн хөдөлж байгаа, гэвч чиний нүд үнэн байдлыг харахгүй. Энэ хоёр нүд ингэж хуурамч төсөөллийг өгдөг.

Энэ нь бид микро түвшин дэх бичил зүйлийг харж чадахгүй, хүнд ийм чадвар байхгүй гэсэн үг биш. Хүн төрөлхөөсөө ийм чадвартай байдаг, зохих бичил түвшин хүртэлх зүйлийг харж чаддаг. Бид энэ материаллаг орон зайд энэ хоёр нүдээр хуурамч төсөөллийг авдаг, үнэнийг харж чаддаггүй. Иймээс урьд бясалгалын хүрээнд ярихдаа харж чадахгүй зүйлдээ итгэдэггүй хүнийг ухамсар дорой хүн, энгийн хүний хуурамч төсөөлөлд автсан, тэдний дунд төөрчихсөн хүн гэдэг байсан. Энэ бол шашинд үеэс үед ярьдаг байсан үг, үүнийг бид бас үндэслэлтэй гэж үздэг.

Энэ хоёр нүд бидний энэ материаллаг орон зайн зүйлсийг ийм тогтмол байдалд харагдуулдаг. Үүнээс өөр ямар ч онцгой чадвар байхгүй. Хүн юм харахад, нүдэнд тэр дүрслэл шууд буудаг юм биш. Нүд зургийн аппаратын линз шиг зөвхөн нэг хэрэгслийн үүрэгтэй юм. Холын юмыг харахад линз сунгагддаг, бидний нүд ч гэсэн ийм нэг үүргийг гүйцэтгэдэг. Харанхуйд харахад хүүхэн хараа том болдог, аппаратаар харанхуйд зураг авахад түүний гэрлийн хаалт том онгойно, эс бөгөөс гэрэл цохилт хангалтгүй байвал хар зураг гарна. Хүн гадагш их хурц гэрэлд гарахад хүүхэн хараа маш хурдан жижгэрдэг, тэгэхгүй бол нүд гялбаж юуг ч тодорхой харж чадахгүй болно. Зургийн аппарат бас ийм зарчмаар ажилладаг, гэрлийн хаалт бас жижгэрдэг. Энэ нь зөвхөн дүрсийг татаж авах үүрэгтэй нэг хэрэгсэл юм. Бид үнэн хэрэгтээ хүн юмуу аль нэг биетийн орших хэлбэрийг харахад жинхэнэ дүрс нь хүний тархинд тусдаг. Өөрөөр хэлбэл бидний нүдээрээ харж байгаа зүйлс

тархины ард байрладаг булцуут булчирхайнд харааны мэдрэлийн судлаар дамжин очиж тэнд дүрс болон тусгагдан гардаг. Өөрөөр хэлбэл тэр дүрс нь тархины булцуут булчирхайн энэ хэсэгт тусгагдан харагддаг. Орчин үеийн анагаах ухаан үүнийг бас олж мэдсэн.

Бидний ярьж байгаа тэнгэрийн мэлмий нээх гэдэг нь хүний харааны мэдрэлийн судлыг хэрэглэхийн оронд хүний хоёр хөмсөгний дунд нэг суваг нээж булцуут булчирхай түүгээр шууд гадагш харахыг хэлнэ. Үүнийг тэнгэрийн мэлмий нээгдэх гэдэг. Зарим хүн ингэж боддог, энэ бол бодит биш, энэ хос нүд ямар ч байсан нэг хэрэгслийн үүрэгтэй, тэр юмны дүрсийг татан авдаг, энэ нүдгүй бол бас боломжгүй. Орчин үеийн анагаах ухаан задлан шинжилгээгээр булцуут булчирхайн урд хэсэг нь хүний нүдний бүрэн бүтэцнээс тогтдог болохыг нээсэн. Энэ нь хүний толгойн дотор байдаг учраас үүнийг ширгэсэн нүд гэж ярьдаг. Ширгэсэн нүд мөн үү биш үү гэдэгт бидний бясалгалын хүрээнд өөр тайлбар байдаг. Гэхдээ ямар боловч одоогийн анагаах ухаан аль хэдийн хүний тархины дунд хэсэгт нэг нүд байдгийг олж мэдсэн. Бидний нээж өгдөг суваг нь яг энэ цэг рүү чиглэдэг, одоогийн анагаах ухаанд таньж мэдсэнтэй таарч байгаа юм. Энэ нүд нь бидний энэ хос энгийн нүдтэй адил хуурамч дүрслэлийг хүнд өгдөггүй, тэр нь бие бодийн мөн чанар, үндсэн шинж чанарыг хардаг. Иймээс дээд түвшинд хүрсэн тэнгэрийн мэлмийтэй хүн бидний энэ орон зайг нэвтэрч өөр цаг хугацааны орон зайг хардаг, энгийн хүнд харагддаггүй тэр байдлыг харж чаддаг. Доод түвшинд тэнгэрийн мэлмий нь нээгдсэн хүн нэвт харах чадвартай, хананы цаадах зүйлийг харах, хүний биеийг нэвт харах, ийм ер бусын чадвартай болдог.

Буддын системд тэнгэрийн мэлмий нээгдэхийг таван түвшинд хуваадаг: Махан нүдний нээгдэлт, тэнгэрийн нүдний нээгдэлт, билгийн нүдний нээгдэлт, номын нүдний

нээгдэлт, Будда нүдний нээгдэлт. Энэ бол тэнгэрийн мэлмийн гол таван том түвшин бөгөөд түвшин болгон дотроо дээд, дунд бас доод гэж хуваагддаг. Дао-гийн системд есөн есийн наян нэгэн давхаргын номын нүд гэж ярьдаг. Бид та бүгдийн тэнгэрийн мэлмийг нээж өгнө, гэхдээ тэнгэрийн нүдний нээгдэх түвшинд юмуу эсвэл түүнээс доогуур түвшинд нээж өгөхгүй. Яагаад вэ? Хэдийгээр чи энд бясалгал хийж эхэлсэн ч энгийн хүний түвшнөөс дөнгөж эхэлж байгаа, бас маш олон энгийн хүний зууралдсан сэтгэлээсээ салаагүй байгаа. Хэрэв тэнгэрийн нүдний нээгдэх түвшинд юмуу эсвэл түүнээс доод түвшинд нээчихвэл энгийн хүний ер бусын чадвар гэж үздэг хананы цаадах зүйлийг харах, хүний биеийг нэвт харах чадвар чамд гарна. Хэрэв бид энэ ер бусын чадварыг өргөн хэмжээнд дэлгэрүүлж хүн бүрийн тэнгэрийн мэлмийг энэ түвшинд нээж өгвөл энгийн хүний нийгмийг ноцтойгоор үймүүлнэ, энгийн хүний нийгмийн байдлыг эвдэнэ. Улсын нууцыг хадгалж чадахгүй, хүн хувцас өмссөн ч өмсөөгүйтэй адилхан, гэртээ байгаа хүнийг чи байшингийн гаднаас харчихна, гудамжинд явж байхдаа хонжворт сугалааны нэгдүгээр тохирлыг хараад сугалчихна, ийм байхыг зөвшөөрөхгүй! Та бүгд боддоо, нэг нэгээрээ бүгд тэнгэрийн мэлмий нээгдэх энэ түвшинд хүрвэл энэ нь хүн төрөлхтний нийгэм юм уу? Хүн төрөлхтний нийгмийг ноцтойгоор үймүүлэх байдал гарахыг туйлаас зөвшөөрөхгүй. Би хэрвээ чиний тэнгэрийн мэлмийг энэ түвшинд нээж өгвөл, чи магадгүй тэр дороо чигон багш болно. Зарим хүн урьд нь чигон багш болохыг мөрөөддөг байсан. Гэнэт тэнгэрийн мэлмий нээгдвэл хүний өвчнийг үзэж өгье гэнэ. Би тэгвэл чамайг буруу зам руу дагуулсан болох биш үү?

Тэгвэл би чамд ямар түвшинд нээж өгөх вэ? Би шууд чамд билгийн нүдний түвшинд нээж өгнө. Үүнээс дээд түвшинд нээж өгвөл чиний зан чанар хүрэхгүй, үүнээс доод түвшинд нээж өгвөл энгийн хүний нийгмийн байдлыг

ноцтойгоор эвдэнэ. Билгийн нүдний түвшинд нээвэл чи хананы цаадахыг юмуу хүний биеийг нэвт харах чадваргүй, гэхдээ чи өөр орон зайн орших байдлыг харж чадна. Энэ нь ямар ашигтай вэ? Энэ нь чиний бясалгах итгэлийг бэхжүүлнэ, чи энгийн хүний харж чаддаггүй зүйлсийг харна, тэдгээр нь үнэхээр бодитоор оршдог болохыг ойлгоно. Одоо чи юмыг тодорхой харж чадсан ч, тодорхой харж чадахгүй ч чамд энэ түвшинд нээж өгнө, энэ нь чамд бясалгахад тустай. Дафа-гаар жинхэнэ бясалгаж байгаа хүн өөрийнхөө зан чанарыг дээшлүүлэхэд хатуу шаардлага тавьж хандах юм бол энэ номыг уншихад адилхан үр дүн гарна.

Тэнгэрийн мэлмийн түвшинг шийддэг зүйл нь юу вэ? Чамд тэнгэрийн мэлмий нээж өгсний дараа чи бүх юмыг харж чадна гэсэн үг биш, түүнд бас нэг давхаргын ангилал байдаг. Тэгвэл энэ давхаргыг ямар зүйлээр тодорхойлдог вэ? Гурван хүчин зүйл байдаг. Нэгдэх хүчин зүйл нь: Хүний тэнгэрийн мэлмийд дотроос гадагшилсан заавал нэг орон байх ёстой, бид үүнийг охь чий гэдэг. Энэ нь ямар нөлөө үзүүлдэг вэ? Яг зурагтны дэлгэцтэй адил, хэрэв энэ нь фосфоргүй бол зурагт ассаны дараа зүгээр нэг чийдэнтэй адил зөвхөн гэрэл гаргана, дүрс байхгүй. Яагаад гэвэл фосфор байгаа учраас дүрс тодрон гарч ирдэг. Мэдээж энэ жишээ бол тийм оновчтой биш, яагаад гэвэл бид юмыг шууд хардаг, зурагтанд бол дүрс дэлгэцэн дээр гардаг. Ерөнхийдөө ийм л утгатай юм. Энэ охь чий бол маш нандин зүйл, буянаар гаргасан илүү нарийн охь зүйлээс бүтээгдсэн юм. Ер нь хүн болгонд байгаа охь чий бүгд адилгүй, арван мянган хүний дунд магадгүй хоёр хүнийх л нэг түвшинд байгаа.

Тэнгэрийн мэлмийн түвшин нь бидний энэ орчлон ертөнцийн Номын шууд илрэл юм. Энэ бол ер бусын зүйл, хүний зан чанартай салшгүй холбоотой. Хүний зан чанар

доогуур байвал, түүний түвшин нь бас доогуур юм. Яагаад гэвэл зан чанар муугаас болж түүний энэ охь чий их алдагдсан байдаг. Хэрэв энэ хүний зан чанар өндөр байвал, тэр бага наснаасаа эхлээд том болтлоо энгийн хүний нийгэмд нэр хүнд, хүн хүний хоорондын зөрчил, хувийн ашиг хонжоо, хүний элдэв хүсэл сэтгэл энэ бүгдэд даруу ханддаг байснаас магадгүй түүний охь чий нь нэлээд сайн хадгалагдаж үлдсэн. Иймээс тэнгэрийн мэлмий нээгдсэний дараа нэлээд тодорхой харж чаддаг. Зургаан наснаас доош хүүхдэд тэнгэрийн мэлмий нээгдвэл маш тодорхой хардаг, бас нээгдэх нь их амархан. Би нэг үг хэлэхэд л нээгдчихнэ.

Энгийн хүн, нийгмийн хүчтэй урсгалд бохирдох нь том будагтай торхонд орсонтой адил, хүмүүсийн зөв гэж үздэг зүйлс нь ихэнхдээ буруу байдаг. Хүн болгон сайхан амьдрахыг хүсдэг биз дээ? Сайхан амьдрахын төлөө магадгүй өөр хүний ашиг сонирхолд халдана, хувиа хичээсэн сэтгэлдээ автана, магадгүй бусдын ашиг орлогыг булаана, бусдыг дээрэлхэж бас хохирооно. Хувийн ашиг хонжооны төлөө энгийн хүмүүсийн дунд булаацалдана, тэмцэлдэнэ. Энэ нь орчлон ертөнцийн мөн чанарын эсрэг болсон юм биш үү? Иймээс хүмүүсийн зөв гэж үздэг зүйлс нь магадгүй зөв биш. Том хүмүүс хүүхдээ хүмүүжүүлэхдээ ирээдүйд энгийн хүний нийгэмд хөлийг нь олуулахын тулд “Чи овжин байж сур” гэж үргэлж заадаг. Манай орчлон ертөнцийн жишгээс харвал “овжин байх” гэдэг нь хэзээнээс буруу юм, яагаад гэвэл бид нар байгалийн жам ёсыг дага, хувийн ашгийг хөнгөн авч үз гэдэг. Тэр ийм овсгоотой, хувийн ашгийн төлөө зүтгэдэг. “Хэн чамайг дээрэлхэнэ, чи түүний багштай ярь, түүний эцэг эхтэй нь ярь”. “Газраас мөнгө олбол ав” ингэж хүүхдэд сургадаг. Бага наснаасаа авхуулаад том болтлоо ийм зүйлийг их сурвал яваандаа түүний энгийн хүний нийгэмд амиа хичээсэн сэтгэл нь улам их болж бусдыг хонжиж буянаа алддаг.

Буян, энэ бие бодийг алдахад устаж үгүй болдоггүй, харин өөр хүнд шилжин очдог. Гэвч энэ охь чий нь алга болно. Хэрэв хүн багаасаа их овжин, үргэлж хувиа хичээсэн, ашиг хонжоо их хардаг байсан бол түүний тэнгэрийн мэлмий нээгдсэн ч тодорхой харж чадахгүй. Гэхдээ үүнээс хойш энэ хэвээрээ үлдэнэ гэж байгаа юм биш. Яагаад вэ? Яагаад гэвэл бид бясалгалын явцад үүссэн эх үндсэндээ буцах, үнэнд хүрэх гэдэг, тасралтгүй бясалгахад охь чий дахин сэргэнэ, шинээр нөхөгдөнө. Иймээс зан чанартаа анхаарах ёстой. Бид бүх талаараа дээшилнэ, бүхэлдээ ахина. Зан чанар дээшилбэл бусад бүх зүйлс дагаад дээшилнэ. Харин зан чанар дээшлэхгүй бол тэнгэрийн мэлмийн охь чий-ч эргээд нөхөгдөхгүй. Ийм л зарчимтай юм.

Хоёрдох хүчин зүйл нь: Хүн өөрөө бясалгахад, хэрэв түүний төрөлхийн суурь нь сайн байвал тэнгэрийн мэлмий нь нээгдэж болно. Ер нь зарим хүний тэнгэрийн мэлмий нээгдэнгүүт цочдог. Яагаад цочдог вэ? Яагаад гэвэл хүмүүс гол төлөв шөнө дундын үед, харанхуй нам гүм байхад дасгалаа хийдэг. Тэр бясалгаж байхдаа магадгүй гэнэт нүдний нь өмнө нэг том нүд байхыг хараад цочдог. Ингэж их айж цочсоноосоо болоод дахин бясалгал хийхийг зүрхлэхгүй болдог. Яасан аймаар юм бэ! Тийм нэг том нүд өөдөөс нь хараад анивчих нь маш тодорхой. Иймээс зарим хүн тэр нүдийг мангасын нүд гэдэг, бас зарим нь Буддын нүд гэх мэтчилэн хэлдэг. Үнэндээ энэ бол чиний өөрийн нүд юм. Мэдээж, бясалгал өөрөөс шалтгаална, гон багшаас шалтгаална. Бясалгадаг хүний гон хувиргалтын бүхий л явц нь өөр орон зайд маш нарийн төвөгтэй явагддаг, зөвхөн нэг орон зайд биш, харин бүх орон зайд явагддаг, орон зай болгоны биед өөрчлөлт гардаг. Чи үүнийг өөрөө хийж чадах уу? Хийж чадахгүй. Эдгээр зүйлсийг бүгдийг нь багш зохицуулдаг юм, үүнийг багш хийдэг. Тийм ч учраас бясалгал өөрөөс шалтгаална, гон багшаас шалтгаална гэж

ярьдаг. Чи зөвхөн ийм хүсэлтэй, ингэж боддог байхад л болно, жинхэнэ энэ зүйлийг багш хийж өгдөг.

Зарим хүн өөрөө бясалгаад тэнгэрийн мэлмийг нээдэг. Бид үүнийг чиний нүд гэж үздэг, гэхдээ чи үүнийг өөрөө хувиргаж гаргаж чадахгүй. Зарим хүн багштай, багш чинь чиний тэнгэрийн мэлмий нээгдсэнийг хараад нэг нүдийг чамд хувиргаж гаргаж өгнө, үүнийг үнэн нүд гэдэг. Мэдээж зарим хүнд багш байхгүй, тэгэхдээ зам зуур тааралдсан багш байж магад. Буддын системд ингэж ярьдаг: Будда байхгүй газар гэж байхгүй, хаа сайгүй байдаг, тоо томшгүй олон. Зарим хүмүүс бас ингэж хэлдэг: Толгойноос гурван тохой өндөрт бурхадууд байдаг, энэ нь тэд маш олон гэсэн үг. Замд таарсан нэгэн багш чамайг сайн бясалгаж тэнгэрийн мэлмий чинь нээгдсэн, гэхдээ нэг нүд байхгүйг хараад чамд хувиргаж гаргаж өгнө, үүнийг мөн чи өөрөө бясалгаж гаргасанд тооцогддог. Хүнийг аврахад нөхцөл ярихгүй, үнэ өртөг асуухгүй, шан харамж авахгүй, алдар нэр хүсэхгүй. Тэд энгийн хүмүүс доторхи үлгэр дуурайлалтай хүнээс ч хавьгүй давуу, энэ бүгдийг нигүүлсэнгүй сэтгэлийн үүднээс үйлддэг юм.

Хүний тэнгэрийн мэлмий нээгдсэний дараа, ийм нэг байдал гардаг: Нүд гэрэлд их гялбаж цочром мэдрэмж төрдөг. Үнэндээ чиний нүдийг цочроосон юм биш, харин булцуут булчирхай цочирсноос чиний нүдэнд гялбах мэдрэмж төрдөг. Учир нь чамд энэ нүд хараахан байхгүй. Чамд энэ нүдийг өгсөний дараа, чиний нүд гялбахаа болино. Манай зарим бясаллагчид энэ нүдийг мэдэрдэг ба хардаг. Тэр нь орчлон ертөнцтэй адил мөн чанартай учраас маш гэнэн цайлган, бас сониуч. Тэр чиний тэнгэрийн мэлмий нээгдсэн үгүйг, юм харж чадах эсэхийг чинь шалгаж хардаг. Энэ нүд чиний дотор луу хардаг. Энэ үед чиний тэнгэрийн мэлмий нээгдсэн юм. Тэр чамайг харж байх үед, гэнэт чи түүнийг хараад цочдог. Үнэндээ энэ бол чиний нүд. Чи

үүнээс хойш юм харахдаа энэ нүдээрээ хардаг болно. Чамд энэ нүд байхгүй бол тэнгэрийн мэлмий нээгдсэн ч чи юм харж чадахгүй.

Гуравдахь хүчин зүйл бол: Түвшин дээшлэх тусам орон зай болгоны хооронд гарах ялгааны асуудал байдаг, энэ нь түвшинг жинхэнэ тодорхойлдог зүйл юм. Хүн юм харах гол сувгаас гадна бас олон дэд сувагтай байдаг. Буддын системд арьсны нүх болгоныг нэг нүд гэж ярьдаг, Дао-гийн системд биеийн сүв болгоныг нүд гэж ярьдаг. Энэ нь зүү эмчилгээний цэг болгон нүд юм. Мэдээж тэдний ярьж байгаа нь Ном биен дээр хувирах нэг янзын хэлбэр юм, харж чадахгүй газар гэж байхгүй.

Бидний ярьж байгаа түвшин үүнтэй адилгүй. Гол сувгаас гадна хоёр хөмсөг, зовхины дээгүүр болон зовхины доогуур мөн шангэн¹⁵ цэг гэх мэт хэдэн гол дэд суваг бас байдаг. Эдгээр нь түвшин нэвтрэх асуудлыг шийддэг. Хэрвээ ердийн бясалгадаг хүн энэ хэдэн газраар харж чадвал, энэ хүний түвшин аль хэдийн их өндөрт хүрсэн юм. Зарим хүн хоёр нүдээрээ бас харж чаддаг. Тэр энэ хоёр нүдээ бас бясалгаж янз бүрийн ер бусын чадвартай болгосон. Гэхдээ энэ нүдийг яаж сайн хэрэглэхийг мэдэхгүй бол тэр үргэлж нэг юмыг харахдаа нөгөө юмыг хардаггүй. Тийм байж бас болохгүй. Иймээс зарим хүн гол төлөв нэг нүдээрээ нэг талыг, нөгөө нүдээрээ нөгөө талыг хардаг. Түүнчлэн энэ нүдний доогуур (баруун нүд) дэд суваг байхгүй, яагаад гэвэл энэ бол Номтой шууд хамааралтай. Хүмүүс муу зүйл хийхдээ баруун нүдээр харах дуртай, иймээс баруун нүдний доогуур дэд суваг байхгүй. Энэ бол Гурамсан ертөнцийн номын бясалгалын үед гардаг хэдэн гол дэд суваг юм.

¹⁵ шангэн-хоёр нүдний дунд байрлах цэг

Маш дээд түвшинд хүрэхэд, Гурамсан ертөнцийн номын бясалгалаас гарсны дараа нэг янзын багц нүд бий болдог. Тодорхой хэлбэл энэ нь нүүрний дээд хэсэгт нэг том нүд үүсдэг, дотор нь тоо томшгүй олон жижиг нүд байдаг. Зарим маш өндөр түвшний аугаа гэгээрэгчийн бясалгаж гаргасан нүд нь маш олон, нүүрээр дүүрэн байдаг. Бүх нүднүүд юмыг харахдаа том нүдээр дамжуулж хардаг, юу хүссэн бүхнээ харж чаддаг. Нэг харцаар л бүх түвшинг бүгдийг нь хардаг. Одоогийн амьтан судлаачид, шавьж судлаачид ялаан дээр судалгаа хийдэг. Ялааны нүд маш том, микроскопоор харахад түүний дотор тоо томшгүй жижиг нүд байдаг, түүнийг багц нүд гэж нэрлэдэг. Бясалгагч хүн маш өндөр түвшинд хүрэхэд магадгүй ийм байдал гарна, Рулай түвшнээс олон дахин өндөрт хүрэхэд ийм байдал гардаг. Гэхдээ энгийн хүн энэ нүдийг харж чадахгүй. Дундаж түвшинд хүрсэн бясалгагч бас үүний оршиж байгааг харж чадахгүй, тэр хүн зөвхөн энгийн хүнтэй адил харагддаг. Яагаад гэвэл тэр багц нүд өөр орон зайд оршдог. Энэ нь түвшин нэвтрэхийг ярьж байгаа юм, өөрөөр хэлбэл өөр өөр орон зайд нэвтрэх асуудал юм.

Би тэнгэрийн мэлмийн бүтцийг ерөнхийд нь та бүгдэд ярилаа. Бид чиний тэнгэрийн мэлмийг гадны хүчээр нээнэ, энэ нь хурдан бөгөөд амар. Намайг тэнгэрийн мэлмийн талаар ярьж байх үед хүн болгоны духаар чангарч булчин нь агшиж дотогш татагдах мэт мэдрэмж төрнө. Ийм байдаг биз? Ийм л байдаг. Энд ирж жинхэнэ сэтгэлээсээ Фалунь Дафаг сурч байгаа хүн болгонд ийм мэдрэмж төрнө, дотогш дарах мэт гаднаас нөлөөлөх хүч нь нилээд их. Би зориуд нэг тусгай гон гаргаж чиний тэнгэрийн мэлмийг нээж өгч байгаа, түүнчлэн бас Фалунь явуулж чиний тэнгэрийн мэлмийг засч өгч байна. Би тэнгэрийн мэлмийн талаар ярихдаа зөвхөн Фалунь Дафа-г бясалгадаг хүн болгонд нээж өгнө. Гэхдээ хүн болгон тодорхой харж чадна гэж байгаа юм биш, бас хүн болгон харж чадна гэсэн үг биш. Энэ нь

чамаас, өөрөөс чинь шууд хамаарна. Чи харж чадахгүй байсан ч гэсэн зүгээр, аажим аажмаар бясалгаад л бай. Чи үргэлж түвшнээ дээшлүүлэх тусам аажмаар хардаг болно. Бүдэг хардаг байснаа аажмаар тод хардаг болно. Гагцхүү чи бясалгаад л байвал, сэтгэл шулуудан бясалгах юм бол гээгдсэн бүгдийг нөхөн сэргээж болно.

Чи өөрөө тэнгэрийн мэлмийг нээе гэвэл нэлээд хэцүү. Тэнгэрийн мэлмийг өөрөө нээх хэдэн хэлбэрийг ярья. Жишээ нь, та нарын зарим нь бясалгаж суухдаа духруугаа болон тэнгэрийн мэлмийгээ ажиглахад харанхуй юу ч байхгүйг мэдэрдэг. Яваандаа тэр хүн духан дотор нь аажмаар цайрч байгааг мэдэрнэ. Нэг хэсэг хугацаанд бясалгасны дараа түүний дух нь аажмаар гэгээтэй болж байгааг мэдэрдэг, дараа нь улаан өнгөтэй болдог. Энэ үед тэр нь зурагтаар юмуу кинонд цэцгийн дэлбээ хоромхон зуур дэлгэрэхийг харуулдаг шиг дэлгэрнэ. Ийм үзэгдэл гарах болно. Тэр улаан өнгө нэлэнхүй хавтгай байснаа гэнэт дунд нь товойж ирнэ, тэгээд үргэлжлэн дэлбээлнэ. Хэрэв чи үүнийг өөрөө бүрэн нээгдэж дуусахыг хүсвэл найм эсвэл арван жил ч багадна, яагаад гэвэл тэнгэрийн мэлмий бүхэлдээ бөглөрсөн байдаг.

Зарим хүний тэнгэрийн мэлмий нь бөглөрөөгүй мөн сувагтай байдаг. Гэхдээ тэр бясалгал хийдэггүй учраас тэнд энерги байхгүй. Иймээс тэр бясалгал хийхэд гэнэт нүдний нь өмнө нэг хар дугуй зүйл гарч ирдэг. Нэг хэсэг бясалгасны дараа тэр аажмаар цагаарч дараа нь гэгээтэй болдог. Эцэст нь гэгээ нь улам тодорсоор гэрэлтэж нүд гялбах мэт болдог. Зарим хүн би нарыг харлаа эсвэл би сарыг харлаа гэдэг. Үнэндээ тэр нарыг ч хараагүй, сарыг ч хараагүй. Тэгвэл тэр юу харсан бэ? Энэ бол тэр суваг зам юм. Зарим хүн дээд түвшин лүү нилээд хурдан нэвтэрдэг. Тэр нэг нүдийг суулгаж өгсний дараа шууд харж чадна. Зарим хүний хувьд маш хэцүү, бясалгал хийхэд л түүнд нэг

хонгилоор, эсвэл худаг, тунел дотуур гадагш гүйж байгаа юм шиг санагддаг, тэр ч байтугай унтахдаа хүртэл гадагшаа гүйж байгаа мэт мэдэрдэг. Зарим нь морь унаад давхиж байгаа юм шиг, зарим нь нисч байгаа мэт, заримд нь гүйж эсвэл машинаар давхиж байгаа юм шиг санагддаг. Тэдэнд үргэлж давхисан ч төгсгөлд нь хүрч чадахгүй мэт, яагаад гэвэл өөрөө тэнгэрийн мэлмийг нээхэд маш хэцүү. Дао-гийн системд хүний биеийг нэг жижиг орчлон ертөнц гэж үздэг. Хэрэв нэг жижиг орчлон ертөнц юм бол, та бүгд боддоо, духнаас булцуут булчирхай хүртэл 108 мянган ли¹⁶-гээс давсан хол юм. Тиймээс гадагшаа тувт давхисан ч төгсгөлд нь хүрч чадашгүй санагддаг.

Дао-гийн системд хүний биеийг жижиг орчлон ертөнц гэж үздэг нь их зүй зохистой. Гэхдээ бүтэц зохион байгуулалт нь орчлон ертөнцтэй төстэй гэсэн үг биш, бидний энэ материаллаг орон зайд оршиж байгаа биеийн орших хэлбэрийг ярьж байгаа биш. Орчин үеийн шинжлэх ухаанд танин мэдсэн бодит биений эснээс доош ямар байдал байдаг вэ? Молекулын янз бүрийн бүтэц байдаг. Молекулаас жижиг бол атом, протон, атомын цөм, электрон мөн кварк байдаг. Одоогийн судлагдсанаар хамгийн бичил биет бол нейтрино. Тэгвэл жинхэнэ хамгийн жижиг бичил биет юу вэ? Үүнийг судлахад маш хэцүү. Шагжамүни өтлөх насандаа ийм нэг зүйл ярьсан: Том нь хязгааргүй уудам, жижиг нь хязгааргүй бичил. Утга нь юу вэ? Рулай давхаргад харахад, том нь орчлон ертөнцийн зах нь харагдашгүй, жижиг нь бие бодийн хамгийн бичил нь харагдашгүй, тиймээс тэр “Том нь хязгааргүй уудам, жижиг нь хязгааргүй бичил” гэж ярьсан.

¹⁶ ли- Хятадын зайн нэгж (=0.5 км) "108 мянган ли" гэдэг нь Хятадаар их хол зайг илэрхийлдэг хэллэг.

Шагжамүни бас гурван мянган хорвоо ертөнцийн тухай ярьсан. Тэр бидний энэ орчлон ертөнцөд, энэ тэнгэрийн заадас галактикт манай хүн төрөлхтөнтэй адил бодит биетэй амь бодь оршдог гурван мянган гариг байдаг гэж хэлсэн. Тэр бас нэг ширхэг элсэн дотор ийм гурван мянган хорвоо ертөнц байдаг гэж ярьсан. Тэгэхээр ширхэг элс нь нэгэн орчлон ертөнцтэй адил, бидэнтэй адил оюун ухаантай хүмүүс амьдардаг, од гаригстай, уул устай. Энэ нь төсөөлөхөд бэрх. Хэрэв ийм байвал та бүгд бодоод үздээ, түүн дотор бас элс байгаа биз дээ? Тэр элсний нэг ширхэг дотор бас л гурван мянган хорвоо ертөнц байна биз дээ? Тэгвэл тэр гурван мянган хорвоо ертөнц дотор бас л элс байгаа биз дээ? Тэр элсний ширхэг дотор бас гурван мянган хорвоо ертөнц байна биз дээ? Иймээс Рулай түвшинд үүний төгсгөл нь харагдаагүй.

Молекулаас тогтсон хүний эс нь бас адилхан. Хүмүүс орчлон ертөнц хэр том бэ гэж асуудаг. Би та бүхэнд хэлье, энэ орчлон ертөнц өөрийн гэсэн зах хязгаартай. Рулай түвшинд үүнийг зах хязгааргүй, хэмжээлшгүй уудам гэж үздэг. Түүнчлэн хүний биеийн доторхи нь молекулаас микро жижиг хэсэг хүртэлх бичил түвшинд энэ орчлон ертөнцтэй адил том, үүнийг сонсоход төсөөлшгүй. Хүн юмуу нэг амийг бүтээхэд түүний амины бүтцийн онцгой элементүүд болон үндсэн мөн чанар нь туйлын микро түвшинд бүрддэг. Иймээс бидний орчин үеийн шинжлэх ухаан энэ зүйлийг судлахад маш хол хоцорсон. Орчлон ертөнц даяархи гаригууд дээр орших өндөр оюун ухаант амьтай харьцуулахад манай хүн төрөлхтний шинжлэх ухаан, технологийн түвшин маш их доогуур юм. Бид нэг дор нэг цагт хамт орших өөр орон зайг танин мэдэж ч чадаагүй байхад харь гаригийн нисдэг тавагнууд шууд өөр орон зайн хооронд аялж, орж гарч чаддаг. Тэдний цаг

хугацааны орон зайн ухагдахуун өөр байдаг, иймээс тэд хүссэн цагтаа хүний төсөөлшгүй хурдаар хэдийд ч ирж, буцаж чадна.

Бид тэнгэрийн мэлмийн талаар ярихад ийм асуудал яригддаг: Чи сувган замаар гадагш гарц руу гүйхэд хязгаар төгсгөлгүй мэт санагдана. Зарим хүн магадгүй өөр нэг байдлыг хардаг: тэдэнд хонгилоор гүйж байгаа юм шиг санагддаггүй, харин нэг зах хязгааргүй урт замаар урагшаа гүйж байгаа мэт мэдэрдэг, замын хоёр талаар уул, ус бас хот байна, үргэлж гадагш гүйгээд л байна. Үүнийг сонсоход бүр ч төсөөлөхийн аргагүй байж магадгүй. Би нэг чигон багш ийм зүйл ярьсныг санаж байна: Хүний арьсны нүхэнд хот байдаг, дотор нь галт тэрэг бас машин явж байдаг. Үүнийг сонссон бусад хүмүүс мэл гайхаж төсөөлж чадаагүй. Та бүгд бие бодийн микро хэсгүүд болох молекул, атом, протон байдгийг мэдэж байгаа. Цааш нь судлан үзэхдээ, хэрвээ чи түвшин болгоныг нэг цэг дээр биш бүхэл хавтгайд нь, молекулын давхаргын хавтгайг, атомын давхаргын хавтгайг, протон давхаргын хавтгайг болон атомын цөмийн хавтгайг харж чадвал, чи өөр өөр орон зайн орших хэлбэрийг харах болно. Хүний биеийг оролцуулан, бүх зүйлс орчлон ертөнцийн орон зайн түвшинтэй холбоотой нэг дор зэрэгцэн оршдог. Бидний орчин үеийн физикт бие бодийн микро элементийг судлахдаа зөвхөн нэг ширхэг микро элементийг задлан шинжилдэг, атомын цөмийг задрах урвалд оруулж дараа нь задарч хуваагдсан бүрэлдхүүнийг судлах замаар явагддаг. Хэрэв бүх атомын элементүүдийн болон молекулын элементүүдийн орших түвшинг бүхэлд нь томруулж харах ямар нэгэн төхөөрөмж байвал, энэ байдлыг харж чадвал, чи энэ орон зайг нэвтэрч өөр орон зайн орших үнэн байдлыг харна. Хүний бие гаднах орон зайтай зохилдсон холбоотой байдаг, тэр бүгд ийм орших хэлбэртэй.

Өөрөө тэнгэрийн мэлмийг нээхэд зарим өөр байдал гардаг. Бид түгээмэл байдаг үзэгдлийн талаар ярилаа. Зарим хүн тэнгэрийн мэлмий нь эргэж байна гэж хардаг. Дао системийн гон-оор бясалгагч тэнгэрийн мэлмий дотор нь ямар нэгэн зүйл эргэж байгааг үргэлж хардаг. Тайжи таваг “пад” хийн хагардаг, дараа нь дүрс түүнд харагдана. Гэхдээ түүний толгойн дотор Тайжи байгаа юм биш, анхандаа түүний багш нэг цогц зүйлийг суулгаж өгсөн, үүний нэг зүйл нь Тайжи юм. Багш нь түүний тэнгэрийн мэлмийг хаачихдаг, нээгдэх цаг нь болоход Тайжи хагарч нээгддэг. Багш үүнийг зориуд төлөвлөж зохицуулж өгдөг, энэ нь түүний толгойд өмнө нь байгаагүй.

Бас зарим хүн тэнгэрийн мэлмийг нээхээр хөөцөлддөг, гэвч их хичээх тусам нээгдэхгүй, учир нь юу вэ? Тэр өөрөө ч мэдэхгүй. Гол учир нь тэнгэрийн мэлмийг хүсч болохгүй, хүсэх тусам нээгдэхгүй. Үүнийг улам их хүсэх тусам тэр нээгдэхгүйгээс гадна бас түүний тэнгэрийн мэлмий дотроос хар ч биш цагаан ч биш нэг зүйл гарч тэнгэрийн мэлмийг нь таглачихдаг. Удаан үргэлжлэх тусам хүрээ нь томордог, улам их гарч улам ихээр хуримтлагдана. Тэнгэрийн мэлмий бүр ч нээгдэхгүй, чи их хүсэх тусам энэ зүйл нь улам ихээр урсан гарна. Эцэст нь түүний бүх биеийг бүрхэж их зузаан том оронг үүсгэдэг. Энэ хүний тэнгэрийн мэлмий үнэхээр нээгдсэн ч тэр харж чадахгүй, яагаад гэвэл түүний зууралдсан сэтгэлээс болж энэ нь таглагддаг. Гагцхүү тэр ирээдүйд үүнийг дахин бодохоо боливол, энэ зууралдсан сэтгэлээ бүрмөсөн орхивол тэр нь аажмаар арилна. Гэхдээ маш зүдэрч, урт хугацаанд бясалгаж байж үүнийг арилгана. Ингэх хэрэг байхгүй. Зарим хүн үүнийг ойлгодоггүй. Багш нь түүнд үүнийг хүсч болохгүй, хөөцөлдөж болохгүй гэсээр байтал тэр итгэхгүй үргэлж хүссэн хэвээрээ л байна, эцэст нь үр дүн нь эсрэгээр болдог.

Далдыг харах ер бусын чадвар

Тэнгэрийн мэлмийтэй шууд холбоотой нэг ер бусын чадвар бол далдыг харах чадвар юм. Зарим хүн ингэж ярьдаг: Би энд суугаад Бээжингийн байдлыг, Америкийн байдлыг мөн дэлхийн нөгөө талыг ч харж чадна. Зарим хүн үүнийг ойлгодоггүй, бас шинжлэх ухааны аргаар ч тайлбарлах боломжгүй юм. Яагаад ингэдэг вэ? Хүмүүс үүнийг ингэж ч нэг тайлбарлаж тэгж ч нэг тайлбарлаад учрыг нь хэлж чаддаггүй. Зарим хүн яаж ийм чадвартай болдог байна гэж гайхдаг. Энэ нь тийм биш юм. Гурамсан ертөнцийн номын түвшинд бясалгаж байгаа хүнд ийм чадвар байхгүй. Түүний харж байгаа нь, түүний далдыг харах болон бусад олон ер бусын чадваруудыг оролцуулан бүгд нэг онцгой орон зайд нөлөө гаргадаг, цаад зах нь манай хүн төрөлхтөний орших энэ бодит орон зайн хүрээнээс хэтрэхгүй, ер нь өөрийнхөө орон зайн хүрээнээс ч хэтрэхгүй.

Хүний биеийн тодорхой нэг орон зайд нэг хүрээ байдаг, энэ хүрээ нь буяны хүрээтэй адилгүй, нэг орон зайд оршдоггүй гэхдээ хүрээний хэмжээ нь ижилхэн. Энэ хүрээ нь орчлон ертөнцтэй холбоотой байдаг. Орчлон ертөнцөд оршдог юм бүхэн түүний энэ хүрээнд тусгагдаж байдаг. Бүх зүйлс тусгагдаж болно. Энэ бол нэг хэлбэрийн дүрс, бодит биш юм. Жишээ нь дэлхийд Америк улс байдаг, Вашингтон хот байдаг. Түүний энэ хүрээн дотор Америк улс болон Вашингтон хот тусгагдана, тэгэхдээ тэр бол дүрсл юм. Хэдийгээр энэ нь тусгагдсан дүрс ч гэсэн бие бодийн орших нэг хэлбэр, тэнд болж байгаа өөрчлөлтийг даган тусгагдсан дүрс нь бас даган өөрчлөгддөг. Иймээс зарим хүний ярьдаг далдыг харах ер бусын чадвар нь өөрийн орон зайн хүрээн доторхи зүйлийг харж байгаа юм. Хүн Гурамсан ертөнцийн номын бясалгалаас гарсны дараа ингэж харахгүй болно. Тэр юмыг шууд харна, үүнийг

Буддын номын эрдэм чадал гэдэг. Тэр бол зүйрлэшгүй их сүр хүчтэй.

Гурамсан ертөнцийн номонд далдыг харах ер бусын чадвар гэж ямар учиртай вэ? Би та бүхэнд тайлбарлая: Энэ хүрээний орон зайд хүний духан хэсэгт нэг толь байдаг. Бясалгал хийдэггүй хүний толь өөр лүү нь харсан байдаг, харин бясалгал хийдэг хүний толь эсрэг эргэж харсан байдаг. Хүний далдыг харах ер бусын чадвар гармагц толь нь нааш цааш эргэдэг болно. Дүрсийг тасралтгүй жигд хөдөлгөөнтэй гаргахын тулд киноны хальс секундэнд 24 кадрын хурдтай эргэдгийг та бүхэн мэднэ. Хэрэв секундэнд 24 кадраас бага хурдтай гаргавал дүрс жигд биш үсчин харагддаг. Толины эргэх хурдны хэмжээ нь нэг секундэнд 24 кадраас илүү, тэгээд тусгаж авсан зүйлээ эргүүлж чамд харуулдаг. Дахин буцаж эргэхэд тусгагдсан дүрс арчигддаг. Энэ нь дахин дүрсийг толинд тусгаж харуулаад эргэж дахин арилгана. Дараа нь дахиж тусгаж дахиад эргэж арилгах явц тасралтгүй үргэлжилнэ. Иймээс чиний харсан зүйлүүд хөдөлгөөнтэй байдаг. Энэ нь чиний орон зайн хүрээн доторхи зүйлийг тусгаж чамд үзүүлж байгаа, харин орон зайн хүрээний зүйл бол том орчлон ертөнцөөс тусгагддаг.

Тэгвэл хүн биеийнхээ ард байгаа зүйлийг яаж харах вэ? Ийм жижигхэн толиор яаж биеийн эргэн тойрныг бүгдийг нь тусгаж чадах юм? Та бүгд, тэнгэрийн мэлмий тэнгэрийн нүд нээгдэх түвшнөөс дээгүүр нээгдэж билгийн нүд нээгдэх түвшинд ойртоход бидний энэ орон зайг нэвтрэх байдалд ордгийг мэднэ. Яг энэ шилжих үед тэнгэрийн мэлмийд нэг өөрчлөлт гардаг. Бодит орших зүйлсийг харахад тэр бүгд алга болдог. Хүн болон хана алга болдог, бүх зүйл байхгүй болчихдог. Ямар ч материаллаг зүйл үлдэхгүй. Өөрөөр хэлбэл улам лавшруулж харахад энэ тусгай тогтсон орон зайд хүн оршдоггүй болохыг мэднэ, зөвхөн нэг толь л чиний орон зайн хүрээн дотор босоогоор байдаг. Чиний

орон зайн хүрээн дотор орших энэ толь нь чиний бүхэл орон зайтай адилхан том хэмжээтэй. Иймээс тэр дотор нь эргэхдээ бүх зүйлийг хаана ч байсан тусгаж байдаг. Энэ нь чиний орон зайн хүрээн дотор орчлон ертөнцөөс тусгагдсан бүгдийг чамд харуулж өгч чадна. Энэ бол бидний ярьж байгаа далдыг харах ер бусын чадвар юм.

Хүний бие судлаачид энэ ер бусын чадварыг шалгаж тогтоохдоо ихэнхдээ үүнийг үгүйсгэх нь амархан. Үүнийг үгүйсгэдэг шалтгаан нь: Жишээлбэл нэг хүний Бээжинд байгаа хамаатанг гэртээ юу хийж байгааг үзүүлэхэд, түүний нэр болон ерөнхий байдлыг хэлсний дараа тэр харчихна. Тэр түүний байр нь ямар янзтай, үүдээр нь яаж ордог, өрөөн доторхи тавилга нь ямар болохыг хэлнэ. Бүгдийг нь зөв хэлсэн. Тэр хүн одоо юу хийж байна? Тэр хүн юм бичиж байна гэж хэлсэн. Энэ хэлснийг батлахын тулд түүний хамаатан руу утасдаж асууна, чи одоо юу хийж байна? Би хоол идэж байна. Гэтэл энэ нь түүний харсантай зөрж байгаа юм биш үү? Урьд ийм шалтгаанаас болж энэ ер бусын чадварыг үгүйсгэдэг байсан. Тэрээр орчин байдлыг огтхон ч алдаагүй хэлсэн. Яагаад гэвэл бидний энэ орон зай ба цаг хугацаа, бидний хэлдгээр цаг хугацааны орон зай нь ер бусын чадвар оршиж байгаа тэр орон зайнаас цаг хугацааны хувьд зөрөөтэй байдаг. Хоёр талын цаг хугацааны ухагдахуун нь адилгүй. Тэр арай өмнөхөн юм бичиж байсан, одоо хоол идэж байна, ийм л цагийн зөрөөтэй. Иймээс хүний бие судлаачид энгийн онолын үүднээс харж одоогийн шинжлэх ухааны дагуу зүйчлэн бодож судалбал ахиад арван мянган жил болсон ч үр дүнгүй. Яагаад гэвэл эдгээр нь энгийн хүний зүйлээс давсан зүйл, иймээс хүн үзэл санаандаа эргэлт хийх хэрэгтэй, эдгээр зүйлсийг дахиж ингэж ойлгож болохгүй.

Өнгөрсөн болон ирээдүйг харах ер бусын чадвар

Тэнгэрийн мэлмийтэй шууд холбоотой бас нэг ер бусын чадвар байдаг, үүнийг өнгөрсөн болон ирээдүйг харах чадвар гэдэг. Одоо дэлхийд зургаан төрлийн ер бусын чадвар нийтэд хүлээн зөвшөөрөгдсөн, үүнд тэнгэрийн мэлмий, далдыг харах бас өнгөрсөн болон ирээдүйг харах чадвар багтдаг. Өнгөрсөн болон ирээдүйг харах чадвар гэж юу вэ? Энэ нь хүний ирээдүйг болон өнгөрснийг мэдэх чадвар юм. Нилээд сайн ийм чадвартай хүн нийгмийн хөгжил болон бууралтыг хэлж чадна. Энэ чадвар нь улам хүчтэй бол од гаригсын өөрчлөгдөх зүй тогтлыг харж чадна. Энэ бол өнгөрсөн ба ирээдүйг мэдэх ер бусын чадвар юм. Яагаад гэвэл бие бодь нь тогтсон зүй тогтлын дагуугаар хөдөлдөг, онцгой нэг орон зайд ямар ч бие бодийн бусад маш олон орон зай болгонд орших хэлбэр байдаг. Жишээ нь: Хүний бие хөдлөхөд биеийн эсүүд бүгд дагаад хөдөлдөг, мөн микро түвшинд бүх молекул, протон, электрон болон хамгийн бичил хэсгүүд ч бас хамт хөдөлж байдаг. Гэхдээ тэдгээр нь өөрийн бие даасан орших хэлбэртэй бөгөөд өөр орон зайд орших биеийн хэлбэрт бас өөрчлөлт гардаг.

Бид бие бодийг устдаггүй гэж ярьсан биз дээ? Хүн юу л хийнэ, гарын хөдөлгөөнөөр хийсэн бүгд бие бодийн оршихуйтай, тэр бүгд нэг тусгай тогтсон орон зайд дүрс ба мэдээллийг үлдээдэг. Өөр орон зайд тэр устахгүй, үүрд тэнд үлддэг. Ер бусын чадвартай хүн өнгөрсөн үеийн дүрс мэдээллийг хараад юу болсныг мэдчихдэг. Ирээдүйд чи өнгөрсөн болон ирээдүйг мэддэг чадвартай болсны дараа өнөөдөр миний энд лекц уншиж байгааг харахад тэнд энэ хэвээр оршиж байх болно. Энэ нь аль хэдийн тэнд нэгэн зэрэг үлдсэн байдаг. Хүн төрөхөд цаг хугацааны ухагдахуун байхгүй нэгэн онцгой орон зайд түүний бүхэл амьдралын явц аль хэдийн зэрэгцэн оршиж байдаг. Зарим хүний хувьд түүний нэг бус амьдралын явц нь оршиж байдаг.

Магадгүй зарим хүн ингэж боддог: Тэгвэл бид өөрсдийнхөө чармайлтаар өөрийгөө өөрчлөх шаардлагагүй болсон юм биш үү? Тэр хүлээн зөвшөөрөхгүй. Үнэндээ өөрийнхөө чармайлтаар хүний амьдралын зарим жижиг зүйлийг өөрчилж болно, тэдгээр жижиг зүйлийн зарим хэсгийг өөрийн зүтгэлээр өөрчилж болно. Гэхдээ чи юмыг хүчилсний дүнд өөрчилсөн, тэгээд магадгүй энэ нь нүгэл болно. Гийм биш бол нүгэл үйлдэх асуудал байхгүй болно, бас сайн зүйл хийх, муу зүйл хийх ч асуудал байхгүй болно. Заавал өөрийнхээ хүссэнээр хийхэд бусдын эрх ашгийг хохироож муу зүйл хийчихнэ. Иймээс бясалгалд үргэлж байгалийн жам ёсыг дага гэж ярьдаг, ийм л зарчимтай. Яагаад гэвэл өөрийнхээрээ зүтгэснээс болж хүнийг хохирооно. Хэрэв чиний хувь тавиланд байхгүй, нийгэм дэх өөр хүнд хамаатай зүйлийг авбал, чи түүнд өртэй болдог.

Энгийн хүн, том үйл явдлыг үндсэндээ өөрчилж чадахгүй. Үүнийг өөрчлөх нэг зам бий, энэ нь тэр хүн үргэлж муу зүйл хийхэд, хийхгүй муу зүйл гэж байхгүй бол тэр өөрийнхөө амьдралын замыг өөрчилж чадна. Гэхдээ тэр хүн бүрмөсөн усталтанд тулгарна. Бид дээд түвшнээс харахад хүн үхэхэд сүнс нь устдаггүй. Сүнс нь яагаад устдаггүй вэ? Үнэндээ бидний харснаар хүн үхсэний дараа моргийн өрөөнд байгаа шарил нь зөвхөн бидний энэ орон зайд байгаа эсээс тогтсон хүний бие юм. Энэ орон зайд орших хүний дотоод эрхтэн, биений бүх эд эсүүд болон бүхэл хүний бие, энэ орон зайны эсүүд нь салан үлддэг. Харин өөр орон зайд байгаа молекул, атом, протон гэх мэт бүр бичил элементүүдээс тогтсон бие нь үндсэндээ үхдэггүй. Тэр бусад орон зайд, микро орон зайд оршсон хэвээр байдаг. Мөн аль муу болгоныг хийдэг хүний бүх эс нь бүр мөсөн задрахад хүрнэ. Буддын шашинд үүнийг бие, сүнс бүгд устах гэдэг.

Хүний амьдрах насыг өөрчлөх өөр нэг арга зам байдаг, энэ цорын ганц зам бол хүн энэ цагаас хойш бясалгалын замаар явах юм. Яагаад бясалгалын замаар явахад хүний амьдрах насыг өөрчилж болдог вэ? Гэхдээ энэ зүйлийг хэн тийм амар өөрчилж чадах юм? Энэ хүн бясалгалын замаар явах хүсэлтэй, ийм бодол нэг гарчихвал алт шиг гялалзаж арван зүгийн дэлхийг доргионо. Буддын систем дэх орчлон ертөнцийн ухагдахуунд арван зүгийн дэлхий гэсэн онол байдаг. Дээд төрлийн амь бодийн харснаар хүний амь нь зөвхөн хүн байхын тулд биш юм. Хүний амь бол орчлон ертөнцийн орон зайд үүсдэг, орчлон ертөнцтэй адил мөн чанартай, энэрэнгүй бөгөөд Үнэн, Нинжин, Тэвчээр гэсэн бие бодиор бүтээгдсэн. Мөн үүнд бас олон нийтийн харилцаа байдаг. Тэр олон нийтийн харилцаан дунд нийгмийн харилцаа үүсэхэд зарим нь доройтож доод түвшин лүү унадаг. Тэд энэ түвшинд үлдэж чадахгүй дахин муу болбол улам доошилж дахин нэг доогуур түвшин лүү унана. Тэд үргэлжлэн унан унасаар эцэст нь энгийн хүний энэ түвшинд унаж ирдэг.

Энэ түвшинд унасан хүн устгагдах ёстой. Гэхдээ тэдгээр аугаа гэгээрэгчид нигүүлсэнгүй сэтгэлийн үүднээс зориуд ийм нэгэн орон зайд бий болгосон, бидний хүн төрөлхтний нийгмийн энэ орон зай юм. Энэ орон зайд хүмүүнд нэмэлт нэг махан бие бодийг, мөн зөвхөн бидний энэ материаллаг орон зайд хязгаарлагдсан юмыг хардаг илүү хос нүдийг өгсөн. Өөрөөр хэлбэл төөрөлтийн дунд унаж ирсэн хүнд орчлон ертөнцийн үнэн байдал, бусад бүх орон зайд харагддаг зүйлсийг харуулахгүй. Төөрөлтийн дунд, ийм нөхцөлд түүнд нэг боломж үлдээсэн. Яагаад гэвэл төөрөлтийн дунд байгаа учраас хамгийн хэцүү, ийм бие түүнд гашуун зовлон амсуулна. Хүн энэ орон зайнаас дээш буцаж чадвал, Дао-гийн системд ярьдгаар эх үндсэндээ буцах, үнэнд хүрэх гэдэг. Түүнд бясалгах сэтгэл гарвал Буддын чанар гарсан гэсэн үг. Энэ сэтгэлийг маш их нандин

гэж үздэг, мөн хүмүүс түүнд туслах болно. Хүн ийм гашуун зовлонтой орчинд төөрчихөөгүй бас буцах хүсэлтэй, иймээс түүнд тусална, болзолгүйгээр тусална, юугаар ч хамаагүй тусална. Яагаад бид энэ зүйлийг бясалгаж байгаа хүнд хийж болдог, харин энгийн хүнд хийж болдоггүй вэ гэдэг нь ийм л учиртай юм.

Тэгвэл зөвхөн өвчнөө л эдгээх хүсэлтэй энгийн нэг хүнд бид юугаар ч тусалж чадахгүй. Энгийн хүн бол энгийн л хүн. Энгийн хүн энгийн хүний нийгмийн байдалд нийцсэн байх ёстой. Олон хүн Будда бүх амийг аварна, Буддын системд бүх амийг аварна гэж ярьдаг биз дээ гэдэг. Би чамд хэлье, чи Буддын бүх судрыг сөхөөд үз, энгийн хүний өвчнийг эдгээнэ гэдэг нь бүх амийг аварч байгаа хэрэг гэж хаана ч бичээгүй. Сүүлийн хэдэн жилд тэдгээр хуурамч чигон багш нар энэ зүйлийг сүйтгэж бусниулсан. Тэдгээр жинхэнэ чигон багш нар, зам нээж өгсөн багш нар бусад хүний өвчнийг эдгээ гэж чамд ер хэлээгүй. Тэд зөвхөн өөрөө дасгалаа хийгээд өвчнөө эдгээ, биеэ сайжруул гэж заасан. Чи бол энгийн хүн, хэдхэн өдөр үүнийг заалгаад яаж өвчнийг эдгээх юм? Энэ нь хүнийг залилж байгаа хэрэг биш үү? Энэ нь чиний зууралдсан сэтгэлийг улам дэгдээж байгаа юм биш үү? Тэр нь нэр төр, хувийн ашиг сонирхол болон ер бусын чадвартай болохыг хөөцөлдөж энгийн хүний дунд гайхуулна! Үүнийг туйлаас зөвшөөрөхгүй. Иймээс зарим хүн юмыг хөөцөлдөх тусам улам олодоггүй. Чамайг ингэж хийхийг зөвшөөрөхгүй, чамайг бас ингэж энгийн хүний нийгмийн байдлыг хамаагүй эвдэхийг зөвшөөрөхгүй.

Энэ орчлон ертөнцөд ийм нэг зарчим байдаг, чи өөрийнхээ эх үндсэндээ буцах, үнэнд хүрэхийг хүсвэл бусад нь чамд тусална. Тэд хүний амь энгийн хүний дунд байх ёсгүй харин буцах ёстой гэж үздэг. Хүн төрөлхтөн ямар ч өвчингүй, ая тухтай хангалуун амьдрах боломжтой бол, чамайг бурхан болооч гэсэн ч чи очихгүй. Өвчин зовлонгүй,

бас хүний хүссэн юм бүхэн нь байвал ямар сайхан байх бол, ёстой бурхны орон шиг. Гэхдээ чи муу болсноос энд унаж ирсэн, иймээс чи таатай байж чадахгүй. Хүн төөрөлтийн дунд муу зүйл хийхдээ амархан, Буддын шашинд үүнийг нүглийн үрийг хариулах гэж ярьдаг. Иймээс зарим хүнд гай зовлон, муу зүйл тохиолдож байгаа нь тэд өөрсдийн нүглийн үрийг хариулж байгаа хэрэг юм. Буддын шашинд Будда хаа сайгүй байдаг гэдэг. Нэг Будда гараараа даллахад л бүх хүн төрөлхтний өвчинг байхгүй болгож чадна, энэ бол лавтай юм. Ийм олон Будда байхад яагаад үүнийг хийдэггүй вэ? Яагаад гэвэл тэр хүн урьд нь муу зүйл хийснээс өр тавьсан, тэгээд энэ зовлонг амсаж байгаа. Хэрэв чи түүнийг эдгээчих юм бол, энэ орчлон ертөнцийн зарчмыг эвдэж байгаатай адил, хүн муу зүйл хийж хүнд өртэй болоод төлөхгүй байж болно гэсэн үг, ийм байхыг зөвшөөрөхгүй. Иймээс хэн боловч энгийн хүний нийгмийн байдлыг сахин хамгаалдаг, хэн ч үүнийг эвдэхгүй. Бясалгал бол өөрийгөө таатай өвчингүй байлгах, жинхэнэ ангижрах зорилгондоо хүрэх цорын ганц зам! Хүнийг ариун номоор бясалгуулах нь, бүх амийг жинхэнэ утгаараа аварч байгаа юм.

Энэ олон чигон багш өвчнийг яаж эдгээж чаддаг вэ? Тэд яагаад өвчин эдгээхийг ярьдаг вэ? Зарим хүн магадгүй энэ асуудлын талаар боддог, эдгээр чигон багш нарын ихэнх нь ариун замынх биш. Жинхэнэ чигон багш бясалгалын явцад амь гашуун зовлонтой байгааг хараад энэрэнгүй сэтгэл, өрөвдсөн сэтгэлийн улмаас тэр хүнд тусалдаг, үүнийг бол зөвшөөрнө. Гэхдээ тэр өвчнийг бүрмөсөн эдгээж чадахгүй, харин өвчинг түр зуур намдааж эсвэл хойшлуулдаг. Одоо өвчингүй, гэхдээ ирээдүйд тусна, энэ өвчнийг ирээдүйд хойшлуулсан. Эсвэл чамд хувиргаж өгдөг, чиний ойр дотны хүний биед шилжүүлдэг. Харин бүрмөсөн чиний энэ нүглийг арилгана гэвэл тэр хийж чадахгүй. Энгийн хүнд үүнийг хамаагүй хийхийг зөвшөөрөхгүй, харин зөвхөн бясалгаж байгаа хүнд бол болно. Ийм л зарчимтай юм.

Буддын системд бүх амийг аврах гэдэг үгийн утга нь, чамайг энгийн хүний хамгийн гашуун зовлонтой байдлаас гаргаж дээд түвшинд хүргэх гэсэн үг юм. Чи үүрд гашуун зовлонг амсахгүй болно, түүнээс ангижирна, ийм л утгатай юм. Шагжамүни нирваны нөгөө эргийн тухай ярьсан биз дээ? Энэ бол бүх амийг аврах гэдгийн жинхэнэ утга нь юм. Чи энгийн хүний дунд жаргалтай маш их мөнгөтэй, ор нь хүртэл мөнгөөр дэвсэгдсэн мөн ямар ч гай зовлонгүй амар тайван амьдарвал, чамайг бурхан бол гэсэн ч чи үгүй гэнэ. Бясалгаж байгаа хүний хувьд чиний амьдрах насны замыг өөрчилж болно, зөвхөн бясалгавал үүнийг өөрчилж өгнө.

Өнгөрснийг болон ирээдүйг мэдэх ер бусын чадварын хэлбэр нь духандаа нэг телевизийн жижигхэн дэлгэцтэй байхын адил. Зарим хүнд энэ нь духан дээр нь, заримд нь духных нь ойролцоо байдаг. Бас зарим хүний духан дотор нь байдаг. Зарим хүн нүдээ аньж юмыг хардаг. Хэрэв энэ чадвар нь хүчтэй бол нүдээ анихгүйгээр юмыг харж чаддаг. Гэхдээ өөр хүнд харагдахгүй, энэ бол түүний орон зайн хүрээнд байгаа зүйлүүд. Өөрөөр хэлбэл энэ ер бусын чадвар гарсаны дараа өөр орон зайд харсан байдлыг эргээд тусгаж өгөх бас нэг зөөгчийн үүрэгтэй ер бусын чадвар байдаг. Үүний үр дүнд тэнгэрийн мэлмийд харагддаг. Хүний ирээдүйг болон өнгөрснийг маш тодорхой харж болдог. Мэрэг төлгөөр яаж сайн үзсэн ч жижиг үйл явдлын талаар нарийвчлалтай хэлж чадахгүй. Харин ийм хүн бол юмыг маш тодорхой хардаг, он жил хугацааг хүртэл хэлж чаддаг. Өөрчлөлтийн жижиг зүйлээс авахуулаад бүгд харагддаг, яагаад гэвэл түүний харж байгаа нь өөр өөр орон зай дахь хүний эсвэл эд зүйлсийн жинхэнэ тусгал юм.

Гагцхүү Фалунь Дафаг бясалгах юм бол, тэнгэрийн мэлмийг хүн болгонд нээж өгнө. Тэгэхдээ бидний сүүлд ярьсан ер бусын чадваруудыг нээж өгөхгүй. Чиний түвшин тасралтгүй дээшлэхийн сацуу, өнгөрснийг болон ирээдүйг

мэдэх ер бусын чадвар жамаараа гарч ирдэг. Чиний цаашдын бясалгалын явцад энэ байдал гарахад, энэ чадвар бий болоход чи юу болж байгааг мэддэг болно. Иймээс бид энэ Ном, зарчмыг ярилаа.

Таван мах бодид оршихгүй, Гурамсан ертөнцөөс гарах нь

“Таван мах бодид оршихгүй, Гурамсан ертөнцөөс гарах” гэж юу гэсэн үг вэ? Энэ бол ярихад их хурц асуудал. Урьд олон чигон багш энэ асуудлыг ярихдаа, чигон-д итгэдэггүй хүмүүсийн “Та нарын хэн нь бясалгаад таван мах бодиос гарсан, хэн нь Гурамсан ертөнц дотор оршихгүй болсон бэ?” гэсэн асуултанд гацдаг байсан. Зарим хүн чигон багш биш ч өөрсдийгээ чигон багш гэж нэрлэчихсэн. Тодорхой хэлж чадахгүй бол дуугүй байсан нь дээр. Гэвч тэд энэ талаар ярьж зүрхэлдэг, тэгээд хүмүүсийн асуултанд амаа таглуулдаг. Энэ нь бясалгалын хүрээнд их том хохирол учруулсан, маш том будилаан тарьсан. Зарим хүмүүст энэ нь чигон-руу дайрах шалтаг болсон. Таван мах бодид оршихгүй, Гурамсан ертөнцөөс гарах гэдэг бол бясалгалын хүрээнд яригддаг, энэ нь шашинаас эх сурвалжтай, шашинаас үүссэн. Иймээс бид энэ асуудлыг түүхэн сурвалж болон тэр үеийн байдлаас салгаж ярьж болохгүй.

Таван мах бодид оршихгүй гэдэг нь юу гэсэн үг вэ? Хятадын эртний физик, орчин үеийн физикийн ухаанд хоёуланд нь Хятадын Таван мах бодийн онолыг зөв гэж үздэг. Төмөр, мод, ус, гал болон шороо гэсэн Таван мах бодиос бидний орчлон ертөнцийн бүх зүйлс бүрэлдсэн гэдэг үнэн. Тиймээс бид энэ таван мах бодийн талаар ярья. Таван мах бодиос гарсан хүн гэдэг нь одоогийн хэллэгээр бол бидний энэ материаллаг дэлхий ертөнцөөс гарсан гэсэн үг, сонсоход их нууцлаг. Та бүгд нэг асуудлыг бодоод үз:

Чигон багшид гон байдаг. Би болон өөр олон чигон багш нар туршилтанд оролцож өөрийнхээ энергийг хэмжүүлсэн. Бидний гон-д байгаа олон материаллаг элементүүдийг өнөөгийн багаж төхөөрөмжөөр илрүүлж болдог. Өөрөөр хэлбэл тийм багаж төхөөрөмж байвал чигон багшаас гаргаж байгаа элементүүдийг болон түүнд байгаа гон-ыг илрүүлж болдог. Орчин үеийн хэмжих багаж хэт улаан туяа, хэт ягаан туяа, хэт нам дууны долгион, хэт өндөр дууны долгион, цахилгаан, соронзон хүч, гамма цацраг, атом болон нейтроныг илрүүлж чаддаг. Чигон багш нарт эдгээр бодис бүгд байдаг, бас чигон багшийн цацруулдаг зарим бие бодийг хэмжин тогтоож чадахгүй, яагаад гэвэл тийм багаж байхгүй. Ийм багаж хэрэгсэл байвал бүгдийг илрүүлж болно. Чигон багшийн цацруулдаг бие бодь маш их баялаг болох нь тогтоогдсон.

Онцгой нэг соронзон орны нөлөөгөөр чигон багш их хүчтэй маш гоё туяаг гаргаж чаддаг. Гон-ы хүч нь өндөр байх тусам гаргасан энергийн хүрээ нь улам том. Мөн энгийн хүн бас туяа гаргадаг, тэгэхдээ энэ нь маш бага хэмжээтэй, хүчгүй. Дээд энергийн физикийн судалгаанаас хүмүүс энергийг нейтрон, атом гэх мэтээс үүсдэг гэж үздэг. Олон чигон багш бүгд хэмжүүлсэн, нилээд нэртэй чигон багш нар оролцсон. Би бас хэмжүүлсэн, цацруулсан гамма туяа ба халуун нейтроны хэмжээ энгийн бодисын хэмжээнээс 80-170 дахин илүү байсан. Энэ үед хэмжих багажны зүү эцэстээ тулж зогссон, хир их хэмжээтэй байгааг нь тогтоож чадаагүй. Ийм их хүчтэй нейтрон байдагт үнэмшмээргүй! Хүн яаж ийм хүчтэй нейтроныг гаргаж чаддаг вэ? Энэ нь бидэнд, чигон багш нарт гон оршдог, энерги байдаг гэдгийг баталж байна, шинжлэх ухаан технологийн хүрээнд нотлогдсон юм.

Таван мах бодиос гарахад амь бие, сэтгэлийн хос бясалгал байхыг шаарддаг. Хэрэв бясалгал нь амь бие,

сэтгэлийн хос бясалгал биш байвал зөвхөн хүрсэн түвшний өндөр намын дагуу гон-ыг өсгөдөг. Амь биеийг бясалгадаггүй бясалгалд энэ асуудал байхгүй, таван мах бодиос гарах тухай ярихгүй. Амь бие, сэтгэлийн хос бясалгал хийхэд энерги биеийн бүх эсэнд хадгалагддаг. Бидний жирийн бясалгадаг хүн болон дөнгөж гон нь өсч байгаа хүний гаргасан энергийн ширхэгүүд нь том, хоорондоо их завсартай нягт биш. Иймээс хүч нь маш бага. Түвшин нь өндөр болох тусам хүний энергийн нягт нь жирийн усны молекулын нягтралаас зуу дахин, мянга дахин эсвэл зуун сая дахин илүү болох бүрэн боломжтой. Яагаад гэвэл түвшин өндөр болох тусам энерги нь улам нягтарч, улам нарийн ширхэгтэй болно, бас хүч нь улам ихэсдэг. Ийм нөхцөл байдалд энерги нь биеийн эс болгонд хадгалагддаг. Ийм энерги зөвхөн энэ материаллаг орон зайн биед байгаа эс болгонд хадгалагдаад зогсохгүй бас өөр орон зайны бүх биед, молекулд, атомд, протонд, электронд болон хамгийн микро эсэнд хүртэл бүгдэд дүүрдэг. Аажимдаа хүний бие нь энэ дээд энергийн бие бодиор бүрэн дүүрдэг.

Энэ дээд энергийн бие бодь нь оюун сэтгэхүйтэй болоод чадвартай. Энэ нь олширч улам нягтрах ба хүний биеийн бүх эсэнд дүүрсэний дараа хамгийн чадваргүй эс болох энэ хүний махан биеийн эсийг хязгаарлачихдаг. Эсүүд хязгаарлагдмагц бодисын солилцоонд орохгүй болно, эцэст нь хүний махан биеийн эсүүд бүрмөсөн солигдоно. Мэдээж энэ нь ярихад амархан ч энэ хүртэл бясалгахад удаан явцтай. Энэ хүртэл бясалгаад хүрэхэд чиний биений бүх эс дээд энергийн бие бодиор бүрэн солигдоно. Тэгвэл боддоо, чиний бие таван мах бодиос бүрдсэн хэвээр гэж үү? Энэ нь бидний энэ орон зайн бие бодь гэж үү? Тэр аль хэдийн өөр орон зайнаас цугласан дээд энергийн бие бодиор бүрдсэн. Энэ буяныг бүрэлдүүлдэг элемент бас өөр орон зайд

оршдог бие бодь юм, тэдгээр нь бас бидний энэ орон зайн цаг хугацааны оронд хязгаарлагдахгүй.

Одоогийн шинжлэх ухаан цаг хугацаанд орон оршдог гэж үздэг, цаг хугацааны орон зайн хүрээнд байхгүй бол тэр цаг хугацаанд хязгаарлагдахгүй. Өөр орон зайн цаг хугацааны орны ухагдахуун нь биднийхтэй адилгүй, тиймээс эндхийн цаг хугацаа яаж өөр орон зайны бие бодийг хязгаарлах юм? Үндсэндээ ямарч нөлөө байхгүй. Та бүгд боддоо, энэ үед чи таван мах бодид оршихгүй болсон юм биш үү? Чиний бие энгийн хүний бие хэвээр гэж үү? Үндсэндээ биш болно. Гэхдээ нэг зүйлийг хэлэхэд энгийн хүнд ямарч ялгаа харагдахгүй. Түүний бие өөрчлөгдөөд ийм хэмжээнд хүрсэн ч бясалгал дуусаагүй. Тэр бас үргэлжлүүлэн түвшнөө ахиулан дээш бясалгах хэрэгтэй. Иймээс тэр энгийн хүний дунд бясалгана, хүмүүст тэр харагдахгүй байж болохгүй.

Тэгвэл дараа нь яах вэ? Хэдийгээр бясалгалын явцад түүний молекулын түвшин дэх эсүүд дээд энергийн бие бодиор солигдсон ч атомуудын жагсах дэс дараалал, мөн молекулууд болон атомын цөмийн жагсах дэс дараалал өөрчлөгдөхгүй. Тийм байдалд биений эсийн молекулын жагсах дэс дараалал нь хэвээр хүрэхэд зөөлөн, ясны молекулын жагсах дэс дараалал нь нягт учраас хүрэхэд хатуу, цусны молекулын нягтрал нь бага учраас энэ нь шингэн. Жирийн хүн чиний өөрчлөлтийг гаднаас чинь хараад мэдэхгүй, эсийн молекулуудын бүтэц ба жагссан дэс дараалал хуучинтай адил, түүний бүтцэнд өөрчлөлт гараагүй гэхдээ доторхи энерги өөрчлөгдсөн. Иймээс энэ хүн үүнээс хойш жам ёсоор хөгшрөхгүй. Түүний эсүүд нь үхэхгүй учраас тэр үүрд залуугаараа байх болно. Бясалгалын явцад хүн залуу харагддаг эцэст нь тэнд нас нь тогтчихдог.

Мэдээж энэ бие машинд мөргүүлчихвэл магадгүй яс нь хугарна, хутгаар зүсчихвэл бас цус гарна. Яагаад гэвэл түүний молекулын жагссан дэс дараалал нь өөрчлөгдөөгүй, зөвхөн жам ёсоороо үхэхгүй, жам ёсоороо хөгшрөхгүй ба үүнд бодисын солилцоо гэж байхгүй болно. Үүнийг бид таван мах бодиос гарах гэж хэлдэг. Энд юуны мухар сүсэг байгаа юм? Шинжлэх ухааны зарчмаар үүнийг тайлбарлаж болно. Зарим хүн тодорхой тайлбарлаж чадахгүйгээс хамаагүй ярьдаг, тэгээд хүмүүс тэднийг мухар сүсэгтэй гэдэг. Яагаад гэвэл энэ үг шашинаас гаралтай, бидний орчин үеийн чигон-оос гарсан хэллэг биш.

Гурамсан ертөнцөөс гарах гэдэг нь юу гэсэн үг вэ? Би тэр нэг өдөр гон өсгөх гол түлхүүр бол бид зан чанараа бясалгах, орчлон ертөнцийн мөн чанарт уусах явдал гэж ярьсан, тэгвэл орчлон ертөнцийн мөн чанар чамайг хязгаарлахгүй болно. Чиний зан чанар дээшлэхэд буяны бие бодь гон болж хувирдаг. Энэ нь тасралтгүйгээр нэмэгдэж дээш өснө, тэгээд дээд түвшин лүү ахисны дараа гон баганыг үүсгэдэг. Энэ гон багана хэр өндөр байна, чиний гон тэр өндөрт байна. Ийм нэг үг байдаг: Аугаа ном хязгааргүй, бясалгал бүхэлдээ чиний сэтгэлээс шалтгаална, чиний хэр өндөр бясалгаж чадах нь чиний тэвчээрээс, хүнд бэрхшээлийг давах чадвараас чинь хамаарна. Чиний цагаан бие бодь хэрэглээд дуусвал чиний хар бие бодь зовлон туулах явцад бас цагаан бие бодь болж хувирдаг. Тэр нь бас л хангалттай биш бол чи бясалгал хийдэггүй найз нөхдийнхээ юмуу гэр бүлийнхнийхээ нүглийг нь давал чиний гон бас өснө. Энэ бол маш өндөрт бясалгаж хүрсэн хүний хувьд ярьж байна. Чи энгийн нэг хүний хувьд бясалгаж байгаа бол ойр дотныхоо хүний нүглийг даах тухай бодож болохгүй, тийм их хэмжээний нүгэлтэй бол жирийн хүн бясалгаад үр дүнд хүрч чадахгүй. Би энд өөр өөр түвшний зарчмыг ярьж байна.

Шашинд ярьдаг Гурамсан ертөнц нь, тэнгэрийн есөн давхарга эсвэл гучин гурван давхарга тэнгэр, өөрөөр яривал тэнгэр, газар, газрын доогуурх Гурамсан ертөнцийн бүх амийг багтаадаг. Гучин гурван давхаргын тэнгэрт орших бүх амь бодь бүгд зургаан замын тойргоор явдаг гэж ярьдаг. Зургаан замын тойрог гэдэг нь энэ насандаа хүн, дараагийн насандаа магадгүй амьтан болно. Буддын шашинд ингэж ярьдаг: Энэ амьдралд олдсон насныхаа цаг хугацааг алдалгүй ашиглах хэрэгтэй. Хэрэв чи одоо бясалгахгүй бол хэзээ бясалгах юм? Яагаад гэвэл амьтанд бясалгахыг зөвшөөрөхгүй, Ном сонсохыг нь зөвшөөрөхгүй, бясалгасан ч үр дүнд хүрэхгүй, гон нь өндөр болбол тэнгэр устгана. Чи магадгүй хэдэн зуун жилдээ хүний бие олж чадахгүй, мянган жилд магадгүй ганц удаа хүний биетэй болно. Хүний биетэй болоод үүнийг нандигнахаа мэдэхгүй. Хэрвээ чи нэг чулуу болж хойд төрлийг олсон бол арван мянган жилдээ ч гарч чадахгүй. Тэр чулуу бутарч няцрахгүй бол, салхи усанд элэгдэхгүй бол, чи үүрд түүнээс гарч чадахгүй. Хүний биетэй болох их хэцүү! Дафа-г үнэхээр олж чадвал энэ хүн хамгийн аз завшаантай хүн. Хүний биеийг олоход хэцүү, энэ ёсыг л ярьж байгаа юм.

Бид бясалгал хийхдээ түвшний асуудлыг ярьдаг, ямар түвшинд хүрэх нь өөрийн бясалгалаас шалтгаална. Чи Гурамсан ертөнцөөс гарахыг хүснэ, чиний гон багана бясалгаад маш өндөрт хүрвэл чи Гурамсан ертөнцийг нэвтэрсэн биш гэж үү? Зарим хүн бясалган сууж байхдаа сүнс нь биенээсээ гараад маш өндөрт гардаг. Нэг сурагч өөрт мэдрэгдсэн сэтгэгдлээ бичихдээ: Багшаа, би хэд хэдэн давхаргын тэнгэрт гарч тэнд ямар байдалтайг нь харсан. Би түүнд улам дээш гардаа гэсэн. Тэр ингэж хэлсэн: Би улам дээшилж чадахгүй, зүрхлээгүй, дахин дээш гарч чадахгүй болсон. Яагаад вэ? Учир нь түүний гон багана тийм л өндөртэй, тэр өөрийнхөө гон баганад суугаад тэнд хүрсэн. Энэ бол Буддын шашинд ярьдаг бүтээлийн орон юм. Тэр

энэ бүтээлийн оронд бясалгаж хүрсэн. Гэхдээ бясалгаж байгаа хүний хувьд энэ нь түүний бүтээлийн орны хамгийн оргил нь биш. Тэр бас үргэлж дээшилнэ, тасралтгүйгээр дээш ахина, үргэлжлэн дээшилнэ. Чиний гон багана Гурамсан ертөнцийн хязгаарыг нэвтэрчихвэл, чи Гурамсан ертөнцөөс гарсан биш гэж үү? Бид хэмжиж тогтоосноор шашинд яригддаг Гурамсан ертөнц бол зөвхөн бидний есөн том гаригийн хүрээнд байдгийг олж мэдсэн. Зарим хүн арван том гариг байдаг гэж ярьдаг, би үүнийг огт байдаггүй гэж хэлнэ. Би урьд байсан зарим чигон багш нарын гон багана маш өндөрт хүрсэнийг харсан, тэд тэнгэрийн заадас галагтикаас цааш нэвтэрсэн, аль хэдийн Гурамсан ертөнцөөс хавьгүй хол давсан байсан. Миний саяхан ярьсан Гурамсан ертөнцөөс гарах нь үнэндээ түвшиний асуудал юм.

Хүсэх асуудал

Олон хүн ямар нэг юм хүсэх сэтгэл тээж бидний дасгалын талбайд ирдэг. Зарим хүн ер бусын чадвартай болохыг хүснэ, зарим нь онолын талаар сонсох хүсэлтэй, зарим хүн өвчнөө эдгэрүүлэх хүсэлтэй, бас зарим хүн Фалунийг авах гэж ирнэ, янз бүрийн бодолтой хүмүүс байдаг. Бас зарим хүн ингэж ярьдаг: Манай гэрээс лекцэнд ирж сууж чадаагүй хүн бас байгаа, би сургалтын төлбөрийг нь өгье, түүнд нэг Фалуны өгөөч. Бид маш олон үе дамжиж, тоог нь хэлбэл цочмоор урт удаан хугацааг туулж байж, ийм урт хугацаанд бий болгосон зүйл, чи хэдэн аравхан юанаар Фалунийг худалдаж авах гэж үү? Бид яагаад та бүгдэд үүнийг ямар ч болзолгүйгээр өгч байгаа вэ? Учир нь чи бясалгагч болохыг хүссэн. Ямар ч их мөнгөөр энэ сэтгэлийг худалдаж авч чадахгүй. Буддын чанар гарч ирсэн болохоор бид ингэж хийж байгаа юм.

Чи юм хүсэх сэтгэлээр, зөвхөн үүний төлөө энд ирсэн гэж үү? Чиний юу бодож байгааг өөр орон зайд байгаа миний Номын бие бүгдийг мэднэ. Яагаад гэвэл хоёр өөр цаг хугацааны орон зайн ухагдахуун адилгүй, өөр орон зайнаас харахад чамаас гарч байгаа бодол их удаан явцтай байдаг. Чамайг бодохоос чинь өмнө тэр бүгдийг нь мэдчихнэ. Иймээс чи өөрийнхөө буруу бодол санаагаа хаях ёстой. Буддын системийн бясалгалд хувь тавиланг ярьдаг, та бүгд хувь тавилангаараа энд ирсэн. Хэрэв чи үүнийг олсон бол чи магадгүй авах учиртай байсан болоод л тэр, иймээс чи үүнийг нандигнах нь зүйтэй, битгий янз бүрийн хүсэх сэтгэлд зууралд.

Урьдын шашины бясалгалд, Буддын системд хоосон чанарыг ярьдаг байсан, энэ нь юу ч бодохгүй байх тэгээд хоосны үүдээр орох, Дао-гийн системд үл оршихуйг ярьдаг байсан, юу ч байхгүй, юуг ч авахгүй, юу ч хөөцөлдөхгүй байх. Бясалгагч хүн бясалгал хийх сэтгэлтэй, гон олох сэтгэлгүй гэж ярьдаг. Үйлгүй байдлаар бясалгана, зөвхөн өөрийнхөө зан чанараа бясалгахад чиний түвшин дээшилнэ, хүртэх ёстой зүйлээ олж авах нь дамжиггүй. Чи элдэв хүслээ орхиж чадахгүй бол энэ нь зууралдсан сэтгэл биш гэж үү? Бид энд шууд ийм дээд түвшний номыг зааж байна, мөн чиний зан чанарт тавих шаардлага мэдээж өндөр түвшинд байна. Иймээс юм хүсэх сэтгэлтэйгээр ирж номыг сурч болохгүй.

Та бүгдэд хариуцлагатай хандахын тулд, бид та нарыг зөв зам руу дагуулж байгаа, энэ номыг чамд тодорхой тайлбарлах ёстой. Зарим хүн тэнгэрийн мэлмийг хүсэхэд энэ нь өөрөө бөглөрчихдөг, тэгээд чи өөрийгөө боочихдог. Та бүгдэд хэлье, Гурамсан ертөнцийн номын бясалгалаар гарч ирдэг бүх ер бусын чадварууд нь энэ махан биеийн төрөлхийн чадварууд юм. Одоо бид үүнийг ер бусын чадвар гэж нэрлэдэг. Эдгээр нь зөвхөн энэ орон зайд үйлчлэх ба

энгийн хүмүүст нөлөөлж чадна. Эдгээр жижиг чадвар, увидастай болохыг хөөцөлдөж яах юм? Хөөцөлдөж хөөцөлдөж Гурамсан ертөнцийн номоос гарсаны дараа энэ нь өөр орон зайд үйлчлэхгүй. Гурамсан ертөнцийн номын бясалгалаас гарах үед энэ бүх ер бусын чадварууд хэрэггүй болж тэдгээр нь маш их гүн орон зайд дарагдан хадгалагддаг. Ирээдүйд чиний бясалгалын явцын тэмдэглэл болж үлдэнэ, зөвхөн ийм л жоохон нөлөөтэй.

Хүн Гурамсан ертөнцийн номоос гарсаны дараа, дахин шинээр бясалгаж эхэлнэ. Тэр бие нь миний сая ярьсан таван мах бодиос гарсан бие юм. Тэр бол Будда бие. Тийм биеийг Будда бие гэж хэлж болохгүй гэж үү? Энэ Будда бие дахин шинээр бясалгаж эхлэх ёстой, ер бусын чадварыг дахин шинээр гаргана. Үүнийг ер бусын чадвар гэж хэлэхгүй, харин Буддын номын увидас чадвар гэдэг. Түүний сүр хүч нь зүйрлэшгүй, орон зай болгонд үйлчилдэг, энэ бол жинхэнэ нөлөө гаргаж чадна. Чи ер бусын чадварын хойноос хөөцөлдөх ямар хэрэгтэй юм? Ер бусын чадварыг хөөцөлддөг хүн, энгийн хүмүүсийн дунд түүнийг хэрэглэх, өөрийгээ гайхуулах гэсэн бодолтой биш үү, тийм биш бол чи түүгээр яах юм? Тэдгээр нь үзэгдэхгүй бас тэмтрэгдэхгүй. Ер нь гоёл чимэглэлийн зорилго нь хүртэл юмыг сайхан харагдуулахад байдаг. Чиний далд санаа нь үүнийг хэрэглэх зорилготой. Түүнийг энгийн хүний ур чадвар мэт үзэж хөөцөлдөж болохгүй. Эдгээр нь бүгд ер бусын зүйлс, чамайг энгийн хүний дунд гайхуулахыг зөвшөөрөхгүй. Гайхуулах гэдэг нь угаасаа маш их хүчтэй зууралдсан сэтгэл, бас их муу сэтгэл, бясалгаж байгаа хүн үүнийг орхих ёстой. Чи энгийн хүний дунд үүнийг хэрэглэж мөнгө олох, эд хөрөнгөтэй болох, эсвэл хувийн зорилгодоо хүрэх, тэмцэлдээ хэрэглэх санаатай бол бүр ч болохгүй. Энэ нь дээд түвшний зүйл хэрэглэж энгийн хүний нийгмийг үймүүлнэ, энгийн хүний нийгмийг эвдэнэ гэсэн үг. Энэ

бодол нь бүр ч муу. Ийм учраас үүнийг хамаагүй хэрэглэхийг зөвшөөрөхгүй.

Ер бусын чадвар хүүхэд болон настангуудад гол төлөв гардаг. Ялангуяа настай эмэгтэйчүүд зан чанараа барьж чаддаг, тэд энгийн хүний дунд зууралдсан сэтгэл бараг байхгүй. Тэдэнд ер бусын чадвар гарсны дараа өөрийгээ амархан барьж чаддаг, гайхуулах сэтгэл байхгүй. Яагаад залуучуудад ер бусын чадвар амархан гардаггүй вэ? Ялангуяа залуу эрчүүд энгийн хүний нийгэмд ямар нэгэн зорилгодоо хүрэх гэж тэмцдэг! Тэд ер бусын чадвартай болмогцоо өөрийнхөө зорилгод хэрэглэнэ, зорилгоо биелүүлэх хэрэгсэл болгодог. Ингэж хэрэглэхийг туйлаас зөвшөөрөхгүй, иймээс түүнд ер бусын чадвар гардаггүй.

Бясалгал бол тоглоом биш, энгийн хүмүүсийн хэрэглэдэг арга барил шиг биш, энэ нь маш нарийн зүйл юм. Чи бясалгах хүсэлтэй байх үгүй нь, эсвэл бясалгаж чадах эсэх нь чиний зан чанар яаж дээшлэхээс шалтгаална. Хэрэв хүн хүссэнээрээ ер бусын чадвартай болдог бол тун аюултай юм болно. Тэгвэл түүнд бясалгах үгүй нь хамаагүй, энэ талаар бодох ч үгүй. Яагаад гэвэл түүний зан чанар нь энгийн хүний түвшинд байгаа, тэгээд ер бусын чадвар хүссэнээрээ олбол тэр ямар ч муу зүйл хийж магадгүй. Банкинд хангалттай их мөнгө байгаа, түүнээс жоохон зөөж авч ирнэ, гудамжинд хонжворт сугалааны газар элбэг, тэр хамгийн дээд сугалааг нь хожино. Яагаад ийм зүйлүүд гарахгүй байна вэ? Зарим чигон багш буяныг эрхэмлэхгүй бол ер бусын чадвар гарсаны дараа амархан муу зүйл хийнэ гэж ярьдаг. Минийхээр бол энэ нь буруу дүгнэлт юм, үндсэндээ ийм учиртай биш. Чи буяныг эрхэмлэхгүй эсвэл зан чанараа бясалгахгүй байвал ер бусын чадвар огт гарахгүй. Зарим хүн зан чанар сайн, аль нэг түвшинд ер бусын чадвар гарахад тэр өөрийгээ зөв барьж чадахгүйгээс хийх ёсгүй зүйлийг хийчихдэг. Ийм байдал бас байдаг.

Гэхдээ муу зүйл хиймэгц түүний ер бусын чадвар нь буурай болно эсвэл байхгүй болно. Үүнийг алдвал үүрд алдана. Мөн хамгийн ноцтой нь энэ хүнд зууралдсан сэтгэл үүсдэг.

Зарим чигон багш, тэдний хичээлийг гурав юм уу таван өдөр заалгаад өвчнийг эдгээж чаддаг болно гэж ярьдаг, зар сурталчилгаа шиг, түүнийг чигон-ы наймаачин гэж хэлбэл зохистой. Та бүгд бодоод үз, чи бол нэг энгийн хүн, өөрийнхээ багахан чий-г гаргаад л өөр хүний өвчнийг эдгээж чадах юм уу? Энгийн хүний биед бас чий байдаг, чамд бас байгаа. Чи дөнгөж бясалгалаар хичээллэж эхэлсэн, зөвхөн алганы чинь лаогон сүв нээгдсэн, чий-г авч, гаргаж чадна. Чи бусдын өвчнийг эдгээхэд, тэдний биед бас чий байгаа, магадгүй чамайг гэмтээчихнэ! Чий хоорондоо яаж нэг нэгэндээ нөлөөлж чадах юм? Чий өвчнийг эдгээж ерөөсөө чадахгүй. Түүнээс гадна, чи хүний өвчнийг эдгээхэд чамд өвчтэй хүнтэй холбогдсон нэгэн орон үүсдэг, тэр хүний биед байгаа өвчний чий бүгд чиний биенд орчихдог. Чамд байгаа нь адил хэмжээтэй, гэхдээ үндэс нь тэр хүний биед байсан ч өвчний чий ихэдвэл чамд бас өвчин үүсдэг. Чи өөрөө өвчнийг эдгээх чадвартай болсон гэж мэдрэхэд өвчтөнийг үзэж эхэлнэ, ирсэн болгонд үгүй гэхгүй, чамд зууралдсан сэтгэл гарна. Хүний өвчнийг эдгээж чаддаг байх нь ямар бахдалтай юм! Яагаад тэд эмчлэгдэж байгаа вэ? Чи энэ талаар бодож үзсэн үү? Хуурамч чигон багш нарын биед бүгдэд нь сүнс эсвэл амьтан шүглэсэн байдаг. Чамд итгүүлэхийн тулд багахан мэдээлэл өгдөг. Чамайг гурав, тав, найм юмуу арван өвчтөнийг эдгээсний дараа хэрэглээд дуусчихна. Энэ нь энергийн зарцуулалт, үүнээс хойш энэ өчүүхэн энерги нь үүрд байхгүй болно. Чамд өөрт чинь гон байхгүй, хаанаас гон байх юм? Бид чигон багш нар, хэдэн арван жилээр бясалгадаг, хуучин Дао-д бясалгахад их амаргүй байсан. Хэрэв ариун номын замаар явахгүй тойруу замаар эсвэл жижиг замаар бясалгахад маш хэцүү.

Чи зарим том чигон багш нарыг харахад тэд нилээд нэр хүндтэй ч, хэдэн арван жил бясалгаад дөнгөж жоохон гонтой л болдог. Чи хэзээ ч бясалгаж байгаагүй. Нэг чигоны ангид сураад л гон гарах юм уу? Тийм зүйл хаана байх юм? Чамд үүнээс хойш зууралдсан сэтгэл үүсчихнэ. Зууралдсан сэтгэл нэг гарангуут чи өвчнийг эдгээж чадахгүй бол тайван байж чадахгүй. Зарим хүн өөрийнхөө нэр хүндийг алдахгүйн тулд хүний өвчнийг эдгээхдээ юу боддог гээч? Энэ өвчнийг надад тусгачих, түүнийг сайжруулчих гэнэ. Энэ нь энэрэнгүй сэтгэлийн үүднээс биш, түүний нэр ашгийн сэтгэл орхигдоогүй, түүнд үндсэндээ энэрэнгүй сэтгэл гарахгүй. Тэр нэр хүндээ алдахаас айсан. Нэр хүндээ хадгалж үлдэхийн төлөө энэ өвчнийг өөртөө авахаас ч буцахгүй. Нэр хүнд хүсэх сэтгэл ямар хүчтэй юм бэ! Түүний энэ хүсэл гарахад тэр өвчин түүний биед шууд шилждэг, үнэхээр ийм нөлөө гарчихна. Тэр гэртээ өвчтэй харина, харин өвчтөн эдгэрсэн. Хүний өвчнийг үзсэний дараа тэр гэртээ хариад өвдөж зовно. Тэр өвчнийг эдгээсэн гэж бодсон. Хүмүүс түүнийг чигон багш гэж дуудахад тэр баярлаж их сэтгэл ханамжтай байдаг. Энэ нь зууралдсан сэтгэл биш гэж үү? Өвчнийг эдгээж чадахгүй бол урам нь хугарч уруу царайлна. Энэ нь нэр хүнд ашигт зууралдсан сэтгэлээс болсон биш үү? Мөн түүний эдгээсэн хүний өвчний чий бүгд түүний биед ирнэ. Тэдгээр хуурамч чигон багш нар түүнд яаж үүнийг биенээсээ гадагшлуулахыг заасан ч би хэлье, үндсэндээ гаргаж чадахгүй, жоохон ч гаргаж чадахгүй, яагаад гэвэл түүнд сайн муу чий-г ялгах чадвар байхгүй. Яваандаа бие доторхи нь тэр чигээрээ хар болчихно, тэр бол нүгэл.

Чи үнэхээр бясалгахыг хүсвэл нилээд хүнд сорилтонд орно. Чи тэгвэл яах вэ? Чи хэр их зовлонг туулж байж түүнийг цагаан бие бодиор хувиргах вэ? Маш хэцүү. Ялангуяа хүний төрөлхийн суурь нь сайн байх тусам энэ асуудалтай амархан тулгардаг. Зарим хүн дандаа өвчин

эдгээхийг хөөцөлддөг. Чи хүсэх сэтгэлтэй байвал амьтанд харагдана, тэр ирж чамайг эзэмдэнэ. Энэ бол сүнс шүглэлт юм. Чи өвчин эмчлэхийг хүсч байгаа юм биш үү? Тэр чамд үүнийг хийхэд тусална. Гэхдээ тэр чамд өвчин эдгээхэд чинь зүгээр туслахгүй. Алдахгүй бол олдохгүй. Энэ нь маш аюултай, эцэст нь чи түүнийг даллан ирүүлнэ. Чи яаж бясалгалаа үргэлжлүүлэх юм? Чиний хувьд бүх зүйл дуусна.

Зарим төрөлхийн суурь сайтай хүн бол өөрийнхөө суурийг бусдын нүглээр сольж байгаа юм. Тэр хүн өвчтэй, бас түүний нүгэл нь маш их. Хэрэв чи хүнд өвчтэй нэг хүнийг эдгээчихвэл гэртээ харьсны дараа бие чинь тун таагүй болно! Урьд өмнө олон хүн өвчтөнийг үзсэнийхээ дараа ийм байдлыг мэдэрдэг байсан. Өвчтөй хүн эдгэрсэн, харин чи гэртээ хариад хүнд өвчилнө. Хугацаа өнгөрөх тусам улам их нүгэл чамд ирнэ. Чи хүнд буянаа өгөөд нүглээр сольж байгаа юм. Алдахгүй бол олдохгүй. Чиний авсан нь өвчин байсан ч нүглийг буянаараа солих ёстой. Энэ орчлон ертөнцөд ийм нэг зарчим байдаг, чи өөрөө үүнийг хүсч байвал хэн ч чамайг хорихгүй, мөн чамайг сайн гэж хэн ч хэлэхгүй. Орчлон ертөнцөд тогтсон нэг зүйл байдаг, энэ бол хэн их нүгэлтэй байна тэр бол муу хүн. Чи төрөлхийн сууриа бусдад өгч нүглээр сольж байгаа юм. Чи их нүгэл хураавал яаж бясалгах юм? Тэр хүнээр чиний төрөлхийн суурь бүрмөсөн сүйтгэгдэнэ. Энэ нь аймшигтай биш гэж үү? Тэр хүний өвчин сайжирсан, таатай болсон, харин чи гэртээ хариад зовно. Чи хоёр хорт хавдартай хүнийг эдгээчих юм бол өөрөө тэдний оронд нас барна. Энэ аюултай биш гэж үү? Яг л ийм байдаг, маш олон хүн энэ зарчмын учрыг мэддэггүй.

Зарим нь бол хуурамч чигон багш, чи тэдний хэр их нэр хүндтэйг нь битгий хар, нэр хүндтэй байх нь сайн мэдлэгтэй гэсэн үг биш. Энгийн хүн юу мэдэх юм? Юмыг сүр дуулиан болгонгуут түүнд итгэчихдэг. Чи одоо түүний

ингэж хийж байгааг нь бүү хар, тэр бусдыг хохироогоод зогсохгүй бас өөрийгээ хохироож байгаа юм. Нэг хоёр жилийн дараа тэдэнд юу болохыг нь чи үзнэ. Бясалгалыг ингэж сүйтгэхийг зөвшөөрөхгүй. Бясалгал бол өвчнийг эдгээж чадна, тэгэхдээ өвчнийг эдгээх зорилгоор хэрэглэж болохгүй. Энэ бол ер бусын зүйл юм, энгийн хүний мэрэгжил чадвар шиг биш, чамд үүнийг хамаагүй ингэж сүйтгэхийг туйлаас зөвшөөрөхгүй. Одоогийн зарим хуурамч чигон багш нар эмх замбараагүй болгосон, чигон-ыг нэртэй болох, баян болох аргаа болгосон. Тэд бол хорлонт бүлгүүд, нөлөөллөө улам тэлж байна. Жинхэнэ чигон багш нараас тэдний тоо олон дахин илүү. Эдгээр энгийн хүмүүсийн хэлж, ярьж байгаад нь чи үнэмшчихсэн үү? Чигоныг ийм л байдаг гэж боддог, гэхдээ тийм биш. Миний ярьж байгаа нь жинхэнэ зарчим юм.

Энгийн хүний дунд янз бүрийн нийгмийн харилцаа үүсэхэд зарим хүн хувийнхаа ашиг сонирхлын төлөө муу зүйл хийдэг, бусдад өртэй болдог. Хүн өрөө төлөхийн тулд зовох болно. Жишээ нь, чи дураараа өвчнийг эдгээнэ, өвчнийг үнэхээр эдгээхийг чамд зөвшөөрөх юм уу? Будда байхгүй газар гэж үгүй. Ийм олон Будда байдаг мөртлөө яагаад энэ зүйлийг хийдэггүй вэ? Хэрэв Будда бүх хүн төрөлхтнийг өвчин зовлонгүй болгочихвол ямар сайхан бэ! Тэр яагаад үүнийг хийдэггүй вэ? Хүн өөрийнхөө нүглийг өөрөө төлөх ёстой, хэн ч энэ зарчмыг зөрчиж зүрхлэхгүй. Хүн бясалгалын явцад нинжин сэтгэлийн улмаас хааяа хүнд тусалж болно, тэгэхдээ тэр нь өвчнийг зөвхөн хойшлуулдаг. Чи, одоо өвдөж зовохгүй ч хожим нь зовно. Эсвэл чамайг өвчин тусахын оронд зовлонг чинь мөнгө алдах юмуу өөр гай зовлон тохиолдохоор өөрчилж өгнө. Магадгүй ийм хэлбэрээр байж болно. Хүний нүглийг жинхэнэ арилгаж өгөхийг зөвхөн бясалгагч хүнд хийж өгч болно, харин энгийн хүнд хийж болохгүй. Би энд зөвхөн өөрийнхөө бясалгалын зарчмыг яриагүй, би бүхэл орчлон

ертөнцийн үнэнг ярьж байна, бясалгалын хүрээн дэх бодит байдлын талаар ярьж байна.

Бид энд өвчин эдгээхийг чамд заахгүй. Бид чамайг аугаа замаар, ариун замаар дагуулж байна, чамайг дээшлүүлж байна. Иймээс би өөрийнхээ лекцэн дээр Фалунь Дафагийн сурагчдад өвчин эмчлэхийг зөвшөөрөхгүй гэж дандаа хэлдэг. Хэрэв чи өвчин эмчлэх юм бол Фалунь Дафагийн сурагч биш. Яагаад гэвэл бид ариун зам руу чамайг дагуулж байгаа, Гурамсан ертөнцийн ном бясалгалын явцад чиний бие дээд энергийн бие бодиор бүрэн хувирах хүртэл үргэлж ариусч байх болно. Чи биедээ тэдгээр хар зүйлийг цуглуулаад байвал яаж бясалгах юм? Тэр бол нүгэл шүү дээ! Чи бясалгах ямар ч боломжгүй болно. Хэтэрхий их нүгэлтэй болбол чи дааж чадахгүй, хэтэрхий их зовлонд унавал бясалгаж чадахгүй болно, ийм учиртай юм. Би энэ Дафа-г нийтэд заасан, чи магадгүй миний юу заасныг мэдэхгүй байж болно. Энэ Дафа нэгэнт дэлгэрсэн болохоор түүнийг хамгаалах арга замууд бий. Чи хүний өвчнийг эмчлэх юм бол миний Номын бие чиний биед өгсөн бүх бясалгалын зүйлээ буцааж авна. Бид чамд нэр хүнд, хувийн ашгийн төлөө ийм нандин зүйлийг хамаагүй сүйтгэхийг зөвшөөрөхгүй. Хэрэв чи Номын шаардлагын дагуу явахгүй бол Фалунь Дафагийн сурагч биш. Чиний биеийг энгийн хүний байдалд нь буцаагаад оруулна, муу зүйлүүдийг чинь буцаагаад чамд өгнө, яагаад гэвэл чи энгийн хүн байхыг хүссэн.

Өчигдрийн хичээлээс хойш та нарын олонхи нь бүх биеэ хөнгөрснийг мэдэрсэн. Гэхдээ хүнд өвчтэй цөөн тооны хүмүүсийн бие нь эхэлж таагүй болж мэдрэгдсэн, өчигдрөөс эхэлж таагүй болсон. Өчигдөр би та бүгдийн биенээс муу зүйлийг чинь авч хаясны дараа ихэнх хүмүүсийн бүхэл бие нь хөнгөрч их тааламжтай болсныг мэдэрсэн. Гэхдээ бидний энэ орчлон ертөнцөд алдахгүй бол олдохгүй гэдэг

зарчим байдаг. Бид чамаас бүх муу зүйлийг чинь авч хаяж болохгүй. Чамайг жоохон ч зовлон амсахгүй байхыг огт зөвшөөрөхгүй. Өөрөөр хэлбэл бид биеийг чинь муу болгож байгаа ба өвчин үүсгэж байгаа үндсэн суурийг чинь авч хаясан, гэвч чамд бас өвчний орон үлдсэн. Тэнгэрийн мэлмий нь их доогуур түвшинд нээгдсэн хүн чиний биен доторхи бөөгнөрсөн хар чий, өвчний их өтгөрсөн бохир хар чий-н бөөгнөрлийг харж чадна. Тэр тэлэх юм бол чиний бүх биеэр тархана.

Өнөөдрөөс эхлээд зарим хүн хүнд ханиад туссан юм шиг бүх бие нь жихүүцэж байгааг мэдэрнэ, магадгүй яс нь хүртэл өвдөнө. Ихэнх хүний хаа нэг газар нь тавгүйрхэнэ. Чиний хөл чинь өвдөж мөн толгой чинь эргэж магад. Чиний урьд нь чигон дасгалаар юмуу эсвэл аль нэгэн чигон багшаар эдгээгдсэн гэж бодож байсан өвчин чинь дахин сэдрэн гарна. Яагаад гэвэл тэр чамайг эдгээж чадаагүй, зөвхөн өвчнийг чинь хойшлуулсан. Тэр газраа байсаар байгаа одоо илрэхгүй ч гэсэн хожим дахиад гарч ирнэ. Бид үүнийг үндсээр нь ухаж гаргаж хаяна, бүрмөсөн арилгана. Ингэвэл магадгүй чиний өвчин дахин сэдэрсэн мэт болдог, энэ бол нүглийг үндсээр нь арилгаж байгаа хэрэг юм. Тиймээс чамд цочрол нөлөө гарна. Зарим хүний бие нь янз бүрийн байдлаар эвгүйрхэж, энд тэнд нь тавгүй болж магад. Энэ бүгд бол хэвийн зүйл юм. Би та бүгдэд хэлье, ямар ч тавгүй байсан тэсээрэй, хичээлдээ ирж тууштай үргэлжлүүлэн сонс. Хичээлийн энэ танхимд орж ирэнгүүт чиний өвчний бүх зовиурууд алга болно, ямар ч аюул гарахгүй. Та бүгдэд дахин онцолж хэлэхэд, чи “өвчин”-өөсөө болоод ямар их зовлонтой байлаа ч үргэлжлүүлэн ирэхийг чинь хүсч байна, Номыг олж авах хэцүү. Чамд их таагүй мэдрэмж төрж байгаа нь юм туйлдаа хүрээд эргэж байгаагийн шинж. Чиний бүх биеийг ариусгах болно, энэ нь заавал бүрэн ариусгагдах ёстой. Өвчний уг үндэс нь авч

хаягдсан, зөвхөн үлдсэн хар чий гарахдаа чамайг жоохон зовооно, чи тэр сорилтыг туулж эдлэхгүй байж болохгүй.

Чи энгийн хүний нийгэмд нэр хүнд, хувийн ашгийн төлөө бусадтай тэмцэлдэж булаалдаад л сайн унтаж, идэж ч чадахгүй, өөрийнхөө биеийг их муутгасан. Өөр орон зайнаас чиний биеийг харахад яс чинь хүртэл хар байдаг. Ийм янзын биеийг гэнэт чамд ариусгаж өгөхөд ямар нэгэн мэдрэмж гарахгүй байх боломжгүй, иймээс чамд цочир үйлчлэл гарна. Зарим хүн бөөлжинө, гүйлгэнэ. Өөр газруудаас ирсэн олон сурагчид надад өөрсөддөө тохиолдсон явдлаас бичихдээ: “Багш аа, би таны хичээлд суусны дараа гэртээ харих замдаа бие засах газар хайсаар байгаад ирсэн”. Яагаад гэвэл бүх дотор эрхтэн ариусгагдах ёстой. Бас зарим хүн унтдаг, намайг хичээл ярьж дуусахад тэр сэрдэг. Яагаад вэ? Учир нь тэр толгойн өвчтэй, түүнд засал хийх хэрэгтэй. Толгойн өвчнийг нь оролдвол тэр тэсвэрлэж чадахгүй. Иймээс заавал түүнийг мэдээ алдуулах байдалд оруулах ёстой, тэр мэдрэхгүй. Гэлээ ч зарим хүний сонсгол нь ямар ч асуудалгүй. Тэд их бөх унтах боловч нэг үг ч гээхгүй бүгдийг нь сонсдог. Дараа нь тэд их сэргэг болдог, хоёр өдөр унтахгүй байсан ч нойрмоглохгүй. Олон төрлийн шинж тэмдгүүд байдаг, тэр бүгдэд засал хэрэгтэй. Чиний бүх биеийг ариусгаж өгнө.

Фалунь Дафа-г жинхэнэ бясалгадаг хүн өөрийнхээ алив сэтгэлээс салж чадвал, энэ үеэс эхлээд бүгдэд нь цочир үйлчлэл гарч эхэлнэ. Алив сэтгэлээ орхиж чадахгүй байгаа хүмүүс үүнээсээ салсан гэх боловч үнэн хэрэг дээрээ тэд салж чаддаггүй, иймээс тэр байдалд хүрэхэд маш хэцүү. Бас нэг хэсэг хүмүүс миний ярьсан хичээлийн агуулгыг сүүлд нь ойлгодог. Тэд зарим сэтгэлээ орхиж эхэлнэ, тэгээд бие нь ариусгагдана. Тэгэхэд бусад хүмүүсийн бие нь аль хэдийн хөнгөрсөн байхад энэ хүмүүсийн өвчин нь дөнгөж арилж эхэлж байдаг, бие нь тавгүйрхэнэ. Анги болгонд ухамсар нь

арай доогуур ийм хоцрогсод байдаг, тийм учраас чамд ямар ч байдал гарсан бүгд хэвийн юм. Өөр газруудад лекц унших болгонд ийм асуудал гардаг байсан. Зарим хүний бие их тавгүйрхэнэ, сандал дээрээ тэгнэж хэвтээд босохгүй, намайг индрээс бууж ирээд түүнийг эдгээхийг хүлээдэг. Би эдгээж өгөхгүй. Чи зөвхөн ийм жоохон сорилтыг давж чадахгүй, ирээдүйд чиний бясалгалд олон том бэрхшээлүүд тулгарах болно, үүнийг давж чадахгүй бол чи яаж бясалгах юм? Ийм жоохон зүйлийг давж чадахгүй гэж үү? Хүн болгон давж чадна. Тэгэхээр үүнээс хойш та бүгд өвчнөө эдгээх гэж над дээр битгий ирж бай, би өвчнийг эдгээхгүй. Чамайг “өвчин” гээд л ярингуут би сонсох хүсэлгүй болно.

Хүнийг аврахад маш хэцүү, лекц болгонд хүмүүсийн 5-10 хувь нь бусдаасаа хоцордог. Хүн болгон Дао-гийн мөрийг олох боломжгүй, тууштай бясалгаж чадах хүн байсан ч, бас чамайг бясалгаад хүрч чадах үгүйг чинь харна, мөн зоригтой бясалгаж чадах эсэхийг чинь харна. Хүн болгон Будда болох боломжгүй. Дафа-гаар жинхэнэ бясалгавал, энэ номыг уншихад бас адилхан байдал гарна, мөн олох ёстой бүх зүйлийг олно.

Гуравдугаар лекц

Би бүх сурагчдаа шавиа гэж үздэг

Та бүгд мэдэж байна уу? Би сурагч бүрийг шавиа гэж авч үзэн дагуулдаг, өөрөө бие даан жинхэнэ бясалгаж байгаа хүн үүнд бас багтана. Дээд түвшинд бясалгалыг заан тараахад ингэж чамайг дагуулахгүй бол болохгүй. Тэгэхгүй бол хариуцлагагүй хандаж хуумгай зүйл хийсэнтэй адил болно. Бид чамд ийм их зүйл өгсөн, чамд энгийн хүний мэдэх ёсгүй олон зарчмыг мэдүүлсэн. Би чамд энэ Дафа-г уламжилсан, бас чамд олон зүйлийг өгөх болно. Чиний биеийг ариусгаж өгч байгаа, мөн өөр асуудлууд бас холбогддог. Иймээс чамайг шавиа гэж үзэн дагуулахгүй бол үндсэндээ болохгүй. Энгийн хүнд ийм их тэнгэрийн нууцыг хамаагүй задруулахыг зөвшөөрөхгүй. Гэхдээ нэг зүйлийг тэмдэглэн хэлэхэд, одоогийн цаг үе өөрчлөгдсөн, бид мөргөх, залбирах хэлбэрийн зан үйлийг хийхгүй. Тэр зан үйл нь онцын ач холбогдолгүй, шашны зан үйл мэт, бид ингэж хийхгүй. Хэрэв чи эндээс гараад л өөрийнхээ урьдын зангаар хүссэн болгоноо хийгээд л энгийн хүмүүсийн дунд өөрийн нэр, ашгийн төлөө өрсөлдөж тэмцэлдэх юм бол багшид мөргөх, залбирах энэ зан үйл юунд хэрэгтэй юм? Чи магадгүй миний далбаан дор Фалунь Дафа-гийн нэр хүндийг гутаана!

Жинхэнэ бясалгал бол чиний яаж сэтгэлээ бясалгаж чадахаас хамаарна. Чи бясалгаж л байх юм бол, бясалгалаа тууштай шамдангүй үргэлжлүүлж чадаж байвал бид чамайг шавиа гэж үзнэ. Чамайг ингэж авч үзэхгүй бол болохгүй. Гэхдээ зарим хүн өөрийгөө жинхэнэ бясалгагч гэж үзэн бясалгалаа үргэлжлүүлж чадахгүй байж мэднэ, зарим хүнд энэ нь боломжгүй юм. Гэхдээ олон хүн жинхэнэ

бясалгаж чадна. Чи бясалгасаар л байх юм бол бид чамайг шавиа гэж үзэн дагуулна.

Чамайг өдөр болгон зөвхөн энэ хэдэн дасгалыг хийгээд байвал Фалунь Дафагийн шавь гэж үзэж болох уу? Тэгвэл магадгүй болохгүй. Яагаад гэвэл жинхэнэ бясалгахад бидний ярьсан зан чанарын шалгуурын дагуу шаардах ёстой, өөрийнхээ зан чанарыг жинхэнэ дээшлүүлэх хэрэгтэй, тэгвэл энэ нь жинхэнэ бясалгал болно. Хэрэв чи зөвхөн дасгалыг л хийгээд зан чанараа дээшлүүлэхгүй бол, бүх зүйлийг эрчимжүүлдэг хүчирхэг энерги байхгүй бол үүнийг бясалгал гэж хэлж болохгүй, бид чамайг Фалунь Дафагийн шавь гэж үзэж болохгүй. Чи үргэлж ийм байвал дасгалаа хичнээн хийсэн ч бидний Фалунь Дафагийн шаардлагыг хангахгүй, зан чанараа дээшлүүлэхгүй, ингээд энгийн хүмүүсийн дунд байдаг янзаараа л байвал магадгүй чамд өөр гай зовлон тохиолдоно. Чи тэр ч байтугай Фалунь Дафаг бясалгаад буруутлаа гэж хэлж магадгүй. Ийм байдал гарч магадгүй. Иймээс чи бидний зан чанарын шалгуурыг дагах ёстой, тэгвэл чи жинхэнэ бясалгадаг хүн. Би үүнийг та бүгдэд тодорхой хэллээ. Тиймээс та бүгд над дээр мөргөж залбирч багшийн барилдлага хийх гэж битгий ирж бай. Чи зөвхөн жинхэнэ бясалгах юм бол, би ингэж л чамд хандана. Миний номын бие аль хэдийн тоолж баршгүй олон болсон. Энд байгаа сурагчид байтугай хичнээн их хүн байсан ч би бүгдийг нь хариуцаж чадна.

Буддын системийн чигон ба Буддын шашин

Буддын системийн чигон бол Буддын шашин биш. Би энэ зүйлийг та бүхэнд тодорхой ойлгуулах ёстой. Үнэндээ Дао-гийн системийн чигон бас Дао-гийн шашин ч биш. Үүнийг сайн ойлгодоггүй хүмүүс байдаг. Зарим хийдийн лам хуврагууд, бас сүсэгтнүүд өөрсдийгөө Буддын шашны

талаар арай илүү мэддэг гэж боддог, тэгээд манай сурагчдад Буддын шашныг их идэвхтэй сурталчилдаг. Би чамд хэлье, чи ийм юм хийж болохгүй, яагаад гэвэл энэ бол өөр номын бясалгалын зүйл. Шашин бол шашны зан үйлийн хэлбэртэй. Бид энд өөрсдийнхөө бясалгалын нэг хэсгээс зааж байна. Фалунь Дафагийн мэрэгшсэн бясалгагчдаас бусад нь шашны зан үйлийг баримталж болохгүй, иймээс бидний бясалгал бол Номын төгсгөлийн үе дэх Буддын шашин биш.

Буддын шашны ном бол Буддын Номын зөвхөн нэг жижиг хэсэг юм. Түүнчлэн бас олон төрлийн аугаа Ном байдаг, түвшин бүрт өөр өөрийн Ном байдаг. Шагжамүни наян дөрвөн мянган Номын үүд байдаг гэж ярьсан. Буддын шашинд бол ердөө хэдхэн төрлийн Номын үүд байдаг. Үүнд Тианьтай, Хуаянь, Даяаны шашин, Ариун Орон болон Тантризм гэх мэт ердөө ийм хэдхэн урсгал байдаг, эдгээр нь тун яльгүй зүйл! Тиймээс Буддын шашин Буддын номыг бүхэлд нь төлөөлж чадахгүй, энэ нь зөвхөн Буддын номын өчүүхэн хэсэг юм. Бидний Фалунь Дафа бол наян дөрвөн мянган Номын үүдний нэг нь юм. Энэ нь анхны Буддын шашинтай болон Номын төгсгөлийн үеийн Буддын шашинтай ямар ч хамааралгүй төдийгүй одоогийн шашинуудтай бас хамааралгүй.

Буддын шашинг 2500 жилийн өмнө эртний Энэтхэгт Шагжамүни бий болгосон. Шагжамүни гон нь нээгдэж гэгээрсний дараа урьд нь бясалгаж байсан зүйлээ санасан, тэгээд түүнийгээ хүмүүсийг аврахын тулд заан тараасан. Түүний Номын хэдэн арван мянган боть судар гарсан ч хамаагүй, үнэндээ гол утга нь зөвхөн гуравхан үгнээс бүрддэг. Түүний номын онцлог шинж нь “цээрлэх, самадид¹⁷ орох, гэгээрэх” юм. Цээрлэх нь энгийн хүний бүх

¹⁷ самади-Буддын шашинд гүн ховсдолын байдалд орж бясалгах

дур хүслийг хорино, хүчээр чамайг хувийн ашиг сонирхлыг чинь орхиулна, энгийн хүний бүх зүйлээс таслах гэх мэтчилэн. Ингэхлээр хүний сэтгэл нь хоосон болно, юуны ч талаар бодохгүй болно, тэгээд самади-д орж чадна. Эдгээр нь хоорондоо ийм уялдаа холбоотой. Самади-д орсны дараа жинхэнэ бясалгана, самади-н хүчээр дээш бясалгана. Энэ бол тэр Номын үүдний жинхэнэ бясалгалын хэсэг. Үүнд дасгал хийхгүй бас өөрийн биеийг ч өөрчлөхгүй. Тэр зөвхөн түүний түвшний өндрийг тодорхойлдог гон-ыг бясалгана, иймээс тэр зөвхөн зан чанараа бясалгана, амь биеэ бясалгадаггүй учраас гон хувиргах асуудал байхгүй. Мөн бясалгалаар самади-д орох чадвараа улам хүчтэй болгоно, завилж суухын зовлонг тэвчиж өөрийнхөө нүглийг хөнгөлнө. Гэгээрэл гэдэг нь хүний аугаа билиг оюун нь нээгдэж гэгээрэх гэсэн үг. Орчлон ертөнцийн үнэнг, орчлон ертөнцийн өөр өөр орон зайн үнэн байдлыг харж чадна, эгнэшгүй увидас чадал нь гарч ирнэ. Билиг оюун нээгдэх буюу гэгээрэхийг бас гон нээгдэх гэж хэлдэг.

Шагжамүни энэ Номын үүдийг үүсгэх үед Энэтхэгт найман төрлийн шашин бас зэрэг дэлгэрч байсан. Тэдгээрийн нэг нь бат бөх суурьтай Брахман шашин байсан. Шагжамүни амьдралынхаа туршид бусад шашинтай үзэл суртлын тэмцэл хийдэг байсан. Яагаад гэвэл Шагжамүнигийн заасан ном нь ариун ном, иймээс түүний дэлгэрүүлсэн Буддын Ном бүхий л явцдаа улам бүр өргөн тархаж харин бусад шашны нөлөө улам буурсан. Бат бөх суурьтай Брахман шашин хүртэл мөхлийн ирмэгт тулж ирсэн. Гэхдээ Шагжамүни нирваалсны дараа бусад шашин ялангуяа Брахман шашин дахин өргөн дэлгэрсэн. Харин Буддын шашинд ямар байдал гарсан бэ? Зарим лам хуврагууд өөр өөр түвшинд гон нь нээгдэж гэгээрсэн, гэхдээ тэдний гэгээрсэн түвшин нь нэлээд доогуур байсан. Шагжамүни Рулай түвшинд хүрсэн, гэхдээ олонхи лам хуврагууд энэ түвшинд хүрч чадаагүй.

Буддын ном өөр өөр түвшинд өөр өөрөөр илэрдэг, гэхдээ түвшин нь улам өндөр болох тусам улам үнэнд ойртоно, түвшин доогуур байх тусам үнэнээс улам хол. Иймээс доогуур түвшинд гон нь нээгдэж гэгээрсэн тэдгээр лам хуврагууд өөрсдийнхөө түвшинд харсан орчлон ертөнцийн илрэлийг тухайн зарчмыг ойлгосон байдалдаа суурилан Шагжамүнигийн ярьсан үгийг тайлбарласан. Өөрөөр хэлбэл зарим лам хуврагууд Шагжамүнигийн ярьсан номыг янз бүрээр тайлбарласан, зарим нь өөрсдийн ухаарч ойлгосон зүйлийг Шагжамүнигийн хэлсэн үг болгож ярьсан, Шагжамүнигийн хэлсэн үгээр ярихгүй болсон. Ингээд Буддын номыг танихын аргагүй болгож Шагжамүнигийн заасан Ном биш болсон. Эцэст нь Буддын шашны Буддын ном Энэтхэгт байхгүй болсон. Энэ бол түүхийн маш том сургамж юм. Хожим Энэтхэгт Буддын шашин ч байхгүй болсон. Буддын шашин байхгүй болохоос өмнө тэр нь олон удаа өөрчлөгдөж засагдсаар сүүлдээ Брахман шашинтай холилдож Энэтхэгт одоогийн байгаа Хиндү шашин үүссэн. Энэ нь Будда-д мөргөж тахихгүй, харин өөр зүйлийг тахин шүтдэг, иймээс Шагжамүнид итгэх бишрэл байхгүй болсон. Ийм л байдалтай болсон.

Буддын шашин хөгжих явцдаа хэд хэдэн том өөрчлөлтийг туулсан. Үүний нэг нь Шагжамүни өөд болсны дараахан зарим хүн Шагжамүнигийн ярьсан дээд түвшний зарчимд үндэслэн Их хөлгөний (Махаяана) шашинг бий болгосон. Мөн тэд Шагжамүнигийн нийтэд ярьсан Номыг энгийн хүмүүст ярьсан гэж үздэг. Энэ нь өөрийгөө ангижруулах, Архад бүтээлийн оронд хүрэхэд зориулагдсан, бүх амийг аврахыг ярьдаггүй. Тиймээс энэ нь Бага хөлгөний (Хинаяана) шашин гэж нэрлэгдсэн. Зүүн өмнөд Азийн орнуудын лам хуврагууд Шагжамүнигийн үеийн бясалгах аргыг хадгалж үлдсэн. Хятадад үүнийг Бага хөлгөний шашин гэж нэрлэдэг. Тэд үүнийг хүлээн зөвшөөрдөггүй харин өөрсдийгөө Шагжамүнигийн анхны

зүйлийг тэр хэвээр нь уламжилж үлдсэн гэж үздэг. Энэ бол үнэхээр тийм, тэд үндсэндээ Шагжамүнигийн үеийн бясалгалын аргыг уламжилж үлдсэн юм.

Энэ засварлагдсан Их хөлгөн шашин Хятад оронд орж ирсэний дараа тогтож үлдсэн, тэгээд одоогийн Хятадад байгаа Буддын шашин бий болсон. Гэхдээ энэ нь Шагжамүнигийн үеийн Буддын шашнаас тэс өөр болсон. Өмсгөлөөс эхлүүлээд ухамсарлалт болон бясалгалын бүх явц нь бүхэлдээ өөрчлөгдсөн. Эртний Буддын шашинд зөвхөн Шагжамүнийг анхны үндэслэгч гэж тахин шүтдэг байсан бол одоо Буддын шашинд маш олон Будда, том Бодьсадва нар гарч ирсэн, мөн олон Буддыг шүтдэг болсон. Их олон Рулай Буддыг шүтдэг, олон Буддаг шүтдэг Буддын шашин болсон. Будда Амитаба, Яоши Будда, Дари Рулай гэх мэтчилэн, бас олон том Бодьсадва нар гарч ирсэн. Ийм байдлаар Буддын шашин Шагжамүнигийн эхлэн үүсгэсэн үеэс огт өөр болсон.

Энэ хугацаанд бас өөр нэгэн өөрчлөлт гарсан нь Нагаржуна Бодьсадва бясалгалын нэг нууц аргыг тараасан. Энэ нь Энэтхэгээс Афганистанд дараа нь Шинжиан мужаар дамжин Хятадад орж ирсэн. Энэ үе нь Тан гүрний¹⁸ үе байсан, иймээс түүнийг Тан Тантризм гэж нэрлэсэн. Күнзийн сургаалийн нөлөөлөл их байсан учраас Хятадын ёс суртахууны байдал бусад үндэстнүүдээс өөр байсан. Энэ нууц бясалгалын арганд эр эм хосоороо бясалгах зүйлүүд байсан учраас тэр үеийн нийгэм үүнийг хүлээн зөвшөөрөөгүй. Иймээс Хуйчаан жилийн Тан хаант гүрний үед Буддын шашин хавчигдаж байх үед арчигдан үгүй болсон. Ингэж Тан Тантризм Хятадад байхгүй болсон. Одоогийн Японд байдаг Зүүн Тантризм нь тэр үед Хятадаас

¹⁸ Тан гүрэн-Хятадын түүхэнд их хөгжингүй үе (618-907 оны үе)

орж ирсэн юм, гэхдээ түүнд адислах зан үйл хийгдээгүй. Тантризмд үзэхдээ хэрэв хэн нэг хүн адислах ёс үйлдэхгүйгээр Тантризм сурвал Номыг хулгайлсанд тооцогддог, түүнийг биечлэн суралцсан гэж хүлээн зөвшөөрдөггүй. Өөр нэг хэсэг нь Энэтхэгээс Непалаар дамжин Түвдэд орж ирсэн, үүнийг Түвдийн Тантризм гэдэг ба өнөөг хүртэл уламжлагдаж үлдсэн. Үндсэндээ энэ бол Буддын шашны байгаа байдал юм. Би үүний үүсэл хөгжил болон өөрчлөлтийн явцыг маш товчхон дурьдлаа. Буддын шашны хөгжлийн явцад Бодьдармагийн байгуулсан Даяаны шашин, бас Ариун Орны шашин, Хуаянь шашин гэх мэт зарим урсгалууд гарч ирсэн. Энэ бүгд бол Шагжамүнигийн тэр үед ярьсан дээр ухамсарлан гаргасан зүйл юм, эдгээр нь бүгд өөрчлөгдсөн Буддын шашинд харьяалагддаг. Буддын шашинд ийм арав гаруй номын үүд байдаг. Тэд бүгд шашны хэлбэртэй учраас Буддын шашинд харьяалагддаг.

Энэ зуунд үүссэн шашнууд, мөн зөвхөн энэ зууных ч биш бас өмнөх зуунуудад дэлхийн янз бүрийн хэсэгт үүссэн олон шинэ шашнуудын ихэнх нь хуурамч. Аугаа гэгээрэгчид бүгд хүн аврах өөрийн гэсэн диваажинтай. Шагжамүни, Будда Амитаба, Дари Рулай гэх мэтчилэн эдгээр Рулай Будда нар хүнийг аврах өөрийн гэсэн диваажинтай байдаг. Бидний энэ тэнгэрийн заадас галагтикт ийм зуу гаруй диваажин байдаг. Бидний Фалунь Дафа бас Фалунь диваажинтай.

Тэдгээр хуурамч номын үүдэнд хүнийг аврахдаа хаашаа аваачих юм? Тэд хүнийг аварч чадахгүй, тэдний заасан нь Ном биш. Мэдээж зарим хүн шашинг анх үүсгэхдээ ариун шашинг сүйтгэх буг чөтгөр болно гэж санаагүй. Тэд өөр өөр түвшинд гон нь нээгдэж гэгээрсэн, зарим нэг зарчмыг харсан. Гэхдээ тэдний түвшин нь хүн аварч чадах гэгээрэгчдийн хэмжээнд хүрэхгүй маш доогуур байсан. Тэр зарим ёс зарчмыг харсан, энгийн хүний зарим хийдэг зүйл

буруу гэдгийг олж мэдсэн, тэр бас хүмүүст яаж сайн үйл хийхийг ярьдаг. Анх эхлэхдээ тэр бусад шашныг эсэргүүцдэггүй байсан. Хүмүүс эцэст нь түүнийг тахин шүтдэг болж, түүний ярьсныг үндэслэлтэй гэж үздэг, яваандаа улам түүнд итгэдэг болсон. Эцэст нь хүмүүс түүнийг биширч, шашныг шүтэхгүй болсон. Түүнд нэр хүнд, ашгийн төлөө сэтгэл гарахад, хүмүүсээс өөртөө өргөмжлөл нэр өгөхийг хүссэн. Дараа нь тэр шинэ шашин үүсгэнэ. Би та бүгдэд хэлье, энэ бүгд бол харгис шашин юм. Тэд хүмүүсийг хорлож харагдахгүй ч гэсэн харгис шашин юм. Яагаад гэвэл тэд хүмүүсийг ариун шашин шүтэхэд нь саад болдог, ариун шашин хүнийг аварч чадна харин тэд чадахгүй. Аажмаар дэлгэрэх явцдаа далдуур муу зүйл хийнэ. Ойрын үед ийм янзын олон зүйл Хятадад гарч ирсэн, жишээ нь Гуанинь шүтлэг бол үүний нэг нь юм. Иймээс та бүгд эрх биш анхаарч яваарай, зүүн Азийн нэг оронд хоёр мянга гаруй төрлийн зүйлс байдаг гэдэг. Зүүн өмнөд Азийн болон барууны зарим орнуудад зүсэн бүрийн шүтлэг байдаг, нэг оронд буг чөтгөрийг ил тод шүтдэг. Эдгээр зүйлүүд бүгд Номын төгсгөлийн үед гарсан буг чөтгөрүүд юм. Номын төгсгөлийн үе нь зөвхөн Буддын шашны төгсгөл биш юм, харин тодорхой нэг өндөр түвшний орон зайнаас дооших маш олон орон зайнууд бүгд доройтолд орсон. Номын төгсгөл нь зөвхөн Буддын шашны номын төгсгөл гэсэн үг биш, мөн хүн төрөлхтөний нийгэмд, хүний сэтгэлд ёс суртахууныг сахин барих хууль байхгүй болсон.

Нэг номоор тууштай бясалгах

Бид бясалгалгахдаа тууштай байхын тухай ярьдаг. Чи яаж ч бясалгасан өөр зүйлийг нэмж оруулан хамаагүй бясалгаж болохгүй. Зарим сүсэгтнүүд Буддын шашинг бидний Фалунь Дафа-тай хамт бясалгадаг. Би чамд хэлье, эцэст нь чи юу ч олохгүй, хэн ч чамд юу ч өгөхгүй. Бид бүгд Буддын

системийнх, гэсэн ч энд зан чанарын асуудал байдаг, мөн нэг бясалгалдаа тууштай байх асуудал яригдана. Чи зөвхөн нэг л биетэй, чиний биенд аль номын үүдний гон гарах юм? Яаж чамд хувиргаж өгөх юм? Чи хаашаа явах юм? Чи ямар номын үүдээр орж бясалгана чи тэнд л очно. Хэрэв чи Ариун орны номоор бясалгавал Будда Амитаба-гийн диваажинд очно, Йоши Буддагийн номоор бясалгавал чи Лиули диваажинд очно. Шашинд ингэж л ярьдаг, үүнийг хоёргүй номын үүд гэдэг.

Бидний энд ярьж байгаа дасгалаар хичээллэх, гон хувирах бүхэл явц нь бүгд өөрийн гэсэн номын үүдний бясалгалын дагуу явагддаг. Чи хаашаа явахаа хэл дээ? Хэрэв чи хоёр завин дээр хөлөө зэрэг тавибал хаашаа ч хүрэхгүй. Чигон бясалгалыг хийдийн доторхи Буддын бясалгалтай хольж болохгүй төдийгүй, бясалгалыг хооронд нь, чигон-ыг хооронд нь, мөн шашинг хооронд нь бас хольж болохгүй. Хэдийгээр нэг шашин ч, түүний дотор багтах хэдэн номын үүдийг хооронд нь бас хольж бясалгаж болохгүй. Зөвхөн нэг номын үүдийг сонгох ёстой. Чи Ариун орны шашинд бясалгавал зөвхөн Ариун орны шашинд, Тантризмд бясалгавал зөвхөн Тантризмд, Даяаны шашинд бясалгавал зөвхөн Даяаны шашинд бясалга. Хэрэв чи хоёр завин дээр хөлөө зэрэг тависантай адил энийг ч бясалгаад тэрийг ч бясалгах юм бол юуг ч олж авахгүй. Өөрөөр хэлбэл Буддын шашинд хүртэл хоёргүй номын үүд гэж ярьдаг, чамайг хольж бясалгахыг зөвшөөрөхгүй. Буддын шашинд мөн адил гон гардаг, энэ бол бас бясалгал, үүнд гон үүсэх бүхэл явц нь өөрийн номын дагуу бясалгах, мөн хувиргах замаар явагддаг. Өөр орон зайд бас гон хувирах явц байдаг. Энэ бол маш их нарийн төвөгтэй үйл явц, түүнд хамаагүй өөр зүйлийг оруулж бясалгаж болохгүй.

Зарим сүсэгтэн Буддын системийн бясалгал хийдэг гэж сонсчихоод манай сурагчдыг хийд рүү аваачих гэж

оролддог. Би энд сууж байгаа сурагч болгонд хэлэхэд хэн ч битгий тийм зүйл хийгээрэй. Тэгвэл чи бидний Дафа-г болон Буддын шашны дэг жаягийг эвдэнэ. Мөн түүнчлэн сурагчдыг үймүүлж тэднийг юуг ч олж авч чадахгүй байдалд хүргэнэ. Энэ бол болохгүй. Бясалгал бол нарийн асуудал, заавал тууштай байх ёстой. Бидний энгийн хүний дунд зааж байгаа энэ хэсэг нь шашин биш ч гэсэн бясалгалын зорилго нь адил юм. Бүгд гон-ыг нээж гэгээрэхэд хүрэх, бясалгалынхаа эцсийг үзэх нэг зорилготой юм.

Шагжамүни Номын төгсгөлийн үед хийдийн лам хуваргууд өөрсдийгөө аврахад хэцүү болох төдийгүй сүсэгтнүүдийг бүүр ч хариуцах хүн байхгүй болно гэж хэлсэн. Чи нэг багштай болсон ч тэр багш нь өөрөө бас бясалгадаг хүн, тэр жинхэнэ бясалгадаггүй бол ямар ч үр дүнгүй, энэ сэтгэлийг бясалгахгүй бол хэн ч дээшилж чадахгүй. Бишрэн дагах бол энгийн хүний асуудал, чи бишрэн дагаад л Буддын системийнх болох юм уу? Тэгээд Будда чамайг ивээлдээ авах юм уу? Тийм зүйл гэж байхгүй. Чи өдөр болгон духаа шалбартал мөргөөд ч, багц багцаар хүж уугиулж өргөсөн ч нөлөө байхгүй. Чи үүний тулд өөрийнхээ сэтгэлийг жинхэнэ бясалгах хэрэгтэй. Номын төгсгөлийн үе ирээд байна, орчлон ертөнцөд маш том өөрчлөлт гарсан. Шашин шүтлэгийн газрууд хүртэл доройтсон. Тэдгээр ер бусын чадвартай хүмүүс (лам хуваргыг оролцуулан) энэ байдлыг бас олж мэдсэн. Одоо бүх дэлхийд зөвхөн би ганцаараа ариун Номыг нийтэд зааж байна, урьд нь хэн ч хийж байгаагүй зүйлийг би хийж байна, мөн Номын төгсгөлийн үед энэ үүдийг өргөн нээсэн. Үнэндээ энэ бол мянган жилд юмуу эсвэл арван мянган жилд ч тохиолдохгүй зүйл, гэхдээ чиний аврагдаж чадах үгүй нь өөрөөр хэлбэл бясалгаж чадах чадахгүй нь чамаас өөрөөс чинь шалтгаална, миний хэлсэн бол орчлон ертөнцийн аугаа зарчим юм.

Би чамайг заавал миний Фалунь Дафаг сур гэж байгаа юм биш, би нэг зарчмыг нь л ярьж байна. Хэрэв чи бясалгахыг хүсвэл, чи зөвхөн нэг бясалгалдаа тууштай байх ёстой. Тэгэхгүй бол чи үндсэндээ бясалгаж чадахгүй. Чамайг бясалгахыг хүсэхгүй бол мэдээж бид нар чамайг хариуцахгүй. Номыг жинхэнэ бясалгах хүнд л заана, сонсуулна, тиймээс заавал тууштай байх ёстой, өөр бясалгалын бодлыг оруулж болохгүй. Би бодлоор удирдахыг ярихгүй, бидний Фалунь Дафад бодлын ямар ч үйлдэл байхгүй, иймээс та бүгд ямар ч бодлын зүйлийг нэмж оруулж болохгүй. Үүнийг онц анхаарах ёстой, үндсэндээ бодлын ямар ч үйлдэл байхгүй. Буддын системд хоосон чанарыг ярьдаг, Дао-гийн системд үл оршихуйг ярьдаг.

Би нэг удаа өөрийнхөө бодлыг маш өндөр түвшний дөрөв таван аугаа гэгээрэгч, аугаа Дао нартай холбосон. Тэдний түвшний өндрийг хэлбэл энгийн хүмүүс төсөөлөхийн аргагүй өндөр. Тэд миний юу бодож байгааг мэдэхийг хүссэн. Би ийм олон жилээр бясалгасан, өөр хүмүүс миний бодлыг мэдэх ямар ч аргагүй, бусад хүмүүсийн ер бусын чадвар нэвтрэн орж чадахгүй. Хэн ч намайг мэдэх боломжгүй, тэд ч миний юу бодож байгааг мэдэж чадахгүй. Тэд миний бодол санааг мэдэхийг хүссэн, тэгээд миний зөвшөөрснөөр тэд бодлоо миний бодолтой хэсэг хугацаанд холбосон. Холбогдсоны дараа надад бага зэрэг хэцүү санагдсан, яагаад гэвэл миний түвшин хэр өндөр, нам байсан ч хамаагүй, би энгийн хүний дунд байгаа, хүн аврах сэтгэлтэй, хүн аврах үйл хийж байгаа. Харин тэдний сэтгэл ямар амгалан байсан гээч? Тэд аймшигт гүн амгаланд байсан. Нэг хүн ийм гүн амгаланд ороход бол яахав, харин дөрөв таван хүн бүгд ийм гүн амгаланд суухад, энэ нь огт хөдөлгөөнгүй үхмэл цөөрөм мэт байсан, би тэднийг мэдрэхийг хүссэн боловч болоогүй. Тэр хэдэн өдрүүдэд миний сэтгэл их таагүй байсан, тийм нэг

мэдрэмжтэй байсан. Энгийн хүн үүнийг төсөөлж мэдрэхийн аргагүй, энэ бол ямар ч үйлгүй, хоосон байсан.

Маш өндөр түвшинд бясалгахад бодлын ямар ч үйл байдаггүй, яагаад гэвэл энгийн хүний түвшинд байгуулах цогц суурь нь аль хэдийн чамд тавигдсан. Дээд түвшинд бясалгаж хүрсний дараа ялангуяа бидний бясалгал үндсэндээ автоматаар явагдана, бүрэн автоматаар бясалгана. Чи өөрийнхөө зан чанарыг дээшлүүлж л байвал чиний гон өснө, тэр ч байтугай чамд ямар ч хөдөлгөөн хийх шаардлага байхгүй. Бидний дасгал бол энэ автомат механизмыг бэхжүүлэхийн тулд юм. Яагаад Даяанд сууж бясалгахад дандаа завилж хөдөлгөөнгүй суудаг вэ? Энэ нь ямар ч үйлгүй байдалд ордог юм. Чи Дао-гийн бясалгалд ийм ч дасгал, тийм ч хөдөлгөөн, мөн бодлын үйлдэл эсвэл бодлоор удирдах гэж ярьдгийг ажигласан байх. Би чамд хэлье, Дао системийн бясалгалд чий-н түвшнөөс гарсны дараа юу ч байхгүй болно, мөн энэ тэр бодлын ч талаар ярихгүй. Иймээс өөр чигон-оор хичээллэж байсан хүн амьсгалаа зохицуулах, бодлоор удирдах гэх мэтийн зүйлээ орхиж чаддаггүй. Би тэдэнд их сургуулийн зүйлийг зааж байхад тэд надаас дандаа бодлоо яаж удирдах, яаж бодлын хөдөлгөөнөөр хийх гэх мэтийн бага сургуулийн зүйлийг асууж байдаг. Тэд хэзээнээс ийм арга барилд дасчихсан, чигон-ыг ийм байдаг гэж үздэг, үнэндээ тийм биш юм.

Ер бусын чадвар ба Гон хүч

Олон хүн чигон-ы нэр хэллэгийн талаар тодорхой мэддэггүй, зарим хүн үүнд байнга төөрөлдөж байдаг. Тэд ер бусын чадварыг гон хүч, гон хүчийг ер бусын чадвар гэж ярьдаг. Бид өөрсдийнхөө зан чанарыг бясалгахад гарсан гон нь орчлон ертөнцийн мөн чанарт уусахад өөрийн буян гон болж хувирдаг. Энэ бол тэр хүний түвшний өндөр намыг,

гон хүчний их багыг, мөн түүний бүтээлийн орны өндөр, намыг тодорхойлдог, энэ бол хамгийн гол гон юм. Бясалгалын явцад хүнд ямар байдал гардаг вэ? Үүний нэг байдал нь гэвэл хүнд зарим онцгой ер бусын чадвар гардаг, бид үүнийг товчоор ер бусын чадвар гэдэг. Миний сая дурьдсан өөрийн түвшинг дээшлүүлдэг гон-ыг гон хүч гэж нэрлэдэг. Түвшин өндөр байх тусам гон хүч нь улам их, мөн ер бусын чадвар нь улам хүчтэй байдаг.

Ер бусын чадвар нь зөвхөн бясалгалын явцад дагалдан гардаг зүйл, тэр нь түвшинг илэрхийлэхгүй, хүний түвшний өндөр намыг, гон хүчний их багыг илэрхийлэхгүй, зарим хүнд энэ нь их гардаг, зарим хүнд бага гардаг. Мөн ер бусын чадвар бол бясалгалын гол зорилго болгон хөөцөлдсөний дүнд олж авдаг зүйл биш. Хүн жинхэнэ бясалгая гэж шийдсэн үед түүний ер бусын чадвар нь гардаг. Үүнийг бясалгалынхаа гол зорилго болгож болохгүй. Чи эдгээр зүйлийг юуны тулд бясалгаж байгаа юм? Зүгээр л энгийн хүнд хэрэглэх гэж үү? Чамайг энгийн хүмүүсийн дунд хамаагүй хэрэглэхийг туйлаас зөвшөөрөхгүй, тиймээс чи үүнийг их хүсвэл улам олдхоггүй. Яагаад гэвэл чи хүсч байна, хүсэх бол зууралдсан сэтгэл юм. Бясалгалд бол яг зууралдсан сэтгэлийг орхих ёстой.

Маш олон хүн дээд ахуйд бясалгаж хүрсэн ч ер бусын чадвар байхгүй. Багш нь үүнийг түгжчихдэг, түүнийг өөрийгөө сайн барьж чадахгүйгээс муу зүйл хийчихнэ гэж болгоомжилдог, иймээс ямагт түүний ер бусын чадварыг ил гаргуулахгүй, ийм их олон хүмүүс байдаг. Ер бусын чадвар нь хүний бодлоор захирагддаг. Хүн унтаж байхдаа, зүүдэндээ өөрийгөө зөв барьж чадахгүйгээс маргааш өглөө нь магадгүй тэнгэр газрыг хөмрүүлчихсэн байж мэднэ. Ийм юм болохыг зөвшөөрөхгүй. Яагаад гэвэл энгийн хүмүүсийн дунд бясалгаж байгаа, иймээс аливаа аугаа ер бусын чадвар хэрэглэхийг зөвшөөрөхгүй. Ихэнх нь түгжчигддэг, гэхдээ

бүрмөсөн биш. Сайн бясалгасан хүн их олон байдаг, тэд өөрсдийгөө сайн барьж чаддаг учраас зарим ер бусын чадвартай байхыг зөвшөөрдөг. Тийм хүнээс чи ер бусын чадвараа үзүүлээч гэж гуйсан ч тэр яасан ч тэгэхгүй. Тэр өөрийгөө барьж чадна.

Урвуу бясалгал ба Гон зээлдэх

Зарим хүн бясалгал хийж үзээгүй, эсвэл аль нэгэн чигон-ы хичээлд сууж хэдэн хөдөлгөөнийг заалгасан, гэхдээ тэр бүгд нь бясалгал биш, өвчнийг арилгах бие сайжруулах зүйлд л хамаарагддаг. Өөрөөр хэлбэл тийм хүн жинхэнэ уламжлан аваагүй, гэхдээ нэг шөнө түүнд гэнэт гон ирсэн. Бид энэ гон хаанаас ирсэнийг ярья, ийм хэдэн хэлбэр байдаг.

Нэг хэлбэр нь урвуу бясалгалд харъяалагддаг. Урвуу бясалгал гэж юу вэ? Энэ бол зарим нилээд настай хүн бясалгах хүсэлтэй байдаг, гэхдээ эхнээс нь бясалгахад амжихгүй болсон. Чигон дэлгэрч байсан оргил үед тэд бас бясалгахыг хүссэн, тэд чигон-оор хичээллэхэд бусад хүмүүст сайн зүйл хийж болно, мөн өөрийгөө ч дээшлүүлж чадна гэж мэднэ, түүнд ийм нэг дээшлэх хүсэл, бясалгах хүсэл байдаг. Хэдэн жилийн өмнө чигон-ы оргил үед тэдгээр чигон багш бүгд чигон-ыг дэлгэрүүлж байсан боловч хэн ч дээд түвшний зүйлийг заагаагүй. Өнөөдрийг хүртэл чигон-ыг жинхэнэ дээд түвшинд нийтэд заахыг би ганцаараа хийж байна, өөр хүн байхгүй. Урвуу бясалгаж байсан хүмүүс бүгд тавиас дээш настай, өндөр настай хүмүүс, төрөлхийн суурь нь маш сайн, биен дэх зүйлүүд нь бас их сайн байдаг, бараг бүгд эдгээр хүмүүсийг шавиа болгож өөрсдийнхөө залгамжлагч болгомоор хүмүүс байдаг. Гэтэл эдгээр хүмүүс нилээд өндөр настай, тэд бясалгахыг хүссэн ч тийм амар биш! Хаана очиж багш олох

юм? Гэхдээ тэд бясалгахыг хүсэхэд, энэ сэтгэл нь гарахад алт шиг гялалзана, арван зүгийн дэлхийг доргионо. Хүмүүс үүнийг Буддын мөн чанар гэдэг, энэ бол Буддын мөн чанар нь гарч ирсэн юм.

Дээд түвшнээс харахад хүний амь бол хүн байхын тулд биш юм. Яагаад гэвэл хүний амь бол орчлон ертөнцийн орон зайд үүссэн, орчлон ертөнцийн Үнэн, Нинжин, Тэвчээр гэсэн мөн чанарт ууссан, мөн угийн эелдэг энэрэнгүй чанартай. Гэхдээ амь бодь өсч олшроход нийгмийн харилцаа үүсдэг, тэгээд тэдний дунд зарим нь амиа хичээсэн эсвэл муу болж их өндөр түвшинд байх боломжгүй болдог, тэд доош тодорхой нэг түвшин лүү унаж ирнэ. Тэр түвшиндээ бас муу болж дахиад доошоо унадаг. Энэ байдлаар үргэлжилсээр эцэст нь энгийн хүний түвшинд унаж ирдэг. Энэ түвшинд унаж ирвэл тэд бүрмөсөн устгагдах ёстой. Гэхдээ тэдгээр аугаа гэгээрэгчид нигүүлсэнгүй сэтгэлийн үүднээс хамгийн зовлонтой энэ орчинд байгаа хүнд дахин нэг боломж өгөхөөр шийдсэн, тэгээд ийм нэгэн орон зайг бүтээсэн юм.

Бусад орон зайд амьдарч байгаа хүмүүст ийм бие байхгүй, тэд нисч чаддаг төдийгүй бас том, жижиг болон хувирч чаддаг. Харин энэ орон зайн хүнд ийм нэгэн биеийг өгсөн, бидний энэ махан бие юм. Ийм биетэй болсны дараа даарах, халууцах, ядрах эсвэл өлсөх зовлонтой. Өвчилсөн үедээ чи зовно, төрөх, хөгшрөх, өвчлөх, үхэх жамаар явуулдагийн учир нь зовлон туулуулж чамаар нүглийг чинь наминчлууулж байгаа юм. Чамайг буцаж чадах эсэхийг чинь харна, дахин нэг боломжийг өгдөг. Иймээс хүн төөрөлтийн дунд унаж ирдэг. Энд унаж ирсний дараа чамд ийм хоёр нүдийг бүтээж өгсөн, чамд бусад орон зайг болон бие бодийн орших үнэн байдлыг харуулахгүй. Хэрэв чи буцах хүсэлтэй байвал хамгийн хүнд зовлон хүртэл чамд хамгийн нандин байх болно. Төөрөлтийн дунд ухамсраараа

бясалгаад буцъя гэвэл маш их гашуун зовлонтой байдаг, гэхдээ буцахад хурдан. Хэрэв чи дахиад муу болбол чиний амь устгагдана. Иймээс тэдний харснаар хүний амь бол хүн байхын тулд биш юм. Энэ нь чамайг үүссэн эх үндсэндээ буц, үнэнд хүр, харь гэсэн үг. Энгийн хүн үүнийг ухаарч чаддаггүй. Энгийн хүн энгийн хүний нийгэмд яаж өөрийгөө хөгжүүлэх, яаж сайхан амьдрах тухай л боддог, энэ бол энгийн хүн. Тэр улам сайхан амьдрах тусам улам амиа хичээнэ, улам их шунана, тэгээд орчлон ертөнцийн мөн чанараас улам эсрэг болно, тэр мөхөл рүүгээ явна.

Дээд түвшнээс харахад, чи өөрийгөө урагшлан ахиж байна гэж бодоход үнэндээ хойш ухран явж байгаа юм. Хүн төрөлхтөн шинжлэх ухаан хөгжиж дэвшил гарч байна гэж боддог боловч үнэндээ энэ бол зөвхөн орчлон ертөнцийн зүй тогтлын дагуу явагдаж байгаа юм. Найман гэгээрэгчийн нэг Жан Гуолао ар нууруугаараа харж илжиг унадаг байсан, түүнийг яагаад ар нууруугаараа харж илжиг унадаг байсныг хүмүүс мэддэггүй. Тэр урагшаа явах нь хойшоогоо ухарч байна гэж олж мэдсэн, тэгээд тэр буруу харж илжигээ унадаг байсан. Тиймээс зарим хүн бясалгахыг хүсэхэд гэгээрэгчид энэ сэтгэлийг нь их нандин гэж үздэг, нөхцөлгүйгээр тусалж болно. Өнөөдөр энд сууж байгаа сурагчидтай адил, хэрэв чи бясалгахыг хүсвэл би чамд ямар ч болзолгүйгээр тусалж чадна. Гэхдээ чи энгийн нэг хүний адил өвчнөө үзүүлэх, энэ тэр юм хүсэх бодолтой байвал болохгүй, чамд тусалж чадахгүй болно. Яагаад вэ? Учир нь чи энгийн хүнээрээ байх бодолтой, энгийн хүн бол төрөх, хөгшрөх, өвчлөх, үхэх жамаар явах ёстой, ийм л байх ёстой. Бүх зүйл хувь ерөөлийн харилцаатай, үүнийг замбараагүй болгож болохгүй. Чиний амьдралд бясалгах асуудал анхнаасаа байгаагүй, харин чи одоо бясалгахыг хүсч байна, тэгвэл чиний амьдралын хойшдын замыг зохицуулж өгөх болно, чиний биеийг засч өгч болно.

Тэгвэл хүн бясалгахыг хүсэх сэтгэл нь нэг гарахад аугаа гэгээрэгчид хараад үүнийг их нандин зүйл гэж үздэг. Гэхдээ яаж түүнд туслах вэ? Энэ дэлхийн хаанаас багшийг олох юм? Мөн тэр бас тавь гарсан настай, аугаа гэгээрэгчид түүнд зааж болохгүй, яагаад гэвэл хэрэв тэд илэрч гарч ирээд чамд Ном болон дасгал заавал тэнгэрийн нууцыг задалсан болно, тэд бас доош унах болно, хүн өөрөө муу зүйл хийснээс энэ төөрөлтийн дунд унаж ирсэн, төөрөлтийн дунд ухамсраараа бясалгах ёстой, иймээс гэгээрэгчид зааж болохгүй. Будда бодитоор илэрч гарч ирээд чамд Ном болон дасгал зааж байгааг харчихвал уучилшгүй арван хар нүгэлтэй хүн ч ирж сурна, хэн ч итгэнэ, тэгвэл юуг нь ухамсарлах юм, ухамсарлах асуудал байхгүй болно. Хүн өөрөөсөө болоод энэ төөрөлтийн дунд унасан, устгагдах ёстой, чамд нэг удаа төөрөлтийн дунд бясалгаад буцах боломжийг өгсөн. Хэрэв чи буцаж чадах юм бол буц, буцаж чадахгүй бол үргэлжлэн зургаан замын тойргоор төрөл олох замаар явна эсвэл устана.

Хүн өөрийнхөө замаар л явдаг. Хэрэв хүн бясалгахыг хүсвэл яах вэ? Тэд нэг арга бодож олсон. Тэр үед чигон оргил үедээ байсан, энэ бас нэг янзын тэнгэрийн өөрчлөлт юм. Иймээс гэгээрэгчид энэ тэнгэрийн байдалд нийцүүлэх үүднээс тэр хүний зан чанарын хэмжээнд тохируулан нэг уян хоолойгоор дамжуулан гон өгнө, усны гоожуур шиг, түүнийг онгойлгоход гон ирнэ. Тэр хүн гон гаргахыг хүсвэл гон гарна, түүнд өөрийн гэх гон байхгүй, ийм л байдалтай. Үүнийг урвуу бясалгал гэж нэрлэдэг, дээрээс доошоо бясалгаад гэгээрэх юм.

Бид ер нь бясалгахдаа, доороос дээшээгээ гон нээгдээд гэгээрэлд хүртэл бясалгана. Энэ урвуу бясалгал нь доороос дээш бясалгахад амжихгүй болсон настай хүний хувьд юм, иймээс дээрээс доош бясалгахад хурдан байдаг, энэ бол тэр үед гарсан нэг байдал юм. Ийм хүний зан чанар заавал их

өндөр байх ёстой, мөн түүний зан чанарын түвшинд тохирсон хэмжээний энергийг өгдөг. Үүний зорилго нь юу вэ? Нэг зорилго нь бол тэр үеийн тэнгэрийн байдалд нийцүүлэх явдал юм, тэр хүн сайн зүйл хийх явцдаа бас зовлонг амсана. Яагаад гэвэл энгийн хүмүүстэй нүүрэлдэнэ, энгийн хүний янз бүрийн сэтгэл чамайг үймүүлдэг. Чи хэн нэгний өвчинг эдгээж өгсөн, гэвч тэр үүнийг ойшоож үзэхгүй. Чи түүний өвчнийг эдгээхдээ биенээс нь олон муу зүйлийг авч хаясан ч, хэр их эдгээсэн ч тэр үед магадгүй мэдэгдэхүйц өөрчлөлт харагдаагүй. Түүний сэтгэл хангалуун биш, чамд ер талархахгүй, харин тэр магадгүй чамайг загнаж түүнийг залилсан гэж буруутгана! Иймэрхүү асуудалтай тулгарахад энэ орчин нь чиний сэтгэлийг хатуужуулдаг. Гон өгсөн зорилго бол түүнд бясалгаж өөрийгээ дээшлүүлэхэд юм. Сайн зүйл хийснээр өөрийнхөө ер бусын чадварыг гаргаж бас өөрийнхөө гон-ыг өсгөнө. Гэхдээ зарим хүн энэ зарчмыг мэддэггүй. Би хэлсэн биз дээ? Түүнд Ном ярьж болохгүй, тэр ухамсарлаж чадвал ойлгоно, энэ бол ухамсарын асуудал, ухамсарлаж чадахгүй бол ямар ч арга байхгүй.

Зарим хүнд гон ирэхэд, нэг шөнө унтаж байхдаа гэнэт халууцаад л хөнжил ч нөмөрч чадахгүй болдог. Өглөө босч ирээд гараа юунд л хүргэнэ тогтой болсноо мэдэрнэ. Тэр гон ирсэнийг мэднэ, хэн нэгний бие хаа нэгтэй өвдөхөд тэнд нь гараараа нэг илээд л гайгүй болгоно, нэлээд сайн үйлчилнэ. Тэр үүнээс хойш гон-той болсоноо мэдээд чигон багш болсон, мөн пайз өлгөөд өөрөө өөртөө чигон багш гэж нэр зүүгээд ажлаа эхэлнэ. Анхандаа энэ хүн нилээд сайн байсан учраас хүний өвчнийг эдгээхэд түүнд өгсөн мөнгө эсвэл бэлгийг тэр магадгүй бүгдийг авдаггүй, авахаас татгалздаг байсан. Гэвч тэр энгийн хүний нийгмийн будагтай том торхноос бохирдохгүй гарч чадахгүй. Яагаад гэвэл эдгээр урвуу бясалгалаар яваа хүмүүс жинхэнэ зан чанарын бясалгал хийгээгүй, тэдэнд өөрийнхөө зан чанарыг

барихад хэцүү. Аажмаар жижигхэн бэлгийг хүлээн авч эхэлнэ, дараа нь том бэлэг өгсөн ч авдаг болно, эцэст нь бага юм өгөхөөр чамладаг болно. Бүүр эцэст нь тэр, чи ийм олон хэрэггүй юм өгч яах юм? Мөнгө өгчих! гэж хэлнэ. Бага мөнгө өгвөл бас голно. Тэр жинхэнэ уламжлагдсан чигон багшийг хүртэл үл тоомсорлоно, түүний чих нь хүмүүсийн өөрийг нь ямар чадвартайг нь хэлсэн магтаалаар дүүрнэ. Хэн нэгэн түүнийг муулбал дургуй нь хүрнэ, нэр хүнд ашгийн сэтгэл бүгд гарч ирсэн, тэр өөрийгөө бусдаас гарамгай чадалтай, мундаг гэж үздэг. Түүнд чигон багш болог, баян болог гэж гон өгсөн гэж буруугаар ойлгосон, үнэндээ бол түүнийг бясалга гэж өгсөн юм. Нэр хүнд, ашгийн сэтгэл гарахад түүний зан чанар нь үнэхээр доош унасан.

Би зан чанар нь хэр өндөр байна, гон нь тэр хэмжээгээр өндөр байна гэж хэлсэн. Зан чанар нь унаж ирвэл түүнд тийм их гон өгөхгүй болно, яагаад гэвэл зан чанарын дагуу өгөх ёстой, зан чанар нь хэр өндөр байна, гон нь тэр хэмжээгээр өндөр байна. Энэ нэр ашгийн сэтгэлийг улам чухалд үзэхэд энгийн хүмүүсийн дунд улам доош унана, түүний гон бас дагаад доош унаж ирдэг. Эцэст нь тэр бүр унахад түүнд гон өгөхгүй болно, ямар ч гон байхгүй болно. Урьд хэдэн жилийн өмнө нилээд олон тийм хүн гарч ирсэн, тавь гаруй насны эмэгтэйчүүд нэлээд байсан. Настай эмэгтэй хүн чигон-оор хичээллэж байгааг харсан байх, гэхдээ тэр нь жинхэнэ уламжлагдаагүй, магадгүй аль нэгэн чигон-ы ангид өвчин эдгээх, бие эрүүлжүүлэх хэдхэн дасгал хөдөлгөөнийг сурсан, нэг өдөр тэр гэнэт гон-той болсон. Зан чанар нь муудсан, нэр хүнд ашгийн сэтгэл гарахад доош унадаг. Эцэст нь тэр одоо хэн ч биш болсон, гон ч байхгүй болсон. Одоо ийм урвуу бясалгалаар унасан олон хүн байдаг, тэднээс зөвхөн цөөхөн хэд нь л үлдсэн. Яагаад вэ? Энэ нь түүнийг бясалгуулах гэж өгсөнийг ухаараагүй тэр өөрийгөө энгийн хүний дунд баян болог, нэрд гараг, мөн

чигон багш болог гэж өгсөн гэж буруу ойлгосон. Үнэндээ энэ бол түүнийг бясалгуулах гэсэн хэрэг.

Гон зээлэх гэж юу вэ? Үүнд насны хязгаар байхгүй, гэхдээ нэг шаардлага бий, тухайн хүн маш сайн зан чанартай байх ёстой. Тэр хүн чигон-оор бясалгаж болно гэж мэддэг, тэр бас бясалгах хүсэлтэй. Бясалгах сэтгэлтэй байсан ч тэр хаанаас багш олох юм? Хэдэн жилийн өмнө жинхэнэ чигон багш нар чигон-ыг зааж байсан, гэхдээ тэдний зааж байсан нь бүгд өвчин эдгээх бие сайжруулах зүйлүүд байсан. Хэн ч дээд түвшний зүйлийг заагаагүй, заах ч хүн байгаагүй.

Гон зээлэхийг ярихад, би бас нэг асуудлыг авч ярья. Хүнд Эзэн сүнснээс (эзэн бодол) гадна бас Дэд сүнс (дэд бодол) байдаг. Зарим хүнд нэг, хоёр, гурав, дөрөв, бас таван Дэд сүнс байдаг. Энэ Дэд сүнсний хүйс нь тухайн хүнийхтэй магадгүй адил биш. Зарим нь эрэгтэй бас зарим нь эмэгтэй, бүгд адилгүй. Үнэндээ Эзэн сүнсний хүйс нь бодит биетэй бас магадгүй адил биш, яагаад гэвэл одоогийн маш олон эрэгтэй хүн эм Эзэн сүнстэй, маш олон эмэгтэй хүн эр Эзэн сүнстэй гэдгийг бид олж мэдсэн. Дао-гийн системд ярьдгаар арга, билиг эсрэгээр эргэсэн, билиг нь мандаж арга нь буурсан тэнгэрийн өөрчлөлттэй яг таарч байна.

Хүний Дэд сүнс нь Эзэн сүнсийг бодвол гол төлөв илүү дээд түвшнөөс ирдэг, ялангуяа зарим хүний Дэд сүнс маш өндөр түвшнөөс ирсэн байдаг. Дэд сүнс бол биенд шүглэсэн сүнс биш, тэр чамтай нэг цагт чиний эхийн хэвлийгээс хамт төрсөн, тэр чамтай адил нэртэй, чиний биеийн нэг хэсэг юм. Жирийн үед хүмүүс ямар нэг юм бодох эсвэл ямар нэг зүйл хийхэд Эзэн сүнсний шийдвэрээр болдог. Дэд сүнс гол нь хүний Эзэн сүнсийг аль болох муу зүйл хийлгэхгүй байхыг хичээдэг, гэхдээ Эзэн сүнс их гэжүүд байхад Дэд сүнс яаж ч

чадахгүй. Дэд сүнс энгийн хүний нийгэмд төөрөлдөөгүй, харин Эзэн сүнс энгийн хүний нийгэмд амархан төөрдөг.

Зарим Дэд сүнс их өндөр түвшнээс ирсэн, магадгүй гэгээрлийн хутаг олоход их ойртсон. Дэд сүнс бясалгах хүсэлтэй, гэхдээ Эзэн сүнс бясалгах бодолгүй бол түүнд ямар ч арга байхгүй. Чигон-ы өргөн дэлгэрч байсан оргил үед Эзэн сүнс нь нэг өдөр чигон-оор хичээллэхийг бодсон, дээд түвшинд бясалгахыг хүссэн, тэр бодол нь мэдээж маш энгийн бөгөөд цайлган байсан, нэр хүнд ашиг гэх мэтийн зүйлээр хөөцөлдөх бодол байгаагүй. Дэд сүнс их баярласан, би бясалгахыг хүсч байна, гэхдээ миний хүслээр болохгүй, чи бясалгах бодолтой болсон нь яг миний бодолтой нийцэж байна. Гэвч хаанаас багш олох юм? Дэд сүнс нэлээд чадвартай, тэр биенээс гараад урьд насандаа мэддэг байсан аугаа гэгээрэгчийг олохоор явна. Яагаад гэвэл зарим Дэд сүнс маш өндөр түвшинтэй, биенээс гарч явж чадна, тэр тэнд очоод бясалгах хүсэлтэй, гон зээлэхээр ирсэнээ хэлнэ. Аугаа гэгээрэгч түүнийг боломжийн сайн хүн гэж хараад бясалгахад нь дуртайяа тусална. Ингээд Дэд сүнс нь гон зээлж аваад ирнэ. Энэ гон бол ерөнхийдөө цацарсан энергитэй, хоолойгоор дамжуулагддаг, зарим зээлдсэн гон бэлэн хэлбэрээр ирдэг, үүнд гол төлөв ер бусын чадвар хамт ирдэг.

Ийм байдлаар тэр бас ер бусын чадвартай болж магадгүй, энэ хүн миний дөнгөж сая ярьсан шиг нэг шөнө унтаж байхдаа бас их халууцна, маргааш өглөө нь босч ирэхэд гон ирсэн байна. Хаана ч хүрсэн тогтой болсон гэж мэдэрнэ, мөн хүний өвчнийг эдгээж чаддаг болсон, тэр гонтой болсноо ойлгоно. Энэ нь хаанаас ирсэн бэ? Тэр мэдэхгүй. Тэр үүнийг орчлон ертөнцийн орон зайнаас ирсэн гэдэг л бүрхэг төсөөлөлтэй. Гэхдээ чухам яаж үүнийг олсноо тэр мэдэхгүй, Дэд сүнс түүнд хэлэхгүй, яагаад гэвэл

Дэд сүнс л бясалгаж байгаа, тэр зөвхөн өөрийгөө гон-той болсон гэж л мэднэ.

Гон зээлэхэд гол төлөв насны хязгаар байдаггүй, залуу хүмүүс нилээд олон байсан, тиймээс хэдэн жилийн өмнө хорин хэдтэй, гучин хэдтэй бас дөчин хэдэн настай хүмүүс байсан, мөн өндөр настай хүмүүс ч байсан. Залуу хүнд өөрийгөө барихад амаргүй, чи түүнийг харахад жирийн үед нилээд сайн байдаг, энгийн хүний нийгэмд ямарч чадваргүй байхдаа биеэ сайн барьдаг нэр хүнд ашгийг даруу хардаг байсан. Харин тэр нэр цуутай болмогц нэр хүнд ашгийн үймүүлэлд амархан ордог. Тэр бас амьдралын урт зам өмнө нь хүлээж байна гэж боддог, тэгээд энгийн хүмүүсийн зорьдог зарим зүйлд хүрэхийн тулд янз бүрээр чармайна. Иймээс ер бусын чадвар гарахад, зарим чадвартай болонгуут тэр үүнийг энгийн хүний нийгэмд хувийн зорилгодоо хүрэхийн тулд хэрэглэнэ. Тэгвэл болохгүй, ингэж хэрэглэхийг зөвшөөрөхгүй. Тэр улам их хэрэглэх тусам гон улам багасна, эцэст нь түүнд юу ч байхгүй болно. Ингэж унаж ирсэн хүн бүр ч их байдаг, миний харснаар одоо ийм нэг ч хүн үлдээгүй.

Миний сая ярьсан гон гарах энэ хоёр тохиолдол нь нэлээд сайн зан чанартай хүмүүст гардаг, энэ гон-ыг тэд өөрсдөө бясалгаж гаргасан биш, харин аугаа гэгээрэгчээс ирсэн болохоор уг гон нь сайн.

Сүнс шүглэх

Бясалгагчдын хүрээнд, магадгүй та нарын олонхи нь үнэг, үен, могой, гэх мэт амьтдын сүнс шүглэх тухай сонссон байх. Энэ нь чухам ямар учиртай вэ? Зарим хүн чигон-оор хичээллээд ер бусын чадвартай болдог гэж ярьдаг. Үнэндээ ер бусын чадварыг бий болгодог биш, харин тэдгээр нь

хүний төрөлхийн чадвар юм. Хүмүүс зөвхөн энэ хүн төрөлхтний нийгмийн хөгжлийн дагуу улам их материаллаг орон зайн бодит зүйлсийг чухалчлан үздэг болсноор орчин үеийн багаж төхөөрөмжинд улам найдах болсон. Яваандаа хүний төрөлх чадварууд нь улам бүр буурсаар эцэст нь энэ чадвар нь бүрмөсөн байхгүй болсон.

Ер бусын чадвартай болохыг хүсвэл бясалгах, өөрийнхөө үүссэн эх үндсэндээ буцах, үнэнд хүрэх хэрэгтэй, үүнийг бясалгалаар олно. Харин амьтанд ийм төвөгтэй бодол байдаггүй, иймээс тэр орчлон ертөнцийн мөн чанартай холбогддог, тэр төрөлхийн чадвартай. Зарим хүн амьтныг бясалгаж чадна, үнэг “үрэл”-ийг бясалгаж чадна, могой гэх мэт амьтад бясалгахыг мэддэг гэж ярьдаг. Тэр амьтад бясалгахыг мэддэг биш, анхандаа тэд энэ талаар юу ч мэдэхгүй, зөвхөн төрөлх чадвартай байдаг. Тэгээд тодорхой нөхцөл байдалд, тодорхой орчинд удаан хугацаа өнгөрсний дараа магадгүй үр нөлөө нь гардаг, тэр амьтан гон-той болно тэгээд ер бусын чадвар нь гарч ирнэ.

Ингэснээр амьтан зарим чадвартай болдог, бидний урьд ярьдгаар увидас, чадвартай болсон юм. Энгийн хүн харахад амьтад их айхтар, хүнийг эрхшээлдээ амархан оруулж чаддаг. Үнэндээ би тэднийг айхтар биш, жинхэнэ бясалгагчийн өмнө тэд бол юу ч биш гэж хэлнэ, тэр нь мянгаад жил бясалгасан ч бай түүнийг няцалхад чигчий хуруу ч элбэг хангалттай. Бид амьтанг ийм төрөлхийн зөн увьдастай, түүнд ийм чадвар гарч болно гэж хэлсэн. Гэхдээ манай орчлон ертөнцөд нэг зарчим байдаг, энэ нь амьтан бясалгаад үр дүнтэй болохыг нь зөвшөөрөхгүй. Иймээс та бүгд эртний номонд бичсэнийг санаж байгаа, хэдэн зуун жил тутамд тэднийг нэг удаа устгадаг, үүнийг их сүйрэл эсвэл бага сүйрэл гэдэг. Амьтад нэг тодорхой хугацаанд гон нь өсөхөд тэднийг аянгаар ниргэж юмуу өөр байдлаар устгана, бясалгахыг нь зөвшөөрөхгүй. Яагаад гэвэл тэдэнд

хүний мөн чанар байхгүй, тэд хүн шиг бясалгаж чадахгүй, тэдэнд хүнтэй адил шинж чанар байхгүй, хэрэв тэд бясалгаад үр дүнтэй болбол гарцаагүй буг чөтгөр болно, тиймээс бясалгаад үр дүнтэй болохыг нь зөвшөөрөхгүй, тэнгэр тэднийг ниргэнэ, тэд бас үүнийг мэддэг. Гэхдээ би хэлсэн, одоо хүн төрөлхтний нийгэм их доройтсон, зарим хүнд хийхгүй муу зүйл гэж байхгүй, ийм үед тулж ирсэн нь хүн төрөлхтний нийгэм аюулд орсон биш гэж үү?

Юмс үзэгдэл туйлдаа хүрвэл хувьсал гардаг! Бид ингэж олж мэдсэн, өнө эртний хүн төрөлхтөний нийгэм үеэс үед удаа дараа сүйрэлд орох бүрд хүн төрөлхтний ёс суртахуун туйлын ихээр доройтсон байсан. Одоо хүн төрөлхтний оршиж байгаа орон зай болон бусад олон орон зайнууд бүгд маш аюултай байдалд хүрсэн, энэ түвшин дэх бусад орон зайн амь бас эндээс бушуухан зугтаж дээд түвшин лүү гарахыг хүсч байгаа, тэд дээд түвшин лүү гарвал зугтаж чадна гэж боддог. Гэхдээ яаж тийм амархан байх юм? Бясалгахад заавал хүний биетэй байх ёстой. Иймээс энэ нь зарим чигон-ы бясалгагчдад сүнс шүглэх байдал гардгийн нэг учир нь юм.

Зарим хүн ингэж боддог, ийм олон аугаа гэгээрэгчид, мөн өндөр түвшинд хүрсэн багш нар яагаад үүнийг шийддэггүй вэ? Манай энэ орчлон ертөнцөд бас ийм нэгэн зарчим байдаг: Чи өөрөө хүссэн, чи авах бодолтой байвал бусад хүмүүс хөндлөнгөөс оролцохгүй. Энд бид та бүгдэд зөв замаар явахыг зааж байгаа, мөн чамайг өөрөө ухамсарлаг гэж Номыг дэлгэрэнгүй тайлбарлаж өгч байна, чамаар өөрөөр чинь ухамсарлуулна, сурах сурахгүй нь чиний өөрийн хэрэг. Багш чамайг үүдээр оруулж өгнө, харин бясалгал бол өөрөөс шалтгаална. Хэн ч чамайг албадаж бясалгуулахгүй, бясалгах бясалгахгүй нь хувь хүний асуудал, өөрөөр хэлбэл чи ямар замаар явах, юуг хүсч

юуг олоход чинь хэн ч оролцохгүй, бид зөвхөн нинжин байхыг зөвлөнө.

Чи зарим хүнийг чигон-оор хичээллэж байгааг нь харсан, үнэндээ бясалгасан гон-ыг шүглэсэн сүнс нь авдаг. Яагаад тэд сүнсийг өөртөө татсан бэ? Бүх орон даяар хичнээн чигон бясалгагчдын ар талд нь шүглэсэн сүнс байгаа вэ? Хэрэв би энэ тоог хэлбэл маш олон хүн чигон-оор хичээллэхээс айх болно. Энэ тоо нь аймшигтай их! Тэгвэл яагаад ийм байдал үүссэн бэ? Эдгээр зүйлс энгийн хүний нийгэмд төвөг учруулж байна, яагаад ийм ноцтой үзэгдэл гарсан бэ? Үүнийг бас хүмүүс өөрсдөө өдөөсөн, яагаад гэвэл хүн төрөлхтөн улам доройтож байна, мөн энд тэндгүй буг чөтгөрүүд байгаа. Ялангуяа тэдгээр хуурамч чигон багш нарын биед бүгдэнд нь шүглэсэн сүнс байгаа, тэд бясалгал заахдаа үүнийг л дамжуулдаг. Хүн төрөлхтний түүхэнд амьтад хүний биед гарах нь хориотой байсан, тэд гарвал устгагддаг байсан, хэн ч харсан үүнийг зөвшөөрөхгүй. Гэхдээ өнөөдрийн манай нийгэмд зарим хүн тэднээс юм хүсдэг бас тэднийг хүсдэг, тахин шүтдэг. Зарим хүн ингэж бодно, би яг түүнийг хүсээгүй ш дээ! Чи түүнийг хүсээгүй, гэхдээ чи ер бусын чадвартай болохыг хүсч байна, ариун номоор бясалгасан гэгээрэгч чамд үүнийг өгөх юм уу? Хүсэх бол энгийн хүний зууралдсан сэтгэл, энэ сэтгэлийг хаях ёстой. Тэгвэл хэн чамд үүнийг өгөх вэ? Зөвхөн өөр орон зайны буг чөтгөрүүд болон янз бүрийн амьтад үүнийг чамд өгч болно, тэгвэл тэднээс гуйсантай адил биш гэж үү? Тэгвэл тэд ирнэ.

Хэр олон хүн зөв бодлоор чигон-оор бясалгадаг вэ? Чигон бясалгал буянг чухалчлахыг шаарддаг, сайн зүйл хийж нинжин сэтгэлтэй байх ёстой, бүх зүйлд энэ байдлаар өөрийгөө шаардах ёстой. Паркт дасгал хийсэн ч, гэртээ дасгал хийсэн ч ингэж боддог хүн хэр олон вэ? Зарим хүний ямар чигон-оор бясалгаж байгаа нь мэдэгдэхгүй, нэг нь

биеэрээ найган дасгал хийнгээ амандаа үглэнэ: Хн, манай бэр надад халамжгүй, хадам ээж бол ёстой зэвүүн! Зарим нь ажлынхаа газраас авхуулаад улсын хэрэг хүртэл хов жив ярина. Тэдэнд ярихгүй зүйл гэж үгүй, тэдний үзэл бодолтой нь санал нийлэхгүй бол их ууртай. Үүнийг чи чигон бясалгал гэж хэлэх үү? Мөн зарим нь зогсоо дасгал хийхдээ хөл нь ядраад чичирч байсан ч тархи нь завгүй: Одоогийн юмс хэтэрхий үнэтэй, үнэ нь өсөөд л, ажлын газар ч миний цалинг өгч чадахгүй, чигон-оор хичээллээд надад яагаад ер бусын чадвар гарахгүй байгаа юм бол? Хэрэв би ер бусын чадвартай болчихвол би ч бас чигон багш болно мөн баян чинээлэг болно. Би өвчтөнийг үзээд мөнгөтэй болно. Тэр өөр хүнд ер бусын чадвар гарсныг нь харчихаад улам яарна, тэр ер бусын чадварын хойноос хөөцөлдөнө, тэнгэрийн мэлмийг хүснэ, мөн өвчин эдгээх чадвартай болохыг хүснэ. Та бүгд боддоо, энэ нь манай орчлон ертөнцийн Үнэн, Нинжин, Тэвчээр мөн чанараас ямар хол зөрж байна! Энэ бүгд нь үүний яг эсрэг болж байна. Ноцтойгоор хэлбэл, энэ хүн буруу номоор бясалгаж байна! Гэхдээ тэр үүнийг санаандгүй хийж байгаа. Тэр улам ингэж бодох тусам түүнээс гарах бодол нь улам муу болдог. Энэ хүн Ном олж аваагүй, тэр буянг чухалчлахыг мэдэхгүй, зүгээр дасгал хийгээд л гон-той болно бас хүссэн юм болгоноо хөөцөлдөж олж авч болно гэж боддог, тэр ийм л байдаг гэж боддог.

Яагаад гэвэл түүний бодол нь зөв бишээс муу зүйлийг авчирдаг. Харин амьтан үүнийг нь хардаг: Энэ хүн бясалгаад баян болох хүсэлтэй, тэр хүн нэрд гарах мөн ер бусын чадвартай болохыг хүсч байна. Ээ дээ, түүний бие нь дажгүй, биенд нь байгаа зүйл нь бас нилээд сайн, харин түүний бодол нь үнэхээр муу, тэр ер бусын чадварыг хөөцөлдөж байна! Магадгүй тэр багштай, гэхдээ түүнд багш байсан ч би айхгүй, ариун номын багш түүнийг ингэж ер бусын чадвартай болохыг хөөцөлдөж байгааг нь хараад хүсэх тусам нь улам түүнд өгөхгүй, яг энэ бол хаях ёстой

зууралдсан сэтгэл гэдгийг амьтан сайн мэднэ. Тэр энэ бодлоосоо салахгүй бол түүнд ер бусын чадвар өгөхгүй, тэр үүнийг бүр ч ухамсарлахгүй, хөөцөлдөх тусам бодол нь улам муудна. Эцэст нь энэ хүнд огт найдвар байхгүй болсныг багш нь хараад санаа алдан түүнийг орхин явна. Зарим хүнд багш байхгүй, гэхдээ магадгүй замд тааралдсан нэг багш түүнийг харж хандана. Яагаад гэвэл орон зай болгонд их олон гэгээрэгч байдаг, нэг гэгээрэгч энэ хүнийг ажиглаад нэг өдөр дагана, тэгээд түүнийг тийм сайн биш болохыг нь мэдээд яваад өгнө, дараа нэг өдөр өөр нэг нь түүнийг сайнгүй болохыг нь хараад бас орхин явна.

Түүнд багш байсан ч эсвэл замд тааралдсан багш байсан ч, түүний хөөцөлдөж байгаа зүйлийг багш нь өгч болохгүй гэдгийг амьтан мэднэ. Яагаад гэвэл амьтан аугаа гэгээрэгч байдаг орон зайг харахгүй, иймээс тэр айхгүй, энэ боломжийг ашигладаг. Манай орчлон ертөнцөд ийм нэг зарчим байдаг, хүн юу хөөцөлдөнө, юуг өөрөө хүснэ бусад хүмүүс үүнд хөндлөнгөөс оролцож болохгүй. Амьтад үүгээр далимдуулдаг: Тэр хүсч байна, би түүнд өгье, миний түүнд туслах нь буруу биш биз дээ? Амьтан түүнд өгнө. Амьтан анхандаа хүний биен дээр гарч зүрхлэхгүй, тэр эхлээд түүнд жоохон гон өгөөд үзнэ. Нэг өдөр гэнэтхэн тэр хүн хүсч байсан гон-той болсноо мэдсэн, мөн өвчнийг эдгээж чаддаг болсон. Амьтан харахад энэ нь их дажгүй, хөгжмийн удиртгалтай адил: Тэр авах дуртай байна, биен дээр нь гарчихъя, тэгвэл илүү их зүйлийг амар өгч чадна. Чи тэнгэрийн мэлмий хүссэн биз дээ? Одоо чамд бүхнийг өгнө, тэгээд тэр биен дээр нь гарчихна.

Тэр бодолдоо эдгээр зүйлээр хөөцөлдөж байхад тэнгэрийн мэлмий нь нээгдсэн, тэр байтугай гон гаргаж чаддаг болсон, бас бага зэрэг ер бусын чадвартай болсон. Тэр маш их баярласан, өөрийнхөө зүтгэлээр мөн дасгалынхаа үр дүнд хүссэн зүйлдээ хүрлээ гэж бодно, үнэн

хэрэгтээ тэр юуг ч бясалгаж гаргаагүй. Тэр өөрийгөө хүний бие дотор хаана өвчин байгааг харж чаддаг болсон гэж бодсон. Үнэндээ түүний тэнгэрийн мэлмий огт нээгдээгүй, тэр амьтан түүний тархийг эзэмдэн өөрийнхөө нүдээр харсан зүйлийг түүний тархинд тусгахад тэр өөрийнх нь тэнгэрийн мэлмий нээгдсэн гэж бодсон. Гон гаргамаар байна уу? Тэг тэг, тэр гараа сунгаад гон гаргахад нөгөө амьтны жижиг савруу нь түүний араас бас сунаж гарна, тэр гон гаргахад могойны амнаас хэл нь гарч ирээд өвчтэй хэсгийг, хавдсан газрыг долооно. Иймэрхүү явдал маш олон байдаг, эдгээр хүмүүст шүглэсэн сүнс нь тэд өөрсдөө хөөцөлдсөнөөс болсон.

Яагаад гэвэл энэ хүн түүний хойноос их хөөцөлдсөн, тэр баян болох, нэрд гарах хүсэлтэй. За одоо ер бусын чадвартай болчихлоо, өвчин эдгээж чадна, мөн тэнгэрийн мэлмийгээр бас харж чадна, энэ бүгдэд тэр маш их баярласан. Амьтан үүнийг хараад, “Чи баян болохыг хүссэн биз дээ? За, би чамайг баян болгоё.” Энгийн хүний бодлыг удирдах нь их амархан зүйл. Тэр амьтан олон хүнийг түүн дээр эмчлүүлэхээр ирүүлж чадна, олноороо тэд ирнэ. Өө бас болоогүй, түүнийг энд хүн эмчилж байхад нөгөө амьтан цаагуур нь хэвлэлийн газрын сурвалжлагчаар түүнийг сурталчлан сонин дээр хэвлүүлнэ. Тэр энгийн хүмүүсийг удирдаж ийм зүйлийг хийлгэдэг, ямар нэгэн хүн ирж өвчнөө үзүүлээд бага мөнгө төлбөл болохгүй, толгойг нь өвдүүлнэ, ямар ч байсан түүнд их мөнгө заавал төлүүлнэ. Тэр нэр хүнд, хөрөнгө хоёуланг нь оллоо, их мөнгөтэй боллоо нэрд ч гарчихлаа, тэгээд бас чигон багш болсон. Ер нь ийм хүн зан чанарыг эрхэмлэдэггүй, юу ч гэж хэлэхээс эмээхгүй, тэр өөрийгээ зөвхөн тэнгэрийн дараа тавина мөн тэнгэрийн Дарь эх, эсвэл Хурмаст тэнгэрийн хаан хүний орчлонд бууж ирсэн дүр гэж ярьж зүрхэлдэг, тэр өөрийгөө бүр Будда гэж хэлж зүрхэлнэ. Тэр жинхэнэ зан чанарын бясалгал дагуу

яваагүй учраас дасгал хийж ер бусын чадвартай болохыг хөөцөлдсөн, эцэст нь амьтны сүнсийг өөртөө шүглүүлдэг.

Зарим хүн магадгүй ингэж боддог: Ингэсний буруу нь гэж юу байна? Мөнгө олж баян л болж байвал боллоо, бас нэрд гарч болно, нилээд олон хүмүүс ингэж боддог. Би та бүгдэд хэлье, үнэндээ тэр амьтан бол зорилготой, тэр учир шалтгаангүй зүгээр чамд юм өгч байгаа юм биш. Энэ орчлон ертөнцөд нэг зарчим байдаг, энэ нь алдахгүй бол олдохгүй гэдэг. Тэр юуг олох юм? Би дөнгөж сая энэ асуудлын талаар ярьсан биз дээ? Тэр чиний биеийн охийг аваад хүний хэлбэрээр бясалгах хүсэлтэй, тиймээс хүний биенээс охийг нь цуглуулдаг. Хүний биед зөвхөн нэг хувь охь байдаг, хүн бясалгахыг хүсвэл ийм л нэг хувьтай. Чи үүнийг амьтанд алдвал бясалгаж чадахгүй болно, тэгвэл чи юугаараа бясалгах юм? Чамд юу ч үлдэхгүй, чи бясалгах ямарч боломжгүй болно. Зарим хүн магадгүй ингэж хэлнэ: Надад бясалгах бодол байхгүй, би зөвхөн мөнгөтэй болох хүсэлтэй, мөнгөтэй болж л байвал боллоо, тэр надад ямар хамаатай юм! Би та бүгдэд хэлье, чи баян болох хүсэлтэй гэхдээ би чамд нэг ёсыг хэлсний дараа чи тэр бодлоо орхино. Яагаад вэ? Хэрэв тэр чиний биенээс эрт гараад явбал, чиний дөрвөн мөч чинь хүчгүй болно. Үүнээс хойш чи үлдсэн насандаа энэ хэвээрээ хоцорно, яагаад гэвэл чиний хамаг охь алдагдсан, хэрэв тэр чиний биенээс орой гарч явбал чи шулбайсан нэг ургамал шиг болж үлдэнэ, зөвхөн нэг амьсгаатай, үлдсэн насаа хэвтэрт барна. Чи мөнгөтэй байлаа гээд хэрэглэж чадах юм уу? Нэр цуутай боллоо ч баярлаж чадах юм уу? Энэ аймаар биш гэж үү?

Ийм үзэгдлүүд одоогийн бясалгагчдын дунд мэдэгдэхүйц их гарах болсон, ийм тохиолдлууд маш олон. Амьтан зөвхөн хүний биед шүглээд зогсохгүй бас хүний Эзэн сүнсийг алж болно, тэр тэгээд хүний Ниван³ ордонд нэвтэрч ороод эзлэн суудаг. Харахад тэр нэг хүн шиг, гэхдээ

тэр хүн биш, одоо үед бүр ийм байдал гардаг болсон. Яагаад гэвэл хүн төрөлхтний ёс суртахууны шалгуур нь өөрчлөгдсөн, хэн нэгэн хүн буруу зүйл хийж байхад нь чи түүнд буруу юм хийж байна гэж хэлбэл тэр үнэмшихгүй. Тэр мөнгө олох, мөнгөний хойноос хөөцөлдөх, баян болохыг олны ёс, орчлонгийн зүй гэж боддог, иймээс тэр мөнгөтэй болохын тулд хүмүүсийг хохирооно, хор учруулна, үүний төлөө ямарч нүгэл үйлдэнэ, юу ч хийхээс буцахгүй. Тэр амьтан алдахгүй бол олж чадахгүй, тэр зүгээр чамд юм өгөх юм уу? Тэр чиний биед байгаа зүйлийг авах хүсэлтэй. Бидний ярьснаар хүний үзэл бодол буруугаас, сэтгэл нь зөв бишээс өөртөө гай зовлонг авчирдаг.

Бид Фалунь Дафаг зааж байна. Бидний энэ номоор бясалгахад чи өөрийнхөө зан чанарыг сайн барьж чадвал, нэг ариун бодол зуун муу ёрыг дардаг, чамд ямар ч асуудал гарахгүй. Чи зан чанараа сайн барьж чадахгүй энийг ч, тэрийг ч хүсээд байвал лав өөртөө гайг авчирна. Зарим хүн урьд нь бясалгаж байсан зүйлээ орхиж чаддаггүй, жинхэнэ бясалгалд нэг сэтгэлээр тууштай байх ёстой, бид нэг бясалгалын замаар хичээллэхийг шаарддаг. Зарим чигон багш нарыг ном бичсэнээр нь битгий хар, би чамд хэлье, тэдгээр номон дотор байгаа элдэв янзын зүйлүүд нь тэдний бясалгадаг зүйлүүдтэй адилхан, тэдгээр нь могой, үнэг мөн үен юм. Чи ийм номыг уншихад тэдгээр зүйлс үгнүүдээс нь үсрэн гарч ирнэ. Хуурамч чигон багш нар жинхэнэ чигон багш нараас хэд дахин олон байдаг гэж би хэлсэн, гэхдээ чи тэднийг ялгаж чадахгүй, иймээс та бүгд өөрийгөө сайн барих ёстой. Би чамайг энд заавал Фалунь Дафагаар бясалга гэж байгаа юм биш, чи аль хүссэн номоороо хичээллэж болно. Гэхдээ хуучны ийм нэг үг байдаг: Мянган жилд ариун номыг олж чадахгүй байсан ч, хээрийн үнэгний номыг нэг өдөр ч гэсэн сурахгүй. Иймээс өөрийгөө заавал сайн барь, жинхэнэ ариун номоор бясалга, янз бүрийн зүйлийг хольж бясалгаж болохгүй, тийм бодлыг ч бүү

оруул. Зарим хүний Фалуний хэлбэр нь гажсан. Яагаад гажсан бэ? Тэд өөр чигон-оор хичээллээгүй гэж хэлдэг. Гэхдээ тэд дасгал хийхдээ хуучин хичээллэж байсан зүйлээ бодолдоо нэмж оруулдаг, тэдгээр зүйлсийг бясалгалдаа хольж оруулсан биш гэж үү? Бид сүнс шүглэх асуудлаар энэ хүртэл л ярилаа.

Сансарын хэл

Сансарын хэл гэж юу вэ? Энэ нь хүн гэнэт үл ойлгогдох үгээр ярьж эхэлдэг. Тэр ойлгомжгүйгээр шулганан ярина, өөрөө юу ярьж байгаагаа ч мэдэхгүй. Өөр хүний бодлыг мэдэх ер бусын чадвартай хүн ерөнхий санааг нь гадарлаж чадна, гэхдээ тэр юуны тухай ярьж байгааг нь тодорхой хэлж чадахгүй. Мөн зарим хүн өөр олон янзын хэлээр ярьж чаддаг. Зарим хүн үүнийг их чадвартай, ер бусын чадвартай гэж үздэг. Энэ бол ер бусын чадвар ч биш, бас бясалгагчийн чадвар ч биш энэ нь чиний түвшинг илэрхийлж чадахгүй. Тэгвэл энэ ямар учиртай вэ? Тэр бол чиний бодол гадны сүнсэнд удирдагдсан хэрэг. Харин чи үүнийг зүгээр сайн гэж бодно, дуртайяа хүлээж авна, мөн баяртай байна. Чамайг үүнд улам тааламжтай байх тусам тэр чамайг улам хүчтэй эзэмдэнэ. Жинхэнэ бясалгадаг хүний хувьд, чи яаж түүний эрхшээлд орж болох юм? Түүнээс гадна энэ нь их доод түвшнөөс ирдэг, иймээс жинхэнэ бясалгаж байгаа хүн ийм төвөг өөртөө битгий учруул.

Түмэн амь бодийн дунд хүн бол хамгийн нандин, чи яагаад эдгээр зүйлүүдээр эзэмдүүлж байгаа юм? Чи өөрийнхөө биеийг эзэнгүй хаявал ямар харамсалтай юм! Тэдгээрийн зарим нь хүний биен дээр гарчихсан, зарим нь гараагүй биенээс нь жоохон зайтай байдаг, гэхдээ тэр чамайг удирдан захирч байдаг. Чамайг ярихыг хүсвэл тэр чамайг яриулна, дри дру, дри дру гээд яриулна. Энэ нь бас

дамжиж болно, хэн сурмаар байна зоригтой амаа нээхэд тэр бас ярьж эхэлнэ. Үнэндээ эдгээр зүйлүүд нь бас хэсэг бүлгээрээ байдаг, чи ярихыг хүсвэл нэг нь чам дээр гараад яриулна.

Яагаад ийм байдал гардаг вэ? Би хэлсэн, тэд өөрийнхөө түвшинг дээшлүүлэх хүсэлтэй, гэвч тэнд зовлон бэрхшээл байхгүй, бясалгаж өөрсдийгөө дээшлүүлж чадахгүй. Тэд ийм нэг арга бодож олсон, хүмүүст сайн зүйл хийж туслах, гэхдээ яаж туслахаа мэдэхгүй, түүний гаргасан энерги нь хүний өвчнийг түр намжаах нөлөөтэй байдгийг тэр мэднэ, өвчтөний зовлонг тухайн үед хөнгөлдөг, тэгэхдээ бүрмөсөн сайжруулж чадахгүй, хүний амаар дамжуулж энергийг гаргахад ийм нөлөө байдгийг тэр мэддэг, ийм л учиртай юм. Зарим хүн үүнийг тэнгэрийн хэл гэдэг, зарим нь үүнийг Буддын хэл яриа гэдэг, энэ бол Буддаг гүжирдэж байна. Би үүнийг ёстой дураараа ярьж байна гэж хэлнэ!

Та бүгд мэднэ, Будда тэр болгон ярьдаггүй. Хэрэв манай энэ орон зайд юм яривал хүн төрөлхтөнд газар хөдлөлт болно, яаж ингэж болох юм? Тийм хүчтэй тэнгэр нүргэлсэн дуу гарна. Зарим хүн ингэж хэлдэг: Би тэнгэрийн мэлмийгээр Будда надтай ярьж байхыг харсан. Тэр чамтай ярьсан юм биш. Зарим хүн бас миний номын бие ярьж байхыг харсан гэдэг, чамтай бас ярьсан юм биш, түүний гаргасан бодол нь стерео дуутай байдаг, чамд тэр юм ярьж байгаа мэт сонсогддог. Тэр голдуу өөрийнхөө орон зайд ярьдаг, гэхдээ дуу нь энд нэвтэрч ирэхэд чи түүний ярьж байгааг тодорхой сонсч чадахгүй. Яагаад гэвэл хоёр орон зайны хоорондох цаг хугацаа ба орон зайн ухагдахуун нь өөр, манай энэ орон зайн нэг шичэн¹⁹ одоогийн хоёр цагтай

¹⁹ шичэн-Хятадын цаг хугацааны нэгж, 2 цагтай тэнцэнэ.

тэнцүү. Харин тэр том орон зайд манай нэг шичэн нь тэндхийн нэг жилтэй тэнцүү, тэдний цаг хугацаанаас удаан.

Хуучны ийм нэг үг байдаг: “Тэнгэрт нэг өдөр болоход дэлхийд мянган жил өнгөрдөг”, энэ бол орон зай, цаг хугацааны ухагдхуун байдаггүй нэгж орон, өөрөөр хэлбэл аугаа гэгээрэгчид байдаг орон юм. Жишээлбэл Сухвати диваажин, Лиули диваажин, Фалунь диваажин, Лянхуа диваажин гэх мэт тэдгээр орнууд юм. Харин тэр том орон зайн цаг хугацаа нь манайхаас хурдан, хэрэв чи хүлээж авч чадах юм бол түүний ярьж байгааг сонсоно, зарим хүмүүсийн тэнгэрийн чих нь нээгдсэн, ер бусын сонсох чадвартай болсон, түүний ярьж байгааг сонсох боловч тод биш. Юу ч сонссон чамд шувууны шулганаан мэт эсвэл пянз тоглуулагчийг хурднаар сонсож байгаа юм шиг байдаг, юу ярьж байгааг нь ойлгохгүй. Мэдээж зарим хүн хөгжим болон яриа сонсдог. Гэхдээ ер бусын чадвараар дамжуулж цаг хугацааны зөрөөг гаргах ёстой, дуу авиа чиний чихэнд хүрэхэд чи тодорхой сонсох болно, ийм л байдал юм. Зарим хүн үүнийг Буддын хэл яриа гэдэг, энэ нь ердөө ч тийм биш.

Хоёр гэгээрэгч уулзаад нэг инээмсэглэхдээ л хоорондоо бүрэн ойлголцдог. Энэ нь телепатаар бодлоо холбосных юм, стерео дуугаар хүлээж авдаг. Тэд инээмсэглэхэд бодол санаагаа хэдийн солилцож дууссан байдаг. Энэ бол тэдний хэрэглэдэг ганц арга биш, заримдаа бас өөр арга хэрэглэдэг. Та бүгд Тантризмд Түвдийн лам нар гар хурууны онцлог ур хөдөлгөөн хийдгийг мэднэ, гэхдээ чи тэр ламаас үүнийг юун гарын хөдөлгөөн бэ гэж асуувал тэр чамд энэ бол дээд йог гэнэ. Юунд зориулагдсан юм бэ? Тэр ч мэдэхгүй. Үнэндээ энэ бол аугаа гэгээрэгчийн хэл яриа юм. Олон хүн байвал, тэр гарын том ур хөдөлгөөнийг хийдэг, маш гоё янз бүрийн том гарын ур хөдөлгөөн байдаг, цөөн хүмүүс байхад тэр гарын жижиг ур хөдөлгөөнийг хийдэг, бас их гоё

бөгөөд янз бүрийн хэлбэртэй гарын жижиг ур хөдөлгөөн байдаг, маш нарийн төвөгтэй бөгөөд их баялаг, яагаад гэвэл энэ бол хэл яриа юм. Урьд энэ бол тэнгэрийн нууц байсан, одоо бид үүний нууцыг тайллаа. Түвдэд хэрэглэдэг нь бясалгалын зөвхөн хэдэн хөдөлгөөн, тэд үүнийг төрөлжүүлж ангилсан юм. Тэр нь зөвхөн бясалгалын дан ганц хэл ярианы утгатай, хэдхэн төрлийн бясалгалын хэлбэр, жинхэнэ гарын ур хөдөлгөөн бол маш их нарийн төвөгтэй.

Багш сурагчиддаа юу өгсөн бэ?

Зарим хүн надтай уулзаад гар бариад тавьдаггүй. Бусад хүн тэднийг надтай гар барьж байгааг харчихаад ирж бас гар барина. Би тэдний дотроо юу бодож байгааг нь мэднэ. Зарим хүн багштайгаа гар барьсандаа их баяртай байдаг. Зарим хүн жоохон мэдээлэл авах санаатай гар барьчихаад тавихгүй. Жинхэнэ бясалгал бол чиний хувийн хэрэг гэж бид хэлсэн, бид энд өвчин эмчлэх, бие сайжруулах, чамд жоохон мэдээлэл өгөөд чиний өвчнийг эдгээх гэж байгаа юм биш, бид ийм зүйл хийхгүй. Чиний өвчнийг арилгахыг би өөрөө хийнэ, дасгалын талбайд миний номын бие арилгаж өгнө, Номоо уншаад өөрсдөө хичээллэж байгаа сурагчдын өвчинг бас миний номын бие арилгаж өгнө. Чи миний гарыг барихад гон чинь өснө гэж бодож байгаа юм уу? Энэ нь инээдтэй биш гэж үү?

Гон бол өөрийнхөө зан чанарыг бясалгахад гардаг. Чи жинхэнэ бясалгахгүй бол гон дээш өсөхгүй, яагаад гэвэл үүнд зан чанарын шалгуур байдаг. Чиний гон өсөхөд дээд түвшинд байгаа хүнд чиний зууралдсан сэтгэл, тэр зүйл арилсан нь, чиний толгой дээрхи хэмжүүр багана өсч байгаа нь харагддаг. Энэ хэмжүүр нь гон багана шиг хэлбэрээр оршдог, хэмжүүр багана хэр өндөр байна гон багана нь

төдий өндөрт байна, энэ нь чиний бясалгаж гаргасан гон-ыг илэрхийлдэг, мөн чиний зан чанарын өндөр намыг илэрхийлдэг. Өөр хүн чамд үүнийг яаж ихээр нэмье ч гэсэн болохгүй, жоохон нэмлээ ч гэсэн энэ нь тэнд тогтохгүй уначихна. Би чамайг дор нь “гурван цэцэг толгой дээр цуглах” байдалд хүргэж чадна, гэхдээ чамайг үүдээр гарангуут л гон чинь доош уначихна. Энэ нь чинийх биш, чи бясалгалаар гаргаагүй учраас тэнд үлдэхгүй, яагаад гэвэл чиний зан чанарын түвшин тэнд хүрээгүй, хэн ч үүнийг чамд нэмж өгье гэсэн бүтэхгүй, яагаад гэвэл энэ нь бүхэлдээ өөрийн бясалгалаар, сэтгэлээ бясалгаж байж гардаг. Чи гон-ыг ул суурьтайгаар дээш өсгөнө, өөрийгөө тасралтгүйгээр дээшлүүлж орчлон ертөнцийн мөн чанарт уусч байж чи дээшилнэ. Зарим хүн надаас гарын үсэг авахыг хүсдэг, би зурах дургүй. Зарим нь багш надад гарын үсгээ үлдээсэн гэж гайхуулна, тэр үүгээр гайхуулах эсвэл багшийнхаа мэдээллээр хамгаалуулахыг хүсдэг. Энэ нь бас өөр нэгэн зууралдсан сэтгэл биш гэж үү? Бясалгал өөрөөс шалтгаална, чамд мэдээллийн талаар ярих хэрэг байна уу? Дээд түвшний бясалгалд чи энэ зүйлийг ярих гэж үү? Тэр юу юм бэ? Тэр бол зөвхөн өвчнийг эдгээх бие сайжруулахад л яригддаг.

Чиний бясалгаж гаргасан гон-ы микро жижиг ширхэг болгон маш бичил байдалд чамтай яг адилхан харагддаг. Гурамсан ертөнцийн номноос гарахад чи Буддын биений бясалгал хийж эхэлнэ. Тэр гон Буддын дүрстэй, энэ нь маш гоё лянхуа цэцгэн дээр суусан байдаг, микро жижиг ширхэг болгон ийм байдалтай харагдана. Амьтны гон-ы хувьд энэ нь жижигхэн үнэг, могой зэрэг зүйлс байдаг, маш микро байдал дахь жижиг ширхгүүд бүгдэд нь эдгээр зүйлс байдаг. Бас мэдээлэл оруулах гэж ярьдаг, энэ нь цай хутгаад чамд уулгана, тэрийг бас гон гэнэ. Энгийн хүн өвчнөө зөвхөн түр зуур намдаах, хойшлуулж дарахыг боддог. Энгийн хүн бол энгийн л хүн, тэр биеэ яаж муу болгож байгаад нь бид оролцохгүй. Бид бол бясалгаж байгаа

хүмүүс, тиймээс би чамд эдгээр зүйлийг мэдүүллээ. Үүнээс хойш та бүгд битгий эдгээр зүйлийг хийгээрэй, ямар нэгэн мэдээлэл, ийм ч юм тийм ч юм гэсэн зүйлийг хэзээ ч битгий аваарай. Зарим чигон багш ингэж хэлдэг: Би та нарт мэдээлэл явуулъя, та нар орон даяар хаанаас ч хүлээн авч болно. Юуг нь хүлээж авах юм? Би чамд хэлэхэд эдгээр зүйлүүд нь их нөлөө байхгүй. Хэрвээ энэ нь ашиг тустай байлаа ч зөвхөн өвчин эдгээх бие сайжруулахын тулд л юм. Харин бид бясалгаж байгаа хүний хувьд гон өөрийн бясалгалаар гарна, бусад хүний явуулсан гон мэдээлэл түвшинг чинь дээшлүүлж чадахгүй, зөвхөн л энгийн хүний өвчнийг л дарна. Заавал өөрийнхөө сэтгэлийг зөв байлгах ёстой, хэн ч бусдын өмнөөс бясалгаж чадахгүй, зөвхөн чи өөрөө жинхэнэ бясалгавал түвшнөө дээшлүүлж чадна.

Тэгвэл би та нарт юу өгөх вэ? Та бүгд мэднэ, манай олон хүн чигон-оор хичээллэж байгаагүй, тэд өвчтэй биетэй, хэдийгээр нилээд их хүн чигон-оор олон жил хичээллэсэн ч чий-н түвшнээсээ гараагүй, гон байхгүй. Мэдээж зарим нь хүний өвчнийг эдгээдэг, гэхдээ чи яаж эдгээснээ ч мэдэхгүй. Би сүнс шүглэх асуудлыг ярихдаа жинхэнэ Дафагаар бясалгаж байгаа хүний биед шүглэсэн сүнсийг, ямар зүйл байсан ч аль хэдийн зайлуулсан, биеийн дотор гаднагүй бүх муу зүйлийг нь бүгдийг нь авч хаясан. Энэ Дафа-г уншаад жинхэнэ өөрөө бясалгадаг хүний биеийг би бас цэвэршүүлж өгнө, чиний гэр орчинг бас цэвэршүүлнэ. Чи урьдны үнэг, үен тахисан сахиусаа нэн даруй хаях хэрэгтэй, бүгдийг нь цэвэршүүлсэн, байхгүй болсон. Яагаад гэвэл чи бясалгах хүсэлтэй, бид чамд хамгийн амар үүдийг нээж өгч болно, эдгээр зүйлсийг чамд хийж өгнө, гэхдээ зөвхөн жинхэнэ бясалгах хүнд л хийж өгнө. Мэдээж зарим хүн бясалгахыг хүсдэггүй, одоо хүртэл үүнийг ойлгодоггүй, тиймээс бид ч хариуцахгүй, харин жинхэнэ бясалгадаг хүнийг л хариуцна.

Ийм нэг хүн байдаг, урьд нь түүнийг шүглэсэн сүнстэй гэж ярьдаг байсан, тэр өөрөө ч мэдэрдэг. Хэдий түүнийг биенээс нь авч хаясан ч түүний санаа нь бас л зовсон хэвээр, тэр байдал байсаар байгаа мэт санагддаг, тэр үүнийг байсаар байна гэж боддог, энэ нь нэг төрлийн зууралдсан сэтгэл, эргэлзэх сэтгэл юм. Яваандаа сүнсийг өөртөө дахин ирүүлж болзошгүй. Чи энэ сэтгэлээ орхих хэрэгтэй, шүглэсэн сүнс нь аль хэдийн байхгүй болсон. Бидний урьдын лекцэнд зарим хүнд эдгээр зүйлийг шийдэж өгсөн, би аль хэдийн эдгээр зүйлийг хийсэн, шүглэсэн бүх сүнсийг авч хаясан.

Дао-гийн системд доод түвшинд бясалгахад зарим суурь байгуулах шаардлагатай, тэнгэрийн эргүүлэг, үрлийн талбай болон өөр зарим зүйлүүдийг бий болгох хэрэгтэй. Бид чамд Фалунь, энергийн механизм, бясалгалын бүх механизмууд гэх мэтчилэн маш олон зүйлийг, арван мянга гаруй зүйлийг, эдгээр бүгдийг нь чамд өгнө, үр шиг чамд суулгаж өгнө. Чиний өвчнийг арилгасны дараа хийх ёстой бүгдийг хийж өгнө, өгөх ёстой зүйлсийг бүгдийг нь чамд өгнө, тэгээд чи бидний энэ номоор жинхэнэ бясалгаж үр дүнд хүрнэ. Хэрвээ чамд юуг ч өгөхгүй бол энэ нь зөвхөн өвчин арилгах бие сайжруулах талын л зүйл болно. Үнэнийг хэлэхэд, зарим хүн зан чанараа чухалчилдаггүй, тэгвэл биеийн тамирын дасгалаа хийсэн нь дээр.

Жинхэнэ бясалгана гэвэл бид чамд хариуцлагатай хандах ёстой, тэдгээр бие даан бясалгаж байгаа хүмүүс ч гэсэн адилхан олж авна. Гэхдээ тэд заавал жинхэнэ бясалгадаг байх шаардлагатай, бид эдгээр зүйлийг жинхэнэ бясалгадаг хүнд л өгнө. Би чамайг жинхэнэ шавиа гэж үзэн дагуулна гэж хэлсэн. Үүнээс гадна, чи дээд түвшний Номыг маш сайн сурах ёстой, мөн яаж бясалгахаа мэддэг байх ёстой, таван дасгалыг нэг мөсөн сурч, хийж чаддаг болно. Ирээдүйд чи маш өндөр түвшинд хүрэх болно, чи тэр

түвшний өндрийг төсөөлж ч чадахгүй, гэгээрлийн хутгийг олоход асуудалгүй. Чамайг бясалгана гэвэл би энэ Номыг өөр өөр түвшинд уялдуулан ярьж байгаа, хойшид чи өөр өөр түвшинд бясалгахдаа үүнийг үргэлж удирдах нөлөөтэй болохыг ойлгоно.

Бясалгадаг хүний хувьд үүнээс хойш чиний амьдралын зам өөрчлөгдөх болно, миний Номын бие чамд шинээр зохицуулж өгнө. Яаж зохицуулах вэ? Тухайн хүнд хэр удаан наслах үлдсэн бэ? Тэр өөрөө ч мэдэхгүй, зарим хүн магадгүй нэг жил эсвэл хагас жилийн дараа хүнд өвчин тусна, тэр нь магадгүй хэдэн жил ч үргэлжилнэ, зарим хүн магадгүй тархинд нь цус харвана эсвэл өөр өвчин тусаад хөдөлж чадахгүй болно. Үлдсэн насандаа чи яаж бясалгах юм? Бид энэ бүгдийг чамд арилгаж өгнө, эдгээр зүйлийг гаргуулахгүй. Гэхдээ бид ийм зүйлийг зөвхөн жинхэнэ бясалгадаг хүнд хийж өгнө гэдгээ эртхэн хэлэх ёстой. Энгийн хүнд хамаагүй хийж өгч болохгүй, тэгвэл муу зүйл хийсэнтэй адил болно. Энгийн хүнд төрөх, хөгшрөх, өвчлөх, үхэх гэх мэтийн асуудал бүгд хувь тавилангийн холбоотой байдаг, хамаагүй эвдэж болохгүй.

Бид бясалгаж байгаа хүнийг хамгийн нандин хүн гэж үздэг, иймээс зөвхөн бясалгаж байгаа хүнд хийж өгч болно. Яаж үүнийг хийх вэ? Хэрэв багш нь аугаа их буянтай бол өөрөөр хэлбэл багшийн гон хүч нь маш өндөр байвал тэр чиний нүглийг арилгаж чадна. Багшийн гон өндөр байвал чиний их хэмжээний нүглийг арилгаж чадна, багшийн гон доогуур бол чиний зөвхөн бага зэрэг нүглийг арилгаж чадна. Нэг жишээ авч үзье, чиний ирээдүйн амьдралд үлдсэн янз бүрийн нүглийг бүхэлд нь авч үзвэл түүний нэг хэсгийг юмуу эсвэл хагасыг нь арилгана. Үлдсэн талыг нь чи давж чадахгүй, яагаад гэвэл тэр нь уулнаас ч өндөр. Тэгвэл яах вэ? Магадгүй ирээдүйд чи Дао-д хүрэхэд энэ нь маш олон хүнд ашиг тус үзүүлнэ. Ингэвэл маш олон хүн

чиний нүглээс хуваалцан даах болно. Тэдний хувьд энэ нь юу ч биш. Чи биендээ бас олон амь бодийг бясалгаж гаргана, мөн чиний Эзэн сүнс, Дэд сүнснээс гадна олон чи байгаа, тэд бүгд хуваалцах болно. Чамд гай зовлон туулах багахан нүгэл үлдсэн. Жоохон үлдсэн ч гэсэн тэр бас л их, чи бас л давж чадахгүй, тэгвэл яах вэ? Үүнийг маш олон хэсэг болгоод чиний бясалгах түвшин болгонд хувааж тавина, тэдгээрийг ашиглаад чиний зан чанарыг дээшлүүлнэ, чиний нүглийг хувиргахад болон чиний гон-ыг өсгөхөд хэрэглэнэ.

Түүнээс гадна, хүн бясалгахыг хүсвэл энэ нь амар зүйл биш. Энэ бол маш нарийн асуудал гэж би хэлсэн, энгийн хүний асуудлаас давсан зүйл бөгөөд энгийн хүний аливаа зүйлээс илүү хэцүү байдаг. Энэ ер бусын зүйл биш гэж үү? Иймээс чамд энгийн хүний ямар ч асуудлаас дээгүүр шаардлага тавигдана. Хүн Эзэн сүнстэй, Эзэн сүнс устдаггүй. Хэрэв Эзэн сүнс нь устдаггүй юм бол та бүгд боддоо, чиний Эзэн сүнс урьд насандаа нийгмийн харилцааны явцад муу зүйл хийсэн байж болох уу? Энэ нь тун болзошгүй. Магадгүй амь хөнөөсөн, хэн нэгэнд өр тавьсан эсвэл хэн нэгнийг дээрэлхэх мөн хохироох гэх мэт зүйлийг хийсэн байх. Хэрэв тийм бол чамайг энд бясалгаж байхад, нөгөө талд тэр чамайг тодорхой харж байдаг. Хэрэв чи өвчнөө арилгах, биеэ сайжруулах гэж байвал тэр чамайг зөвхөн өрөө хойшлуулж байна гэж мэдэх тул тоохгүй, хэрэв чи одоо төлөхгүй бол ирээдүйд төлнө, ирээдүйд төлөхөд бүр ч хүндэрнэ. Иймээс хэдийгээр чи одоо өрөө төлөхгүй байсан ч тэр үл тооно.

Харин чи бясалгана гэвэл тэр чамайг хийлгэхгүй гэнэ. Чи бясалгахыг хүсч байна, явах гэж байна. Чи гон-той болчихвол би чамайг барьж авч чадахгүй, чамд хүрч чадахгүй болчихно. Тэр үүнийг зөвшөөрөхгүй, янз бүрийн байдлаар чамд саад хийж бясалгал хийлгэхгүйг оролдоно,

тиймээс тэр саад болох янз бүрийн арга хэрэглэнэ, тэр ч байтугай чамайг үнэхээр алах гэж ирнэ. Мэдээж чамайг энд суугаад бясалгаж байхад чинь толгой чинь цавчигдахгүй, яагаад гэвэл энгийн хүний нийгмийн байдалд нийцэх ёстой. Магадгүй чи гэрээсээ гараад машинд дайруулах ч юмуу, байшингаас унах эсвэл өөр ямар нэгэн аюулд орно, маш аюултай. Жинхэнэ бясалгал бол чиний төсөөлж байгаа шиг амар зүйл биш, чи бясалгах хүсэлтэй л бол бясалгаж чадна гэж бодож байна уу? Чи жинхэнэ бясалгахыг хүсмэгц чиний амь нас тэр дорхноо аюулд учирна, шууд энэ асуудалтай тулгарна. Маш олон чигон багш хүнийг дээд түвшин лүү дагуулах бясалгал зааж зүрхэлдэггүй. Яагаад вэ? Тэд энэ асуудлыг шийдэж чадахгүй, чамайг тэд хамгаалж чадахгүй.

Урьд өмнө Дао-г заадаг олон хүн байсан. Тэд зөвхөн нэг л шавьд заадаг байсан, нэг л шавийг харж хамгаалж чаддаг байсан. Харин ердийн нэг хүн ийм өргөн хэмжээнд заан тараахыг зүрхлэхгүй. Гэхдээ бид энд та бүхэнд хэлсэн, энэ зүйлийг би хийж чадна гэж, яагаад гэвэл надад тоолшгүй олон Номын бие байгаа, тэдгээр нь миний зүйрлэшгүй хүчтэй бурханлаг увидас чадварыг агуулсан байдаг, тэд аугаа ер бусын чадвар, асар их хүч чадлыг гаргаж чадна. Гэвч бидний өнөөдөр хийж байгаа энэ зүйл гаднаас нь харахтай адил тийм амар биш, би үүнийг хийхээр зүгээр сэтгэлийн хөөрлөөр гарч ирсэн юм биш. Би та бүхэнд энэ үйл явдлыг маш олон аугаа гэгээрэгчид ажиглан харж байгааг хэлье. Энэ бол Номын төгсгөлийн үед заах эцсийн ариун ном юм. Ингэж хийхдээ үүнийг бас гажуудуулахыг бид зөвшөөрөхгүй. Бясалгалын ариун замаар үнэхээр замнаж чадвал хэн ч чамд муу зүйл амархан хийж зүрхлэхгүй. Үүнээс гадна чамд миний Номын биеийн хамгаалалт байгаа, ямар ч аюулд орохгүй.

Өр тавьсан бол төлөх ёстой, иймээс бясалгалын замд зарим аюултай зүйл тохиолдож болзошгүй. Гэхдээ ийм зүйл

тохиолдоход чи айхгүй, тэгээд ч чамд жинхэнэ аюул гаргуулахгүй. Би та бүхэнд хэдэн жишээ хэлье. Намайг Бээжинд лекц уншиж байхад нэг сурагч дугуйгаа унаад зам хөндлөн гарч байсан. Түүнийг замын уулзвараар эргэж байтал нэг тансаг суудлын машин огцом эргэхдээ манай энэ тавь гариу настай эмэгтэй сурагчийг их хүчтэй мөргөсөн. Тэр сурагч толгойгоороо саван машины дээд талыг “пан” хийтэл чанга дуутай цохисон. Энэ үед түүний хөл дугуйны дөрөөн дээрээсээ ч салаагүй. Тэр толгойгоороо мөргөсөн ч өвдөөгүй. Толгой нь өвдөөгүй төдийгүй цус ч гараагүй бас хавдаа ч үгүй байсан. Тэр жолооч их айсан, машинаасаа үсэрч гарч ирээд түүнээс гэмтсэн үү гэж яаран асуусан, эмнэлэгт хүргэж өгье гэсэн. Тэр зүгээр ээ гэж хариулсан. Мэдээж энэ сурагчийн зан чанар их өндөр байсан, хүнд төвөг учруулахыг хүсээгүй. Тэр зүгээр ээ гэсэн ч мөргөснөөс болж машин дээр том хонхорхой үлдсэн байсан.

Иймэрхүү явдал амь насыг авахаар ирдэг, гэхдээ жинхэнэ аюул учрахгүй. Урьд Жилинь их сургуульд лекц унших үед нэг сурагч их сургуулийн гол хаалгаар дугуйгаа түрээд гарч явсан, түүнийг замын яг голд хүрэхэд хоёр машин гэнэт түүнийг дундаа бараг хавчих шахсан, бараг мөргөх шахсан гэвч тэр ердөө ч айгаагүй. Бид ийм зүйлтэй тааралдахдаа бүгд айдаггүй, яг тэр агшинд машинууд зогссон, аюулд оролгүй өнгөрсөн.

Бээжинд бас нэг ийм явдал болсон. Өвөл эрт харанхуй болдог, хүмүүс бас эрт унтацгаадаг. Гудамжинд хэн ч байхгүй ямар ч анир чимээгүй нам гүм байсан. Нэг сурагч дугуйгаа унаад гэр лүүгээ яаран явж байтал өмнө нь зөвхөн нэг жийп машин явж байсан. Гэнэт тэр машин зогссон. Тэр үүнийг анзаараагүй, толгойгоо тонгойсон хэвээр урагш жийсээр байсан. Тэгтэл нөгөө машин гэнэт хойшоо ухарсан, их хурдтай ухарсан. Ийм хоёр талын хүчээр мөргөж түүний амийг авахаар ирсэн. Тэднийг яг мөргөлдөхийн даваан дээр

нэг хүч түүний дугуйг хагас метр гаруй хойш нь гэнэт татсан, мөн жийп түүний дугуйг тулаад тоормосоо чахруулан зогссон, магадгүй жолооч ард нь хүн байгааг мэдсэн байх. Энэ сурагч тэр үед айгаагүй. Ийм байдалтай тааралдахад бүгд айдаггүй, магадгүй өнгөрсний дараа айна. Хамгийн түрүүнд түүнд орж ирсэн бодол нь: Аая! Хэн намайг хойш нь татав? Би түүнд талархах ёстой. Эргэж хараад баярласнаа хэлэх гэтэл гудамжинд хэн ч байхгүй эргэн тойронд нь нам гүм байсан. Тэр даруй ойлгосон, Багш намайг хамгаалжээ!

Бас нэг тохиолдол Чанчунь хотод болсон. Нэг сурагчийн гэрийн хажууд байшин баригдаж байсан, одоогийн байшингууд их өндөр баригдаж байгаа. Барилгын угсардаг шат 2 цун диаметртэй дөрвөн метр урттай төмөр труба-гаар хийгддэг. Энэ сурагч гэрээсээ гараад холгүй явж байтал нөгөө өндөр байшингийн дээрээс нэг төмөр хоолой эгцээрээ түүний толгой дээрээс нь унаад ирсэн, замаар явж байсан хүмүүс бүгд мэлэрсэн. Тэр хэлсэн: Хэн намайг алгадав? Тэр хэн нэгэн түүний толгойн дээр алгадсан гэж бодсон. Яг энэ агшинд тэр эргээд харахад толгой дээр нь нэг том Фалунь эргэж байсан. Төмөр хоолой толгойн хажуугаар нь өнгөрч газарт эрчээрээ зоогдсон. Хэрэв энэ нь хүний биенд зоогдсон бол та нар боддоо, тийм хүнд жинтэй төмөр труба түүнийг яг шорлог шиг нэвт сүлбэх байсан. Маш аюултай юм болох байсан!

Иймэрхүү тохиолдол маш их байдаг, үүнийг тоочих аргагүй олон, гэхдээ хэнд ч жинхэнэ аюул учраагүй. Хүн болгонд иймэрхүү зүйл тохиолдохгүй гэхдээ зарим нэг хүнд ийм аюул тулгарна. Чамд ийм юм тохиолдсон ч бай тохиолдоогүй ч бай ямар ч аюул гарахгүйг батална, би үүнийг баттай хэлж чадна. Зарим сурагчид зан чанарын шаардлагын дагуу явдаггүй, зөвхөн дасгалаа хийгээд зан

чанараа бясалгадаггүй, тэд бясалгаж байгаа хүнд тооцогдохгүй.

Багш юу өгдөгийн тухайд бол би та бүхэнд эдгээр зүйлсийг өгнө. Миний номын бие чамайг өөрийгөө хамгаалж чаддаг болтол чинь хамгаална, тэр үед чи Гурамсан ертөнцийн номын бясалгалаас дээш гарсан байх болно, мөн чи аль хэдийн Дао-д хүрсэн байх болно. Гэхдээ чи өөрийгөө заавал жинхэнэ бясалгадаг хүн гэж авч үзэх ёстой, тэгвэл чи үүнд хүрнэ. Нэг хүн гудамжинд миний номыг гартаа барьчихаад хашгирч байсан: “Ли багш намайг хамгаална, би машинд дайруулахаас айхгүй”. Энэ бол Дафа-г гуйвуулж байна. Ийм хүнийг хамгаалахгүй. Жинхэнэ бясалгадаг шавь ийм зүйл хийхгүй.

Энергийн орон

Бид гон бясалгахад бидний эргэн тойронд нэг орон үүсдэг. Энэ ямар орон бэ? Зарим хүн үүнийг чий орон, соронзон орон, мөн цахилгаан орон гэж хэлдэг. Үнэндээ чи үүнийг ямар ч орон гэж хэлсэн буруу болно, яагаад гэвэл энэ оронд оршдог бодис нь маш их баялаг. Бидний орчлон ертөнцийн бүх орон зайг бүрдүүлсэн бие бодь энэ гон дотор бараг бүгд байдаг, бид үүнийг энергийн орон гэж хэлбэл арай зохистой, иймээс бид үүнийг ерөнхийдөө энергийн орон гэж нэрлэдэг.

Тэгвэл энэ орон ямар нөлөөтэй вэ? Та бүгд мэднэ, манай ариун номоор бясалгадаг хүнд ийм мэдрэмж байдаг. Яагаад гэвэл ариун номоор бясалгасан учраас энэ нь энэрэнгүй, мөн орчлон ертөнцийн Үнэн, Нинжин, Тэвчээр мөн чанарт ууссан. Тиймээс манай сурагчид энэ оронд сууж байхад муу бодол байхгүй болдгийг мэдэрдэг. Мөн олон сурагчид энд суухад тамхи татах ч бодол гардаггүй, амгалан тайван

орчинг мэдэрдэг энэ нь их тааламжтай сайхан. Энэ бол ариун номоор бясалгадаг хүнд байдаг энерги, энэ орны хүрээн дотор ийм нөлөө гардаг. Энэ лекцэнд суусны дараа манай ихэнх хүн гон-той болно, жинхэнэ гон гарна. Миний чамд уламжилсан бол ариун номын бясалгалын зүйл, чи өөрийгөө бас энэ зан чанарын шалгуурын дагуу шаардах ёстой. Чи үргэлжлүүлэн хичээллэж бидний зан чанарын шаардлагын дагуу бясалгахад аажимдаа чиний энерги улам хүчтэй болно.

Бид өөрсдийгөө болон бусдыг, мөн бүх амь бодийг аврахыг ярьдаг. Тиймээс Фалунь дотогшоо эргэхдээ өөрийгөө аварна, гадагш эргэхдээ бусдыг аварна. Гадагш эргэхдээ энерги гаргана, энэ нь бусдад ашиг тустай. Иймд чиний энергийн орны хүрээн доторхи хүнд ашигтай, түүнд магадгүй их таатай мэдрэмж төрнө. Чи гудамжинд явж байсан ч, ажил дээрээ байсан ч, эсвэл гэртээ байсан ч ийм нөлөө гаргаж болно. Магадгүй чи өөрийнхөө орны хүрээн дотор байгаа хүний биеийг санаандгүйгээр засчихна, яагаад гэвэл энэ орон бүх буруу байдлыг засч болно. Хүний бие өвчтэй байх ёсгүй, өвчтэй байвал буруу байдалд орсных. Тэр орон энэ буруу байдлыг засч чадна. Муу бодолтой хүнд буруу санаа төрөхөд чиний орны хүчтэй нөлөөнд түүний бодол өөрчлөгдөж болно, магадгүй тэр үед муу зүйл бодохгүй болно. Магадгүй нэг хүн хэн нэгнийг загнах бодолтой байснаа гэнэт болино, загнах хүсэлгүй болно. Зөвхөн ариун номын бясалгалаас гарсан энергийн орон ийм нөлөө үзүүлж чадна. Тиймээс Буддын шашинд урьд нэг ийм үг байсан, “Буддын туяа даяар гийхэд зүй бус бүхэн засагдана.” Ийм л утгатай юм.

Фалунь Дафагийн сурагч бясалгалыг яаж тараах вэ

Манай олон сурагч харьсныхаа дараа энэ бясалгал их сайн юм байна гэж ойлгодог, хамаатан садандаа болон найз нөхөддөө тараахыг хүсдэг. Болно, та нар үүнийг хэнд ч тарааж болно. Гэхдээ нэг зүйлийг бүгдэд анхааруулах ёстой. Бид та бүхэнд ийм олон зүйлийг өгсөн, энэ нь ямар ч үнэ цэнээр хэмжишгүй. Би яагаад үүнийг та бүгдэд өгч байгаа вэ? Чамайг бясалгуулахын тулд юм, зөвхөн бясалгах юм бол чамд эдгээр зүйлийг өгч болно. Өөрөөр хэлбэл, та нар ирээдүйд бясалгал тараахад эдгээр зүйлээр нэр ашиг хөөцөлдөж болохгүй. Иймээс чи над шиг курс зохион байгуулж төлбөр авч болохгүй. Яагаад гэвэл бидэнд ном, материал хэвлэх хэрэгтэй, мөн энд тэнд очиж бясалгал заана, зардалд мөнгө хэрэгтэй. Бидний авдаг төлбөр бол орон даяар хамгийн бага, гэхдээ бидний өгдөг зүйлс хамгийн их. Бид хүнийг жинхэнэ дээд түвшин лүү дагуулж байгаа, үүнийг та бүгд өөрөө ч мэдэрч байгаа. Фалунь Дафагийн сурагчийн хувьд чи ирээдүйд бясалгалыг тараахад бид чамд хоёр шаардлагыг тавина:

Эхнийх нь бол төлбөр авч болохгүй. Бид чамд ийм их зүйлийг өгсөн, чамайг баян бол, нэртэй бол гэсэн үг биш, харин чамайг аврахын тулд, чамайг бясалгуулахын тулд юм. Хэрэв чи төлбөр авбал миний Номын бие чамд өгсөн бүх зүйлээ буцааж авна, мөн үүнээс хойш чи манай Фалунь Дафагийн сурагч гэж тооцогдохгүй, чиний тараасан нь бидний Фалунь Дафагийн зүйл биш болно. Та нар бясалгал тараахдаа нэр ашиг хүсэхгүйгээр, сайн дураараа хүнд үйлчил. Бүх орон даяархи сурагчид бүгд ингэж хийж байгаа, бас бүх газрын зааварлагчид өөрсдөөрөө үлгэр жишээ харуулж байгаа. Хэрэв чи манай бясалгалыг сурах хүсэлтэй бол ирж сурч болно, бид чамд хариуцлагатай хандана мөн чамаас нэг мөнгө ч авахгүй.

Хоёр дахь шаардлага бол Дафа-д өөрийнхөө зүйлийг хольж оруулж болохгүй. Өөрөөр хэлбэл дасгал заах явцад чиний тэнгэрийн мэлмий нээгдсэн ч бай, чи ямар нэг зүйлийг харсан ч бай, чамд ямар нэгэн ер бусын чадвар гарсан ч бай хамаагүй чи өөрийнхөө харсан байдлаар бидний Фалунь Дафаг ярьж болохгүй. Чиний өөрийнхээ түвшинд харсан тэр өчүүхэн зүйл юу ч биш, бидний ярьж байгаа номын жинхэнэ утгаас маш хол зөрөөтэй. Хойшид чи бясалгал, дасгал тараахдаа энэ асуудал дээр их болгоомжтой ханд. Зөвхөн ийм байвал бидний Фалунь Дафа-гийн эх зүйлүүд өөрчлөгдөхгүй гэдгийг батална.

Түүнчлэн над шиг ийм хэлбэрээр бясалгал дасгал зааж болохгүй, мөн миний хийдэг шиг том хэмжээний лекц хэлбэрээр Ном ярихыг зөвшөөрөхгүй, чи Ном ярьж чадахгүй. Яагаад гэвэл миний ярьж байгаа зүйлүүд маш гүн утга агуулгатай, дээд түвшний зүйлүүдтэй уялдаатай. Та нар өөр өөр түвшинд бясалгаж байгаа, ирээдүйд чиний түвшин дээшилсний дараа эргээд энэ бичлэгийг сонсвол чи мөн үргэлжлэн дээшилнэ, чи үргэлж сонсоход үргэлж шинэ зүйл ойлгож авна, шинэ зүйл олж авна, ном уншихад энэ нь бүр илүү. Миний эдгээр үгс маш их гүн гүнзгий зүйлүүдийг уялдуулан ярьж байгаа, иймээс энэ номыг чи ярьж чадахгүй. Чи миний хэлсэн үгийг өөрийнхөө үг болгож ярихыг зөвшөөрөхгүй, тэгвэл Номыг хулгайлсан хэрэг болно. Чи зөвхөн миний үгийг тэр хэвээр нь Багш ингэж ярьсан, номонд ингэж бичсэн, зөвхөн ингэж ярьж болно. Яагаад гэвэл чамайг ингэж хэлэхэд үүнд Дафа-гийн хүч оршино. Чи өөрийнхөө мэдэж байгаа зүйлийг Фалунь Дафагийн зүйл болгон тарааж болохгүй, тэгвэл чиний тараасан нь Фалунь Дафа биш, бидний Фалунь Дафаг эвдэж байгаатай адил. Чи өөрийнхөө бодлын дагуу ярьвал тэр бол Ном биш, хүнийг аварч чадахгүй, бас ямар ч нөлөө гарахгүй, иймээс хэн ч энэ Номыг ярьж чадахгүй.

Та нар бясалгалыг тараахдаа дасгалын талбайд юмуу хичээллэдэг газарт сурагчдад дууны эсвэл дүрст бичлэгийг тавьж өгөх, дараа нь зааварчлагч тэдэнд дасгал зааж өгч болно. Та нар хоорондоо ойлгосноо хуваалцах, хамтдаа санал бодлоо солилцох хэлбэрээр явуулж болно. Бид та нарыг ингэж хийхийг шаардана. Мөн Фалунь Дафаг тарааж байгаа сурагч (шавь)-ийг багш эсвэл их багш гэх мэтээр дуудаж болохгүй, Дафа-гийн багш ганц л байдаг. Үүдээр эхэлж орсон хүн, дараа нь орсон хүн ялгалгүй бүгд шавь нар юм.

Та нар бясалгал тараахдаа зарим нь магадгүй ингэж бодно: Багш Фалунийг суулгаж мөн хүний биеийг засч өгч чадна, бид нар тэгж чадахгүй. Зүгээр, би та бүгдэд сурагч болгоны ард миний Номын бие байгаа гэж дээр хэлсэн, энэ нь бас нэг ч биш, иймээс миний Номын бие эдгээр зүйлийг хийж өгнө. Чи тэр хүнд заахад хэрэв тэр хувь тавилантай байвал тэр даруй Фалунийг авна. Хэрэв хувь тавилан нь тийм сайн биш бол бие нь засагдаж бясалгал дасгал хийсний дараа яваандаа авч болно. Миний номын бие түүнд тусалж биеийг нь засч өгнө. Үүнээс гадна би чамд хэлье, хэрэв чи миний номыг уншиж, миний лекцийн дүрст бичлэгийг үзэж, эсвэл миний лекцийн бичлэгийг сонсож, бясалгалыг сурахдаа өөртөө жинхэнэ бясалгагч хүн гэж хандвал чи олох ёстой зүйлийг мөн адил олж авна.

Бид сурагчдыг хүний өвчинг үзэж өгөхийг зөвшөөрөхгүй, Фалунь Дафагийн сурагчдад хүний өвчнийг эдгээхийг туйлаас хориглоно. Бид чамд дээш бясалгахыг зааж байгаа, чамд янз бүрийн зууралдсан сэтгэл гаргуулахгүй бас өөрийнхээ биеийг муутгах зүйл хийлгэхгүй. Бидний дасгал хийдэг талбай бусад ямар ч чигон дасгалын газраас илүү сайн, чи бидний тэр талбайд дасгал хийхээр очих нь өөрөө өвчнөө эдгээх гэж явснаас хавьгүй дээр. Тэнд миний номын биес тойрч суусан байгаа,

мөн дасгалын талбай дээгүүрээ хамгаалах бүрхүүлтэй, дээр нь том Фалунь байдаг, том Номын бие энэ бүрхүүлний дээгүүр хамгаалж байдаг. Энэ талбай бол энгийн талбай биш, энгийн чигон дасгалын талбай ч биш, энэ бол бясалгалын талбай. Манай ер бусын чадвартай олон хүн Фалунь Дафагийн талбайг улаан туяан бүрхүүлтэйг харсан, нилэнхүйдээ улаанаар туяарсан байдаг.

Миний номын бие шууд Фалунь суулгаж өгч болно, гэхдээ бид зууралдсан сэтгэлийг дэмжихгүй. Чамайг түүнд дасгал заахад тэр: Өө, одоо би Фалунь-тай болчихлоо гэж хэлэхэд чи өөрөө түүнийг өгсөн гэж бодож магад, гэхдээ тэр тийм биш. Би та бүгдэд үүнийг ярьж байгаагийн учир бол та нарт тийм зууралдсан сэтгэл гаргуулахгүйн тулд юм. Энэ бүгдийг миний Номын бие хийдэг. Бидний Фалунь Дафагийн шавь нар ингэж л бясалгалыг тараах хэрэгтэй.

Хэн нэгэн Фалунь Дафагийн дасгалыг өөрчлөн засварлах юм бол тэр хүн Дафа-г эвдэж байна, энэ номын үүдийг эвдэж байна гэсэн үг. Зарим хүн дасгалын зааварчилгааг шүлгийн холбоо үгс болгон өөрчилсөн, үүнийг туйлаас зөвшөөрөхгүй. Жинхэнэ бясалгах арга бүгд түүхийн урьд үеэс үлдсэн зүйл, маш өнө эртний үеэс уламжилсан, мөн тоолшгүй олон аугаа гэгээрэгчид бясалгаж гарсан. Хэн ч үүнийг өөрчилж зүрхлээгүй. Энэ нь зөвхөн бидний номын төгсгөлийн үед гарсан зүйл. Түүхийн аль ч үед ийм зүйл хэзээ ч гарч байгаагүй, та бүгд эрх биш энэ асуудалд анхаараарай.

Дөрөвдүгээр лекц

Алдах ба олох

Бясалгалын хүрээнд үргэлж алдах ба олохын харилцааг ярьдаг, энгийн хүмүүс бас үүнийг ярьдаг. Бид бясалгаж байгаа хүний хувьд алдах ба олоход яаж хандах вэ? Энэ нь энгийн хүнийхтэй адилгүй. Энгийн хүн хувийн ашиг сонирхол мөн яаж сайхан амьдрах, тав тухтай байхыг л хүсдэг. Бид бясалгаж байгаа хүн, ингэхгүй харин яг эсрэгээр энгийн хүний хүсдэг зүйлийг бид хөөцөлдөхгүй. Харин бидний олох зүйлийг энгийн хүн хүссэн ч олж авч чадахгүй, гагцхүү бясалгалаар олно.

Бидний ярьдаг алдах бол жижиг хүрээн дэх алдалт биш. Алдах талаар ярихад зарим хүн мөнгөөр хандив өргөх, тусламж гуйсан хүнд гар сунгах эсвэл гудамжны гуйлгачинд өглөг өгөх тухай боддог. Энэ ч бас нэг хэлбэрийн өглөг бас нэг хэлбэрийн алдалт, энэ нь зөвхөн мөнгө эсвэл эд материалын хувьд хөнгөн харж байгаа явдал. Хөрөнгө мөнгөний өглөг бол мэдээж нэг талын алдалт, бас нилээд чухал асуудал. Харин бидний ярьж байгаа алдах нь ийм жижиг хүрээнд биш, бид бясалгах явцдаа бясалгаж байгаа хүний хувьд хаях ёстой сэтгэл маш олон байдаг, гайхуулах сэтгэл, атаархах сэтгэл, тэмцэлдэх сэтгэл, баярлах сэтгэл гэх мэт маш олон, янз бүрийн зууралдсан сэтгэлийг бүгдийг хаях ёстой. Бидний ярьж байгаа алдалт бол өргөн утгатай, бясалгалын бүхий л явцад энгийн хүний бүх зууралдсан сэтгэл, янз бүрийн хүслийг хаях ёстой.

Магадгүй зарим хүн ингэж боддог, бид энгийн хүмүүсийн дунд бясалгаж байгаа, бүгдийг нь хаявал бид лам хувраг эсвэл гэлэнмаа нартай адил болох юм биш үү?

Бүгдийг нь хаяна гэвэл боломжгүй юм шиг. Бидний номоор энгийн хүний дунд бясалгаж байгаа энэ хэсэгт чамайг боломжийн хэрээр энгийн хүний нийгэмд, энгийн хүний амьдралын дунд бясалгахыг шаарддаг, материаллаг ашиган дээр чамайг үнэн хэрэгтээ алдуулж байгаа юм биш. Чиний хэр дээгүүр албан тушаалд байх, ямар их мөнгө хөрөнгөтэй байх нь хамаагүй, гол нь чи энэ сэтгэлээ орхиж чадах, чадахгүйн асуудал юм.

Бидний бясалгал хүний сэтгэл рүү чиглэсэн, хувь хүний ашиган дээр, хүн хүний хоорондын зөрчил дунд эдгээр асуудлыг хөнгөн авч үзэж чадах юм уу, үгүй юу гэдэг нь гол асуудал юм. Сүм хийдэд болон зэлүүд уулс, ойн гүнд бясалгахад чамайг энгийн хүний нийгмээс бүрэн тусгаарлана, чиний энгийн хүний сэтгэлийг хүчээр орхиулна, аливаа эд материалын ашиг чамд олуулахгүй, ингэж чамайг алдуулна. Энгийн хүмүүсийн дунд бясалгаж байгаа хүн энэ замаар явахгүй, энгийн хүний амьдралд эдгээр асуудлыг хөнгөн харахыг шаардана. Мэдээж энэ нь маш их хэцүү, энэ нь манай бясалгалын хамгийн чухал зүйл юм. Иймээс бидний ярьж байгаа алдах нь нэг явцуу хүрээнд биш харин өргөн утгатай. Сайн зүйл хийх, эд мөнгөний өглөг өгөх талаар ярья. Гудамжинд байгаа одоогийн зарим гуйлгачид мэрэгжсэн, тэд магадгүй чамаас их мөнгөтэй. Бид үл ялих зүйл дээр анхаарахын оронд өргөн хүрээнд харах ёстой. Бид эрхэм сайн чанарыг барин өргөн хүрээнд бясалгах хэрэгтэй. Үнэндээ алдах явцад бидний жинхэнэ алдаж буй нь муу зүйлс юм.

Хүмүүс үргэлж өөрсдийнхөө хөөцөлддөг юм болгоныг сайн зүйл гэж боддог. Үнэндээ дээд түвшнээс харахад, энэ бүгд нь энгийн хүний дунд олсон тэр жоохон хувийн ашигандаа сэтгэл ханахын тулд байдаг. Шашинд ингэж ярьдаг, чи хичнээн ч их мөнгөтэй байсан, ямар ч том албан тушаалд байсан энэ нь зөвхөн хэдэн арван жилд л нөлөөтэй,

төрөхдөө хамт авчирч чадахгүй, үхэхдээ хамт аваад явж чадахгүй. Энэ гон яагаад ийм нандин байдаг вэ? Яагаад гэвэл тэр шууд чиний Эзэн сүнсний биен дээр өсдөг, төрөхдөө авч ирдэг, үхэхдээ аваад явдаг, мөн тэр нь чиний бүтээлийн оронг шийддэг, иймээс бясалгахад амаргүй. Өөрөөр хэлбэл, чиний алдсан нь муу зүйл юм, ингэснээр чи үүссэн эх үндсэндээ буцаж үнэнд хүрч чадна. Тэгвэл юу олж авах вэ? Чиний түвшин дээшилнэ, эцэст нь гэгээрлийн хутгийг олно, гэгээрэх үндсэн асуудал шийдэгдэнэ. Мэдээж, бид энгийн хүний янз бүрийн дур хүслийг тэр дор нь орхиж жинхэнэ бясалгагч хүний зэрэгт хүрэхэд тийм амаргүй, үүнд аажимдаа хүрнэ. Намайг үүнд аажимдаа хүрнэ гэж хэлэхийг сонсоод, Багш бидэнд аажмаар хий гэж хэлсэн, тэгвэл аажмаар хийе, ингэж болохгүй! Чи өөртөө хатуу шаардлагатай байх ёстой, гэхдээ бид чамайг аажмаар дээшлэхийг зөвшөөрнө. Чи гэнэт бүгдийг хийж чадвал чи өнөөдөр Будда болчихно. Иймээс энэ нь бодит биш, чи аажмаар үүнд хүрэх болно.

Бидний алдсан нь үнэндээ бол муу зүйл юм. Энэ юу вэ? Энэ бол нүгэл, тэр бол хүний янз бүрийн сэтгэлтэй уялдаа холбоотой. Жишээ нь, энгийн хүнд янз бүрийн муу бодол санаа байдаг. Тэд хувийн ашиг сонирхлынхоо төлөө янз бүрийн муу зүйл хийдэг, тэгээд энэ хар бие бодь нүглийг олдог. Энэ нь бидний өөрийн сэтгэлтэй шууд холбоотой, энэ муу зүйлийг устгахын тулд чи хамгийн түрүүнд өөрийнхээ сэтгэлийг өөрчил.

Нүглийн хувиралт

Цагаан бие бодь ба хар бие бодийн хооронд хувирах явц байдаг. Хүн хүний хооронд зөрчил гарсны дараа энэ хувирах явц гардаг. Сайн зүйл хийхэд цагаан бие бодь-буян олж авдаг, муу зүйл хийхэд хар бие бодь-нүгэл ирдэг. Мөн

уламжлан дамжиж ирэх явц бас байдаг. Зарим хүн ингэж ярьдаг: Залуу насандаа муу зүйл хийснээс болдог уу? Магадгүй бүгд тийм биш, яагаад гэвэл хүний нүгэл зөвхөн нэг амьдралын туршид хуримтлагддаг юм биш. Бясалгалын хүрээнд Эзэн сүнс устдаггүй гэж ярьдаг. Хэрэв Эзэн сүнс устдаггүй юм бол тэр хүн өмнөх амьдралдаа нийгмийн харилцаанд байсан байж таарна, тэгвэл тэр урд насандаа магадгүй хэн нэгэнд өр тавьсан, хэн нэгнийг дээрэлхсэн, эсвэл ямар нэг муу зүйл хийсэн, амь хороох гэх мэт зүйл хийсэн байх, тэгвэл энэ нь нүгэл болдог. Эдгээр зүйлүүд өөр орон зайд хуримтлагддаг, үргэлж хамт явдаг, цагаан бие бодийн хувьд бас адилхан, зөвхөн ийм янзын үүслээр хязгаарлагдахгүй. Бас өөр нэг байдал байдаг, гэр бүлийн удам угсаагаар өвөг дээдсээс хойч үедээ дамжиж болно. Урьд хөгшчүүл ингэж ярьдаг байсан: Буян хураа, буян хураа, өвөг дээдэс буян хураасан, энэ хүн буянаа алдаж байна, буянаа гээж байна, энэ бол маш үнэн үг. Өнөөгийн энгийн хүн энэ үгийг хүлээж авахаа больсон, чи тэдгээр залуучуудад буянаа алдах, буянаа гээх гэж ярихад тэд үүнийг ердөө ойшоож сонсохгүй. Үнэндээ үүний утга нь маш гүн гүнзгий юм, энэ нь зөвхөн орчин үеийн хүний үзэл бодол, оюун санааны хэмжүүр биш, харин энэ бол жинхэнэ бодитоор оршдог, бидний хүний биед ийм хоёр төрлийн бие бодь байдаг.

Зарим хүн, хар бие бодь ихэсвэл дээд түвшин лүү бясалгаж чадахгүй юу? гэж асуудаг. Тэгж хэлж болно, хар бие бодь ихэсвэл энэ нь хүний ухамсарт нөлөөлдөг. Яагаад гэвэл энэ нь чиний биеийн гадуур бүрхүүл үүсгэдэг, чамайг яг голдоо ороогоод орчлон ертөнцийн Үнэн, Нинжин, Тэвчээр мөн чанараас тусгаарлачихдаг. Тиймээс ийм хүний ухамсар нь магадгүй муу байдаг. Хүмүүс бясалгал болон чигон-ы талаар ярихад үүнийг тэр мухар сүсэг гэж үздэг, тэдэнд ердөө итгэхгүй, түүнд инээдтэй санагддаг. Ихэнхдээ ийм байдаг, гэхдээ туйлын биш. Ийм хүн бясалгахад маш

хэцүү юу? Өндөр гон-той болох боломжгүй гэсэн үг үү? Энэ нь бас тийм биш. Бид Дафа бол хязгааргүй гэдэг, энэ нь чиний бясалгах сэтгэлээс шууд шалтгаална. Багш чамайг номын үүдээр оруулна, цаашдын бясалгал бол өөрөөс чинь шалтгаална, чамайг яаж бясалгахыг чинь харна. Чиний бясалгаж чадах үгүйг чинь, тэвчиж чадах үгүйг чинь, өөрийгээ зориулж чадах үгүйг чинь, бэрхшээлийг даван туулж чадах үгүйг чинь харна. Хэрэв чи бясалгахаар хатуу шийдсэн бол ямар ч бэрхшээл чамайг зогсоож чадахгүй. Тэгвэл асуудалгүй гэж би хэлнэ.

Хар бие бодь ихтэй хүн цагаан бие бодь ихтэй хүнээс гол төлөв илүү зовлон даах хэрэгтэй болдог. Яагаад гэвэл цагаан бие бодь бол орчлон ертөнцийн Үнэн, Нинжин, Тэвчээр мөн чанарт шууд ууссан учраас тэр хүн зөвхөн зан чанараа дээшлүүлэхэд, зөрчлийн дунд өөрийгөө дээшлүүлэхэд түүний гон нь өснө, ийм л хялбар. Буян ихтэй хүний ухамсар нь өндөр, бас бие сэтгэлийн хүнд бэрхшээлийг туулж чадна. Тэр хүн биеэрээ илүү зовлон амсч сэтгэл санааны бага зовлон үзсэн ч түүний гон ялгаагүй өснө. Хар бие бодь ихтэй хүний хувьд бол тийм биш, тэр эхлээд заавал ийм нэгэн явцыг туулах ёстой: Эхлээд хар бие бодийг цагаан бие бодиор хувиргах ёстой, энэ дамжлага бол тун их зовлонтой. Иймээс ухамсар муутай хүн гол төлөв илүү зовлон амсдаг, их нүгэлтэй бас ухамсар муутай бол бясалгахад бүр ч амаргүй.

Нэг тодорхой жишээн дээр ярья, түүнийг яаж бясалгахыг харья. Даяанд бясалгаж суухдаа хөлөө удаан хугацаагаар завилж суудаг, ингэж завилж суухад хөл өвдөнө, бадайрна, удаан суух тусам сэтгэл улам хэцүүднэ, байж сууж ядна. Бие сэтгэлээр зовоход бие ч таагүй сэтгэл ч таагүй. Зарим хүн завилж суух өвдөлтнөөс айж хөлөө тэнийлгэнэ, үргэлжлүүлж тэвчихийг хүсэхгүй. Бас зарим хүн жоохон удаан завилж суусны дараа тэвчихгүй хөлөө

тэнийлгэхэд дасгал үр дүнгүй болно. Завилж суугаад хөл нь өвдөнгүүт тэнийлгэн амраагаад дахиад үргэлжлүүлэн завилж суухад бидний харснаар үр дүнгүй болдог. Яагаад гэвэл хүний хөл өвдөхөд хар бие бодь хөлөнд буудаг. Хар бие бодь бол нүгэл, үүнийг зовлон эдэлснээр арилгаж буян болгон хувиргана. Өвдөж эхэлмэгц нүгэл арилж эхэлдэг. Нүгэл их орж ирэх тусам хөлний өвдөлт улам ихсэнэ. Тиймээс хөлний өвдөлт учир шалтгаангүй гардаггүй. Ер нь хүн завилж суугаад бясалгахад хөлний өвдөлт үе үеэр давтагддаг. Нэг хэсэг өвдөлт болж өнгөрсний дараа хэсэг гайгүй болж тэгээд дахин өвдөж эхэлнэ, ийм байдлаар үргэлжилдэг.

Нүгэл хэсэг хэсгээр арилдаг болохоор нэг хэсэг нь арилсны дараа хөл арай гайгүй болно. Удалгүй дараачийн хэсэг ирэхэд дахиад өвдөж эхэлнэ. Хар бие бодь арилсны дараа хийсч алга болохгүй устаж үгүй болдоггүй, харин шууд цагаан бие бодь болон хувирна, энэ цагаан бие бодь бол буян. Яагаад ингэж хувирч болдог вэ? Яагаад гэвэл энэ хүн зовлон амссан, бие сэтгэлээ зориулсан, мөн зовлонг даасан. Бид өөр дээрээ зовлон бэрхшээлийг тэсвэрлэн давж туулснаар, сайн зүйл хийснээр буяныг олж авдаг гэж хэлсэн. Иймээс бясалгал хийж суухад ийм байдал гардаг. Зарим хүн хөл нь өвдөж эхлэнгүүт л хөлөө тэнийлгэн хөдөлгөж амраагаад дахин үргэлжлүүлдэг. Ингэж хийвэл ямар ч үр дүнгүй болно. Зарим хүн “Багана зогсолт” дасгал хийхдээ гар нь чилж тэвчиж чадахгүй гараа буулгадаг, тэгэхэд бас ямарч үр дүнгүй. Ийм жоохон зовлон юу ч биш биз дээ? Хүн бясалгахдаа гараа өргөж зогсоод бясалгалын эцэст хүрдэг бол энэ нь хэтэрхий амархан гэж би хэлнэ. Энэ бол хүн завилж суугаад бясалгахад гардаг байдал юм.

Бидний бясалгал бүхэлдээ ийм байдлаар явагдахгүй ч гэсэн зарим тал дээр бас ийм нөлөө гардаг. Бидний ихэнх нь хүн хүний хоорондын зан чанарын зөрчил дунд нүглийг

хувиргадаг, үргэлж ийм байдлаар илэрдэг. Хүн зөрчлийн дунд, хүн хүний хоорондын мөргөлдөөнд байх нь биеэр амсах зовлонгоос ч хэцүү. Минийхээр бол, биеэр үзэх зовлонг давахад хамгийн амар, шүдээ зуугаад л өнгөрөөчихнө. Хүмүүс хоорондоо бие биенээ чадахад, сэтгэлээ барих нь хамгийн хэцүү.

Жишээ хэлье, тэр ажилдаа дөнгөж орж ирэхэд хоёр хүн түүнийг их муулж байгааг нь сонссон, түүний уур дүрсхийсэн. Гэхдээ бид хэлсэн, бясалгагч хүний хувьд цохиулсан ч эргэж цохихгүй, загнуулсан ч эргэж хэрэлдэхгүй, өөрийгөө дээд шалгуурын дагуу шаардах ёстой. Тэр хүн багшийн хэлсэн “бид бясалгаж байгаа хүмүүс, бусад хүнтэй адил байж болохгүй, өршөөнгүй байх ёстой” гэсэн үгийг санасан. Тэр нөгөө хоёр хүнтэй хэрэлдээгүй. Гэхдээ ер нь зөрчил гарахад хэрэв энэ нь хүний сэтгэлийг цочроож чадахгүй бол тооцогдохгүй, үр дүн гарахгүй, дээшилж чадахгүй. Иймээс тэр сэтгэлээ тавьж чадахгүй, түүнийг шаналгана. Энэ сэтгэл нь түүний толгойноос салахгүй өөрийг нь муулсан хоёр хүнийг эргэж хармаар санагдаад болохгүй. Эргээд харахад нөгөө хоёр хүний царай нь их заналтай харагдана, тэдний хов жив туйлдаа хүрсэн, энэ агшинд түүний тэвчээр алдран уур нь гэнэт дүрэлзэн магадгүй тэдэнтэй шууд хэрэлдэнэ. Хүн хүний хооронд зөрчил гарахад сэтгэлээ барих нь хамгийн хэцүү. Хэрэв завилж суугаад бүх зүйлийг давдаг бол энэ нь ёстой амар гэж би хэлнэ, гэхдээ үргэлж ийм байхгүй.

Иймээс чиний хойшдын бясалгалд чамд янз бүрийн саад бэрхшээл тохиолдоно. Тэдгээр бэрхшээл байхгүй бол чи яаж бясалгах юм бэ? Хэрэв хүн болгон нэг нэгэндээ сайн, хоорондоо ашиг сонирхлын зөрчилгүй, мөн сэтгэл санааны үймүүлэл байхгүй бол чи тэнд суугаад зан чанар чинь дээшлэх юм уу? Тийм байж болохгүй. Хүн өөрийгөө жинхэнэ бодитоор хатуужуулж дээшилнэ. Зарим хүн ингэж

асуудаг: Бясалгахад бидэнд яагаад дандаа саад бэрхшээл тохиолддог юм бэ? Тэдгээр нь энгийн хүмүүстэй бараг ялгаа байхгүй. Яагаад гэвэл чи энгийн хүмүүсийн дунд бясалгаж байгаа. Чамайг гэнэт толгойгоор чинь доош харуулан агаарт дүүжлээд тэнгэрт гарган зовлон амсуулахгүй, тийм юм гэж байхгүй. Бүгд энгийн хүний байдлаар болдог, хэн нэгэн өнөөдөр чамайг өднө, хэн нэгэн чамайг уурлуулна, хэн нэгэн чамд зохисгүй хандана, эсвэл гэнэт хэн нэгэн чамтай бүдүүлэг харьцана, чамайг эдгээр асуудалд яаж хандахыг чинь харна.

Яагаад ийм асуудалтай тулгардаг вэ? Тэр бүгд бол чиний хийсэн нүглээс болж гардаг. Бид үүний тоолшгүй хэсгийг чамд аль хэдийн арилгаж өгсөн. Үүнээс үлдсэн зөвхөн жоохон хэсгийг чиний зан чанарыг дээшлүүлэхийн тулд, чиний сэтгэлийг хатуужуулахын тулд, мөн чиний янз бүрийн зууралдсан сэтгэлийг хаяулахын тулд өөр өөр түвшинд туулах саад бэрхшээл болгон хуваасан. Энэ бүгд бол чиний өөрийн гай зовлон, үүнийг бид чиний зан чанарыг дээшлүүлэхийн тулд ашиглаж байгаа. Чамд тэдгээрийг даван туулж чадах байдлаар зохицуулна. Чи зан чанараа дээшлүүлбэл тэдгээрийг давж чадна, хэрэв чи давах хүсэлгүй байвал чадахгүй, давах хүсэлтэй байвал давна. Үүнээс хойш чамд ямар нэгэн зөрчил тохиолдоход чи түүнийг тохиолдлын зүйл гэж битгий үз. Зөрчилдөөн санаандгүй байтал гэнэт гарна, гэхдээ энэ нь санамсаргүй тохиолдлын зүйл биш, энэ бол чиний зан чанарыг дээшлүүлэхийн тулд юм. Чи өөрийгөө бясалгагч хүн гэж үзэн хандвал, чи үүнийг зөвөөр зохицуулна.

Мэдээж, саад бэрхшээл, зөрчил гарахыг чамд урьдчилан хэлэхгүй, бүгдийг нь чамд хэлчихвэл чи яаж бясалгах юм? Тэгвэл тэр ямар ч нөлөө байхгүй болно. Эдгээр нь гол төлөв гэнэт тохиолдоно, хүний зан чанарыг шалгадаг, мөн зан чанарыг жинхэнэ дээшлүүлэх боломж олгоно, чиний зан

чанараа сайн барьж чадах үгүйг чинь харна, ингэж л харагддаг, иймээс зөрчил гарах нь санаандгүй болдог юм биш. Бүхий л бясалгалын туршид, нүгэл хувирах явцад ийм асуудал гардаг, энэ нь биеэрээ зовлон амсах жирийн хүний төсөөллөөс илүү хэцүү. Чи дасгалаа жоохон удаан хугацаагаар хийгээд гараа өргөж чилэхэд, хөл чинь зогсоод ядрахад гон чинь өсөх юм уу? Дасгалаа хэдэн цаг илүү хийгээд л гон чинь өсөх юм уу? Дасгал нь түвшинг дээшлүүлэх нөлөө үзүүлэхгүй, зөвхөн чиний биеийг хувиргах нөлөөтэй, бас үүнийг энергиэр адислах хэрэгтэй. Сэтгэлээ хатуужуулах нь жинхэнэ түвшнээ дээшлүүлэх гол түлхүүр юм. Зөвхөн биеэрээ зүдрээд дээшилж болдог бол хятадын тариачид хамгийн ихээр зовдог гэж би хэлнэ, тэд бүгдээрээ том чигон багш болчих юм уу? Чи биеэрээ яаж ч их зүдэрсэн тэднийг гүйцэхгүй, тэд өдөр болгон тариалангийн талбайд халуун наранд шарагдан махран ажиллана. Энэ бол тийм амар зүйл биш. Иймээс жинхэнэ дээшлэх хүсэлтэй байвал чи сэтгэлээ жинхэнэ дээшлүүлэх хэрэгтэй гэж бид хэлсэн. Зөвхөн тэгвэл жинхэнэ дээшилнэ.

Нүгэл хувирах явцад өөрийгөө барьж сур, энгийн хүнтэй адил асуудалд буруу хандахгүйн тулд бид үргэлж энэрэнгүй, тайван сэтгэлтэй байх хэрэгтэй. Гэнэт ямар нэг асуудалтай тулгарахад чи түүнд зөв зохистой хандаж чадна. Чи үргэлж нинжин, энэрэнгүй сэтгэлтэй байвал гэнэт асуудал гарахад чамд түүнийг намжаах боломж, бодох хугацаа байх болно. Чи хүнтэй байнга өрсөлдөх бодолтой, тэмцэлдэх сэтгэлтэй бол асуудал гарах бүрд хүнтэй тэрсэлдэнэ гэдгийг би баттай хэлнэ. Иймээс чи ямар нэгэн зөрчилтэй тулгарвал, энэ нь чиний хар бие бодийг цагаан бие бодиор хувиргахын тулд юм гэж би хэлнэ, энэ нь буян болж хувирна.

Бидний хүн төрөлхтөн өнөөгийн ийм хэмжээнд хүртэл хөгжихөд бараг хүн болгон улам их хуримтлагдсан нүгэлтэй

төрдөг болсон, хүн болгоны бие маш их нүгэлтэй. Тийм учраас нүгэл хувирахад ийм байдал гардаг, чиний гон өсөхөд, зан чанар дээшлэхэд, чиний нүгэл зэрэг арилна бас хувирна. Зөрчилдөөн гарахад, энэ нь магадгүй хүн хүний хоорондын зан чанарын зөрөлдөөнөөр илэрнэ. Хэрэв чи тэвчиж чадвал чиний нүгэл арилна, чиний зан чанар дээшилнэ, мөн чиний гон бас дээш өснө. Энэ бүгд зэрэг явагдана. Дээхэн үеийн хүмүүс буян ихтэй, тэдний зан чанар угаасаа их сайн байсан, жоохон зовлон амсахад л гон нь өсдөг байсан. Одоогийн хүмүүс бол тийм биш болсон, жоохон зовлон үзэхэд л бясалгах хүсэлгүй болдог, мөн улам ухамсарлахгүй болсноор бясалгахад бүр хэцүү болсон.

Бясалгалд ямар нэгэн зөрчил гарахад, мөн хүмүүс чамд муугаар хандахад үүнийг хоёр янзаар авч үзэж болно: Нэг байдал нь бол чи магадгүй урьд насандаа тэр хүнд муугаар хандсан. Чи сэтгэлдээ үүнийг шударга бусаар хүлээж авна, яагаад энэ хүн надад ингэж хандаж байгаа юм бол? Тэгвэл чи урьд нь тэр хүнд яагаад тэгж ханддаг байсан юм? Чи магадгүй би тэр үед мэдэхгүй байсан гэж хэлнэ, мөн энэ насанд урьд насны зүйл хамаагүй гэнэ, тэр болохгүй. Бас нэг асуудал нь бол зөрчилдөөнд нүгэл хувирах асуудал холбогддог. Тиймээс зөрчилдөөнд хандахдаа бид дээд шалгуурын дагуу байх ёстой, энгийн хүн шиг байж болохгүй. Ажлын газарт болон бусад ажлын орчинд адилхан, хувиараа хөдөлмөр эрхэлдэг хүмүүсийн хувьд бас адилхан, бас хүн хүний хоорондын харьцаа байдаг, нийгмийн харьцаанд орохгүй байна гэж байхгүй, наад зах нь хөрш хоорондын харилцаа байдаг.

Нийгмийн харилцаанд чи янз бүрийн зөрчилтэй тулгарна, энгийн хүний дунд бясалгаж байгаа энэ хэсэгт чи хичнээн их мөнгөтэй байсан ч, ямар өндөр албан тушаалтай байсан ч, хувийн наймаа эрхэлдэг эсвэл компани удирддаг байсан ч, ямар ч төрлийн бизнес хийсэн хамаагүй чи

шударга арилжаатай бай, зөв шулуун сэтгэлтэй бай. Хүний нийгэмд янз бүрийн ажил төрөл байх ёстой. Хүний ямар ажил төрөл хийхэд биш харин хүний сэтгэл зөв бишээс болдог. Хуучны ийм нэг үг байдаг, “Арван наймаачнаас ес нь зальхай”, энэ бол энгийн хүмүүсийн яриа, энэ бол хүний сэтгэлийн асуудал гэж би хэлнэ. Хэрэв хүний сэтгэл нь зөв, арилжаа нь шударга байхад чи илүү зүтгэл гаргавал илүү мөнгө олох ёстой, энэ бол чи энгийн хүмүүсийн дунд илүү зүтгэл гаргасных юм, алдахгүй бол олохгүй, хөдөлмөрлөж олсон. Янз бүрийн давхаргад бүгд сайн хүн болж болно, өөр өөр нийгмийн давхаргад өөр өөр зөрчил байдаг. Нийгмийн дээд давхаргад тэр давхаргын зөрчил байдаг, энэ бүгдэд зөвөөр хандаж болно, аль нэг давхаргад сайн хүн байхын тулд янз бүрийн хүсэл, зууралдсан сэтгэлд хөнгөн ханд. Янз бүрийн давхаргад сайн хүн байж болно, хэн ч өөрийнхөө байгаа давхаргад бясалгаж болно.

Одоо орон даяар улсын компанид ч бай бусад аж ахуйн салбарт ч бай ялгаагүй хүмүүсийн хоорондын зөрчил их хурцадсан. Бусад улс оронд ба түүхэнд хэзээ ч ийм байдал гарч байгаагүй, иймээс ашиг сонирхлын зөрчилдөөн их ширүүссэн, бие биенээ чадах, жоохон ашгийн төлөө тэмцэлдэхээс гарсан бодол, хэрэглэдэг арга нь маш их муухай, сайн хүн байхад ч гэсэн хэцүү болсон. Жишээ нь, чи ажилдаа ирэхэд ажлын уур амьсгал чамд таагүй болсныг мэдэрсэн. Сүүлд нь чи нэгнээс нь нэг хүн чиний талаар их муу цуурхал дэгдээж, даргад хүртэл муулж чиний нэр хүндийг гутаасан тухай сонссон. Бусад хүмүүс чам руу сонин харцаар харна. Жирийн хүн яаж ийм байдлыг тэвчих юм? Ийм доромжлолыг яаж хүлээж авах юм? Тэр намайг чадсан би түүнийг ч бас чадна. Түүний талынхан байгаа бол миний талынхан ч бас байна, үзэлцье. Энгийн хүмүүсийн дунд ингэвэл, тэд чамайг мундаг хүчтэй гэж хэлнэ. Гэхдээ бясалгадаг хүний хувьд бол ёстой муухай. Чи энгийн хүнтэй

адил өрсөлдөж тэмцэлдвэл чи энгийн хүн л гэсэн үг, чи түүнээс илүү тэмцвэл, чи тэр энгийн хүнээс ч дор.

Бид энэ асуудалд яаж хандах вэ? Ийм зөрчил тулгарахад, бид юуны өмнө уужуу тайван байх ёстой, түүнтэй адил хандаж болохгүй. Мэдээж бид асуудлыг нөхөрсгөөр шийдэж болно, учир шалтгааныг тодруулахад буруу юм байхгүй. Тэгэхдээ чи үүнд хэтэрхий зууралдаж бас хэрэггүй. Хэрэв бид ийм маргаантай асуудалтай тулгарвал түүнтэй адил өрсөлдөж тэмцэлдэж болохгүй. Тэр ингэвэл чи бас тэгнэ, чи энгийн хүн болсон биш гэж үү? Чи түүнтэй адил өрсөлдөн тэмцэлдэхгүй төдийгүй бас сэтгэлдээ түүнийг занаж болохгүй, үнэхээр чи түүнийг үзэн ядаж болохгүй. Чи түүнийг занаж байвал чи уурласан биш гэж үү? Чи тэвчээгүй. Бид Үнэн, Нинжин, Тэвчээр гэж ярьдаг, чиний нинжин сэтгэл ч энд алга. Иймээс чи түүнтэй адил байж болохгүй, хэдийгээр тэр чамайг нүүрээ хийх газаргүй болтол дээр дооргүй муулж байсан ч чи үнэндээ түүнд уурлаж болохгүй. Чи түүнд уурлаж болохгүй төдийгүй харин ч баярлах ёстой. Энгийн хүн бол ингэж бодно: Тэгвэл яг А-Кю²⁰-тай адилхан болсон юм биш үү? Би чамд хэлье, энэ бол тийм биш.

Та бүгд бодоод үз, чи бол бясалгаж байгаа хүн, дээд шалгуурын дагуу чамайг шаардах ёстой биш гэж үү? Энгийн хүний ёсоор чамайг шаардаж болохгүй. Бясалгадаг хүний хувьд чиний олж байгаа нь дээд түвшний зүйлүүд биш гэж үү? Тэгвэл чамайг дээд түвшний зарчмаар шаардах ёстой. Чи түүнтэй адил харьцвал чи түүнтэй адилхан болсон биш гэж үү? Тэгвэл яагаад түүнд баярлах ёстой вэ? Боддоо, чи юу олж авах юм бэ? Энэ орчлон ертөнцөд алдахгүй бол олохгүй гэсэн зарчим байдаг, олбол алдана. Тэр хүн чамайг энгийн хүмүүсийн дунд их хэцүү байдалд оруулсан, тэгвэл

²⁰ А-Кю-Хятадын зохиолд гардаг тэнэг хүний дүр

тэр олсон талд тооцогдоно, тэр ялсан. Тэр чамайг их муулах тусам чи улам хэцүү байдлыг даан тэсвэрлэх хэрэгтэй болно, тэр илүү их буянаа алдана, энэ буян нь чамд бүгд ирнэ. Чи энэ бүгдийг тэвчихдээ магадгүй сэтгэлдээ үүнийг их хүндээр хүлээж аваагүй, юм санаагүй.

Энэ орчлон ертөнцөд бас нэг зарчим байдаг: Чи маш их зовлон даасан бол чиний нүгэл бас хувирах болно. Яагаад гэвэл чи зовлон давсан, хэдий их хэмжээгээр даана төдий чинээгээр хувирна, бүгд буянаар хувирна. Энэ буян бол бясалгагч хүний хүсдэг зүйл биз дээ? Чиний нүгэл бас арилсан учраас чамд хоёр талын ашигтай боллоо. Тэр чамд ийм нэг байдал үүсгээгүй бол чи хаана очиж зан чанараа дээшлүүлэх юм? Чи ч сайн, би ч сайн эв найртай суугаад байвал гон дээш өсөх юм уу, тийм зүйл гэж байх юм уу? Тэр хүн энэ зөрчлийг бий болгосон нь чамд зан чанараа дээшлүүлэх боломж олгосон. Чи үүний дүнд өөрийнхөө зан чанарыг дээшлүүлж болно, чиний зан чанар дээшилсэн биш гэж үү? Чи гурван талын ашиг оллоо. Чи бясалгагч болохоор чиний зан чанар дээшлэхэд гон чинь бас өснө биз дээ? Чи нэг дор дөрвөн талын ашиг оллоо. Чи тэр хүнд баярлах ёсгүй гэж үү? Чи түүнд чин сэтгэлээсээ талархах хэрэгтэй, үнэндээ бол ийм л юм.

Мэдээж түүнээс гарсан сэтгэл нь муу, эс бөгөөс чамд буянаа өгөхгүй, гэхдээ тэр үнэндээ чиний зан чанарыг дээшлүүлэх боломж бий болгосон. Өөрөөр хэлбэл, бид заавал зан чанараа бясалгахыг чухалд үзэх ёстой, зан чанараа бясалгахад нүгэл хамт арилж буян болж хувирна, тэгээд чиний түвшин дээшилнэ, ийм харилцан уялдаатай юм. Дээд түвшнээс харахад энэ зарчмууд өөр байдаг. Энгийн хүн энэ зүйлийг ойлгож чадахгүй, чи дээд түвшнээс энэ зарчмыг харахад бүгд өөр байдаг. Энгийн хүмүүсийн дунд чи энэ зарчмыг зөв гэж үзэхэд, үнэндээ зөв биш.

Зөвхөн дээд түвшнээс харсан нь жинхэнэ зөв юм, үргэлж ийм байдаг.

Би та бүгдэд энэ зарчмыг тодорхой ярилаа, үүнээс хойш хүн бүр өөрийгээ бясалгагч гэж үзэн тууштай бясалгахыг чинь хүсч байна, яагаад гэвэл ийм л зарчимтай. Энгийн хүний дунд амьдарч байгаа болохоор магадгүй зарим хүн энгийн хүний материаллаг бодит ашгийг хараад үүнийг л илүүд үздэг. Энгийн хүний урсгал дунд тэр өөрийгөө дээд шалгуурын дагуу шаардаж чадахгүй. Үнэндээ, энгийн хүмүүсийн дунд сайн хүн байхын тулд баатар гарамгай хүмүүсээс үлгэр дууриал авч болно гэхдээ тэд жирийн хүмүүсийн л үлгэр дууриалал юм. Хэрэв чи бясалгагч болохыг хүсч байвал сэтгэлээ яаж бясалгахаас шалтгаална, чиний ухамсраас шалтгаална, ямар ч үлгэр дууриал гэж байхгүй. Ашгүй бид өнөөдөр Дафа-г нийтэд ярилаа. Урьд өмнө чи бясалгахыг хүссэн ч заах хүн байгаагүй. Чи Дафа-гийн дагуу хийвэл магадгүй илүү сайн хийнэ, бясалгаж чадах, чадахгүй нь, болох болохгүй нь, ямар түвшинд хүрэх нь бүгд өөрөөс чинь шалтгаална.

Мэдээж, нүгэл хувирах хэлбэр нь миний сая ярьсантай дандаа адил байхгүй, мөн өөр байдлаар бас илэрдэг. Нийгэмд болон гэр бүлд бүгдэд илэрдэг. Гудамжинд явж байхад эсвэл нийгмийн өөр орчин дунд магадгүй төвөгтэй асуудалтай тулгардаг. Чамаар энгийн хүний дунд салж чадахгүй байгаа зууралдсан сэтгэлийг чинь бүгдийг нь хаяулна. Чамд ямар л зууралдсан сэтгэл байна бүгдийг нь янз бүрийн орчинд шаталж байхгүй болгоно. Чамайг бүдрүүлнэ унагана, ийм байдалд ухамсарлуулна. Ингэж л бясалгаж давна.

Нилээд түгээмэл гардаг ийм нэг байдал байдаг: Бясалгалын явцад ер нь чамайг чигоноор хичээллэхэд эхнэр чинь юмуу нөхөр чинь их дургүй байдаг, та нарын олон хүн

ийм байдал гарахыг үзнэ. Чамайг чийгон дасгал хийж эхлэнгүүт л чамтай хэрэлдэнэ. Чи өөр зүйл хийж байвал тэр тоохгүй. Маажон²¹ тоглоод их цагаа үрсэн ч тэр дургуй байж магад гэхдээ чамайг чийгон-оор хичээллэхэд чинь уурладаг шиг байхгүй. Чи чийгон дасгал хийхэд түүнийг үймүүлэхгүй, биеэ сайжруулахын тулд хийж байгаа, уг нь сайн зүйл, чи түүнд садаа ч болохгүй. Гэхдээ чамайг чийгон дасгал хийж эхэлхэд тэр хэрэлдэнэ чам руу юм шидэлнэ. Зарим хосууд бясалгал хийснээс болж хэрэлдээд гэр бүл салахдаа хүрдэг. Үүнийг олон хүн бодож үзээгүй, яагаад ийм асуудал гардаг вэ? Өнгөрсөн хойно нь чи түүнээс намайг чийгон дасгал хийхэд яагаад тэгж их уурладаг юм бэ? гэж асуухад тэр юу ч хэлж чадахгүй, үнэхээр хэлэх үг байхгүй. “Тийм ээ, надад тэгж уурлах хэрэг байгаагүй, би тэр үед л тэгж их уурлачихлаа”. Үнэндээ ямар учиртай вэ? Түүнчлэн бясалгал хийхэд нүгэл бас хувирдаг, алдахгүй бол олохгүй, чиний алдсан нь муу зүйл, чи ямар нэгэн зүйл өгөх ёстой.

Магадгүй чамайг дөнгөж гэрийнхээ үүдээр орж ирэнгүүт нөхөр чинь эсвэл эхнэр чинь чам руу нүүр нүдгүй дайрна. Хэрэв чи үүнийг тэвчиж өнгөрөөвөл чиний өнөөдрийн бясалгал талаар болохгүй. Бясалгал хийхэд буянг чухалчлах ёстой гэдгийг зарим хүн бас мэднэ. Тиймээс тэр жирийн үед ханьтайгаа гол төлөв эвтэй байдаг. Тэр ингэж бодно, ер нь намайг юм хэлэхэд тэр эсэргүүцдэггүй байсан харин өнөөдөр толгой дээр гарч байна. Тэр уураа барьж чадахгүй хэрэлдэж эхэлнэ. Ингэснээр өнөөдрийн бясалгал үр дүнгүй болно. Яагаад гэвэл нүгэл тэнд байна, тэр чамд үүнийг арилгахад туслах гэхэд чи хүлээж аваагүй, харин түүнтэй хэрэлдсэн, тиймээс нүгэл арилахгүй. Иймэрхүү байдал их гардаг, манай олон сурагчдад тохиолдож байсан, яагаад ийм байдал гарч байгааг бодож үзээгүй. Чамайг өөр зүйл хийж

²¹ Маажон-Хятадын уламжлалт 4 хүний хөлгөн тоглоом

байхад тэр тоохгүй. Чийгон-оор хичээллэх нь үнэндээ сайн хэрэг гэхдээ тэр чамайг үргэлж тайван байлгахгүй. Тэр үнэндээ чамд нүглийг чинь арилгахад тусалж байгаа, гэхдээ тэр өөрөө мэдэхгүй. Тэр зөвхөн гаднаа чамд уурлаад дотроо чамд сайн хэвээр байгаа юм биш, энэ нь тийм биш. Тэр үнэн сэтгэлээсээ чамд уурлаж байгаа юм. Яагаад гэвэл нүгэл хэн дээр бууна түүнд таагүй болно, ийм байх нь лавтай.

Зан чанараа дээшлүүлэх

Урьд их олон хүн зан чанараа барьж чаддаггүй байснаас маш их асуудал гардаг байсан, тодорхой нэг түвшинд хүрсний дараа дээш ахиж чадахгүй болдог. Зарим хүний зан чанар угаасаа сайн байдаг, бясалгалын явцад гэнэт Тэнгэрийн мэлмий нээгдэж ямар нэг хэмжээнд хүрдэг. Яагаад гэвэл энэ хүний төрөлхийн суурь нь нилээд сайн, зан чанар нь өндөр учраас түүний гон хурдан дээшилдэг. Түүний гон зан чанарын түвшинд хүрэхэд гон-ы өндөр бас тэр өндөрт хүрнэ. Хэрэв тэр өөрийнхөө гон-ыг улам дээшлүүлэхийг хүсвэл зөрчил бас улам хурцдана, зан чанараа улам сайжруулах шаардлагатай болдог. Ялангуяа төрөлхийн суурь сайтай хүн өөрийнхөө гон-ыг сайн өсч байгааг болон бясалгал ч нэлээд сайн болж байгааг мэдэрдэг, тэгтэл яагаад ийм их асуудалтай тулгарав? Бүх юм бүтэхээ болино, хүмүүс түүнд сайн хандахгүй болсон, мөн дарга нь бас түүнийг үнэлэхээ больсон, гэр бүлийн байдал гэнэт хурцадсан. Яагаад гэнэт ийм их асуудал гарах болов? Тэр өөрөө үүний учрыг ухамсарлаж чадахгүй. Яагаад гэвэл тэр төрөлхийн сайн суурьтай байсан учраас тухайн нэг түвшинд хүрсэн, тэгээд ийм байдал гарах болсон. Гэхдээ энэ нь яаж бясалгагч хүний гэгээрэлд хүрэх эцсийн шалгуур болж чадах юм? Энэ нь бясалгалын эцэст хүрэхээс хаа ч байсан юм! Чи үргэлж өөрийгөө дээшлүүлэх ёстой. Чи бага зэрэг төрөлхийн сайн сууриныхаа хүчинд

ийм хэмжээнд хүрсэн. Цаашид улам дээшлэх гэвэл тавигдах шалгуур нь бас дээшлэх ёстой.

Зарим хүн ингэж ярьдаг: Би ахиухан шиг мөнгөтэй болж гэрийнхнийгээ сайн төвхнүүлчихээд дараа нь санаа зовох юмгүй бясалгана. Үүнийг би чиний хийсвэр мөрөөдөл гэнэ, чи өөр хүний амьдралд оролцох боломжгүй, өөрийнхөө эхнэр хүүхэд, эцэг эх, ах дүү нарын болон бусад хүмүүсийн хувь тавиланг өөрчилж чадахгүй, чиний санаснаар болох юм уу? Түүнчлэн хэрэв чамд хойшдын ямар ч зовох зүйл, бэрхшээл байхгүй бол чи яаж бясалгах юм? Чи дасгалаа таатай, амар тайван хиймээр байна уу? Тийм зүйл гэж хаана байх юм? Энэ бол чиний энгийн хүний байрь сууринаас харж байгаа бодол.

Саад бэрхшээлийн дунд бясалгах ёстой, тэгснээр чамайг хүний янз бүрийн хүсэл, сэтгэлээ орхиж чадах эсэх, даруу харж чадах үгүйг чинь харна. Хэрэв чи эдгээр зүйлд зууралдаад байвал бясалгаад амжилтанд хүрч чадахгүй. Бүх зүйлд учир шалтгааны холбоо байдаг. Хүн яагаад хүн байж чадаж байгаа вэ? Яагаад гэвэл хүнд сэтгэл байдаг, хүн үүний төлөө амьдарч байдаг, төрөл садны сэтгэл, эр эм хоорондын сэтгэл, эцэг эхийн сэтгэл, сэтгэл хөдлөл, найрсаг сэтгэл, юм хийхэд найз нөхөрлөл харах, мөн бусад бүх зүйлс сэтгэлтэй холбоотой. Юу хийх дуртай дургүй нь, баяр ба гуниг нь, хайр ба занал, бүхэл хүн төрөлхтний нийгэмд болдог бүх зүйлс энэ сэтгэлээс үүддэг. Энэ сэтгэлийг орхихгүй бол чи бясалгаж чадахгүй. Алив хүн энэ сэтгэлээс чөлөөлөгдөж чадвал хэн ч чамайг хөдөлгөж чадахгүй. Энгийн хүний сэтгэл чамд нөлөөлж чадахгүй. Үүний оронд гарч ирэх зүйл бол энэрэнгүй сэтгэл, энэ нь эрхэм дээд зүйл юм. Мэдээж гэнэт энэ сэтгэлийг орхиход тийм амар биш. Бясалгал бол урт удаан явцтай, аажмаар өөрийн зууралдсан сэтгэлийг орхих явц юм. Гэхдээ чи өөртөө хатуу шаардлагатай байх ёстой.

Бясалгаж байгаа бидний хувьд зөрчил гэнэт гарна. Яах ёстой вэ? Чи үргэлж нинжин, энэрэнгүй сэтгэлтэй байхад бэрхшээлтэй тулгарах үед чи гайгүй давж чадна, яагаад гэвэл энэ нь чамд асуудлыг зөөлрүүлэх боломж олгоно. Чи үргэлж энэрэнгүй сэтгэлтэй, хүнд сайхан сэтгэлээр хандаж, ямарваа нэгэн юм хийхдээ үргэлж бусдыг эхлээд боддог, ямар нэгэн асуудал гарахад эхлээд энэ хэргийг бусад хүн хүлээж авч чадах эсэхийг, хэн нэгэнд хохирол учруулахгүй байх эсэхийг бодож үзэж бай. Ийм байвал асуудал гарахгүй. Иймээс чи бясалгахдаа дээд шалгуурын дагуу өөрийгөө шаард, бүр дээд шалгуурын дагуу өөрийгөө шаард.

Зарим хүн ер ухамсарладаггүй. Зарим нэг хүний Тэнгэрийн мэлмий нээгдэхэд Будда-г хардаг, гэртээ хариад Буддад залбирахдаа: Чи яагаад намайг харж хандахгүй байгаа юм бэ? Надад энэ бэрхшээлтэй асуудлыг шийдэж өгч туслаач. Будда мэдээж шийдэж өгөхгүй, энэ бэрхшээлтэй асуудлыг тэр бэлдсэн, зорилго нь бол чиний зан чанарыг дээшлүүлэх, зөрчлийн дунд чамайг дээшлүүлэх юм. Тэр чамд шийдэж өгөх юм уу? Угтаа чамд шийдвэрлэж өгөхгүй. Хэрэв тэр энэ бүгдийг чамд хийж өгвөл чи яаж гон-оо өсгөх юм, яаж зан чанар мөн түвшнээ дээшлүүлэх юм? Чиний гон-ыг өсгөх нь хамгийн чухал юм. Аугаа гэгээрэгчдийн хувьд хүн болж амьдрах нь хүний гол зорилго биш, хүний амь бол хүн байхын тулд биш харин чамайг буцаахын тулд юм гэж үздэг. Хүн хэр их зовлон амссан ч, гэгээрэгчид үүнийг их зовлон туулах тусмаа сайн, өрөө хурдан төлнө гэж үздэг. Тэд ингэж боддог. Зарим хүн үүнийг ухамсарлахгүй, тэгээд залбирал нь бүтэхгүй болохоор Буддад гомдол мэдүүлнэ: Яагаад надад туслахгүй байгаа юм бэ? Би өдөр болгон чамд хүж бариад мөргөдөг. Үүнээс болж зарим хүн Буддын хөргийг газар чулуудсан, үүнээс хойш Буддаг буруутгаж загнадаг болсон. Ингэж буруутгаж загнаснаас болоод түүний зан чанар унасан, бас гон-нь байхгүй болсон. Тэр бүх зүйл байхгүй болсныг

мэдээд Будда түүнийг хохироосон гэж үзэн Буддаг улам занана. Тэр энгийн хүний ёсоор Буддын зан чанарыг цэгнэсэн, яаж тэгж харьцуулж болох юм? Тэр дээд түвшиний зүйлийг энгийн хүний шалгуураар авч үзэж болох юм уу? Иймээс хүмүүс өөрийн амьдрал дахь зовлон зүдгүүрийг шударга бус байна гэж үздэг. Маш олон хүн ингэж доош унадаг.

Өмнө нь их олон том чигон багш, их нэр цуутай багш нар хүртэл доош унасан. Мэдээж жинхэнэ чигон багш нар өөрсдийнхөө түүхийн үүргийг гүйцэтгээд буцсан. Зөвхөн зарим нь энгийн хүний дунд төөрөлдөж зан чанар нь унасан. Тэдгээр нь хүмүүсийн дунд одоог хүртэл идэвхитэй хэвээр байдаг боловч тэдэнд аль хэдийн гон байхгүй болсон. Урьд нэрд гарч байсан цөөн хэдэн чигон багш одоо ч нийгэмд идэвхтэй хэвээр байгаа. Багш нь түүнийг энгийн хүмүүсийн дунд унасан, алдар нэр, хувийн ашиг сонирхолд автаж түүнээс салах найдваргүй болсон, аль хэдийн болохгүй болсныг нь хараад түүний дэд сүнснийг дагуулаад явсан. Бүх гон-нь дэд сүнсний бие дээр байдаг. Иймэрхүү жишээ олон бий.

Манай энэ номын бясалгалд ийм тохиолдлууд харьцангуй бага байдаг. Байсан ч мэдэгдэхүйц хэмжээнд биш. Зан чанар дээшлүүлэх тал дээр бол маш олон гайхалтай жишээнүүд байдаг. Шандун мужийн нэг хотод нэхмэлийн үйлдвэрт ажилладаг нэг сурагч Фалунь Дафагаар хичээллэж эхэлсний дараа ажлынхандаа бас бясалгал заасан. Үүний үр дүнд үйлдвэрийн байдалд шинэ хандлага гарсан. Тэр өмнө нь нэхмэлийн үйлдвэрийн үлдэгдэл алчуураас гэрлүүгээ авч явдаг байсан, бусад ажилчид ч бас авдаг байсан, бясалгаж эхэлсний дараа гэр лүүгээ юм зөөхөө больсон төдийгүй урьд нь гэртээ аваачсан зүйлээ буцааж үйлдвэртээ авчирсан. Бусад нь түүний энэ байдлыг хараад хэн ч гэр лүүгээ юм авч явахаа больсон. Зарим ажилчид

өөрсдийнхөө урьд нь авсан зүйлүүдийг үйлдвэртээ бас буцааж авчирч өгсөн. Үйлдвэр даяар ийм байдал гарсан.

Нэг хотын Дафа-гийн дадлагажуулах төвийн зааварлагч нэгэн үйлдвэрийн Фалунь Дафагийн сурагчдын бясалгалын байдалтай танилцахаар очсон, үйлдвэрийн дарга нь биечлэн түүнийг хүлээн авч уулзаад: “Эдгээр ажилчид танай Фалунь Дафагаар хичээллэж эхэлснээс хойш ажилдаа эрт ирж орой буудаг болсон. Тэд их идэвхи зүтгэлтэй ажиллаж, өгсөн ямар ч үүрэг даалгаврыг ялгалгүй биелүүлдэг, бас хувийн ашгин дээр тэмцэлдэхээ больсон. Ингэж ажиллах болсноор тэд бүх үйлдвэрийн нүүр царайг өөрчилсөн, мөн үйлдвэрийн эдийн засгийн үр ашиг сайжирсан. Та нарын энэ бясалгал ямар хүчирхэг юм, танай багш хэзээ ирэх юм бэ? Би бас лекцэнд нь суумаар байна”. Манай Фалунь Дафа бясалгалын гол зорилго бол хүмүүсийг дээд түвшин лүү дагуулах юм. Ийм зүйл хийх зорилго тавиагүй ч гэсэн нийгэм дэх соён гэгээрэлд маш том нөлөө үзүүлдэг. Хэрэв хүн болгон дутагдлаа өөрөөсөө хайж, хүн болгон хэрхэн сайн хийхийг хичээвээс, нийгмийн байдал тогтворжиж хүн төрөлхтний ёс суртахуун буцаад дээшилнэ гэж би хэлнэ.

Би Тайюань хотод Ном ярьж бясалгал заах үед нэг тавь гаруй настай сурагч нөхөртэйгөө лекцэнд сууж байсан. Тэднийг замаар гарч байхад нэг машин их хурдтай зөрөхдөө хажуугийн толиороо эмэгтэйн хувцаснаас гогдсон. Түүний хувцас машинд татагдаад тэр арав гаруй метр хол чирүүлээд газарт унасан. Машин хориод метр явж байж зогссон. Жолооч нь машинаасаа бууж ирээд ууртайгаар ингэж хэлсэн: “Хөөе, чи замаа харж явахад яадаг юм”. Одоо үед хүмүүс ийм болсон, асуудал гарахад өөрийнх нь буруу байсан ч, байгаагүй ч хамгийн түрүүнд хариуцлагаас зайлсхийхээ боддог. Машин дотор явсан хүн, гэмтэж үү үгүй юу хараадах, эмнэлэгт хүргэж өгье гэсэн. Жолооч дөнгөж ухаарч яаран асуусан: “Яаж байна, эгч ээ? Та

гэмтсэн үү? Эмнэлэгт очиж үзүүлье”. Тэр сурагч аажуухан босч ирээд: Зүгээрээ, та нар яв даа гээд шороогоо гөвчихөөд нөхрийгөө сугадаад явсан.

Тэр лекцэнд орж ирээд надад энэ болсон явдлаа ярихад би ч баярласан. Манай сурагчдын зан чанар үнэхээр дээшилсэн байна. Тэр надад: Багшаа, би одоо Фалунь Дафагаар хичээллэж байна. Хэрэв би Фалунь Дафагаар бясалгадаггүй байсан бол өнөөдрийн осолд ингэж хандахгүй байсан гэж хэлсэн. Та бүгд боддоо, тэтгэвэрт гарсан хүн, одоогийн юмны үнэ ийм өндөр, ямар ч асрамж хангамж байхгүй болсон, тавь гаруй настай хүн машинд ийм хол чирүүлээд газарт ойчсон. Гэмтэх байсан уу? Хаа сайгүй гэмтэнэ, тэр газар хэвтээд босч ирэхгүй байх байсан. Эмнэлэгт очих уу? Тэгье. Эмнэлэгт очиж хэвтээд гарахгүй байж мэдэх байсан. Энгийн хүн бол магадгүй тэгнэ. Гэхдээ тэр бол бясаллагч учраас тэгээгүй. Бид, сайн муу үр дагавар гарах нь хүний анхны бодлоос шалтгаалдаг гэж ярьсан. Тухайн үед гарсан бодол нь өөр өөр үр дагавар дагуулдаг. Тийм настай хүн, энгийн хүн байсан бол яаж гэмтэхгүй байх юм? Гэхдээ түүний арьс нь ч шалбараагүй. Сайн муу үр дагавар гарах нь бодлоос шалтгаалдаг. Хэрэв тэр тэнд хэвтчихээд: Ёо ёо, би болохоо байчихлаа, энд ч болохгүй байна, тэнд ч өвдөөд байна гэсэн бол магадгүй түүний шөрмөс нь тасарч яс нь хугарч мөн саа ч тусч болох байсан. Түүнд хэр их мөнгө төлсөн ч эмнэлэгт хэвтээд үлдсэн насандаа босч ирж чадахгүй, яаж тааламжтай байх юм? Хажуугийн харж байсан хүмүүс хүртэл тэр настай эмэгтэйг жолоочоос мөнгө нэхээгүйд гайхаж байсан. Одоогийн хүмүүсийн ёс суртахууны хэм хэмжээ доройтсон. Жолооч их хурдтай явж байсан ч санаатайгаар хүн шүргэе гэж бодох уу? Тэр санамсаргүйгээр хийсэн биш гэж үү? Харин одоогийн хүмүүс ийм л болсон. Түүнээс мөнгө нэхэхгүй бол харж байсан хүмүүсийн сэтгэл нь тайван биш. Би одоогийн хүмүүс сайн мууг ялгаж чадахаа больсон гэж хэлсэн, нэг нь

нөгөөдөө чи муу юм хийж байна гэж хэлбэл тэр итгэхгүй. Яагаад гэвэл хүний ёс суртахууны шалгуур өөрчлөгдсөн, зарим хүн хувийн ашиг сонирхлын хойноос л хөөцөлдөнө, мөнгө олж л байвал ямар зүйлийг ч хийнэ. “Хүн өөрийнхөө төлөө байхгүй бол, тэнгэр газар ч өршөөхгүй”-гэдэг үгийг мөрдлөгөө болгосон.

Бээжингийн нэг сурагч оройн хоолныхоо дараа хүүхдээ дагуулаад Чианмэнь гэдэг газар луу салхинд алхахаар гарсан, тэнд нэгэн худалдааны машинаас хонжворт сугалаа зарлаж байхыг харсан. Хүүхэд нь сониучирхан сугалаа авъя гэж гуйсан. Тэр хүүхэддээ нэг юань өгөөд сугалаа сугалуулсан, тэгтэл хоёрдугаар зэргийн хонжвор нь таарч хүүхдийн тансаг унадаг дугуй хожсон. Хүүхэд нь маш их хөөртэй байсан. Аавынх нь толгойд гэнэт нэгэн бодол зурсхийн орж ирсэн, би бясалгагч хүн, яаж ийм зүйлийг авч болох юм? Хэрэв би мөнгий нь төлөхгүйгээр зүгээр юм авбал хариуд нь хэр их буянаа өгөх вэ? Хүүхэддээ тэр хэлсэн: Үүнийг авахаа больё. Чи авмаар байвал бид өөрсдөө худалдаж авъя. Хүүхэд нь ундуйцан, би таниар авахуулъя гэхэд та авч өгөөгүй. Одоо би өөрөө сугалаагаар хожиж байхад та намайг авахуулахгүй юм гэж уйлаад л бархираад болдоггүй, тэр аргаа бараад дугуйг гэр лүүгээ авч явсан. Гэртээ харьсаны дараа бодох тусам түүнд улам хэцүү санагдсан. Буцаж очоод мөнгийг тэр хүмүүст өгье гэж бодсон. Эргээд бодоход, хонжворын сугалаа ч дууссан, би мөнгө аваачиж өгвөл тэд өөрсдөө хуваагаад авчих юм биш үү? Би энэ мөнгийг ажлынхаа газартаа хандивласан нь дээр гэж бодсон.

Аз болоход түүний ажлын газарт Фалунь Дафагийн нилээд сурагчид байсан, дарга нь бас түүнийг ойлгоно. Хэрэв энэ нь нэг энгийн орчинд юмуу нэг жирийн ажлын газарт чи өөрийгөө бясалгадаг хүн гэж хэлээд сугалаагаар хожсон дугуйгаа зүгээр авахгүй, мөнгийг ажлын газартаа

хандивлая гэвэл дарга чинь хүртэл чамайг мэдрэл муутай юм уу гэж бодно. Бусад хүмүүс ч гэсэн шүүмжлэн ярилцана: Энэ хүн чигон-оор хичээллээд жоохон юмтай болсон юм бол уу, бясалгаад солирсон юм болов уу? Би ёс суртахууны хэм хэмжээ гажсан гэж хэлсэн. Тавь, жараад оны үед ийм явдал бол хачирхалтай санагдахгүй ердийн зүйл байхсан, хэн ч үүнд гайхахгүй.

Бид ингэж ярьдаг, хүн төрөлхтний ёс суртахуунд хэр их өөрчлөлт гарсан ч энэ орчлон ертөнцийн мөн чанар – Үнэн, Нинжин, Тэвчээр нь үүрд өөрчлөгдөхгүй. Зарим хүн чамайг сайн гэж хэлнэ, чи үнэндээ сайн биш байж болно, зарим хүн чамайг муу гэж хэлнэ, чи үнэндээ муу биш байж болно. Яагаад гэвэл сайн мууг цэгнэх шалгуур нь гажсан. Зөвхөн энэ орчлон ертөнцийн мөн чанартай нийцсэн бол, тэр сайн хүн. Энэ бол сайн муу хүнийг цэгнэх орчлон ертөнцөд хүлээн зөвшөөрөгдсөн цорын ганц шалгуур. Чи хүн төрөлхтний нийгэмд хэр том өөрчлөлт гарсныг нь битгий хар, хүн төрөлхтөний ёс суртахууны хэм хэмжээ их унасан, ёс суртахуун өдөр өдрөөр доройтож хувийн ашиг хонжоо хөөцөлдөх нь ганц тэмүүлдэг зүйл нь болсон, гэхдээ орчлон ертөнцийн өөрчлөлт нь хүн төрөлхтний өөрчлөлтийг дагаж өөрчлөгдөхгүй. Бясалгагч хүний хувьд энгийн хүний шалгуураар өөртөө хандаж болохгүй. Энгийн хүн энэ зүйлийг зөв гэхэд чи дагаж хийвэл болохгүй. Энгийн хүн сайн гэж хэлсэн зүйл нь магадгүй сайн биш, энгийн хүн муу гэж хэлсэн нь магадгүй муу биш. Ёс суртахууны шалгуур гажсан энэ үед нэг хүн муу зүйл хийхэд чи түүнд муу зүйл хийж байна гэж хэлбэл тэр ер үнэмшихгүй! Бясалгагч хүний хувьд орчлон ертөнцийн мөн чанарын дагуу цэгнэх ёстой, тэгвэл юу нь жинхэнэ сайн, юу нь жинхэнэ муу гэдгийг ялгаж чадна.

Энергиэр адислах

Бясалгагчдын хүрээнд ийм нэг байдал байдаг, үүнийг энергиэр адислах гэдэг. Энергиэр адислах бол Буддын Тантрын шашин дахь бясалгалын зан үйл юм. Зорилго нь энергийн адислалт хийлгэснээс хойш энэ хүн өөр номын бясалгалд орж болохгүй, энэ номын бясалгалын жинхэнэ шавь гэж хүлээн зөвшөөрөгдөнө. Одоо үүний гайхалтай нь юу болов? Шашны иймэрхүү зан үйл чигон бясалгалд бас гарч ирсэн. Энэ нь зөвхөн Тантрын шашинд хэрэглэгдээд зогсохгүй бас Дао-гийн бясалгалын аргад хийдэг болсон. Би хэлсэн, аливаа Тантрын шашны нэрээр нийгэмд зааж байгаа бясалгалууд нь бүгд хуурамч. Яагаад ингэж хэлж байгаа вэ? Яагаад гэвэл манай оронд Тан Тантрын шашин мянга гаруй жилийн өмнө байхгүй болсон, энэ нь бүрмөсөн оршихоо больсон, хэлний бэрхшээлээс болоод Түвдийн Тантрын шашин Хан газар нутагт бүрэн орж ирээгүй. Ялангуяа энэ бол нууц шашин учраас заавал хийдэд нууцаар бясалгана, мөн багш заавал нууцаар заах шаардлагатай, багш нь шавийг дагуулж нууцаар бясалгуулна. Ингэж хийхгүй бол хэрхэвч дэлгэрүүлж болохгүй.

Олон хүн Түвдэд ийм нэг зорилгоор чигон сурахаар очдог, тэд багш олохыг хүсдэг, ирээдүйд чигон багш болж нэрд гарах, баян болох зорилготой байдаг. Та бүгд боддоо, жинхэнэ уламжилж авсан гэгээнтэн лам их хүчтэй ер бусын чадвартай байдаг, чигон сурахаар ирсэн хүний бодлыг хараад л мэднэ. Тэр юуны тулд энд ирсэн бэ? Лам тэр хүний бодлыг уншаад дор нь мэдчихнэ. Энд ирэн бясалгал сурч гараад чигон багш болох, баян болох, нэрд гарах гэсэн хүсэл нь энэ номын үүдний Буддад бясалгах аргыг эвдэнэ. Буддад бясалгах ийм нарийн номын үүдний бясалгалыг чамайг хамаагүй чигон багш болгож, нэр ашиг хөөцөлдүүлж сүйтгэхийг зөвшөөрөх юм уу? Чи ямар санаатай байна вэ? Иймээс үндсэндээ түүнд заахгүй, жинхэнэ уламжлахгүй.

Мэдээж, сүм хийдүүд олон байгаа, магадгүй зарим нэг өнгөцхөн зүйлийг сурна. Хэрэв сэтгэл зөв биш байвал чигон багш болоод муу юм хийхэд биендээ сүнсийг даллаж ирүүлнэ. Шүглэсэн амьтад бас гон-той гэхдээ Тантрын шашных биш. Чин сэтгэлээсээ номын мөр хөөж Түвдэд очсон хүн магадгүй тэнд суурьшин үлдэнэ, энэ бол жинхэнэ бясалгадаг хүн.

Гайхалтай нь, одоо маш олон Дао-гийн бясалгалд бас энергиэр адислахыг ярьдаг болсон. Дао-гийн бясалгалд энерги судлаар явдаг, энергиэр адислалт хийх ямар хэрэг байна? Миний мэдэж байгаагаар, намайг өмнөд мужид бясалгал зааж байхад, ялангуяа Гуаньдунд нилээд олон, арав гаруй төрлийн замбараагүй бясалгалд энергийн адислалтыг ярьж байсан. Зорилго нь юу вэ? Тэр чамд энергийн адислал хийсэн, чи түүний шавь болно, өөр бясалгал сурч болохгүй, өөр бясалгал хийвэл тэр чамайг шийтгэнэ, тэр ийм л зүйл хийдэг. Энэ нь гаж буруу зүйл хийж байгаа биш гэж үү? Тэр зааж байгаа нь өвчин эдгээх, бие сайжруулах талын л зүйл, хүмүүс сураад эрүүл биетэй байхыг хүсдэг. Яагаад ингэж хийж байгаа вэ? Зарим хүн ингэж ярьдаг, түүний чигон-оор хичээллэх юм бол бусад бясалгалаар хичээллэж болохгүй гэдэг. Тэр хүнийг төгс аварч чадах юм уу? Хүмүүст саад болж байгаа юм биш үү? Маш олон хүн ингэж хийдэг.

Дао-гийн системд ийм зүйл ярьдаггүй, гэхдээ одоо бас энергийн адислал хийх явдал гарсан. Их сүр дуулиантайгаар энергийн адислал хийж байсан нэгэн чигон багшийн гон багана хэр өндөр байсан бэ? Ердөө хоёр гурван давхар байшингийн өндөртэй чацуу байсан, нилээд нэртэй том чигон багш, түүний гон нь унаад хөөрхийлэлтэй болсныг нь би харсан. Зуу зуун хүмүүс түүгээр энергийн адислал хийлгэхээр дараалан зогссон байсан. Түүний гон өгөгдсөн хэмжээтэй, өндөртэй, тэр гон нь тун удахгүй доош унана,

байхгүй болно, өөр юугаараа хүнд энергийн адислал хийх юм, хүмүүсийг тэр хуурч байгаа юм биш үү? Өөр орон зайд харахад жинхэнэ энергийн адислал нь хүний ясыг толгойноос хөл хүртэл цагаан хаш шиг болгодог. Энэ бол гон-оор буюу дээд энергийн бие бодиор хүний бие толгойноос хөл хүртлээ ариусгагдаж байгаа юм. Энэ чигон багш үүнийг хийж чадах юм уу? Тэр хийж чадахгүй. Тэр юу хийж байгаа вэ? Мэдээж тэр шашны зүйл хийж байгаа юм биш, зорилго нь түүний чигон-ыг сурсан хүнийг өөрийн болгоход юм, чи түүний ангид орж түүний зүйлийг сурна. Зорилго нь чиний мөнгийг авахад юм, хэн ч түүний зүйлийг сурахгүй бол тэр мөнгө олж чадахгүй.

Фалунь Дафагийн шавь нарт бусад Буддын бясалгалын шавь нартай адил, их багш олон удаа энергийн адислал өгдөг, гэхдээ чамд мэдүүлэхгүй. Ер бусын чадвартай хүн магадгүй мэдэрнэ, эсвэл мэдрэмтгий хүн бас мэдэрч болно. Унтаж байхад юмуу эсвэл ямар нэгэн үед гэнэт халуун урсгал толгойноос доош бүх биеэр нэвтэрдэг. Энергийн адислал хийх зорилго нь чамд өндөр гон өгөхөд биш, гон чиний өөрийн бясалгалаар гардаг. Энергийн адислал бол эрчимжүүлэх арга юм, энэ бол чиний биеийг ариусгана, улам цэвэршүүлнэ. Олон удаа энергийн адислал хийгдэх болно, чиний биеийг түвшин болгонд цэвэршүүлж өгнө. Яагаад гэвэл бясалгал өөрөөс чинь шалтгаална, гон багшаас шалтгаална, иймээс бид энергиэр адислах зан үйл хийдэггүй.

Зарим хүн бас багшид шавь орох зан үйл хийдэг. Үүнээс үүдээд би нэг зүйлийг хэлмээр байна. Олон хүн намайг багшаа болгох гэж энэ зан үйл, барилдлага хийхийг хүсдэг. Бидний түүхийн энэ үе бол Хятадын феодалын нийгэмтэй адилгүй. Сөгдөж мөргөснөөр хэн нэгнийг багшаа болгох гэж үү? Бид ийм зан үйл хийдэггүй. Олон хүн ингэж боддог, би хүж бариад Буддад мөргөж сэтгэлдээ сүжигтэй байвал

миний гон өснө. Надад энэ бол их инээдтэй. Жинхэнэ бясалгал бол өөрөө яаж бясалгахаас шалтгаална, юу ч хүсээд нэмэргүй. Чи заавал Буддад мөргөж, хүж барихгүй байсан ч жинхэнэ бясалгагч хүний шалгуурын дагуу бясалгавал Будда чамайг хараад баяртай байх болно. Хэрэв чи гараад л элдэв янзын муу зүйл хийгээд байвал, чи түүнд хүж бариад мөргөсөн ч тэр чамайг харах ч дургуй, ийм биш гэж үү? Жинхэнэ бясалгал бол өөрөөс хамаарна. Өнөөдөр чи багшид мөргөж шавь орох зан үйл хийсэн, гэхдээ үүдээр гараад өөрийнхөө юу хүссэнээ хийх юм бол ямар хэрэг байх юм? Бид ийм зан үйл огт ярихгүй. Чи миний нэр хүндийг ч гутааж магадгүй!

Бид та бүгдэд ийм их зүйл өгч байгаа, та бүхэн жинхэнэ бясалгавал, Дафа-гаар өөрийгөө хатуу шаардаж байвал би чамд шавиа гэж хандана, чи зөвхөн Фалунь Дафа бясалгана гэвэл бид чамайг шавиа гэж дагуулна. Хэрэв чи бясалгахгүй бол бид чамд юу ч хийж өгч чадахгүй. Чи бясалгахгүй бол энэ нэрийг зүүгээд ямар хэрэгтэй юм? Чи эхний ээлжийн сурагч ч бай, хоёрдугаар ээлжийн сурагч ч байсан зөвхөн энэ дасгалын хөдөлгөөнийг хийгээд бидний шавь гэж ярьж болох юм уу? Чи бидний энэ зан чанарын шалгуурын дагуу жинхэнэ бясалгавал эрүүл биетэй болох ба жинхэнэ дээд түвшин лүү явах болно. Иймээс бид тэдгээр зан үйл ярихгүй. Чи бясалгах юм бол манай номын бясалгалын хүн. Миний номын бие бүхнийг мэднэ, тэд чиний бодолд юу байгааг мэднэ, тэд юуг ч хийж чадна. Чи бясалгахгүй бол тэр чамайг хариуцахгүй, чи бясалгана гэвэл чамд эцэст нь хүртэл тусална.

Зарим чигон бясалгалд багштайгаа уулзаагүй ч гэсэн тодорхой зүг рүү харж мөргөөд хэдэн зуун юань төлөхөд л хангалттай гэж ярьдаг. Энэ нь өөрийгөө болон бусдыг хуурч байгаа хэрэг биш үү? Мөн тэдгээр хүмүүс үүнээс хойш энэ бясалгал болон багшийгаа өмгөөлөн хамгаалахад маш

идэвхитэй болно. Тэд бас хүмүүст өөр бясалгалыг битгий сур гэж хэлнэ. Надад энэ бол тун инээдтэй. Зарим хүн бас адислал хийнэ. Түүний толгойд хүрэх нь ямар нөлөөтэй байх вэ дээ.

Тантризмын нэрээр бясалгалыг заан тарааж байгаа хүмүүс хуурамч төдийгүй бас Буддизмын нэрээр зааж байгаа бүх чигон бясалгалууд хуурамч. Та бүгд боддоо, хэдэн мянган жилийн туршид Буддын шашин дахь бясалгалын арга нь тодорхой хэдэн хэлбэртэй байсан. Хэрэв хэн нэгэн үүнийг өөрчилбөл Буддын шашин мөн юм уу? Буддад бясалгадаг бясалгалын арга бол маш нарийн, гүн бөгөөд гайхамшигтай, түүнийг жоохон л өөрчилбөл эмх замбараагүй болчихно. Яагаад гэвэл гон-ын хувирах явц нь маш нарийн байдаг, хүний мэдрэмж юу ч биш, мэдрэмжээр бясалгаж болохгүй. Лам хувраг нарт байх шашны хэлбэр нь бясалгалын арга юм, жоохон өөрчилбөл тэр номын үүдийн зүйл биш болно. Номын Үүд бүрийг хариуцсан нэг аугаа гэгээрэгч байдаг, тэгээд Ном болгонд олон аугаа гэгээрэгч бясалгаж гарсан, хэн ч тэр Номын үүдийн бясалгалын аргыг дураараа өөрчилж зүрхлэхгүй, харин нэг жижиг чигон багш ямар аугаа буянтай гэж багшийгаа мэхэлж Буддын бясалгалын аргыг өөрчилж зүрхлэх юм? Хэрэв үнэхээр өөрчилж болно гэвэл урьдын тэр Номын бясалгал хэвээрээ байх уу? Тиймээс хуурамч чигон-ыг ялгаж болно.

Шуангуаныг байршуулах

“Нууцлаг цэг байршуулах” (Шуангуань шөвэй) явцыг бас “Нууцлаг нэгэн цэг” (Шуангуань ичао) гэж нэрлэдэг. Эдгээр хэллэгийг “Үрлийн ном” (Данжин), “Дао-гийн жаяг” (Даозань), болон “Зан авир, амийг удирдах” (Шинминь

Гүйжи)²² гэсэн номнуудаас олж үзэж болно. Тэгвэл энэ нь юу гэсэн утгатай үг вэ? Олон чигон багш үүнийг тодорхой тайлбарлаж чаддаггүй. Яагаад гэвэл ердийн чигон багшийн түвшинд харах боломжгүй, бас түүнд харахыг ч зөвшөөрөхгүй. Бясалгагч хүн үүнийг харахыг хүсвэл билгийн мэлмийн дээд түвшинд болон түүнээс дээш түвшинд хүрсэн байх ёстой. Жирийн чигон багш энэ түвшинд хүрч чадахгүй, иймээс харж чадахгүй. Түүхийн туршид бясалгалын хүрээнд Шуангуань гэж юу вэ? Тэр Нэгэн цэг хаана байдаг вэ? Мөн яаж байршуулдаг талаар судалсаар ирсэн. “Үрлийн ном”, “Дао-гийн жаяг”, “Зан авир, амийг удирдах” номуудад үүний талаар бүгд онолын хүрээнд яригддаг, харин чамд бодит үнэнийг хэлэхгүй. Янз бүрээр тайлбарлаад чиний толгойг эргүүлнэ. Тэнд тодорхой тайлбарладаггүй, яагаад гэвэл энэ зүйлийг энгийн хүнд мэдэгдэж болохгүй.

Түүнээс гадна, та нар Фалунь Дафагийн шавь учраас би та бүхэнд үүнийг хэлье: Тэдгээр замбараагүй чигон номнуудыг хэзээ ч битгий унш, би дээр дурьдсан эртний номнуудыг ярьж байгаа юм биш, харин одоогийн хүмүүсийн бичсэн хуурамч чигон номнуудыг хэлж байна. Чи сөхөж үзсэний ч хэрэггүй. Чиний бодолд: За, энэ үг нь зүйтэй юм гэсэн бодол гарангуут л номонд шүглэсэн сүнс эсвэл амьтан чиний биенд асна. Маш олон ном шүглэсэн сүнс, амьтнаар хүний нэр, ашгийн сэтгэлийг захиран бичигдсэн байдаг. Хуурамч чигон номнууд зөндөө байдаг, маш олон. Их олон хүн хариуцлагагүй ханддаг, зарим нь шүглэсэн сүнс болон замбараагүй зүйлүүдийн тухай бичдэг. Ер нь дээр дурьдсан эртний хэдэн номнуудыг, мөн бусад эртний бясалгалтай холбоотой номнуудыг уншихгүй байсан

²² Данжин, Даозань, Шинминь Гүйжи-Хятадын эртний бясалгалын судрууд

нь дээр, энд нэг л бясалгалдаа тууштай байх асуудал байдаг.

Хятадын чигон нийгэмлэгийн нэг удирдагчийн надад ярьсан зүйл үнэхээр инээд хүргэсэн. Бээжинд чигон-ы хичээлд байнга суудаг нэг хүн байсан. Тэр их олон лекцэнд суусны дараа чигон-ыг түүний сонссон зүйлээс хэтрэхгүй гэж бодсон. Яагаад гэвэл бүгд нэг түвшнийх байсан учраас ижил зүйлүүдийг л ярьдаг. Тэр бусад хуурамч чигон багш нартай адил, чигон-ы агуулга нь эдгээр зүйл л гэж үзсэн! Тэгээд тэр чигон-ы талаар мөн ном бичье гэж бодсон. Та бүгд боддоо, бясалгадаггүй хүн чигон-ы ном бичнэ гэнэ. Одоогийн чигон номнууд бол нэг нь нөгөөгөөс хуулж бичигдсэн. Тэр бичиж байгаад Шуангуаны асуудалд хүрээд гацсан. Шуангуань гэж юу болохыг хэн ойлгох юм? Жинхэнэ чигон багш нараас ч ойлгодог хүн ховор. Тэр нэгэн хуурамч чигон багшаас очиж асуусан. Тэр түүнийг хуурамч гэж мэдээгүй, өөрөө ч чигон-ыг ямар ойлгодог биш. Хэрэв тэр хуурамч чигон багш асуултанд хариулахгүй бол хүмүүс түүнийг хуурамч гэдгийг мэдчихнэ биз дээ? Иймээс тэр санаанаасаа зохиож, “Шуангуань нэгэн цэг” бол эр хүний бэлэг эрхтэний үзүүрт байдаг гэж хэлсэн. Сонсоход их инээдтэй. Инээгээд яахав, энэ ном нь хэвлэгдээд аль хэдийн нийтийн дунд гарчихсан. Өөрөөр хэлбэл одоогийн чигон номнууд ийм инээдтэй хэмжээнд хүрсэн. Ийм номнуудыг унших чамд ямар хэрэгтэй юм. Ямар ч хэрэг байхгүй, зөвхөн л хүнд гай болно.

Шуангуань байршил гэж юу вэ? Хүн Гурамсан Ертөнцийн Номын бясалгалд, дунд түвшнээс дээш гарахад, өөрөөр хэлбэл Гурамсан ертөнцийн дээд түвшинд бясалгахад хүний биед Мөнхийн нярай хүүхэд (Юан-инь) бүрдэж эхэлнэ. Мөнхийн нярай хүүхэд болон бидний ярьсан Бясалгасан нярай хүүхэд (Инь-хай) бол хоёр өөр зүйл. Бясалгасан нярай хүүхэд бол бяцхан, мөн их хөдөлгөөнтэй,

дүрсгүй. Мөнхийн нярай хүүхэд бол хөдөлдөггүй, эзэн сүнс нь түүнийг удирдахгүй бол тэр хөлөө завилаастай, гарын мутарын барилтай (Жэ-инь) лянхуа цэцгэн дээр хөдөлгөөнгүй сууна. Мөнхийн нярай даньтиан (үрлийн талбай)-д үүсдэг, маш өчүүхэн байхад, зүүний үзээрээс ч бага хэмжээтэй байхад тэр харагддаг.

Тэрнээс гадна нэг асуудлыг тодруулах хэрэгтэй. Жинхэнэ даньтиан нэг л байдаг, тэр нь хэвлийд байдаг. Энэ бол хуйен²³ цэгээс дээхнэ хүний биеийн дотор, хэвлийн доохно байдаг тиан (талбай) юм. Маш олон гон, ер бусын чадварууд, арга увидас, Фашэнь (Номын бие) болон Мөнхийн нярай хүүхэд, Бясалгасан нярай хүүхэд, мөн маш олон амь бодь бүгд энэ талбайгаас үүсдэг.

Урьд өмнө зарим бясалгагч дээд даньтиан, дунд даньтиан, доод даньтиан гэж ярьдаг байсан. Энэ бол буруу. Зарим хүн тэдний багш нь олон үе дамжин ингэж заадаг байсан, номон дээр ингэж бичсэн байдаг гэдэг. Би та нарт хэлэхэд, эртний үед ч гэсэн хаях хэрэггүй зүйлс байсан. Чи хэр олон жилээр уламжлагдан ирснийг нь бүү хар, тэд магадгүй зөв биш. Дэлхийн зарим жижиг бясалгалын арга хүний нийгэмд үргэлж уламжлагдсаар ирсэн, гэхдээ түүгээр бясалгаж чадахгүй, тэр юу ч биш. Тэд дээд, дунд, доод даньтиан гэж ярьдаг, тэднийхээр бол дань (үрэл) үүсдэг газрыг даньтиан гэж үздэг. Энэ нь инээдтэй биш гэж үү? Хүний бодол биений аль нэг газарт удаанаар төвлөрөхөд энергийн бөөгнөрөл бий болох ба дань үүснэ. Чи үнэмшихгүй байвал гаран дээрээ бодлоо дандаа төвлөрүүл, үргэлж ингэж удаан хугацаагаар төвлөрүүлэхэд дань үүснэ. Иймээс зарим хүн энэ байдлыг харчихаад даньтиан бол хаа

²³ хуйен-хярзанд байдаг биологийн идэвхтэй цэг

сайгүй байдаг гэж ярьдаг. Энэ нь сонсоход бүр инээдтэй. Тэд дань үүсдэг газар болгоныг даньтиан гэж боддог. Үнэндээ тэр бол дань гэхдээ талбай биш. Чи дань бол хаа сайгүй байдаг эсвэл дээд, дунд, мөн доод дань гэж ярьвал болно. Харин жинхэнэ тоолшгүй олон Ном гаргадаг жинхэнэ талбай бол ганцхан, хэвлийн доод хэсэгт байдаг юм. Иймээс дээд, дунд, доод даньтиан гэж ярих нь буруу юм. Хүний бодол аль нэг хэсэгт удаан хугацаагаар төвлөрөхөд тэнд дань үүсдэг.

Мөнхийн нярай, хэвлийн доод хэсэг дэх энэ даньтиан-д үүснэ, аажмаар өссөөр улам томорсоор байна. Теннисний бөмбөгний дайтай болоход бүх биеийн хэлбэр нь тодорно, хамар, нүд бүгд үүсдэг, энэ үед түүний хажууд нэг жижиг бөмбөлөг үүсдэг. Үүссэний дараа Мөнхийн нярайн өсөлтийг дагаж бөмбөлөг бас томорно. Мөнхийн нярай 4 цун (13-14 орчим см) өндөр болоход лянхуа цэцгийн нэг дэлбээ гарч ирнэ, мөн 5-6 цун өндөрт хүрэхэд лянхуа цэцгийн дэлбээн эхний давхарга гарч дуусаад, алт шиг гялалзсан Мөнхийн нярай хүүхэд алтлаг лянхуа цэцгэн тавцан дээр суугаад маш үзэсгэлэнтэй харагдана. Энэ бол хэзээ ч үхэшгүй мөнхийн Очирваань бие, Буддын системд үүнийг Буддын бие гэж нэрлэдэг, харин Дао-гийн системд Мөнхийн нярай хүүхэд гэж нэрлэдэг.

Манай энэ номонд хоёр янзын биеийг хоёуланг нь бясалгана, мөн өөрийн биеийг бас хувиргах ёстой. Та нар Буддын бие энгийн хүмүүсийн дунд илэрч гарч болохгүй гэдгийг мэднэ. Маш их чармайхад энэ нь өөрийнхөө хэлбэр дүрс, туяаг энгийн хүний нүдэнд харагдуулж болно. Мөн энэ махан бие хувирсаны дараа энгийн хүмүүсийн дунд жирийн хүний бие шиг л харагдана. Энгийн хүн хараад ялгахгүй гэхдээ энэ бие өөр орон зайн хооронд орж гарч чадна. Мөнхийн нярай 4-5 цун өндөр болж өсөхөд хоосон бөмбөлөг нь бас тийм өндөртэй болно. Энэ нь үлээсэн шаар

шиг тунгалаг. Мөнхийн нярай хүүхэд хөдөлгөөнгүй завилж суусан, хөдлөхгүй байдаг. Энэ үед хий бөмбөлөг даньтиан-аас гарна. Энэ нь өсч боловсорсон болохоор дээшилж эхэлнэ. Дээшлэх явц нь их аажим, гэхдээ өдөр болгон хөдөлж байгааг нь ажиглаж болно. Тэр улам дээшээ өгсөнө. Хэрэв бид анхааралтай ажвал түүний оршин байгааг нь мэдэрнэ.

Бөмбөлөг дээш явсаар хүний таньжун²⁴ цэгт хүрээд тэндээ нэг хэсэг хугацаанд байна. Яагаад гэвэл энд хүний биеийн охь болон маш олон зүйл (зүрх бас энд) байдаг, бүгд бөмбөлөг дотор нэгэн цогц зүйл бий болгоно. Тэдгээр охь зүйлүүд бөмбөлөг дотор орж баяжуулна. Нэг хэсэг хугацааны дараа тэр дахиад дээш ахина. Энэ нь хоолойгоор өнгөрөх үед хоолой боогдсон мэт мэдрэмж төрдөг, судас хүртэл боогдсон мэт хөөгөөд тааламжгүй. Энэ байдал ганц хоёр өдөр болоод өнгөрчихнө. Тэр толгойн оройд гарна, бид үүнийг ниван-д хүрэх гэж нэрлэдэг. Бид үүнийг ниванд хүрсэн гэж хэлж байгаа боловч үнэндээ тэр чиний бүхэл тархи шиг том байдаг. Чиний толгой хөөсөн юм шиг санагдана. Яагаад гэвэл ниван бол хүний амины маш чухал газар, тэр бас дотроо охь зүйлс бүрдүүлдэг. Дараа нь бөмбөлөг тэнгэрийн мэлмийн сувгаар гадагшлах гэж чихнэ, энэ мэдрэмж бол маш их эвгүй. Тэнгэрийн мэлмий хөөж хөндүүрлэнэ, чамархай хөөж нүд хонхойсон мэт санагдана. Ийм мэдрэмж тэр шахагдаж гарах хүртэл үргэлжилнэ, гадагш гараад духны урд унжина. Үүнийг Шуангуань байрших гэдэг, тэнд дүүжлэгдэн байна.

Тэнгэрийн мэлмий нээгдсэн хүн энэ үед харж чадахгүй болно. Яагаад гэвэл Буддын болон Дао-гийн системийн бясалгалд Шуангуань доторхи зүйлс бүрэлдэхийг

²⁴ таньжун-цээжний голд орших биологийн идэвхтэй цэг

хурдасгахын тулд үүд нь хаагддаг. Үүнд үүдний хоёр хаалга, арын бас хоёр хаалга байдаг, бүгд хаагдана. Бээжин дэх Тиананьмэн-ий хаалга шиг, тал болгонд хоёр том хаалгатай. Шуангуанийг хурдан боловсруулах, баяжуулахын тулд маш онцгой байдал гарахгүй л бол хаалганууд нь онгойхгүй. Тэнгэрийн мэлмийгээр урьд нь хардаг байсан хүн энэ үед юу ч харж чадахаа болино, тэдэнд юм харахыг зөвшөөрөхгүй. Бөмбөлөг тэнд өлгөөтэй байх зорилго нь юу вэ? Яагаад гэвэл бидний биен дэх зуу зуун энергийн судлууд энд нийлдэг, тэгвэл энэ судлууд Шуангуанийг тойрч өнгөрөөд гарна. Бүгд Шуангуанаар гарах ёстой, зорилго нь үүн дотор нэмэлт суурь тавина, нэг цогц зүйлийг бүрэлдүүлнэ. Яагаад гэвэл хүний бие нь нэг жижиг орчлон ертөнц, түүн дотор жижиг хорвоо ертөнц бий болно, хүний биеийн бүх охь зүйл бүгд түүн дотор бий болно. Гэхдээ энэ нь бүрэн ажиллагаатай биш зөвхөн нэгэн цогц төхөөрөмж юм.

Чимэнь номын бясалгалд, шуангуань онгорхой байдаг. Шуангуань тавигдан гадагш гарахдаа цилиндр хэлбэртэй, гэхдээ аажмаар бөөрөнхий болно. Үүний хоёр талын хаалга нь нээлттэй байдаг. Яагаад гэвэл Чимэнь бясалгалд Буддаг ч бясалгадаггүй, Дао-г ч бясалгадаггүй болохоор тэр өөрөө өөрийгөө хамгаалдаг. Буддын болон Дао-гийн системд олон багш байдаг, тэд бүгд чамайг хамгаалж чадна. Чамд юм харах шаардлага байхгүй, тэгсэн ч ямар ч асуудал гарахгүй. Харин Чимэнь бясалгалын хувьд бол тийм биш, өөрөө өөрийгөө хамгаалах ёстой. Тиймээс тэр заавал харах чадвартай байх хэрэгтэй. Тэр үед тэнгэрийн нүдээр юмыг харахад яг дурангаар харж байгаа мэт үзэгддэг. Энэ цогц зүйл бүрэлдэж дуустал сар гаруй болсны дараа энэ нь буцаад дотогшоо орно. Толгойн дотор буцаж орохыг шуангуань байраа сольж байна гэж хэлдэг.

Буцаж дотогшоо ороход толгой хөөсөн мэт таагүй мэдрэмж бас төрнө. Дараа нь тэр хүний юүжэн²⁵ сүвнээс шахагдаж гарна. Тэр шахалт нь бас толгой задарч байгаа мэт их таагүй мэдрэмж төрүүлдэг. Шуангуань гадагшлангуут тэр дороо бие тайвширна. Гарсаны дараа тэр маш гүн орон зайд дүүжлэгдэн байж байдаг, маш гүн орон зайд байгаа бидний биеийн нэг хэлбэр дээр оршдог учраас унтаж байхдаа түүнийг үрэхгүй. Гэхдээ нэг зүйл байдаг, эхний удаа Шуангуаны байршилт болоход нүдний урд мэдрэгдэнэ. Тэр нь өөр орон зайд байгаа ч гэсэн өөрт нүдний урд ямар нэгэн зүйл бүрэлзээд нүдийг халхалж байгаа юм шиг тааламжгүй байдаг. Юүжэн сүв бол бас нэг гол даваа учраас бас хойд талд нэг цогц зүйл бүрдүүлнэ, тэгээд тэр дахин буцаж орно. Шуангуань нэг сүв гэдэг нь үнэндээ нэг сүвийн байрлал биш, тэр олон удаа байраа сольдог. Тэр Ниваньд буцсаны дараа бууж эхэлнэ, биеийн дотуур доошоо минмэн²⁶ сүв хүртэл бууж ирнэ. Минмэн сүвд хүрээд тэр дахин гадагшилна.

Хүний биеийн минмэн сүв бол маш чухал том цэг юм, Дао-гийн системд үүнийг цэг гэдэг, бид даваа гэдэг. Энэ бол гол том даваа, тэр ёстой төмөр хаалга шиг, тоолшгүй олон давхар төмөр хаалга шиг. Та бид хүний бие маш олон давхаргатай байдгийг мэднэ. Бидний махан биений эсүүд нь нэг давхарга мөн доторхи молекулууд нь бас өөр нэг давхарга юм. Атом, протон, электрон, маш бичил хэсгүүд, бүр маш бага бичил хэсгүүд, мөн өчүүхэн жижиг микро хэсгээс туйлын микро бичил хэсэг хүртэл давхарга болгонд хаалга байрладаг. Иймээс маш олон ер бусын чадварууд, маш олон арга увидасын зүйлүүд давхарга бүрийн хаалганы цаана түгжээтэй байдаг. Бусад бясалгалуудад бол дань

²⁵ юүжэн-дагзанд байдаг биологийн идэвхтэй цэг

²⁶ минмэн-ууц нуруунд байрлах биологийн идэвхтэй цэг

үүсгэдэг. Дань дэлбэрэхэд Минмэн сүв доргилтын хүчинд эхлээд онгойх ёстой. Хэрэв энэ нь доргилтонд нээгдэхгүй бол ер бусын чадварууд чөлөөлөгдөн гарч чадахгүй. Минмэн сүвэнд энэ цогц зүйлс бүрдсэний дараа дахиад биений дотогш орно. Тэгээд хэвлийн доод хэсэгт буцаж ирнэ, үүнийг Шуангуань байрандаа буцаж ирэх гэдэг.

Шуангуань байрандаа буцсаны дараа анхныхаа байршилд эргэж ордоггүй. Энэ үед Мөнхийн нярай хүүхэд өсч нилээд том болсон байна. Хийн бөмбөлөг Мөнхийн нярай хүүхдийг бүрхдэг, түүнийг хүрээлчихдэг. Мөнхийн Нярай хүүхэд өсөхөд, тэр бас дагаж өснө. Дао-гийн системд Мөнхийн нярай хүүхэд бараг зургаа, долоон настай хүүхдийн хэмжээтэй болоход түүнийг биенээс гарахыг зөвшөөрнө, үүнийг Мөнхийн нярай хүүхэд төрөх гэдэг. Хүний эзэн сүнсний удирдлагын дор тэр биенээс гарч хөдөлгөөнд орно. Хүний бие тогтуун хөдөлгөөнгүй суухад Эзэн сүнс гарч ирнэ. Ер нь Буддын системд Мөнхийн нярай хүүхэд бясалгаад өөртэй нь адилхан том болоход аюулгүй болно. Энэ үед түүнийг биенээс гарахыг зөвшөөрнө, энэ биенээс гарч болдог. Тэр үед Мөнхийн нярай хүүхэд энэ хүнтэй өөртэй нь адил том болсон байна, мөн бүрхүүл нь бас адилхан томорно, энэ бүрхүүл нь аль хэдийн биеийн гадуур тэлж өргөсчихсөн байдаг, энэ бол Шуангуань юм. Мөнхийн нярай хүүхэд ийм том болж өссөн учраас мэдээж энэ бүрхүүл нь биений гадуур тэлж өргөснө.

Та нар магадгүй хийдийн доторхи Буддын хөргийг харж байсан байх, Буддын хөрөг үргэлж нэг хүрээн дотор байдаг. Ялангуяа зурмал Буддын хөргөнд үргэлж нэг хүрээ байдаг, дотор нь Будда суудаг. Маш олон Буддын хөрөг ийм байдаг, ялангуяа эртний хийдүүд дэх Буддын хөрөг бүгд ийм байдаг. Яагаад хүрээн дотор сууж байдаг вэ? Хэн ч үүнийг тодорхой тайлбарлаж чаддаггүй. Би та бүхэнд хэлэхэд тэр бол Шуангуань. Гэхдээ одоо түүнийг Шуангуань гэж

нэрлэхгүй, түүнийг диваажин гэж нэрлэдэг, гэхдээ одоохондоо яг диваажин гэж нэрлэхэд арай болоогүй. Энэ нь зөвхөн нэг цогц тоног төхөөрөмжтэй үйлдвэртэй адил, гэхдээ үйлдвэрлэл явуулах чадвар байхгүй. Үйлдвэрлэл явуулахын тулд заавал эрчим хүч, түүхий эд байх шаардлагатай. Урьд хэдэн жилийн өмнө олон бясалгагчид миний гон Бодьсадваас өндөр, миний гон Буддагаас өндөр гэж ярьдаг байсан. Бусдад энэ нь төсөөлөхийн аргагүй байсан. Үнэндээ тэдний хэлсэн нь төсөөлөхийн аргагүй зүйл биш, хүний ертөнцөд бясалгахад гон нь үнэхээр их өндөр түвшинд хүрэх ёстой.

Тэгвэл яагаад ийм байдал гарсан бэ, тэд бясалгаад Буддагаас өндөр түвшинд хүрсэн гэж үү? Үүнийг өнгөцхөн ойлгож болохгүй. Ийм хүний гон үнэхээр маш өндөр. Яагаад гэвэл тэр бясалгаад маш өндөр түвшинд хүрсэний дараа төгс гэгээрэх үед түүний гон нь үнэхээр маш өндөр байна. Төгс гэгээрэлдээ хүрэхийн яг өмнөх агшинд, түүний гон-ы аравны найман хувийг түүний зан чанарын түвшинтэй нь хамт авчихна. Энэ энерги нь түүний диваажин оронг төгөлдөржүүлэхэд зарцуулагдана, энэ нь түүний өөрийнх нь диваажин орон юм. Бясалгадаг хүний энэ гон ба зан чанарын шалгуур нь амьдралын туршид их бэрхшээл зовлон туулснаар мөн хүнд амьдралын нөхцөлийг давснаар бясалгаж гарч ирсэн гэдгийг та бүгд мэднэ. Иймээс тэр бол маш нандин. Энэ үнэт зүйлийн аравны найман хувь нь түүний диваажинг хангахад хэрэглэгддэг. Иймээс ирээдүйд түүний бясалгал үр дүнтэй болоход, тэр хүссэнээ авна, санасан бүхэн бүтнэ, юу хүссэнээ хийж чадна, мөн түүний диваажин оронд бүх юм байна. Энэ бол түүний зовлон туулж бясалгаж олсон аугаа буян.

Энэ энерги нь ямар ч зүйлийг хувирган гаргаж чаддаг. Иймээс Будда юу авах хүсэлтэй, юу идэх хүсэлтэй, юугаар тоглох хүсэлтэй байна, бүх зүйл байна. Эдгээр нь түүний

бясалгалын үр дүнд бий болсон, энэ бол Буддын бүтээлийн орон (фовэй), үүнгүйгээр тэр бясалгаад үр дүнд хүрч чадахгүй. Одоо энэ үед түүнийг өөрийнх нь Диваажин гэж нэрлэж болно. Харин түүнд гон-ы зөвхөн аравны хоёр хувь үлдсэн байна, үүгээр төгс гэгээрч, Дао-д хүрнэ. Түүнд гон-ы зөвхөн аравны хоёр хувь үлдсэн ч бие нь түгжигдээгүй. Тэр энэ биеийг орхиж эсвэл авч явж болно. Харин энэ бие нь аль хэдийн дээд энергийн бие бодиор хувирсан, энэ үед түүнд эгнэшгүй увьдас чадвар гарч ирнэ, сүр хүч нь зүйрлэшгүй их. Гэхдээ энгийн хүмүүсийн дунд бясалгахад үргэлж түгжээтэй байдаг, тийм том чадвар байхгүй, гон хичнээн өндөр байсан ч хязгаарлагдсан хэвээр байна. Одоо тийм биш болсон.

Тавдугаар лекц

Фалунь дүрс

Бидний Фалунь Дафагийн бэлэг тэмдэг бол Фалунь. Ер бусын чадвартай хүн энэ Фалунь эргэж байдгийг хардаг. Бидний тэр жижиг Фалунь эмблем бас адилхан эргэж байдаг. Бид орчлон ертөнцийн мөн чанар болох Үнэн, Нинжин, Тэвчээрийн дагуу удирдуулан бясалгадаг. Орчлон ертөнцийн хувьслын зарчим дагуу бясалгадаг, иймээс бидний бясалгал бол маш аугаа юм. Өөрөөр Фалунь дүрс бол орчлон ертөнцийн хураангуй дүрс юм. Буддын системд арван зүгийн хорвоог нэг орчлон ертөнц гэж үздэг, дөрвөн тал найман зовхист орчлон ертөнц, зарим хүн магадгүй Фалуний дээд доод талд босоо гон багана оршиж байгааг харсан, иймээс дээд доод зүгийг нийлүүлбэл Фалунь яг арван зүгийн хорвоо болдог, энэ орчлон ертөнцийг бүрдүүлдэг. Энэ нь Буддын систем дэх орчлон ертөнцийн дүрслэл юм.

Мэдээж энэ орчлон ертөнцөд тоолшгүй олон галагтик байдаг, бидний тэнгэрийн заадас галагтик бас ордог. Бүх орчлон ертөнц хөдөлгөөнд байдаг, мөн түүн доторхи галагтикууд бас бүгд хөдөлж байдаг, иймээс энэ дүрс доторхи Тайжи ба жижиг 卐 (хас) тэмдгүүд бас эргэдэг, Фалунь бүхэлдээ эргэж байдаг, мөн дунд талын том 卐 тэмдэг бас эргэж байдаг. Өөр нэг утгаар бол Фалунь нь бидний тэнгэрийн заадас галагтикийн бэлэг тэмдэг, мөн бид Буддын системийнх учраас голд нь байгаа тэмдэг бол Буддын системийн тэмдэг, гаднах байдал нь ийм л юм. Янз бүрийн бие бодиуд бүгд өөр өөр орон зайд орших өөрийн хэлбэртэй, энэ нь өөр орон зайд маш баялаг, маш нарийн хувирах явцтай, мөн орших хэлбэртэй байдаг. Энэ Фалунь

дүрс бол орчлон ертөнцийн хураангуй дүрс, энэ нь бусад бүх орон зай болгонд орших өөрийн хэлбэртэй ба хувьсах явцтай, иймээс би үүнийг замбуулин хорвоо гэдэг.

Фалунь цагийн зүүний дагуу эргэхдээ орчлон ертөнцөөс энергийг автоматаар татаж авдаг, цагийн зүүний эсрэгээр эргэхдээ энергийг гаргадаг. Дотогшоо (цагийн зүүний дагуу) эргэхдээ өөрийгөө авардаг, гадагшаа (цагийн зүүний эсрэг) эргэхдээ хүнийг авардаг, энэ бол манай бясалгалын онцлог. Зарим хүн ингэж асуудаг, бид Буддын системийнх, тэгвэл яагаад бас Тайжи тэмдэг байгаа юм бэ? Энэ Тайжи Дао системийх биш гэж үү? Яагаад гэвэл бидний бясалгал бол маш аугаа, бүхэл орчлон ертөнцийг бясалгаж байгаатай адил. Тэгвэл та бүгд боддоо, энэ орчлон ертөнцөд хоёр систем л байдаг: Буддын, Дао-гийн гэсэн хоёр систем л юм. Аль нэгийг нь хасчихвал бүхэл бүтэн орчлон ертөнцийг бүрдүүлж чадахгүй, бүхэл бүтэн орчлон ертөнц гэж ярьж болохгүй. Иймээс үүн дотор Дао-гийн зүйлс байдаг. Зарим хүн Дао-гийн системээс гадна бас Христосын шашин, Күнзийн шашин, мөн бусад шашин байдаг шүү дээ гэдэг. Би та бүхэнд хэлье, Күнзийн шашинд бясалгаад маш өндөр түвшинд хүрэхэд Дао-гийн системд харъяалагддаг, мөн барууны олон шашинд бясалгаад өндөр түвшинд хүрсний дараа Буддын системд харъяалагддаг. Ийм л хоёр үндсэн систем байдаг.

Тэгвэл яагаад Тайжи дүрс хоёр нь дээрээ улаан, доороо цэнхэр, мөн нөгөө хоёрын дээд хэсэг нь улаан, доод хэсэг нь хар байдаг вэ? Бидний мэддэг Тайжи бол хар цагаан хоёр бие бодиос бүтдэг, арга билиг хоёр чий юм. Энэ бол маш өнгөцхөн ойлголт, харин өөр өөр орон зайнд өөр өөрөөр илэрдэг. Хамгийн өндөр түвшинд илрэхдээ түүний өнгө нь ийм байдаг. Бидний нийтлэг мэдэх Дао-д дээд хэсэг нь улаан доод хэсэг нь хар өнгөтэй байдаг. Жишээлбэл, бидний зарим тэнгэрийн мэлмий нээгдсэн хүн энгийн

нүдэнд харагддаг улаан өнгө зөвхөн нэг давхаргаар ялгаатай орон зайд харахад ногоон өнгөтэй байдаг. Алтан шар өнгө өөр орон зайд ягаан өнгөтэй харагддаг, ийм нэг ялгаа гардаг. Өөрөөр хэлбэл өөр өөр орон зайд өнгө нь бас өөр өөрөөр өөрчлөгддөг. Дээд хэсэг нь улаан доод хэсэг нь цэнхэр Тайжи нь анх үүссэн Аугаа Дао-гийн системд хамаарагдах бөгөөд үүнд мөн Чимэнь бясалгал багтдаг. Дөрвөн жижиг 卍 тэмдэг Буддын системийх, эдгээр нь голд нь байгаатай адил бүгд Буддын системийх. Фалуний энэ өнгө нь нилээд тод, бид үүнийг Фалунь Дафагийн бэлэг тэмдэг болгон авсан.

Бидний тэнгэрийн мэлмийд харагддаг Фалунь ийм өнгөтэй байх албагүй. Түүний суурь өнгө өөрчлөгддөг, гэхдээ хэлбэр дүрс нь өөрчлөгдөхгүй. Чиний хэвлийн доод хэсэгт миний суулгаж өгсөн Фалунь эргэхийг чи тэнгэрийн мэлмийгээрээ харахад тэр нь магадгүй улаан, ягаан, ногоон, эсвэл өнгөгүй ч байж болно. Улаан, улбар шар, шар, ногоон, хөх, цэнхэр мөн ягаанаар түүний суурь өнгө нь байнга солигдож байдаг. Иймээс чиний харсан нь магадгүй өөр өнгөтэй, гэхдээ доторхи 卍 тэмдэг, Тайжигийн өнгө, дүрс нь өөрчлөгдөхгүй. Бид энэ Фалунь дүрсний суурь өнгийг нилээд өнгөлөг гэж үзэн сонгож авсан. Ер бусын чадвартай хүн энэ орон зайг нэвтэрч их олон зүйлсийг харж чаддаг.

Зарим хүн: Энэ 卍 тэмдэг Гитлерийн зүйлтэй адилхан юм шиг гэж ярьдаг. Та бүгдэд хэлэхэд энэ тэмдэг өөрөө нийгмийн ямар ч ангийн ухагдахуун илэрхийлдэггүй. Зарим хүн үүний өнцөг нь ийшээ хазайвал Гитлерийн тэмдэг болчихно гэж ярьдаг. Энэ бол тийм биш, яагаад гэвэл энэ нь хоёр тийшээ эргэдэг. Бидний хүн төрөлхтний нийгэмд энэ тэмдгийг 2500 жилийн өмнөх Шагжамүнигийн үеэс эхлэн өргөн мэддэг болсон. Дэлхийн 2-р дайны Гитлерийн үеэс одоог хүртэл дөнгөж хэдэн арван жил л

өнгөрч байна. Тэр үүнийг хулгайлж хэрэглэсэн, гэхдээ түүний хэрэглэсэн өнгө биднийхээс өөр, хар өнгөтэй бас түүний өнцөг нь дээш чиглэсэн босоо хэлбэртэй. Энэ Фалуний талаар би энэ хүртэл ярьж, үүний зөвхөн гаднах хэлбэрийг л дурьдлаа.

Тэгвэл энэ 卐 тэмдэг бидний Буддын системд юуг илэрхийлдэг вэ? Зарим хүн үүнийг өлзий хутгийн бэлэгдэл гэдэг, энэ бол энгийн хүний тайлбар. Би та бүгдэд хэлье, энэ 卐 тэмдэг бол Буддын түвшинг илэрхийлдэг, зөвхөн Буддын түвшинд хүрэхэд бий болдог. Бодьсадва, Архадад байхгүй, гэхдээ том Бодьсадва нарт, дөрвөн Том Бодьсадвад бүгдэд нь байдаг. Бид эдгээр том Бодьсадва нарыг жирийн Буддагийн түвшнээс маш хол давсныг нь харсан, тэр ч байтугай Рулай (Татагата)-гаас ч өндөр. Рулай түвшнээс давсан Будда тоолшгүй олон байдаг. Рулай зөвхөн нэг л 卐 тэмдэгтэй, Рулай-гаас дээш түвшинд хүрэхэд энэ 卐 тэмдэг нь олон болдог. Рулай-гаас хоёр дахин өндөр түвшинд хүрсэн Буддад хоёр 卐 тэмдэг байна. Түүнээс улам өндөр түвшинд хүрэхэд тэдэнд гурав, дөрөв, тав байдаг гэх мэт, ихэсвэл биеэр нь дүүрэн болдог. Толгой, мөр, өвдгөн дээр нь гээд л гардаг, багтах зайгүй болбол гарын алга, хурууны өндөг, хөлийн уланд, хөлний хуруунуудад гэх мэтчилэн гарна. Түвшин дээшлэх тусам 卐 тэмдэг улам нэмэгдэнэ. Иймээс 卐 тэмдэг нь Буддагийн түвшинг илэрхийлдэг. Буддагийн түвшин улам өндөр байх тусам 卐 тэмдэг улам олон болно.

Чимэнь²⁷ бясалгал

Буддын ба Дао-гийн системийн бясалгалаас гадна бас нэг Чимэнь гон бясалгал байдаг, тэд үүнийгээ Чимэнь бясалгал гэдэг. Энгийн хүмүүс бясалгалын талаар ийм нэг ойлголттой, эртний Хятадын үеэс өнөөг хүртэл хүмүүс Буддын болон Дао-гийн системийн бясалгалыг уламжлалт бясалгал гэж үздэг, мөн ариун номын бясалгал гэж хэлдэг. Энэ Чимэнь бясалгал нь олон нийтийн дунд хэзээ ч тараагдаж байгаагүй, маш цөөхөн хүн үүний оршиж байгааг мэддэг, зөвхөн урлагийн бүтээлд гарч байсан.

Чимэнь бясалгал гэж байдаг уу? Байна. Би бясалгалынхаа явцад, ялангуяа сүүлийн хэдэн жилд Чимэний өндөр түвшинд хүрсэн гурван хүнтэй таарсан. Тэд өөрсдийн энэ бясалгалын охь зүйлийг надад дамжуулсан, маш онцгой бөгөөд их сайн зүйл. Тэдний зүйл их онцлог учраас бясалгаж гарсан зүйл нь их өвөрмөц, жирийн хүнд ойлгогдохгүй. Тэд бас ингэж ярьдаг, өөрсдийгөө Будда ч биш Дао ч биш гэдэг, Буддад ч бясалгахгүй, Дао-д ч бясалгахгүй. Хүмүүс тэднийг Буддад ч бясалгадаггүй Дао-д ч бясалгадаггүй гэдгийг дуулаад үүнийг “Хажуугийн үүд ба Болхи замын” (панмэн зуодао) гэж нэрлэсэн, тэд өөрсдөө Чимэнь бясалгал гэж нэрлэдэг. Хажуугийн үүд ба Болхи замын гэдэг нь доорд үзсэн утгатай үг, гэхдээ энд буруу номын гэж хэлсэн эсрэг утга байхгүй, энэ бол лавтай юм. Үгийн утгаар нь ойлгоход буруу номын гэсэн санаа байхгүй. Түүхэнд Буддын бясалгал, Дао-гийн бясалгалыг ариун номын бясалгал гэж нэрлэдэг. Хүмүүс энэ бясалгалыг ойлгохгүй болохоор үүнийг хажуу үүдний ба хажуу замын уламжлагдсан бус бясалгал гэж хэлдэг. Тэгвэл “зуодао” гэдэг нь юу гэсэн үг вэ? Энэ нь болхи гэсэн утгатай буюу

²⁷ чимэнь-энгийнээр уламжлагддаггүй бясалгал

мулгуй замын гэсэн утгатай. Эртний Хятад хэллэгээр голдуу мунхаг гэсэн утгатай байсан. Хажуу үүдний, Болхи замын гэдэг нь ийм л утгатай юм.

Яагаад энэ нь буруу ном биш вэ? Яагаад гэвэл тэр бас зан чанарт хатуу шаардлага тавьдаг, бас орчлон ертөнцийн мөн чанарын дагуугаар бясалгадаг. Энэ нь орчлон ертөнцийн мөн чанар, зүй тогтлыг зөрчдөггүй, муу зүйл хийлгэдэггүй учраас үүнийг буруу ном гэж хэлж болохгүй. Яагаад гэвэл бидний энэ орчлон ертөнцийн мөн чанар Буддын, Дао-гийн хоёр системийн бясалгалын аргад нийцсэндээ биш, харин Буддын, Дао-гийн хоёр системийн бясалгалын арга нь орчлон ертөнцийн мөн чанарт нийцдэг учраас ариун ном болсон юм. Чимэнь бясалгал орчлон ертөнцийн мөн чанарт нийцсэн юм бол энэ нь буруу номын бясалгал биш, харин адилхан ариун номын бясалгал юм. Яагаад гэвэл сайн мууг, нинжин харгисийг цэгнэдэг шалгуур нь орчлон ертөнцийн мөн чанар юм. Тэр орчлон ертөнцийн мөн чанарын дагуугаар бясалгана, тиймээс тэр бас ариун замын, харин тэдний шаардлагын онцлог нь Буддын ба Дао-гийн системтэй адилгүй. Тэр олон шавьд өргөнөөр заадаггүй, маш цөөхөн хүнд л заадаг. Дао-гийн системд бол олон шавь нарт заадаг, гэхдээ зөвхөн нэг л шавьд жинхэнээр уламжилдаг. Буддын системд бүх амийг аврахыг ярьдаг, хэн бясалгаж чадна тэр бясалгана.

Чимэнь бясалгал нь хоёр хүнд уламжилж болохгүй, түүхийн урт хугацаанд зөвхөн нэг хүнийг л сонгож уламжилдаг. Иймээс энэ зүйл нь энгийн хүнд ердөө үзэгдэж байгаагүй. Мэдээж чигон-ы ид дэлгэрч байсан үед энэ бясалгалын цөөн хүмүүс бас гарч ирэн зааж байсныг би харсан. Гэхдээ тэд заах явцдаа болохгүй болохыг олж мэдсэн, яагаад гэвэл багш нь зарим зүйлийг олны дунд тараахыг хориглосон байсан. Хэрэв чи бясалгалыг заах бодолтой байвал сурагчдыг шилж сонгож чадахгүй.

Суралцахаар ирсэн хүмүүсийн зан чанар нь өөр өөр түвшинд, янз бүрийн бодолтойгоор ирж сурдаг, төрөл бүрийн хүмүүс байдаг, чамд шавийг сонгох арга байхгүй. Иймээс Чимэнь бясалгалыг нийтэд дэлгэрүүлж болохгүй, амархан аюул гарна, яагаад гэвэл тэр зүйл нь их өвөрмөц.

Зарим хүн ингэж боддог, Буддын системд Буддад бясалгадаг, Дао-гийн системд Дао-д бясалгадаг, тэгвэл Чимэнь бясалгалаар төгс үр дүнд хүрвэл юу болох вэ? Тэр бол чөлөөтэй аялах бурхан, түүнд энэ орчлон ертөнцөд тогтсон хүрээ байхгүй. Та бүгд мэднэ, Рулай бурхан Шагжамүни Саха диваажинтай, Будда Амитаба Сухвати диваажинтай, Яуши Будда Лиули диваажинтай, Рулай, мөн аугаа Будда болгон өөрийн диваажинтай. Аугаа гэгээрэгч болгон өөрийн бүтээсэн нэг тэнгэрийн оронтой, түүний маш олон шавь нар нь тэнд амьдардаг. Харин Чимэнь бясалгалд түүнд тогтсон орчлон ертөнцийн хүрээ байхгүй, тэр зөвхөн нэг чөлөөтэй аялагч бурхан.

Буруу аргын бясалгал

Буруу аргын бясалгал гэж юу вэ? Үүнд хэдэн хэлбэр байдаг. Зарим хүн зориуд буруу номоор бясалгадаг, яагаад гэвэл энэ зүйл үеэс үед уламжлагдан ирсэн. Яагаад энэ зүйлийг уламжилдаг вэ? Яагаад гэвэл тэд энгийн хүмүүсийн дунд нэр хүнд, хувийн ашиг сонирхол, баяжихын төлөө хөөцөлддөг, тэд үүнийг л ярьдаг. Мэдээж түүний зан чанар нь өндөр биш, тэр гон олохгүй. Тэр юу олж авах вэ? Нүгэл. Хүний нүгэл ихэдвэл бас нэг янзын энерги бий болдог. Гэхдээ түүнд түвшин байхгүй, түүнийг бясаллагч хүнтэй харьцуулшгүй, гэхдээ энгийн хүнтэй харьцуулбал энгийн хүнийг захирч чадна. Яагаад гэвэл энэ зүйл бас энергийн илрэл, нягтрал нь маш их болоход хүний ер бусын чадварыг хүчтэй болгож чадна, тэгээд бас ийм нөлөө гаргадаг, иймээс

түүхийн туршид зарим хүн ийм зүйлийг уламжлан заадаг байсан. Тэр ингэж ярьдаг: Би муу зүйл хийснээр, хүн загнаснаар миний гон өснө. Тэр гон-оо өсгөж байгаа юм биш, үнэндээ бол энэ хар бие бодийн нягтралыг нэмж байгаа, яагаад гэвэл муу зүйл хийхэд хар бие бодь-нүглийг олдог. Иймээс түүнд байгаа төрөлхийн үл ялих ер бусын чадвар нь энэ нүглээр хүчтэй болж болно, бас бага зэрэг ер бусын чадвар гаргадаг, гэхдээ ямар ч том зүйл хийх чадваргүй. Ийм хүн муу зүйл хийж бас гон-оо өсгөж болдог гэж үздэг, тэр ингэж л ярьдаг.

Зарим хүн Дао нэг тохойгоор өндөр байхад буг чөтгөр арван тохой илүү өндөр гэж ярьдаг. Энэ нь энгийн хүний ташаа яриа юм. Буг чөтгөр Дао-гаас хэзээ ч өндөр байж чадахгүй. Ийм нэг байдал байдаг, бидний хүн төрөлхтөний ойлгож байгаа орчлон ертөнц нь зөвхөн тоолшгүй олон орчлон ертөнцийн дундах нэг жижиг орчлон ертөнц, бид үүнийг товчоор орчлон ертөнц гэж нэрлэдэг. Манай орчлон ертөнцөд удаа дараалан маш олон жилийн мөчлөг үеийг туулах бүрд орчлон ертөнцийн том гай гамшиг болдог. Энэ гай гамшигт орчлон ертөнцийн бүх зүйлс, од гаригс сүйдэж болно, орчлон ертөнцийн амьтай бүгд устаж болно. Орчлон ертөнцийн хөдөлгөөн бас зүй тогтолтой, бидний энэ удаагийн орчлон ертөнцөд зөвхөн хүн төрөлхтөн муу болсон биш, бас маш олон амь аль хэдийн ийм нэг байдлыг олж харсан, одоогоор энэ орчлон ертөнцийн орон зайд аль хэдийн том дэлбэрэлт болсон. Өнөөдөр одон орон судлаачид үүнийг харж чадахгүй, яагаад гэвэл хамгийн хүчирхэг дурангаар бидний харж чадах нь одоогоос 150 мянган гэрлийн жилийн өмнөх зүйл юм. Одоо тэр од гаригсын өөрчлөлтийг харахыг хүсвэл энэ нь 150 мянган гэрлийн жилийн дараа л харагдана. Энэ бол маш удаан хугацаа.

Одоо бүх орчлон ертөнц даяар аль хэдийн маш том өөрчлөлт гарсан. Ийм өөрчлөлт гарах болгонд бүхэл орчлон ертөнцийн амь бодь бүгд устгах байдалд хүрдэг, бүрэн сүйдэх байдал тулгардаг. Ийм байдал тохиолдох бүрд орчлон ертөнцийн урьд оршиж байсан мөн чанар ба доторхи бүх бие бодь бүгд тэсрэлтэнд устана, ихэвчлэн бүгд дэлбэрэлтэнд үхдэг, гэхдээ удаа дараагийн ийм тэсрэлт болгонд нэг бүрчлэн устдаггүй. Маш өндөр түвшний аугаа гэгээрэгчид шинэ орчлон ертөнцийг дахин бүтээсний дараа дотор нь дэлбэрэлтэнд үхээгүй зарим амь бодь үлддэг. Аугаа гэгээрэгчид энэ орчлон ертөнцийг өөрсдийн мөн чанар, өөрсдийн шалгуурын дагуу бүтээдэг, иймээс өмнөх үеийн орчлон ертөнцийн мөн чанартай адилгүй.

Дэлбэрэлтээс амьд үлдэгсэд энэ орчлон ертөнцөд өмнөх мөн чанар, зарчмын дагуу аливаа үйлийг хийдэг. Шинээр бүтээгдсэн энэ орчлон ертөнц нь үйл хөдлөлдөө шинэ орчлон ертөнцийн мөн чанар, зарчмыг дагадаг. Иймээс дэлбэрэлтнээс үлдэгсэд нь шинэ орчлон ертөнцийн зарчмыг үймүүлэх буг чөтгөр болдог. Гэхдээ тэр ч бас тийм муу биш, тэр зөвхөн өмнөх үеийн орчлон ертөнцийн мөн чанарын дагуугаар үйлийг хийдэг, энэ бол хүмүүсийн хэлдэг тэнгэрийн буг чөтгөр юм. Гэхдээ тэр энгийн хүмүүст аюул занал хийхгүй, хор хөнөөл ч учруулахгүй. Тэд зөвхөн өөрсдийн зарчмаар л үйлийг хийдэг. Урьд үүнийг энгийн хүнд мэдүүлдэггүй байсан. Би Рулай түвшнээс их өндөрт гарсан Будда маш олон байдаг гэж хэлсэн, харьцуулж харахад тэр буг чөтгөр юу ч биш, маш өчүүхэн. Хөгшрөлт, өвчлөлт мөн үхэл бол буг чөтгөрийн бас нэг хэлбэр, гэхдээ энэ ч гэсэн орчлон ертөнцийн мөн чанарыг сахин хамгаалахын тулд үүссэн юм.

Буддын шашинд зургаан замын тойрогт төрөл олох гэж ярьдаг, үүнд Асурын асуудал яригддаг, үнэндээ энэ нь өөр орон зайны амь бодь юм, гэхдээ тэдэнд хүний мөн чанар

байхгүй. Аугаа гэгээрэгчдийн харснаар тэд маш доод түвшнийх бөгөөд их чадваргүй, гэхдээ энгийн хүмүүст аймаар харагддаг, тэд тодорхой хэмжээний энергитэй, энгийн хүмүүсийг амьтантай адил үздэг, тэгээд хүнээр хооллох дуртай. Сүүлийн жилүүдэд тэд бас чигон заахаар гарч ирсэн. Тэр юу вэ, тэр хүнтэй адилхан гэж үү? Их аймаар харагддаг, тэдний зүйлийг сурчих юм бол тэдэнтэй явж төрөлд нь орох болно. Зарим хүн чигон-оор бясалгахдаа бодол нь зөв биш, түүний үзэл бодолтой нийцэхэд тэр ирж чамд заана. Нэг зөв сэтгэл гарахад зуун ёрыг дардаг, чи хөөцөлдөхгүй байхад хэн ч чамайг оролдож зүрхлэхгүй. Чамаас муу бодол гарвал, муу зүйлийн хойноос хөөцөлдвөл тэр чамд туслахаар ирнэ, чи бясалгаад буг чөтгөрийн замд орчихно. Ийм асуудал гардаг.

Өөр нэг асуудал байдаг, үүнийг санаандгүйгээр буруу аргаар бясалгах гэдэг. Санаандгүйгээр буруу аргаар бясалгах гэж юу вэ? Энэ бол хүн мэдэхгүйгээс буруу аргаар бясалгадаг. Энэ нь их түгээмэл, маш их байдаг. Нилээд олон хүн чигон-оор хичээллэхдээ буруу санаа бодолтой байдаг гэж би урьд хэлсэн. Дасгал хийж зогсоход гар хөл нь чилэн чичирч байхдаа ч түүний бодол нь завгүй байдаг. Тэр ингэж бодно: Юмны үнэ өсч байна, дасгалаа дуусахаар дэлгүүр явах хэрэгтэй, тэгэхгүй бол юмны үнэ улам өсчихнө. Өөр нэг хүн ингэж бодно: Ажлын газраас одоо байр хуваарилж өгч байгаа, би байртай болох болов уу, байр хуваарилж байгаа хүн надад дургүй. Тэр энэ талаар их бодох тусам уур нь улам хүрнэ. Тэр надад байр өгөхгүй нь лавтай, би яаж түүнтэй үзэлцвэл дээр бол... Элдэв янзын бодол гарч ирдэг. Миний хэлсэн шиг тэд гэр бүлийн асуудлаас улсын хэрэг хүртэл хов жив ярина. Тэд уураа хүрсэн асуудлаар улам их ярьж өөрсдийгээ бүр их бухимдуулна.

Чигон бясалгал буянг эрхэмлэхийг шаарддаг. Дасгал хийж байхдаа чи сайн зүйлийн талаар боддоггүй юмаа гэхэд

муу зүйлийн талаар ч бас бодохгүй байх хэрэгтэй. Юу ч бодохгүй байх нь хамгийн сайн. Яагаад гэвэл доод түвшинд бясалгахад суурь тавих хэрэгтэй, энэ суурь нь маш их чухал нөлөө гаргадаг, хүний бодлын хөдөлгөөн энэ сууринд нөлөөлдөг. Та бүгд энэ талаар бодоод үз, чи ямар зүйл гон дотроо нэмж байна? Чиний бясалгаж гаргасан тэр зүйл сайн байж чадах юм уу? Тэр зүйл хар биш гэж үү? Хэр олон хүн ийм бодолтойгоор чигон-оор хичээллэдэг гээч? Чи бясалгаад байхад яагаад чиний өвчин эдгэрэхгүй байна вэ? Дасгалын талбайд зарим хүн тийм муу юм бодоогүй ч гэсэн ямагт ер бусын чадвартай болох, энэ тэрийг хөөцөлдөх, янз бүрийн сэтгэл, янз бүрийн хүчтэй хүсэлтэйгээр хичээллэдэг. Үнэндээ тэд аль хэдийн санаандгүйгээр буруу аргаар бясалгалд орсон, чи түүнийг буруу аргаар бясалгаж байна гэж хэлбэл тэр дургүйцнэ, би бол том чигон багшаар заалгасан гэнэ. Гэхдээ тэр том чигон багш чамайг буянг эрхэмлэ гэж сургасан. Чи түүнийг дагасан уу? Чи чигон-оор бясалгахдаа үргэлж муу бодлыг оруулдаг, чи хэл дээ яаж сайн зүйл бясалгаж гаргах юм? Ийм л асуудал юм, үүнийг санаандгүйгээр буруу аргаар бясалгах гэдэг, энэ нь маш түгээмэл байдаг.

Эр эм хос бясалгал

Бясалгагчдын хүрээнд ийм нэг бясалгалын арга байдаг, эр эм хос бясалгал гэдэг. Та нар магадгүй Түвдийн Тантризм бясалгалд Буддын сийлбэр эсвэл хөрөг зураг харсан байх, эрэгтэй нь эмэгтэйгээ тэврэн бясалгаж байдаг. Эрэгтэйн бие нь заримдаа Будда хэлбэртэй, нүцгэн эмэгтэйг тэвэрсэн байдаг. Зарим нь магадгүй Буддын хувирсан дүртэй, үхэр толгой адуун нүүртэй Доржзодов дүрд хувираад нүцгэн эмэгтэйн биеийг тэвэрсэн байдаг. Яагаад ийм байдаг вэ? Бид эхлээд та бүгдэд энэ асуудлыг тайлбарлая, манай дэлхийд зөвхөн Хятадад Күнзийн сургааль нөлөөлсөн юм

биш, хэдэн зууны өмнө бидний бүхэл хүн төрөлхтөний ёс суртахуун бараг бүгд ижилхэн байсан. Иймээс энэ бясалгалын арга үнэндээ манай энэ дэлхийгээс эх сурвалжтай биш. Энэ нь өөр гаригаас ирсэн, гэхдээ энэ аргаар үнэхээр бясалгаж болно. Энэ бясалгал Хятадад орж ирэх үед үүнд эр эм хосоор бясалгадаг арга, мөн зарим нууцаар бясалгах зүйл байсан учраас Хятад хүмүүс үүнийг хүлээж авч чадаагүй, иймээс үүнийг Тан гүрний хаан Хуйчань жилд Хан нутаг дэвсгэрт тараахыг хориглосон. Хан нутагт заан тараахыг зөвшөөрөөгүй, тэр үед үүнийг Тан Тантризм гэж нэрлэсэн. Гэхдээ энэ нь Түвдийн нэг онцгой орчинд, тусгай газарт уламжлагдсан. Яагаад ингэж бясалгаж байгаа вэ? Эр эм хос бясалгал нь билгийг цуглуулж аргыг нөхөх, аргыг цуглуулж билгийг нөхөх замаар харилцан дэмжиж, хоорондоо бясалгаж арга билиг хоёрыг тэнцвэржүүлэх зорилготой юм.

Буддын системд болон Дао-гийн системд, ялангуяа Дао-гийн арга билигийн онолд хүний биед төрөлхөөс арга билиг оршдог гэдгийг та бүгд мэднэ. Хүний биед арга билиг оршдог болохоор бясалгалаар янз бүрийн ер бусын чадвар, “Мөнхийн нярай хүүхэд”, “Бясалгасан нярай хүүхэд”, Номын бие гэх мэт амь бодийг гаргаж болно. Арга билиг байгаа болохоор маш олон амь бодийг бясалгаад гаргаж болдог. Эрэгтэй, эмэгтэй хүний бие ялгаагүй бясалгалаар даньтиан-д бүгдийг үүсгэж гаргадаг, энэ онол нь үнэхээр үндэслэлтэй юм. Дао-гийн системд ер нь биеийн дээд хэсгийг арга, доод хэсгийг билиг гэж үздэг. Зарим нь биеийн ар талыг арга, урд талыг билиг гэж үздэг. Мөн зарим нь биеийн зүүн талыг арга, баруун талыг билиг гэж үздэг. Хятадад эр зүүн, эм баруун гэсэн яриа байдаг, энэ нь бас үүнээс үүсэлтэй бөгөөд их учир зүйтэй юм. Хүний биед угаасаа арга билиг оршдог болохоор арга билигийн харилцан нөлөөллийн дүнд бие нь өөрөө арга билигийг

тэнцвэртэй болгож чадна, мөн маш олон амь бодийг үүсгэн гаргаж чадна.

Энэ нь юуг хэлж байна вэ гэвэл, бид эр эм хос бясалгалын аргыг хэрэглэхгүйгээр бясалгалын маш өндөр түвшинд хүрч бас чадна гэсэн үг. Хэрэв эр эм хос бясалгалын аргыг зүй бусаар хэрэглэх юм бол чөтгөр шуламын нөлөөлөлд орж энэ нь буруу аргын бясалгал болно. Тантризмын маш өндөр түвшинд эр эм хос бясалгалыг хэрэглэх юм бол энэ лам хувраг заавал бясалгалын маш өндөр түвшинд хүрсэн байх ёстой. Тэр үед багш нь түүнийг дагуулж ийм бясалгал хийдэг. Яагаад гэвэл түүний зан чанар нь маш өндөр, тэр өөрийгээ сайн барьж чадна, гажуу зүйлд орохгүй. Харин зан чанарын түвшин нь доогуур хүн энэ аргыг хэрэглэж хэрхэвч болохгүй, хэрэглэх юм бол энэ хүн буруу аргын бясалгал руу орох нь лавтай. Зан чанарын түвшин хангалтгүй, энгийн хүний дур хүсэл, шунал тачаалаа орхиогүй учраас түүний зан чанарын хэмжээ нь тэр л түвшинд байх ба хэрэглэх юм бол муу ёр болох нь гарцаагүй. Иймээс бид үүнийг доод түвшинд хамаагүй дэлгэрүүлэх юм бол буруу ном тараасан болно гэж хэлсэн.

Сүүлийн жилүүдэд нилээд олон чигон багш эр эм хос бясалгалыг зааж байгаа. Үүнд хачирхалтай нь юу вэ? Дао-гийн системд бас эр эм хос бясалгах арга гарсан. Гэхдээ энэ нь саяхнаас гарсан биш, Тан хаант төрийн үеэс эхэлсэн. Дао-гийн системд яагаад эр эм хос бясалгах арга гарсан бэ? Дао-гийн систем дэх Тайжи номлолын дагуугаар хүний биеийг жижиг орчлон ертөнц гэдэг, төрөлхийн арга билигтэй байдаг. Жинхэнэ ариун ном болгон эрт дээр үеэс уламжилж ирсэн байдаг. Дураараа жоохон ч өөрчлөлт хийх, хамаагүй зүйлийг нэмж оруулах нь тэр номын бясалгалыг бусниулна, бясалгаад гэгээрэх зорилго нь бүтэхгүй болно. Гиймээс хийж байгаа бясалгалд чинь эр эм хос бясалгал

байхгүй бол түүнийг бясалгалдаа бүү оруул, оруулбал гажуудаж асуудал гарна. Ялангуяа манай Фалунь Дафагийн номонд эр эм хос бясалгал байхгүй, бид ч үүнийг ярьдаггүй. Энэ асуудлыг бид ингэж л үздэг.

Амь бие, сэтгэлийн хос бясалгал

Амь бие, сэтгэлийн хос бясалгалын талаар та бүгдэд урьд нь тайлбарласан. Амь бие, сэтгэлийн хос бясалгал гэдэг нь зан чанарыг бясалгахаас гадна мөн амь биеэ бясалгадаг. Өөрөөр хэлбэл энэ бодит бие өөрчлөгддөг. Өөрчлөгдөх явцад хүний эсүүд нь аажмаар дээд энергийн бие бодиор солигдох ба хөгшрөлт удааширна, хүний бие залуу нас руу ухарна, аажмаар ухарна, аажмаар хувирна. Энэ нь бүх бие эцэстээ дээд энергийн бие бодиор солигдож дуустал үргэлжилнэ. Тэр үед хүний бие нь аль хэдийн өөр төрлийн материас тогтсон бие болж хувирсан байна. Тэр бие бол миний дээр хэлснээр таван махбодиос гарсан, таван махбодид оршихгүй болсон болохоор энэ хүний бие нь хөгширч муудахгүй болсон.

Сүм хийдэд бясалгахад зөвхөн сэтгэлийг бясалгадаг, иймээс дасгал заадаггүй, амь биеийг бясалгадаггүй, тэр зөвхөн нирвааныг ярьдаг. Шагжамүнигийн заасан арга бол нирваан байсан, үнэндээ Шагжамүни өөрөө аугаа дээд түвшний Номтой байсан, өөрийнхөө биеийг дээд энергийн бие бодид хувиргаад авч явж чадах байсан. Гэхдээ ийм бясалгалын аргыг үлдээхийн тулд тэр өөрөө нирваалсан. Тэр яагаад ингэж заасан бэ? Хүний зууралдсан сэтгэлийг хамгийн дээд хэмжээгээр орхиулах, бүхнийг орхиулах, эцэст нь бодит биеэ хүртэл орхих, бүх сэтгэлийг үгүй болгоход оршдог. Хүнийг хамгийн дээд хэмжээгээр орхиулахын тулд тэр нирвааны замыг сонгосон. Иймээс үеийн үед лам хувраг нар нирвааны замаар явах болсон.

Нирваан гэдэг нь лам хувраг нас барахдаа махан биеэ орхиж сүнс нь гон-тойгоо дээш явахыг хэлдэг.

Дао-гийн системд амь биеийг бясалгахыг илүү анхаардаг. Тэнд бүх амийг аврахыг ярихгүй, шавийг сонгож авдаг учраас сонгосон сурагч нь маш сайн байдаг. Тиймээс үүнд арга увидасын зүйлийг ярьдаг, амь биеийг яаж бясалгахыг заадаг. Харин Буддын системийн энэ тусгай тогтсон бясалгалын аргад, ялангуяа Буддын шашны бясалгалын аргад үүнийг заадаггүй. Гэхдээ бүгд үүнийг ярьдаггүй юм биш, Буддын системийн дээд бясалгалын олон аугаа номонд бас ярьдаг, манай энэ номын бясалгалд үүнийг ярьдаг. Манай Фалунь Дафа-номонд өөрийн биеэ ч бясалгана мөн “Мөнхийн нярай хүүхэд” -ийг ч бясалгана, энэ хоёр бол ялгаатай зүйл. “Мөнхийн нярай хүүхэд” бас нэг янзын дээд энергийн бие бодиор бүтээгдсэн бие юм, гэхдээ тэр бидний энэ орон зайд хамаагүй илэрч болохгүй, мөн энэ орон зайд урт хугацаагаар энгийн хүний төрх хэлбэртэй байхын тулд бид заавал өөрийн бодит биетэй байх ёстой. Иймээс энэ бие хувирсны дараа түүний эсүүд нь дээд энергийн бие бодиор солигддог ч гэсэн түүний молекулын жагсах дараалал өөрчлөгдөхгүй, иймээс энэ бие нь энгийн хүний биенээс их ялгаатай харагдахгүй. Гэхдээ бас ялгаатай, тухайлбал энэ бие өөр орон зайд орж чаддаг.

Амь бие, сэтгэлийг хос бясалгадаг бясалгалууд нь хүний гаднах төрхийг их залуу харагдуулдаг, хүн өөрийнхөө жинхэнэ наснаас их хол зөрөөтэй харагддаг. Нэг удаа надаас нэгэн эмэгтэй асуусан: Багшаа, та намайг хэдэн настай гэж бодож байна? Үнэндээ, тэр дал хүрч байсан гэхдээ дөнгөж дөч гарам настай юм шиг харагдсан. Нүүр нь бараг үрчлээгүй, гэрэлтсэн цагаан царайтай, хацар нь улаа бутарсан туяатай, түүнийг яаж дал хүрсэн гэх юм бэ. Манай Фалунь Дафагийн бясалгагчдад ийм байдал гардаг. Жоохон наргиан болгож хэлэхэд, залуу охидууд нүүр царайгаа

цагаан сайхан байлгах гэж дандаа оо энгэсэг хэрэглэх дуртай. Би хэлбэл, хэрэв чи бие сэтгэлийн хос бясалгалаар тууштай явбал жамаараа тийм байдалд хүрнэ. Чамд оо энгэсэг хэрэглэх шаардлага байхгүй болох нь лавтай. Бид өөр иймэрхүү жишээг дурьдахаа больё. Урьд янз бүрийн мэргэжилд ихэнхдээ ахимаг настай хүмүүс зонхилдог байсан, намайг залуу хүнд тооцдог байсан. Одоо үед арай дээр болж байна, мэргэжил болгонд залуучуудын эзлэх хувь харьцангуй нэмэгдлээ. Үнэндээ би ч тийм залуу биш болсон. Би одоо 43 хүрчихлээ, тавин нас луу явж байна.

Номын бие (Фашэнь)

Буддын хөргөнд яагаад нэг орон байдаг вэ? Олон хүн үүнийг тайлбарлаж чаддаггүй. Зарим хүн ингэж хэлдэг: Буддын хөрөгний энэ орон бол Лам хувраг Буддын хөрөгний дэргэд ном уншсанаас үүссэн, өөрөөр хэлбэл лам хувраг түүний өмнө бясалгаснаас энэ орон үүссэн. Лам хувраг ч бай өөр хэн ч бай бясалгахад гарсан энерги нь нэг зүгт биш харин эргэн тойронд тарах ёстой. Хийдийн доторхи шал, тааз болон бүх хананд ижил орон үүсэх ёстой. Тэгвэл яагаад зөвхөн Буддын хөрөг дээрх орон тийм хүчтэй байдаг вэ? Ялангуяа алслагдсан ууланд, агуйд байгаа эсвэл хадан дээр сийлсэн Буддын хөрөг, зурган дээр үргэлж ийм орон байдаг. Яагаад ийм орон байдаг вэ? Зарим хүмүүс үүнийг янз бүрээр тайлбарладаг ч тодорхой хэлж чаддаггүй. Буддын хөрөг ийм оронтой байдаг үнэн учир нь түүн дээр аугаа гэгээрэгчийн Номын бие байдаг. Аугаа гэгээрэгчийн Номын бие тэнд байгаа учраас түүнд энерги байдаг.

Түүхэнд Шагжамүни болон Бодьсадва Гуанинь бодит хүмүүс байсан юм бол, тэд бясалгаж байсан, тэгвэл тэд бясалгагчид байсан биш гэж үү? Хүн Гурамсан ертөнцийн номоос давсан маш өндөр түвшинд бясалгахад Номын бие

гардаг. Номын бие хүний даньтиан-д үүсдэг, энэ нь Ном болон гон-оор бүтээгдсэн, өөр орон зайд илэрдэг. Номын биед тэр хүний асар их сүр хүч байдаг, Номын биеийн бодол санаа нь эзэн биед захирагддаг. Гэхдээ Номын бие нь өөрөө бас бүрэн төгс тусгаар, жинхэнэ бодит амь, тиймээс тэр өөрөө ямар ч зүйлийг бие даан хамааралгүйгээр хийж чадна. Номын биеийн хийж байгаа зүйл нь хүний Эзэн бодол тухайн зүйлийг яаж хийхийг хүссэнтэй яг адилхан. Хэрэв хүн ямар нэгэн зүйлийг тодорхой нэг байдлаар хийдэг бол түүний Номын бие түүнийг бас тэр байдлаар адилхан хийнэ, энэ бол бидний ярьж байгаа Номын бие юм. Би ямар нэг зүйл хийхэд, жишээ нь жинхэнэ бясалгаж байгаа шавь нарынхаа биеийг засаж өгөх гэх мэт зүйлийг бүгдийг миний Номын бие хийж чадна. Номын бие энгийн хүн шиг биетэй биш, энэ нь өөр орон зайд илэрдэг. Тэр бие нь тогтмол өөрчлөгддөггүй биш, харин том жижиг болж чаддаг. Заримдаа энэ нь маш том болно, толгой нь бүтнээр харагдахааргүй том болдог. Заримдаа маш жижиг болно, эсний хэмжээнээс ч жижиг болдог.

Аравнайлах

Үйлдвэрт хийсэн Буддын хөрөг, баримал бол зөвхөн нэг урлагийн бүтээл. Аравнайлах гэдэг нь Буддын Номын биеийг Буддын хөрөг, барималд урин ирүүлж ариусган амилуулсаны дараа энгийн хүмүүсийн дунд бодит биетэй болгон тахин шүтэх зан үйл юм. Бясалгадаг хүн сүсэг бишрэлтэйгээр бясалгахад Буддын хөрөг, баримал дээрх Номын бие номыг сахин хамгаалж, бас тэр хүнийг харж хандан ивээлдээ байлгадаг. Энэ бол аравнайлахын жинхэнэ зорилго юм. Үүнийг тогтсон ёс зан үйлийн дагуу ариун бодол гаргаж хийнэ, эсвэл маш өндөр түвшний аугаа гэгээрэгч, эсвэл бясалгалын маш өндөр түвшинд хүрсэн ийм чадвартай хүн энэ зүйлийг хийж чадна.

Сүм хийдэд Буддын хөрөг, баримлыг аравнайлахыг хийдэг, аравнайлаагүй Буддын хөрөг баримал нь увидасгүй гэж ярьдаг. Одоогийн сүм хийдийн лам хуврагуудын дотор жинхэнэ их багш үлдээгүй бүгд өөд болсон. Соёлын их хувьсгалаас хойш жинхэнэ уламжилсан ном заалгаагүй залуу лам хуврагын зарим нь одоогийн хийдүүдийн тэргүүн хамба болцгоосон, маш олон зүйлс уламжлагдан үлдээгүй. Хэрэв түүнээс аравнайлахын зорилго нь юу вэ? гэж асуувал аравнайлсны дараа Буддын хөрөг, баримал увидастай болно гэж хариулна. Энэ нь яаж увидастай болохыг тэр тодорхой тайлбарлаж чадахгүй. Иймээс тэр зөвхөн ёс төдий зан үйл хийнэ. Буддын хөрөг, баримал дотор бурханы жижиг судар хийж цаасаар нааж битүүмжлээд түүнд ном уншина, тэгээд аравнайлчихлаа гэнэ. Гэхдээ аравнайлж чадсан юм уу, үгүй юу? Энэ нь түүний яаж ном уншихаас шалтгаална. Шагжамүни ариун бодол гэж ярьдаг байсан, нэгэн сэтгэлээр анхаарлаа төвлөрүүлэн түүний бясалгаж байгаа номын үүдний оронг доргиотол ном уншвал аугаа гэгээрэгчийг урин залж болно. Аугаа гэгээрэгчийн нэгэн Номын бие Буддын хөрөг, баримал дээр ирэхэд л аравнайлах зорилго үр дүнд хүрнэ.

Зарим лам хувраг Ном уншиж байхдаа: Аравнайлж дууссаны дараа надад хэдийг өгөх бол? гэж бодож суудаг. Эсвэл тэр, тэр надад их муу хандах юм, гэж бодно, бас өшөөрхөн хорсоно, бусадтай зөрчилдөнө. Одоо Номын Төгсгөлийн Үе. Ийм үзэгдэл гарч байгааг үгүйсгэх аргагүй. Бид энд Буддын шашныг шүүмжилж байгаа юм биш, Номын төгсгөлийн үед зарим хийдүүд ариун биш болсон. Хэрэв толгойд нь ийм бодол дүүрэн байхад, ийм муу бодол гарахад тэр гэгээрэгч ирэх юм уу? Аравнайлах зорилгондоо хүрч огтхон ч чадахгүй. Гэхдээ бүгд тийм биш, бас зарим сайн хийдүүд, Дао-гийн сүм дуган бий.

Би нэг хотод нэгэн хуврагыг харсан, хав хар гартай. Тэр Буддын баримал дотор судар хийгээд хайхрамжгүй битүүмжилж байсан. Аман дотроо хэдэн үг бувтнаад л аравнайлж дууслаа гэсэн. Дахиад нэг Буддын баримал аваад хэдэн үг бувтнасан. Аравнайлалт хийх болгондоо дөчин юань авч байсан. Одоогийн лам хуврагууд аравнайлалтаар гүйлгээ арилжаа хийж мөнгө олдог болсон. Миний харснаар аравнайлалт үр дүнтэй болоогүй тэр ерөөсөө ч үүнийг хийж чадахгүй. Одоогийн лам хуврагууд бүүр ийм юм хийдэг болсон. Намайг өөр бас юу харсан гээч? Хийд дотор Буддын сүсэгтэн гэмээр нэг хүн Буддын баримлыг аравнайлж байсан. Тэр нэг толь бариад нарны гэрлийг Буддын баримал дээр тусгаад аравнайлал боллоо гэсэн. Ийм инээдэмтэй болсон! Өнөөдөр Буддын шашин ийм хэмжээнд хүрсэн, энэ бол их түгээмэл байдал юм.

Нанжин хотод нэг том Буддын хүрэл хөшөө бүтээж Хонг Конг-ийн Лантау арал дээр босгосон, маш том Буддын хөшөө. Дэлхийн өнцөг булан бүрээс маш олон лам хуврагууд хөшөөг аравнайлахаар ирцгээсэн, тэдний нэг нь толь бариад нарны туяаг Буддын хөшөөний нүүрэн дээр тусгаад аравнайлж байна гэсэн. Тийм том ёслолын сүрлэг үйл ажиллагаанд хүртэл ийм зүйл хийдэг болсон. Надад тун харамсалтай санагдсан! Шагжамүни Номын төгсгөлийн үед лам хуврагууд бусдыг аврах нь бүү хэл өөрсдийгээ аврахад ч хэцүү болно гэж хэлсэнд гайхах юм байхгүй. Түүнээс гадна их олон лам хуврагууд Буддын ном судрыг өөрийнхөө өнцгөөс тайлбарлаж хөрвүүлсэн байдаг, Ванму хатны судар ч хийдийн дотор орчихсон, Буддын үндсэн номын биш зүйлүүд бас хийдийн дотор орчихсон, тун эмх замбараагүй, одоо маш замбараагүй болсон. Мэдээж, жинхэнэ бясалгаж байгаа лам хуврагууд ч бас байдаг, тэд нилээд сайн. Аравнайлах гэдэг нь үндсэндээ аугаа гэгээрэгчийн Номын биеийг залж Буддын хөрөг дээр ирүүлэхийг хэлдэг, энэ бол аравнайлалт юм.

Буддын хөрөг, баримлыг аравнайлаагүй бол тахиж болохгүй. Тахивал ноцтой асуудал гарна. Ямар ноцтой асуудал гарах вэ? Хүний сэтгэл зүй судлаачид хүний тархины үйл ажиллагаа ба бодол нь бие бодь үүсгэдгийг илрүүлсэн. Бид их өндөр түвшнээс харахад энэ нь үнэхээр бие бодь болохыг мэдсэн, гэхдээ энэ бие бодь бидний өнөөгийн судалгаа шинжилгээнд илэрсэн шиг тархины долгион хэлбэртэй биш юм. Харин энэ нь хүний бүхэл бүтэн тархины хэлбэртэй юм. Энгийн хүн аливаа зүйлийн талаар бодох үед түүнээс гардаг зүйл бол ерөнхийдөө нэг тархины хэлбэртэй. Энэ нь энергигүй учраас гарангуутаа удалгүй сарниж алга болно. Харин бясалгагч хүний энерги хадгалагдан үлдэх хугацаа нь хавьгүй удаан байдаг. Буддын хөрөг баримал үйлдвэрт бүтээгдсэний дараа сэтгэхүйтэй болно гэсэн үг биш, тийм юм байхгүй. Зарим Буддын хөрөг, баримлыг аравнайлаагүй байхад, хийдэд аваачиж аравнайлсан ч үр дүнд хүрээгүй байдаг. Хэрэв аравнайлыг ямар нэгэн хуурамч чигон багшаар эсвэл буруу номын хүнээр хийлгэвэл бүр ч аюултай, үнэг эсвэл үен дээр нь гарчихна.

Хэрэв чи аравнайлагдаагүй Буддын хөрөг баримлыг тахин шүтвэл маш аюултай. Энэ нь хэр аюултай вэ? Би дээр хэлсэн, хүн төрөлхтөн өнөөдрийг хүртэл хөгжихөд бүх юм гажуудал доройтолд орсон, бүхэл нийгэм дэх болон орчлон ертөнц даяархи бүх зүйлс хойно хойноосоо дараалан муудаж, доройтож байна, энгийн хүний бүх асуудал тэднээс өөрсдөөс нь шалтгаалдаг. Ариун номыг олъё, зөв замаар явъя гэсэн ч их хэцүү, тал талаас үймүүлдэг. Буддад мөргөж гуйя гэсэн ч аль нь Будда юм бэ? Гуйя гэсэн ч маш хэцүү. Үнэмшихгүй бол би тайлбарлая. Аравнайлаагүй Буддын хөрөг, барималд эхний хүн мөргөж залбирахад л хэрэг бишдэнэ. Одоо үед хэр олон хүн Буддад залбирч гэгээрлийн хутагт хүрэхийг хүсч мөргөдөг вэ? Тийм хүн тун цөөн. Буддад мөргөж байгаа ихэнх хүмүүсийн зорилго юу байдаг

вэ? Тэд гай зовлонгоосоо салах, саад бэрхшээлээ арилгах, баян болгохыг л гуйдаг. Буддын шашны сударт ийм зүйл байдаг юм уу? Тийм зүйлс ердөө ч байдаггүй.

Буддад мөргөж байгаа хүн мөнгөтэй болохыг хүсэн Буддын хөрөг, барималд эсвэл Бодьсадва Гуанинь юмуу Рулай бурхны хөрөг, барималд сөхрөн “Мөнгөтэй болоход минь туслаач” гэж гуйвал нэг цогц бодол үүсчихнэ. Буддын барималд хандаж залбирсан болохоор энэ нь тэр дороо Буддын хөрөг дээр бууна. Өөр орон зайн энэ бие том жижиг болон хувирч чаддаг, энэ биед буухад Буддын хөрөг тархитай болно, бодолтой болно, гэхдээ түүнд бие байхгүй. Өөр хүн бас очиж мөргөнө, энэ мэтээр мөргөсөөр түүнд хэсэг энерги өгдөг. Ялангуяа бясалгаж байгаа хүн залбирвал бүр аюултай, нэг залбирахад л түүнд аажмаар энерги өгч бодит хэлбэртэй бие нь үүснэ. Гэхдээ энэ бие нь өөр орон зайд үүсдэг. Тэр нь бий болсныхоо дараа өөр орон зайд оршдог бөгөөд орчлон ертөнцийн багахан ёсыг мэддэг. Иймээс тэр хүний төлөө бага зэрэг зүйл хийдэг, ингээд түүнд багахан гон гардаг. Гэхдээ тэр хүмүүст өртөгтэй, болзолтойгоор тусална. Өөр орон зайд тэр чөлөөтэй хөдөлж мөн энгийн хүмүүсийг хялбархан удирдаж чадна. Энэ бодит бие нь Буддын хөрөг, баримлын хэлбэртэй яг адилхан. Хүний залбирал мөргөл нь ингэж хуурамч Бодьсадва Гуанинь, дуураймал Рулай бурханыг бий болгодог, тэдгээр нь Буддын хөрөг, баримлын хэлбэр дүрстэй яг адилхан. Гэхдээ хуурамч Будда, хуурамч Бодьсадвагийн бодол нь маш их муу, мөнгөний төлөө байдаг. Тэд өөр орон зайд үүссэн, сэтгэн бодох чадвартай бөгөөд бага зэрэг ёс зарчим мэддэг, тэр нэг их том муу зүйл хийж зүрхлэхгүй, гэхдээ бага зэрэг муу зүйл хийчихнэ. Заримдаа бас хүнд тусална, тэгэхгүй тэр чигтээ муу байвал устгагдана. Яаж тусалдаг вэ? Нэг хүн ингэж залбирна, Будда надад туслаач, манай гэрт нэг маань өвчтэй байна. За чамд тусалъя. Түүний бодол нь мөнгөний төлөө учраас тэр чамаар хандивын хайрцганд

мөнгө хийлгүүлнэ. Хандивын хайрцганд ахиухан мөнгө хийвэл өвчин хурдан эдгэнэ. Тэр тодорхой хэмжээний энергитэй учраас өөр орон зайнаас энгийн хүнийг удирдаж чадна. Ялангуяа гон-той хүн очиж залбирвал бүр ч аюултай. Бясалгадаг хүн юу гуйж залбирах вэ дээ? Мөнгө. Та бүхэн боддоо, бясалгаж байгаа хүн мөнгөний хойноос явах ямар хэрэгтэй юм? Гэр бүлийнхээ хүний гай барцад, өвчнийг арилгахын төлөө гуйж залбирах нь гэр бүлийн сэтгэлд зууралдсан болно. Чи бусад хүмүүсийн хувь тавиланг удирдахыг хүсч байна уу? Хүн бүр өөрийн гэсэн хувь тавилантай! Чи түүнд мөргөж амандаа бувтнана: Намайг мөнгөтэй болоход туслаач, за тэгээд тэр чамд тусална. Тэр чамайг улам их мөнгө гуйхыг тэсч ядан хүлээнэ, чи их мөнгө хүсвэл тэр чамаас улам их зүйлийг авч чадна. Энэ бол тэнцвэртэй арилжаа. Хүмүүс хандивын хайрцганд хангалттай мөнгө хийсэн, тэр энэ мөнгөнөөс чамд өгнө. Яаж өгөх вэ? Үүдээр гарч яваад магадгүй мөнгөтэй түрүүвч олно эсвэл ажлын газар чинь мөнгөн шагнал өгнө. Тэр чамайг ямар нэгэн байдлаар мөнгөтэй болгоно. Тэр болзолгүй бол чамд юу гэж туслах юм? Алдахгүй бол олохгүй. Түүнд гон хэрэгтэй учраас чиний гон-ыг авна, эсвэл тэр чиний бясалгаж гаргасан үрлийг авна. Тэр үүнийг л авдаг.

Эдгээр хуурамч Будда заримдаа маш их аюултай. Тэнгэрийн мэлмий нь нээгдсэн олон бясалгагчид Будда-г харсан гэж боддог. Магадгүй нэг нь ингэж ярина, өнөөдөр энэ хийдэд хэсэг Будда ирсэн, энэ хэсгийг тийм тийм нэртэй Будда тэргүүлж явсан. Тэр бас өчигдрийн ирсэн хэсэг ямархуу байсан, өнөөдөр ирсэн хэсэг ямар байгааг дүрслэн ярина, мөн нэг хэсэг нь явангуут дараагийнх нь удахгүй ирдэг гэдэг. Тэд нар хэн бэ? Тэд зөвхөн энэ төрөлд харьяалагдана. Тэд жинхэнэ Будда биш, тэд бол хуурамч, ийм төрөл маш их байдаг.

Хэрэв хийдийн дотор ийм байдал гарвал бүр ч аюултай. Лам хуврагууд түүнд мөргөвөл, тэднийг тэр удирдана: Чи надад мөргөж байгаа юм биз дээ? Чи надад ил тод мөргөлөө! За, чи бясалгах хүсэлтэй биз дээ? Би чамайг хариуцъя, би чамд яаж бясалгахыг зааж өгье, гэнэ. Тэр чамд үүнийг зохицуулж өгнө, хэрэв чи бясалгаад төгс болбол, хаашаа явах юм? Бясалгал түүгээр зохицуулагдсан болохоор дээд аль ч Номын үүд чамайг хүлээж авахгүй. Тэр зохицуулсан, иймээс чи хойшид түүнийг л дагах болно. Чи ямар ч үр дүнгүй бясалгасан биш гэж үү? Одоо хүн төрөлхтөн бясалгаж гэгээрлийн хуггийг олно гэвэл маш хэцүү гэж би хэлсэн. Ийм байдал маш түгээмэл, бидний их олон хүн Буддын туяаг нэртэй уулнуудаар, том голын хөвөөгөөр харсан. Тэдний ихэнх нь бүгд энэ төрөл, тэр энергитэй, өөрөө илэрч гарч чаддаг. Жинхэнэ аугаа гэгээрэгч бол хамаагүй илэрдэггүй.

Урьд цагт газрын Будда, газрын Дао гэж нэрлэдэг байсан, харьцангуй цөөн байсан, харин одоо бол тэд маш олон болсон. Тэд муу зүйл хийхэд дээгүүр бас тэднийг устгана, тэр үед тэд зугтаж Буддын хөрөг, баримал дээр гардаг. Энгийн хүний энэ ёсонд аугаа гэгээрэгчид тэр болгон оролцоод байдаггүй, аугаа гэгээрэгчийн түвшин өндөр байх тусам энгийн хүмүүсийн ёсыг бүр ч эвдэхгүй, жоохон ч оролцохгүй. Юу гэж аянгаар гэнэт Буддын хөрөг, баримлыг ниргэх юм, тэд ийм зүйл хийхгүй, иймээс хуурамч бурхан Буддын хөрөг, баримал дээр гарвал дээд амь бодь оролдохгүй зүгээр орхино. Түүнийг устгах болоход тэр мэдээд зугтана. Тэгэхээр чиний харсан Бодьсатва бол жинхэнэ Бодьсатва Гуанинь мөн үү? Чиний харсан Будда бол жинхэнэ Будда мөн үү? Хэлэхэд тун хэцүү.

Та нараас олон хүн магадгүй ингэж бодно, бид гэртээ байгаа Буддын хөрөг, баримлыг яах вэ? Магадгүй олон хүн

намайг санасан. Сурагчдынхаа бясалгалд туслахын тулд би чамд ингэж хийж болохыг хэлье: Чи миний номыг бариад (учир нь миний фото зураг номонд байгаа) эсвэл миний фото зургийг гаргаад гартаа Буддын хөрөг, баримлыг бариад, том лянхуа цэцгийн мутарын барилт хий, дараа нь надаас гуйж байгаатай адил аравнайлж өгөхийг багшаасаа хүс. Хагас минутын дотор энэ нь шийдэгдэнэ. Та нарт хэлэхэд үүнийг зөвхөн манай бясалгагчдад хийж өгч болно, энэ аравнайлалт танай хамаатан саданд болон найз нөхдөд үйлчлэхгүй, бид зөвхөн бясалгаж байгаа хүнийг л хариуцна. Зарим хүмүүс багшийнхаа фото зургийг хамаатан садан, найз нөхдийнхээ гэрт тавьж муу сүнсийг зайлуулах гэдэг, би энгийн хүмүүст муу юмыг зайлуулж өгөхийн тулд байгаа юм биш. Энэ бол багшийгаа тун хүндлэхгүй байгаа хэрэг юм.

Газрын Будда, газрын Дао-гийн тухай ярихад өөр нэг байдал байдаг, эртний Хятадад их олон хүн алс ууланд болон ой хөвчид бясалгадаг байсан. Одоо яагаад байхгүй болсон бэ? Үнэндээ байхгүй болсон биш, харин энгийн хүмүүст мэдүүлэхгүй, тэд жоохон ч цөөрөөгүй, эдгээр хүмүүс бүгд ер бусын чадвартай. Сүүлийн жилүүдэд тэд байхгүй болоогүй, эдгээр хүмүүс бүгд байсаар л байгаа. Одоо дэлхий дээр хэдэн мянгаараа байдаг, манай оронд харьцангуй их байдаг. Ялангуяа тэдгээр нэртэй том уулс, гол мөрний дагуу байдаг, зарим өндөр уулнуудад ч байдаг. Тэд агуйныхаа үүдийг ер бусын чадвараар хаадаг, тэгэхээр чамд тэдний байгаа нь харагдахгүй. Тэдний бясалгалын явц нь их удаан, арга нь харьцангуй болхи, бясалгалын гол үндсийг бариагүй. Харин бид бол шууд хүний сэтгэл рүү чиглэсэн, бидний орчлон ертөнцийн хамгийн дээд мөн чанарын дагуу бясалгадаг, орчлон ертөнцийн хэлбэрийн дагуугаар бясалгадаг, мэдээж гон их хурдан өснө. Яагаад гэвэл бясалгалын ном нь пирамид хэлбэртэй адил, зөвхөн төвийн зам нь гол зам юм. Тэдгээр хажуугийн жижиг замаар

бясалгагчдын зан чанарын түвшин магадгүй өндөр биш, бясалгаад өндөрт хүрээгүй байхад гон нь нээгдчихдэг, гэхдээ тэр нь жинхэнэ бясалгалын гол замаас их хол зөрөөтэй.

Тэр бас шавьд уламжлан заадаг. Энэ бясалгалаар зөвхөн тийм л өндөрт хүрнэ, бясалгалын болон зан чанарын түвшин тэр хүртэл л өснө, иймээс тэр уламжилсан шавь бүгд тэр өндөрт л бясалгана. Бясалгалын зам нь гол замаасаа хазайх тусам дэлхийн жижиг замын бясалгалууд нь улам их ярвигтай болдог, бясалгалын арга нь бас төвөгтэй, голыг нь барьж бясалгаж чаддаггүй. Бясалгалд хүн гол нь зан чанарыг бясалгах хэрэгтэй. Тэд үүнийг ойлгодоггүй хэвээр, зөвхөн бэрхшээл, зовлон амсаж байж бясалгана гэж үздэг. Иймээс тэд их урт хугацааны дараа, хэдэн зуун жилээр, мянга гаруй жил бясалгаж байж бага зэрэг гон олж авдаг. Үнэндээ зовлон туулснаар тэдний гон өссөн юм биш. Тэд яаж гон-той болсон бэ? Жирийн хүнтэй адил, залуудаа олон зууралдсан сэтгэлтэй байдаг, хөгширч он жилүүд өнгөрөх тусам ирээдүйдээ найдах итгэлгүй болно. Тэдгээр зууралдсан сэтгэл нь аажмаар үгүй болдог. Салаа замын бясалгалууд бас энэ аргыг хэрэглэдэг. Тэд амгаланд орж завилан суун бясалгаснаар, бэрхшээл зовлон туулж дээш бясалгахад гон нь өсдөг гэж олж мэдсэн. Гэхдээ тэд өөрийнхөө энгийн хүний зууралдсан сэтгэл нь урт удаан, хэцүү он жилүүдийн туршид аажмаар үгүй болж тэр сэтгэлийг орхисноос гон -нь өссөн гэдгийг мэддэггүй.

Бид бол энэ сэтгэл рүү чиглэн заана, тэдгээр сэтгэлийг орхисноор бясалгалдаа их хурдан амжилт олно. Би зарим газраар явж байхдаа олон жилээр бясалгасан тийм хүмүүстэй их тааралддаг байсан, тэд биднийг энд байгааг хэн ч мэдэхгүй, чиний хийж байгаа зүйлд бид оролцохгүй, үймүүлэхгүй гэдэг. Эдгээр хүмүүс гайгүй сайн талд хамаардаг.

Бас зарим муу талынхан ч байдаг, мууд нь бид бас арга хэмжээ авна. Жишээлбэл би анх удаа Гүйжоу хотод хичээл зааж байхад нэг хүн намайг хайж ирээд түүний өвгөн багш нь надтай уулзахыг хүсч байна гэсэн. Тэр өвгөн багшийнхаа хэн болохыг, түүний хэр олон жил бясалгасан талаар ярьсан. Надад тэр хүн билиг чий-тэй их муу, шаравтар царайтай харагдсан. Надад түүнтэй уулзах зав алга байна гэж хэлсэн. Улмаар түүний өвгөн багш нь их дургүйцэж надад төвөг учруулж эхэлсэн, өдөр болгон намайг үймүүлдэг болсон. Би хүнтэй тэмцэлдэх дургүй, түүнтэй тэмцэлдэх ч шаардлага байхгүй. Тэр муу зүйл авчрах болгонд би зүгээр л түүнийг нь арилгаад лекцээ үргэлжлүүлдэг байсан.

Мин гүрэн-ий²⁸ үед Дао-гийн нэг бясалгагч байсан, түүний бясалгаж байх үед могойн сүнс биенд нь шүглэсэн. Сүүлд нь тэр бясалгаад үр дүнд хүрч чадалгүй нас барсан. Тэр могой энэ Дао-гийн бясалгагчийн биеийг эзэмдээд хүний хэлбэрээр бясалгасан. Нөгөө хүний өвгөн багш нь хүн хэлбэртэй тэр могой байсан. Түүний мөн чанар нь өөрчлөгдөөгүй учраас тэр аварга могой болж хувираад намайг үймүүлсэн. Надад тэр дэндүү хэтэрч байгаа санагдсан, тэгээд түүнийг гартаа барьж аваад хайлуулах гон гэдэг маш хүчтэй гон хэрэглэж түүний доод биеийг нь ус болгон хайлуулсан. Түүний дээд бие нь зугтсан.

Нэг өдөр, Гүйжоу хот дахь дадлагажуулах төвийн зааварлагчтай тэр хүний шавь нь ирж уулзаад түүний өвгөн багш тэр эмэгтэйтэй уулзахыг хүсч байна гэсэн. Зааварлагч уулзахаар очсон, агуй руу ороход хав харанхуйд сууж байгаа хүний дүрс харсан, түүний зөвхөн ногооноор

²⁸ Мин гүрэн- Хятадын 1368-1644 оны үе

гэрэлтсэн нүднээс өөр юу ч харагдахгүй байсан. Түүний нүд нээгдэхэд агуй нь гэрэлтэж, нүдээ анихад нь агуй хав харанхуй болж байсан. Тэр нутгийн хэллэгээр ярьсан: Ли Хонжи энд дахин ирэх гэж байна, бидний хэн нь ч энэ удаа дахин төвөг учруулахгүй. Би буруу юм хийсэн. Ли Хонжи хүнийг аврахаар ирсэн. Түүний шавь: Өвгөн багшаа босдоо, хөл чинь яасан бэ? гэж асуусан. Тэр босч чадахгүй болсон, миний хөл гэмтсэн гэж хэлсэн. Яагаад гэмтсэнийг асуухад тэр өөрийнхөө үймүүлсэн тухайгаа ярьсан. Бээжингийн 1993 оны Дорно дахины эрүүл мэндийн үзэсгэлэн яармаг дээр тэр дахин намайг үймүүлсэн. Тэр үргэлж муу юм хийдэг байсан, миний Дафа-г заахад гай болсон учраас би түүнийг бүрмөсөн устгасан. Тэр устгагдсаны дараа, түүний хамсаатнууд нь хөгшин залуугүй, эрэгтэй эмэгтэйгүй цөм тэмцэлдэхийг хүссэн. Тэр үед би хэдэн үг хэлсэн. Тэд бүгд цочин айж хэн нь ч юу ч хийж зүрхлээгүй. Тэд бас юу болж байгааг ойлгосон. Тэдний зарим нь их удаан хугацаагаар бясалгал хийсэн ч ердөө энгийн хүн хэвээрээ л байсан. Аравнайлалттай холбогдуулан энэ хэдэн жишээг би ярилаа.

Жу Юу Кэ (Ид шидийн анги зүйл)

Жу Юу Кэ гэж юу вэ? Бясалгалын хүрээнд маш олон хүн чигон заах явцдаа үүнийг ч бас бясалгалын нэг зүйл болгон оруулдаг. Үнэндээ энэ бол бясалгалын хүрээний зүйл биш. Тэр бол нууц арга барил, тарни, мэрэгжил уламжилж байгаатай адил байдаг. Тэд үүнийг дүрс тэмдэг зурах, хүж уугиулах, цаас шатаах, тарни унших гэх мэтийн хэлбэрээр хийдэг. Энэ нь өвчнийг эдгээж чадна, мөн өвчин эдгээх арга нь маш их онцлог. Жишээ нь хэн нэгний нүүрэн дээр хатиг гарсан байвал тэр бийрээ улаан шунханд дүрээд газар дээр тойрог зурна, тойрогны голд нь “х” хэрээс тавина, энэ хүнийг тойргийн дунд зогсоогоод тэр тарни уншиж эхэлнэ. Дараа нь бийрээ улаан шунханд дүрээд түүний нүүрэн дээр

тойргууд зурна, зурангаа тарни уншаад л, зурсаар хатиган дээр очиж нэг цэг тавина, тарниа ч уншиж дуусна, одоо зүгээр болсон гэж хэлнэ. Нөгөө хүн хатигаа илж үзэхэд үнэхээр жижгэрч өвчингүй болсон байна, үр дүн гарсан. Тэр хөнгөн өвчнийг эдгээж чадна харин хүнд өвчнийг бол чадахгүй. Гар өвдвөл яах вэ? Тэр тарни уншиж эхлээд чамайг гараа алдал гэнэ, нэг гарын чинь алганы хэгү²⁹ сүвэнд үлээнэ, нөгөө гарын хэгү сүвээр гаргана. Чи хөнгөн салхи сэвэлзэхийг мэдэрнэ, гараа бариад үзэхэд урьдынх шиг өвдөхөө больсон байна. Мөн зарим нь цаас шатаах, дүрс тэмдэг зурах, дүрс тэмдэг наах гэх мэт аргыг хэрэглэдэг, тэд ийм л зүйл хийдэг.

Дао-гийн системийн дэлхийн жижиг замд амь биеийг бясалгахыг ярьдаггүй. Тэд мэрэг төлөг үзэх, фэнг шүй шинжих, муу сүнсийг зайлуулах, мөн өвчин эдгээхийг л хийдэг. Эдгээр зүйлийг дэлхийн жижиг замын урсгалд үргэлж хэрэглэдэг. Тэр нь өвчнийг эдгээж чадна, гэхдээ тэдний хэрэглэдэг арга нь сайн биш. Бид тэдний өвчин эдгээхдээ юу хэрэглэдгийг яриад яахав, манай Дафагийн бясалгагч үүнийг хэрэглэж болохгүй, яагаад гэвэл эдгээр нь их доогуур маш муу мэдээлэлтэй байдаг. Эртний Хятадад эмчилгээний аргуудыг анги зүйл болгон хуваадаг байсан. Жишээ нь: Яс барих арга, зүү төөнүүр, массаж, бариа засал, цэг дарах, чигон эмчилгээ, эмийн ургамлаар эдгээх гэх мэт олон ангилалд хуваадаг. Өвчнийг эдгээх арга болгоныг нэг анги зүйл гэдэг. Энэ Жу Юу Кэ арван гурав дугаарт ордог учраас түүний бүтэн нэрийг Жу Юу арван гурав дахь анги зүйл гэж нэрлэдэг. Жу Юу Кэ бол манай бясалгалын хүрээнд харъяалагдах зүйл биш, тэр нь бясалгалаар гаргасан гон биш, харин энэ бол нэг төрлийн арга увидасын зүйл юм.

²⁹ хэгү-гарын ард эрхий хуруу долоовор хурууны дунд орших цэг

Зургаадугаар лекц

Бясалгалын солиорол

Бясалгалын хүрээнд бясалгалын солиорол гэдэг нэг яриа байдаг. Энэ нь нийтэд нилээд хүчтэй нөлөөлсөн. Ялангуяа зарим хүмүүс энэ талаар хэт дэгсдүүлж их цуурснаас зарим хүн чигон-оор хичээллэхээс айдаг болсон. Хүмүүс чигон-оор хичээллэхэд бясалгалын солиорол болдог гэж сонсоод бясалгаж зүрхэлдэггүй. Би та бүгдэд хэлье, үнэндээ бясалгалын солиорол гэж ердөө байдаггүй.

Нилээд их хүний сэтгэл нь зөв биш байснаас болж сүнс ба амьтан шүглэдэг. Тэдний эзэн бодол нь өөрийгөө эзэмдэж чаддаггүй, харин үүнийг тэд гон гэж андуурдаг. Биед нь шүглэсэн сүнс тэднийг эзэмдэж, ухаан мэдрэлийг нь үймүүлж орилж бахируулна. Хүмүүс чигон-оор хичээллэхэд ийм болдог гэж хараад, бясалгал хийхээс зүрхшээдэг. Олон хүн үүнийг гон гэж боддог, гэхдээ үүнийг яаж чигон бясалгал гэх юм? Энэ бол зөвхөн өвчин эдгээх, бие сайжруулах хамгийн доодын доод байдал, гэхдээ энэ нь маш их аюултай. Чи өөрөө ингэж хийж хэвшвэл, чиний эзэн бодол өөрийгөө байнга удирдаж чадахгүй байвал чиний бие магадгүй дэд бодлоор, гадны мэдээллээр, шүглэсэн сүнс ба амьтан гэх мэтээр эзэмдүүлнэ. Чи магадгүй зарим аюултай үйлдэлд автаж бясалгагчдын хүрээнд хор хөнөөл учруулна. Энэ бол хүний сэтгэл зөв биш байснаас болдог, өөрийгээ гайхуулах сэтгэлд автсанаас болдог, энэ бол бясалгалын солиорол биш. Зарим хүн яаж чигон багш болсныг нь мэдэхгүй, тэд өөрсдөө бас бясалгалын солиорлыг ярьдаг. Үнэндээ чигон-оор хичээллэхэд бясалгалын солиорол гэж гарахгүй. Ихэнх хүн энэ үгийн талаар уран зохиол, ушугийн ном гэх мэт зүйлээс мэдэж авсан. Үнэмшихгүй бол чи

эртний номноос эсвэл бясалгалын номноос хайж болно, ийм зүйл тэнд байхгүй. Бясалгалын солиорол гэж яаж байх юм? Үндсэндээ ийм зүйл гарах боломжгүй.

Энгийн хүмүүс бясалгалын солиорлыг хэдэн янз байдаг гэж үздэг. Миний сая дурьдсан бол эдгээр хэлбэрийн нэг нь юм. Хүн буруу бодол санаанаасаа болж сүнс болон амьтанг өөртөө татдаг, мөн ямар нэг чигон байдлыг хөөцөлдөж өөрийгөө гайхуулах гэх мэт янз бүрийн сэтгэлтэй байдаг. Зарим нь шууд ер бусын чадвартай болохын хойноос хөөцөлддөг эсвэл хуурамч чигон-оор хичээллэдэг. Тэд чигон-оор хичээллэхдээ өөрийнхөө эзэн бодлыг сул тавиад сурчихдаг, юу болж байгааг ч мэдэхгүй болж, биеэ бусдад өгнө. Тэдний оюун ухаан нь баларч бие нь тэдний дэд бодлоор юмуу гадны мэдээллээр эзэмдүүлж зарим сонин зан авир үзүүлдэг. Тэр хүнийг байшингаас үсэр гэвэл тэр үсэрнэ, түүнийг ус руу үсрээд ор гэвэл тэр ус руу үсэрнэ. Тэр өөрөө амьдрахыг ч хүсэхгүй болж бусдад биеэ сул өгчихдөг. Энэ бол бясалгалын солиорол биш харин буруу замаар чигон бясалгал хийснийх, эхэндээ санаатайгаар ингэж хийдэг байснаас болсон. Олон хүн бие нь ганхаж савлаж байхыг чигон бясалгал гэж үздэг. Хэрэв үнэхээр ийм байдалд бясалгах юм бол маш ноцтой үр дагаварт хүргэнэ. Энэ бол чигон бясалгал биш, энэ нь энгийн хүний зууралдсан ба хөөцөлдөх сэтгэлээс болдог.

Чигон-оор хичээллэхэд гардаг өөр нэг байдал бол, чий нь биеийн хаа нэгтээ түгжрэхэд юмуу эсвэл чий толгойн оройд гараад бууж чадахгүй болоход хүн айдаг. Хүний бие бол нэг жижиг орчлон ертөнц юм. Ялангуяа Дао-гийн системийн бясалгалд, чий гарц дундуур нэвтрэхэд ийм төвөгтэй байдал гардаг. Хэрэв нэвтэрч чадахгүй бол чий тэндээ эргэлдсээр байдаг. Зөвхөн толгойн оройд ч биш биеийн бусад хэсэгт бас ийм байдал гардаг, гэхдээ хүний хамгийн сэргэг газар бол толгойн оройд юм. Чий толгойн

орой хүртэл өгсөөд дараа нь доош буухдаа гарцаар нэвтэрч чадахгүй үед түүний толгой нь хүнд оргиж хөөсөн мэт санагдана, зузаан чий-н малгай өмссөн юм шиг гэх мэт мэдрэмж төрдөг. Гэхдээ чий нь юунд ч нөлөөлөхгүй ямар ч хүндрэл бэрхшээл учруулахгүй мөн ямар нэгэн өвчин үүсэх шалтгаан болохгүй. Зарим хүн чигон-ы талаар үнэнийг мэддэггүй, тэд учир битүүлэг тайлбар гаргаж замбараагүй байдал бий болгосон. Хүмүүс чий нь толгойн оройд гараад бууж ирэхгүй бол бясалгалын солиоролд орж болохоо байдаг, замаа алддаг гэх мэтээр ойлгодог. Эцэст нь олон хүн үүнээс айдаг.

Чий нь толгойн оройд гараад буухгүй бол энэ нь зөвхөн түр зуурын байдал. Зарим хүний хувьд энэ нь хагас жилээр ч юмуу их удаанаар үргэлжилж магад, бас тэгээд ч бууж ирэхгүй. Хэрэв тийм бол жинхэнэ чигон багш олоод буулгуулж болно. Тэгвэл бид бясалгал хийхэд аливаа чий гарцаар нэвтэрч чадахгүй байвал, чий нь бууж ирэхгүй байвал өөрийн зан чанар луугаа хар, аль нэг түвшинд хэтэрхий удаанаар гацсан юм биш үү, зан чанараа дээшлүүлэх ёстой! Чи зан чанараа үнэхээр сайжруулах юм бол чий доош буухыг үзнэ. Чи нэг л хэвээрээ биендээ гон хувиргахыг чухалчлаад зан чанараа сайжруулахыг гол анхаарахгүй байвал тэр чиний зан чанар дээшлэхийг хүлээж байдаг, тэгсэн цагт л бүхэлдээ өөрчлөлт гарна. Хүний чий таглагдаж хаагдсанаас ямар ч асуудал үүсэхгүй, энэ нь голдуу бидний өөрсдийн сэтгэл санаанаас болдог. Үүнээс гадна хуурамч чигон багш нар чий толгойн оройд гараад гацвал байдал бишдэнэ гэж хэлэхийг сонсчихоод тэр айчихдаг. Ингэж айвал энэ нь түүнд үнэхээр зарим гайг авчирч магад. Чи айж байвал энэ нь айх сэтгэл юм. Энэ нь зууралдсан сэтгэл биш гэж үү? Чамд зууралдсан сэтгэл гарахад түүнийг хаях ёстой биш үү? Улам их айх тусам улам өвчин юм шиг болно, заавал чиний энэ зууралданги

сэтгэлийг орхиулна. Чи энэ сургамжаас суралцсанаар айх сэтгэлийг орхиж дээшилнэ.

Бясалгагч хүн цаашдаа бясалгахад таатай байж чадахгүй, учир нь түүний биед олон янзын гон гарна, бүгд маш их хүчтэй зүйлс, чиний бие дотуур ийш тийш хөдлөхдөө чамайг эвгүйцүүлнэ. Чиний таагүй байгаа гол учир нь чи өөрийгөө үргэлж ямар нэгэн өвчин туссан байх гэж айдгаас юм. Үнэндээ чиний биенд бий болсон зүйлс бол нилээд хүчтэй, бүгд гон, ер бусын чадвар, мөн олон амь бодиуд юм. Тэд хөдлөхөд чиний бие загатнана, өвдөнө, таагүйрхэнэ гэх мэт. Сэрэх мэдрэлийн төгсгөлүүд их мэдрэмтгий, янз бүрийн шинж тэмдэг илэрдэг. Чиний бие дээд энергийн бие бодиор бүрэн хувираагүй бол чамд ийм мэдрэмж байна. Гэхдээ үүнийг сайн зүйл гэж үзэх хэрэгтэй. Бясалгадаг хүний хувьд, хэрэв чи өөрийгөө үргэлж энгийн хүн шиг үзэж, үргэлж өвчтэй гэж бодоод байвал яаж бясалгах юм? Бясалгалын явцад саад бэрхшээл тохиолдоход чи өөрийгөө энгийн хүнтэй адил үзсэн хэвээр байвал, би үүнийг чиний зан чанар тэр үед энгийн хүний түвшинд унасан гэж хэлнэ. Наанадаж энэ асуудал дээр чи энгийн хүний түвшинд унасан.

Бид жинхэнэ бясалгаж байгаа хүний хувьд асуудалд энгийн хүний байр суурьнаас биш харин их өндөр түвшнөөс хандах хэрэгтэй. Чи өөрийгөө өвчтэй байна гэж бодоход магадгүй энэ нь чамд жинхэнэ өвчин үүсэх шалтгаан болно. Яагаад гэвэл чи өөрийгөө өвчтэй байна гэж бодонгуут чиний зан чанар энгийн хүнтэй ижил болно. Ялангуяа ийм байдал гарахад жинхэнэ бясалгал, дасгал хийдэг хүнд өвчин үүсэхгүй. Та бүгд мэдэж байгаа, үнэндээ хүний өвчний 70% нь сэтгэл санааных, 30% нь бие махбодынх байдаг. Ер нь хүн сэтгэл санаагаар эхлээд унаж, сэтгэлийн тэвчээр нь алдрахад сэтгэл санааны хүнд дарамтанд орж шаналдаг, улмаар өвчний байдлыг огцом

хүндрүүлдэг, дандаа ийм байдаг. Нэг жишээ дурьдахад, урьд нэг хүнийг ортой нь хүлээд нэг гарыг нь бариад зүсч цусыг нь гоожуулна гэж түүнд хэлсэн. Тэгээд түүний нүдийг нь боогоод бугуйн дээр нь юмаар зурсан. (Түүний гарыг зүсч цусыг нь гойжуулаагүй.) Усны гоожуурыг онгойлгоод түүнд ус дуслахыг сонсгоход тэр өөрийнх нь цус нь дусаж байна гэж бодсон. Тэгээд тэр хүн удалгүй нас барсан. Үнэндээ түүнээс жоохон ч цус гараагүй, гоожуурын ус л дусалж байсан. Түүний бодол санаа нь үхэлд хүргэх шалтгаан болсон. Чи өөрийгээ үргэлж өвчтэй гэж бодоод байвал магадгүй энэ нь чамайг өвчтэй болгоно. Яагаад гэвэл чиний зан чанар энгийн хүний түвшинд унасан, тэгвэл энгийн хүн мэдээж өвчин тусна.

Бясалгадаг хүн үүнийг үргэлж өвчин гэж бодоод байвал үнэндээ чи хүсч байгаатай адил. Чи өвчин хүсвэл чамд өвчин орж ирнэ. Бясалгагчийн хувьд чиний зан чанарын түвшин өндөр байх хэрэгтэй. Чи битгий үүнийг өвчин гэж санаа зов, өвчин гэж айвал энэ нь зууралдсан сэтгэл, мөн чамд гай авчирч мэднэ. Бясалгалд нүглийг арилгана, нүглийг арилгахад зовно. Яаж ая тухтай байдлаар гон-оо өсгөх юм? Өөрөөр чи яаж зууралдсан сэтгэлээсээ салах юм? Би та нарт Буддын шашны нэг түүх ярья: Урьд нэг хүн маш их чармайж бясалгаад Архат түвшинд хүрсэн. Тэр хүн бясалгалын төгс үр дүнд хүрч Архат болохын даваан дээр байсан, баярлахгүй байж яаж чадах юм? Гурамсан ертөнцийн хязгаарыг давж гарч байна! Гэсэн хэдий ч энэ баярлах сэтгэл нь бас зууралдсан сэтгэл юм. Архатад бол үйлгүй, сэтгэл хөдлөлгүй болсон байх ёстой. Гэвч тэр унасан, үр дүнгүй бясалгасан. Үр дүнгүй бясалгасан учраас дахиж шинээр эхлэх хэрэгтэй болсон. Тэр дахин бясалгаж маш их чармайсны эцэст буцаад дээшилсэн. Энэ удаа тэр айж дотроо бодсон: Би баярлаж болохгүй, тэгвэл дахиад унана. Ингэж айснаас тэр бас дахиад унасан. Айх бол бас нэг төрлийн зууралдсан сэтгэл.

Өөр нэг хэлбэр бол, хүн сэтгэл мэдрэлийн өвчин тусвал түүнд бясалгалын солиорол гэсэн нэр зүүчихнэ. Зарим хүн бас намайг түүний мэдрэлийн өвчнийг эдгээхийг хүлээдэг! Би мэдрэлийн өвчинг өвчин биш гэж хэлнэ, надад ч ийм зүйлд гаргах цаг байхгүй. Яагаад вэ? Яагаад гэвэл мэдрэлийн өвчтэй хүнд ямар ч вирус байхгүй биед нь ямар ч өвчин эмгэг байхгүй, үрэвсэл ч байхгүй, минийхээр бол энэ нь өвчин биш. Мэдрэлийн өвчин бол хүний эзэн бодол маш суларч доройтсоноос болдог. Ямар хэмжээнд хүртлээ доройтох вэ? Хүн өөртөө эзэн биш юм шиг, энэ мэдрэлийн өвчтөний эзэн сүнс нь яг ийм л байдаг. Энэ нь өөрийнхээ биенд эзэн байх хүсэлгүй болно, тэр үргэлж мансуурсан байдалд байдаг, сэргэг байж чаддаггүй. Энэ үед Дэд бодол нь эсвэл гадны мэдээлэл түүнийг үймүүлнэ. Орон зай болгонд маш олон давхарга байдаг, янз бүрийн мэдээллүүд түүнийг үймүүлнэ. Түүнээс гадна Эзэн сүнс урд амьдралууддаа магадгүй муу зүйлс хийж байсан, бас авлагатай хүн магадгүй түүнийг хорлоно, янз бүрийн зүйлүүд гардаг. Би, мэдрэлийн өвчин ийм л учиртай гэж хэлнэ. Би яаж чамайг эдгээх үү? Жинхэнэ мэдрэлийн өвчин ингэж л тусдаг. Тэгвэл яах вэ? Энэ хүнийг хүмүүжүүлнэ, түүнд сэргэг болоход нь тусална, гэхдээ үүнийг хийхэд маш хэцүү. Чи хардаа, сэтгэл мэдрэлийн эмнэлгийн эмч гартаа цахилгаан бороохой барингуут өвчтөн айж тэр дороо дэмий юм ярихаа больчихдог. Яагаад вэ? Тэр үед түүний Эзэн сүнс нь сэргэдэг, тэр цахилгаанаар цохиулахаас айна.

Хүн бясалгалын замаар орсон бол ихэнхдээ үргэлжлүүлэхийг хүсдэг. Хүн болгонд Буддын мөн чанар, Дао-д бясалгах сэтгэл байгаа. Тиймээс бясалгалыг нэг сурвал маш олон хүн үлдсэн насан туршдаа бясалгадаг. Тэд бясалгаад үр дүнд хүрч чадах чадахгүй нь Номыг олж авах үгүй нь хамаагүй, ямар ч байсан Дао-гаар замнах сэтгэлтэй, бясалгахыг л үргэлж хүсдэг. Хүн болгон түүнийг чигон-оор хичээллэдэг гэдгийг мэднэ. Түүний ажлын газрынхан нь

мэднэ, ойр орчныхон нь бас хөршүүд нь бүгд мэднэ. Гэхдээ та нар энэ талаар боддоо, жинхэнэ бясалгалыг, хэдэн жилийн өмнө хэн үүнийг хийж байсан юм? Хэн ч хийгээгүй. Зөвхөн жинхэнэ бясалгахад л түүний амьдралын замыг өөрчилж өгч болно. Харин энгийн хүний хувьд тэр зөвхөн өвчнөө эдгээх, биеэ сайжруулахын тулд чигон-оор хичээллэж байгаа. Хэн түүний амьдралын замыг нь өөрчилж өгөх юм? Энгийн хүн юм чинь нэг өдөр өвчин тусна, өөр нэг өдөр ямар нэгэн гай зовлонтой учирна. Тэр хэзээ нэгэн өдөр магадгүй мэдрэлийн өвчтэй болно эсвэл үхнэ. Энгийн хүний бүхэл амьдрал ийм л байдаг. Чи түүнийг паркт чигон-оор хичээллэж байхыг харсан, үнэндээ тэр жинхэнэ бясалгаж байгаа юм биш. Хэдийгээр тэр дээд түвшин лүү бясалгах хүсэлтэй ч ариун замын номгүйгээр тэр чадахгүй. Түүнд дээд түвшин лүү бясалгах хүсэл л байдаг гэхдээ тэр өвчин арилгах, бие сайжруулах доод түвшингийн бясалгагч хэвээрээ. Хэн ч түүний амьдралын замыг нь өөрчилж өгөхгүй, тэгвэл тэр өвчин тусна. Буянг эрхэмлэхгүй бол өвчин ч эдгэрэхгүй. Чигон-оор хичээллэх юм бол хүн өвдөхгүй гэсэн үг биш.

Тэр жинхэнэ бясалгахад өөрийнхөө зан чанарт анхаарах ёстой. Зөвхөн жинхэнэ бясалгалаар хүний өвчин арилж болно. Яагаад гэвэл чигон бясалгал биеийн тамирын дасгал биш харин энгийн хүнийхээс давсан зүйл, тэгвэл бүр өндөр зарчим болон шалгуураар бясалгагчийг шаардах ёстой. Үүнийг дагаж байж зорилгодоо хүрнэ. Гэхдээ маш олон хүн ингэж хийдэггүй, тэгвэл энгийн хүн хэвээрээ л үлдэнэ. Тиймээс цаг нь болоход тэр өвчин тусна. Энэ хүн магадгүй нэг өдөр толгойд нь цус харвана, гэнэт ямар нэгэн өвчин тусна, эсвэл мэдрэлийн өвчтэй болно. Хүн болгон түүнийг чигон-оор хичээллэдгийг нь мэднэ. Түүнийг мэдрэлийн өвчтэй болмогц хүмүүс түүнийг бясалгалын солиорол туссан гэж хэлнэ, ийм нэр зүүчихнэ. Та бүгд боддоо, ингэж хэлж болох юм уу? Хөндлөнгийн хүн учрыг нь мэдэхгүй,

мэргэжлийн хүнд болон олон бясалгагчдад хүртэл үүний үнэн учир шалтгааныг мэдэхэд хэцүү. Хэрэв энэ хүн гэртээ мэдрэлийн өвчтэй болсон бол төвөг багатай, гэхдээ л хүмүүс бас чигон бясалгалаас болсон гэж ярина. Хэрэв тэр дасгалын талбай дээр мэдрэлийн өвчин тусвал сүйд болно. Түүнд муу нэр зүүчихнэ, арилгах аргагүй. Чигон-оор хичээллээд бясалгалын солиорол туссан гээд сонин дээр хэвлэгдэнэ. Зарим хүн учрыг нь мэдэхгүйгээр чигон-ыг эсэргүүцдэг: Хар даа, саяхан энд чигон дасгал хийгээд зүв зүгээр байсан хүн одоо ийм болчихлоо гэнэ. Энгийн хүний хувьд, түүнд юу л тохиолдох ёстой байсан тохиолдоно. Тэр магадгүй өөр өвчин тусна, эсвэл өөр гай зовлонтой учирна. Бүгдийг чигон бясалгалаас болсон гэж буруутгаж болох юм уу? Жишээ авахад, энэ нь эмнэлгийн эмчтэй адил, эмч хүн бүх насаараа өвдөх учиргүй, ингэж ойлгож болох юм уу?

Иймээс маш олон хүн чигон-ы үнэн байдал ба зарчмыг нь мэдэхгүйгээс учир утгагүй тайлбар хийдэг. Ямар нэгэн асуудал гарангуут янз бүрийн муу нэр чигон-д өгнө. Чигон нийгэмд дэлгэрээд бага хугацаа өнгөрч байна. Олон хүн гөжүүд үзэл бодолтой, үүнийг үргэлж хүлээн зөвшөөрдөггүй, үгүйсгэж муулж байдаг. Тэр хүний ямар янзын сэтгэл зүйтэйг нь мэдэхгүй. Тэр чигон-ыг бүр үзэн яддаг мөртлөө энэ нь тэдэнд ямар нэгэн талаар хамаатай юм шиг санагддаг. Чигон гэсэн үг гарангуут л тэд үүнийг хийсвэр үзэл гэдэг. Чигон бол шинжлэх ухаан, бүр гүн дээд шинжлэх ухаан юм. Тэдгээр хүмүүс хэтэрхий гөжүүд үзэл бодолтой ба мэдлэгийн хүрээ нь хэтэрхий хязгаарлагдмал учраас ийм асуудал гардаг.

Бас өөр нэг байдал гардаг, бясалгагчдын хүрээнд үүнийг чигон байдал гэдэг. Ийм хүний оюун санаа нь орон гаран юм шиг байдаг, гэхдээ тэр бол бясалгалын солиорол биш. Тэр их бодлоготой, ухаалаг. Би эхлээд чигон байдал гэж ямар учиртайг нь ярья. Чигон-оор хичээллэхэд хүний

төрөлхийн суурь чанар их чухал байдаг. Шашин шүтдэг хүн дэлхийн бүх улс оронд байдаг. Хятадад хэдэн мянган жилийн турш Буддын шашин, Дао-гийн шашныг хүмүүс шүтсээр ирсэн. Тэд сайн үйлс хийхэд сайн хариу ирдэг, муу зүйл хийхэд хариу шийтгэл ирдэг гэдэгт итгэдэг. Гэхдээ зарим хүн үүнд итгэдэггүй. Ялангуяа Соёлын их хувьсгалын үед үүнийг шүүмжилж мухар сүсэг гэдэг байсан. Зарим хүн өөрсдийн ойлгодоггүй бүх зүйлсийг, сурах бичгэн дээр байхгүй, одоогийн шинжлэх ухаанаар батлагдаагүй зүйлийг, мөн хараахан танин мэдэгдээгүй байгаа зүйлийг мухар сүсэг гэж үздэг. Урьд хэдэн жилийн өмнө ийм хүмүүс их олон байсан, харин одоо арай цөөн болсон. Хэдийгээр чи зарим үзэгдлүүдийг хүлээн зөвшөөрөхгүй байсан ч тэдгээр нь манай энэ орон зайд аль хэдийн илэрчихсэн. Чи үүнийг хүлээн зөвшөөрч зүрхлэхгүй байгаа ч гэсэн хүмүүс одоо энэ талаар зоригтой ярьдаг болсон. Тэд бас чигон бясалгалын талаархи зарим бодит байдлыг чихээрээ сонсож нүдээрээ үзсэн зүйлүүдээс ойлгож авсан.

Зарим хүн ийм хэмжээнд хүртэл гөжүүд болсон, чигон-ы талаар ярихад чамайг үнэн сэтгэлээсээ шоолно, тэр чамайг мухар сүсэгт автсан, ёстой инээдтэй гэнэ. Чи чигон бясалгалын асуудлаар ярингуут тэд чамайг харанхуй, боловсролгүй гэж үзнэ. Ийм хүн хэдий гөжүүд байсан ч түүний төрөлхийн суурь нь муугүй байж болно. Хэрэв түүний төрөлхийн суурь нь сайн, тэгээд чигон-оор хичээллэхийг хүсвэл түүний тэнгэрийн мэлмий нь их өндөр түвшинд нээгдэж, бас ер бусын чадвар гарч магадгүй. Тэр чигон-д итгэдэггүй, гэхдээ өвчин тусахгүй гэсэн баталгаа байхгүй. Тэр өвчин тусвал эмнэлэгт очиж үзүүлнэ. Барууны эмнэлгээр яваад эмчлэгдэхгүй бол Хятад эмчилгээгээр явна. Хятад эмчилгээгээр ч бас өвчин нь эдгэрэхгүй өөр ямар ч эм тан үйлчлэхгүй бол одоо түүний санаанд чигон орно. Тэр ингэж бодно: Чигон миний өвчнийг эдгээж үнэхээр чадах болов уу би азаа үзээд алдъя. Тэр их эргэлзэж байгаад очно.

Түүний төрөлхийн суурь сайн учраас чигон-оор хичээллэж эхлэнгүүт түүнд маш сайн үр дүн гарна. Магадгүй аль нэг багш түүнийг сонгосон, өөр орон зайд байгаа энэ дээд амь түүнд тусална. Түүний тэнгэрийн мэлмий нь гэнэт нээгдэнэ эсвэл тэр хагас гэгээрлийн байдалд орно. Тэнгэрийн мэлмий их өндөр түвшинд нээгдэхэд тэр ертөнцийн зарим үнэн байдлыг гэнэт харна, мөн ер бусын чадвар гарч ирнэ. Чи боддоо, тийм хүн ийм байдлыг харахад түүний тархи нь хүлээн авч чадах уу? Чи түүнийг сэтгэл санааны ямар байдалд орно гэж бодож байна? Урьд нь мухар сүсэг гэж үздэг байсан, туйлаас байж болшгүй гэж боддог байсан, энэ талаар бусдын ярих болгонд инээд нь хүрдэг байсан зүйлс түүний нүдний өмнө нь бодитоор илэрсэн, мөн үүнтэй бодитоор холбогдсон. Тэгэхэд энэ хүний тархи нь үүнийг хүлээж авч чадахгүй оюун санааны их дарамтанд орно. Түүний хэлж байгааг бусад хүмүүс ойлгохгүй, гэхдээ түүний ухаан санаа саруул. Тэр зөвхөн хоёр талын харьцааг зөв зохицуулж чадахгүй. Тэр, хүн төрөлхтний хийдэг зүйл буруу байдаг, харин нөгөө талд үргэлж зөв байдаг гэдгийг олж мэдсэн. Юмыг нөгөө талд хийдэг байдлаар хийвэл хүмүүс түүний хийж байгааг буруу гэнэ. Хүмүүс ойлгохгүй, иймээс энэ хүнийг бясалгалын солиоролд автсан гэдэг.

Үнэндээ тэр бясалгалын солиорол биш юм, чигон-оор хичээллэдэг ихэнх хүмүүст ийм байдал огтхон ч гарахгүй. Зөвхөн тэдгээр гөжүү үзэлтэй хүмүүст л энэ чигон байдал гардаг. Энд суугаа хүмүүс дунд тэнгэрийн мэлмий нээгдсэн хүн олон бий, нилээд олон. Тэд үнэхээр өөр орон зайн зүйлсийг бодитоор харсан, түүнд гайхмаар санагдаагүй, маш гоё санагддаг, тархи нь цочирдоогүй бас тийм чигон байдал гарахгүй. Чигон байдалд орсон хүн их бодлоготой болдог, юмыг их учир зүйтэй ярьдаг. Гэвч түүний хэлсэн үгэнд нь энгийн хүн үнэмшдэггүй. Тэр хааяа магадгүй хэн нэгэн нас барсан хүнийг харсан, тэр түүнд ямар нэгэн зүйл хий гэж хэлсэн гэж чамд ярина. Энгийн хүн түүнд яаж

үнэмших юм? Сүүлд нь тэр эдгээр зүйлсийг дотроо хадгалах ёстой, ярьж болохгүй гэж ойлгосон. Хоёр талын харьцааг зөв зохицуулсны дараа бүх юм хэвэндээ орно. Ер нь эдгээр хүмүүс гол төлөв ер бусын чадвартай байдаг, гэхдээ энэ нь бясалгалын солиорол биш.

Өөр нэг “жинхэнэ солиорол” хэмээх байдал гардаг бөгөөд энэ нь ховор үзэгддэг. Бидний ярьж байгаа “жинхэнэ солиорол” гэдэг нь бол жинхэнэ солиорсон биш, тийм утгатай үг биш харин энэ нь үнэн бясалгал гэсэн санаа агуулсан. Жинхэнэ солиорол гэж юу вэ? Магадгүй зуун мянган бясалгадаг хүний дотор нэг л байдаг, маш ховор гэж би хэлнэ. Тиймээс энэ нь түгээмэл биш, нийгэмд ямар ч нөлөөгүй.

“Жинхэнэ солиорол”-д үргэлж нэг урьтал нөхцөл байдаг. Энэ нь тэр хүний төрөлхийн суурь нь маш сайн, мөн өндөр настай байх ёстой. Өндөр настай болсон болохоор бясалгаж амжихгүй. Тэдгээр маш сайн төрөлхийн суурьтай хүмүүс энд ихэвчлэн дээд түвшнээс үүрэгтэй ирдэг. Энгийн хүний нийгэмд ирэхээс хэн ч айдаг, ой санамж нь арчигдсаны дараа тэр хэнийг ч танихгүй болно. Энгийн хүний нийгмийн орчинд орж ирэхэд хүмүүс түүнийг үймүүлнэ, түүнийг нэр хүнд ашиг хонжооны хойноос хөөцөлддөг болгоно, эцэст нь тэр доош унана. Тэндээс үүрд гарч чадахгүй. Тиймээс хэн ч энд ирэхийг зүрхэлдэггүй, үүнээс айдаг. Хэдий тийм ч ийм хүн ирсэн, ирээд үнэхээр өөрийгөө энгийн хүний дунд барьж чадаагүй. Тэр үнэхээр доош унахад хүрсэн, амьдралынхаа туршид их олон муу зүйл хийсэн. Хүн хувийн ашиг хонжооны төлөө тэмцэн амьдрахдаа маш их муу үйл хийж бусдад их өр тавьдаг. Багш нь түүнийг доош унах гэж байгааг харсан, гэхдээ тэр урьд нь Бүтээлийн оронтой байсан, тиймээс түүнийг амархан доош унахыг зөвшөөрөхгүй! Тэгвэл яах вэ? Түүний багш их санаа зовно, түүнийг бясалгуулах арга байхгүй. Тэр үед хаанаас багш

олох юм? Тэр буцахын тулд бүр анхнаас нь эхэлж бясалгах ёстой. Гэхдээ энэ нь тийм амар гэж үү? Өндөр настай болсон тул бясалгахад хэтэрхий оройтсон. Тэр бие сэтгэлийн хос бясалгалыг хаанаас олох юм?

Төрөлхийн суурь маш сайн хүнд, энэ маш онцгой нөхцөлд түүнийг солиоруулах аргыг хэрэглэж болно. Өөрөөр хэлбэл ямарч найдваргүй болсон, өөрөө буцаж чадахгүй болсон учраас энэ аргыг хэрэглэж түүнийг ухаан солиотой болгоно. Түүний тархины зарим үйл ажиллагааг түгжчихдэг. Жишээ нь, бид хүмүүс хүйтнээс айдаг, бохиороос сэжиглэдэг тархины тийм үүрэг гүйцэтгэдэг хэсгийг нь түгждэг. Зарим үйл ажиллагаа нь түгжигдсэний дараа тэр сэтгэл мэдрэлийн согогтой харагдана мөн яг солиорсон хүн шиг авирлах болно. Гэхдээ тийм хүн ер нь муу зүйл хийдэггүй, хүнийг загнах ч үгүй цохих ч үгүй харин байнга сайн зүйл хийдэг. Гэхдээ тэр өөртөө маш ширүүн ханддаг. Учир нь тэр хүйтнийг мэдрэхгүйгээс өвөл цасан дээгүүр хөл нүцгэн гүйнэ, нимгэн хувцас өмсөнө. Түүний хөл хөлдсөнөөс хагарч цус гоожино, тэр заваанаас сэжиглэхгүй учраас баас идэж шээс ууж ч зүрхэлнэ. Би тийм нэг хүнийг мэддэг байсан, тэр адууны хөлдүү хомоолыг амтархан мэрдэг байсан. Жирийн хүн эрүүл ухаантайгаар тэвчихийн аргагүй тийм зовлонг тэр амссан. Төсөөлөөд үз, ухаан нь солиорсноор тэр хүн ямар их зовлонг туулав. Мэдээж тийм хүн ихэнхдээ ер бусын чадвартай байдаг, ер нь гол төлөв настай эмэгтэй хүн байдаг. Урьд эмэгтэй хүний хөлийг жижиг байлгахын тулд боочихдог байсан. Гэсэн ч тэр настай эмэгтэй төвөггүй үсрээд хоёр метр гаруй өндөр хашаан дээгүүр давдаг байсан. Гэрийнхэн нь түүний ухаан солиорсныг хараад, үргэлж гарч гүйгээд байхаар нь гэртээ цоожилдог болсон. Гэрийнхэн нь явсаны дараа тэр цоож руу хуруугаараа нэг заагаад л онгойлгож гэрээсээ оргочихно. Сүүлдээ түүнийг тогтоон барихын тулд төмөр гинжээр гинжилдэг болсон.

Гэрийнхэн нь явсаны дараа, гинжийг нэг сэгсрээд л тайлчихна. Түүнийг тогтоон барих боломжгүй байсан. Ингээд л тэр маш их зовлон амсана. Түүний туулсан зовлон маш их, мөн нилээд ширүүн байсан болохоор муу зүйл хийсэн үйлийн үр нь хурдан төлөгдөнө. Энэ нь дээд тал нь гурван жилд юмуу ер нь нэг хоёр жилд л өнгөрнө, маш хүнд зовлон амсдаг. Дараа нь тэр гэнэт бүхнийг ойлгоно. Түүний бясалгал дууссанд тооцогддог учраас гон нь тэр дороо нээгдэж янз бүрийн ер бусын чадвар гарч ирдэг. Ийм тохиолдол их ховор үзэгддэг ч түүхэнд байдаг. Жирийн суурьтай хүнд ийм байдал гаргуулахгүй. Та бүгд мэднэ, түүхэнд солиорсон лам хуврагууд болон солиорсон Дао бясалгагчид байсан тухай бичигдсэн байдаг. Жишээ нь, солиорсон хувраг Чин Хуйг³⁰ хийдээс шүүрээр хөөж гаргасан тухай, солиорсон Дао бясалгагчийн тухай болон өөр домог яриа их олон байдаг.

Бид бясалгалын солиорол гэж байдаггүй болохыг баттай хэлж чадна. Хэрэв хүн гал гаргавал, үнэхээр ийм байвал би тэр хүнийг мундаг гэнэ. Хэрэв хүн амнаасаа галаар үлээж, гараа сунгаад л гал гаргаж эсвэл хуруугаараа тамхи асааж чадах юм бол би үүнийг ер бусын чадвар гэнэ!

Бясалгахад буг чөтгөр үймүүлэх нь

Бясалгахад буг чөтгөр үймүүлэх гэж юу вэ? Бид чигон-оор хичээллэхэд үймүүлэл амархан гардаг. Чигон бясалгал хийхэд яагаад буг чөтгөрийг далладаг вэ? Хүн бясалгахыг хүсвэл маш хэцүү. Жинхэнэ бясалгахад миний Номын биеийн хамгаалалтгүйгээр үндсэндээ үр дүнд хүрч чадахгүй. Чи үүдээр гарангуутаа л амь насны аюултай тулгарч магад. Хүний сүнс нь үхдэггүй. Тэгвэл чи өмнөх

³⁰ Чин Хуй-Өмнөд Сон гүрний үед байсан хааны ордны хэрцгий түшмэл

амьдралуудынхаа нийгмийн харилцаанд магадгүй хэн нэгэнд өр тавьсан, хэн нэгнийг дээрэлхсэн, эсвэл ямар нэг муу зүйл хийсэн, тэгээд тэр хохирогчид чамайг хайж ирнэ. Буддын шашинд, хүн үйлийн үрийг хариулахын тулд амьдардаг гэдэг. Чи хэн нэгэнд өртэй бол тэр авлагаа авахаар чамайг хайж олно, өрөө нугалаад авчихвал дараагийн удаа чамд буцааж төлөх болдог. Хүү нь эцэг эхдээ муу хандаж байсан бол дараагийн удаа тэдний байр эсрэгээр солигдоно. Энэ янзаар дахин дахин ээлжилсээр байдаг. Гэхдээ бид үнэхээр буг чөтгөрүүд хүнийг чигон бясалгал хийлгүүлэхгүйн тулд үймүүлдгийг харсан. Энэ бүгд үйлийн үрийн харьцаанаас гардаг, учир шалтгаангүй зүйл биш юм. Учир шалтгаангүй байсан бол ийм байхыг зөвшөөрөхгүй.

Хамгийн түгээмэл байдаг буг чөтгөр үймүүлэх хэлбэр нь, чамайг чигон-оор хичээллэж эхлэхээс өмнө чиний эргэн тойрны байдал харьцангуй нам тайван байдаг. Чи чигон сурахлаар үргэлж бясалгал хийх дуртай байдаг. Харин чамайг завилж суугаад бясалгаж эхлэнгүүт гэнэт орчин нам гүм биш болдог. Машины сигнал, коридорт гарах хөлийн чимээ, хүмүүсийн яриа, хаалга савах чимээ, мөн гаднаас радио сонсогдох гэх мэтээр дорхноо нам тайван биш болно. Чамайг чигон-оор хичээллээгүй байхад эргэн тойронд харьцангуй нам гүм, харин чигон хийж эхлэнгүүт ийм болдог. Чухам ямар учиртай болохыг нь бидний ихэнх хүмүүс тунгаан бодож байгаагүй, зөвхөн ямар хачин юм бэ гэж бодно. Урам нь хугараад чигон-оор хичээллэж чадахгүй. Тэр ямар хачин юм гээд л болино. Энэ нь буг чөтгөр чамд саад хийж байгаа юм, хүмүүсийг удирдаж чамайг үймүүлнэ. Энэ бол үймүүллийн хамгийн хялбар хэлбэр, тэр чамайг бясалгал хийлгэхгүй байх зорилгодоо хүрнэ. Чи бясалгаад Дао-д хүрэх юм бол чиний тавьсан төлөгдөөгүй өрийг яах вэ? Тэр үүнийг зөвшөөрөхгүй, тиймээс чамайг бясалгуулахгүй. Гэхдээ энэ нь тодорхой нэг

түвшин дэх илрэл. Хэсэг хугацаа өнгөрсний дараа ийм байдал гарахыг цаашид зөвшөөрөхгүй. Өөрөөр хэлбэл энэ өр нь үеэ өнгөрөөсний дараа тэднийг дахин үймүүлэхийг зөвшөөрөхгүй. Энэ нь яагаад гэвэл Фалунь Дафаг бясалгадаг хүмүүс хурдан урагшилдаг, бас түвшин нь дээшлэх нь нилээд хурдан байдаг.

Буг чөтгөрийн өөр бас нэг хэлбэрийн үймүүлэл байдаг. Та бүгд мэднэ, бид чигон-оор хичээллэхэд тэнгэрийн мэлмий нээгдэж болдог. Зарим хүн тэнгэрийн мэлмий нь нээгдсэний дараа гэртээ бясалгал хийж байхдаа зарим аймаар байдал эсвэл аймшигтай зүс царайг хардаг. Зарим нь сэгсийсэн урт үстэй, зарим нь чамтай байлдахыг завдана мөн янз бүрийн аймаар хөдөлгөөн хийнэ, их аймшигтай. Зарим үед бясалгал хийхэд л цонхны цаана тэд ширтэж байгаа нь аймаар харагдана. Яагаад ийм байдал гардаг вэ? Энэ бол буг чөтгөрийн үймүүлж байгаа хэлбэр. Харин манай Фалунь Дафагийн бясалгалд ийм үзэгдэл гарах нь маш ховор, зуугаас нэгд л тохиолдож магад, ихэнхдээ ийм байдал гарахгүй. Энэ нь чиний бясалгалд ямар ч ач холбогдолгүй учраас чамайг ингэж үймүүлэхийг зөвшөөрөхгүй. Бусад ердийн бясалгалуудад ийм янзын үймүүлэл их түгээмэл байдаг, мөн нилээд удаан үргэлжилдэг. Зарим хүн үүнээс болж айгаад чигон-оор хичээллэж зүрхэлдэггүй. Хүмүүс чигон хийхдээ гол төлөв шөнийн нам гүм үеийг сонгодог. Гэнэт өмнө чинь хүн ч биш, чөтгөр ч биш амьтан зогсож байхыг харвал чигон-оор хичээллэхээс айгаад бясалгахыг зүрхлэхгүй болно. Манай Фалунь Дафа-д ер нь ийм байдал байхгүй. Гэхдээ маш ховор тохиолдоно, зарим хүний байдал их онцгой.

Бас нэг янзын дотоод, гадаад хос бясалгал байдаг. Энэ нь Ушу болон дотоод бясалгалыг хамт хийдэг. Ийм төрлийн бясалгал Дао-гийн системд нилээд түгээмэл байдаг. Энэ бясалгалаар хичээллэхэд үргэлж ийм нэг янзын буг

чөтгөрийн үймүүлэлтэй тулгардаг. Жирийн бясалгалд тааралдахгүй, зөвхөн дотоод, гадаад хос бясалгалд болон Ушу-гаар хичээллэдэг бясалгалд байдаг. Энэ бол, хүмүүс түүнтэй тэмцэлдэх гэж хайж ирнэ. Дэлхийд Даод бясалгадаг маш олон хүн байдаг, тэдний олонхи нь Ушугаар хичээллэдэг, дотогшоо гадагшаа бясалгадаг. Ушу-гаар хичээллэдэг хүнд бас гон өсч болдог. Яагаад вэ? Тэр алдар нэр, ашиг хонжоо хөөцөлдөх гэх мэт сэтгэлээсээ салбал гонгоо өсгөж болно. Гэхдээ тэр тулалдах сэтгэлээ орхихдоо удаан, үүнээсээ их аажмаар сална, тиймээс тэр иймэрхүү зүйл амархан хийдэг, мөн тодорхой түвшинд бас тохиолддог. Тэр хүн амгаланд орж бясалгаж суухдаа хэн Ушугаар хичээллэж байгааг мэднэ, сүнс нь биенээсээ гарч хэн нь Ушугаар илүү болохоо үзэлцэхээр нөгөө хүнийг хайж олж очино, тулаан болно. Өөр орон зайд бас ийм байдал гардаг, хэн нэгэн түүн дээр ирж тулалдан зодолдоно, тэр тулалдахаас татгалзвал нөгөө хүн түүнийг үнэхээр алж мэднэ. Тэгээд тэд хоорондоо тулалдаж эхэлнэ. Түүнийг унтахад нь хэн нэгэн ирж түүнтэй тулалдана, тэгээд шөнөжингөө амарч чадахгүй. Үнэндээ энэ бол түүний тэмцэлдэх сэтгэлийг орхиулах гэж байгаа юм, тэр тэмцэлдэх сэтгэлийг орхихгүй бол үргэлж ийм байх болно. Тэр энэ янзаараа байвал хэдэн жилийн дараа ч энэ түвшнээсээ дээш ахиж чадахгүй. Тэр чигон-оор үргэлжлүүлэн бясалгаж чадахгүй болсноо харуулна. Маш их эрч хүч нь барагдаж түүний бие ч даахгүй, магадгүй бясалгаж чадахгүй болно. Иймээс дотоод, гадаад хос бясалгалд ийм асуудал гарч болзошгүй, бас энэ нь их түгээмэл байдаг. Бидний дотоод бясалгалд ийм асуудал байхгүй, түүнийг гарахыг ч зөвшөөрөхгүй. Миний саяны ярьсан ийм хэдэн хэлбэр нилээд түгээмэл байдаг.

Бас буг чөтгөр үймүүлэх өөр нэгэн хэлбэр байдаг. Тэр нь бясалгаж байгаа хүн бүрт тохиолдоно, бидний энэ Номын үүдэнд бас хүн болгонд тохиолдоно. Энэ бол садар самууны

шулам юм. Энэ зүйл маш их ноцтой. Энгийн хүний нийгэмд гэр бүлийн амьдрал байдаг, хүн төрөлхтний хойч үе өсч үрждэг. Хүний үндэс угсаа ингэж л хөгждөг, мөн хүний нийгэмд сэтгэл гэж байдаг. Тэгэхээр ийм зүйл энгийн хүнд байх нь зүй ёсны юм. Хүнд олон янзын сэтгэл байдаг: Уурлах сэтгэл, баярлах, дурлах, үзэн ядах сэтгэл, хийх дуртай зүйл дургүй зүйл, таалагдах хүн таалагдахгүй хүн, сонирхолтой зүйл сонирхолгүй зүйл гээд бүгд сэтгэл. Энгийн хүн үүний тулд л амьдардаг. Тэгэхээр бясалгагч хүн, ер бусын хүний хувьд ийм хандлагаар юмыг цэгнэж болохгүй, үүнээс ангижрах хэрэгтэй. Энэ сэтгэлээс маш олон янзын зууралдсан сэтгэл үүдэн гардаг учраас бид үүнийг хөнгөн авч үзэх хэрэгтэй, эцэст нь орхих ёстой. Дур хүсэл, тачаал мэтийн зүйлүүд бол хүний зууралдсан сэтгэл, энэ бүгдээс ангижрах хэрэгтэй.

Бидний энэ Номын үүдэнд энгийн хүмүүсийн дунд бясалгадаг энэ хэсэгт хүмүүсийг лам хувраг эсвэл хандмаа болохыг шаарддаггүй. Манай залуучууд бас гэр бүлтэй болно. Тэгвэл энэ асуудалд яаж хандах вэ? Би, бидний Номын үүд бол хүний сэтгэл рүү чиглэсэн гэж хэлсэн. Материаллаг ашиг сонирхлын хувьд үнэндээ чамайг алдуулж байгаа юм биш. Харин эсрэгээр энгийн хүмүүсийн энэ материаллаг ашгийн дунд чиний зан чанарыг хатуужуулна, жинхэнэ дээшилж байгаа нь чиний зан чанар юм. Чи энэ сэтгэлээсээ салж чадвал, чи юуг ч орхиж чадна, материалын ашиг сонирхлоо орхи гэвэл чи орхиж чадна. Чи сэтгэлээ орхиж чадахгүй бол чи юуг ч орхиж чадахгүй. Иймээс бясалгалын жинхэнэ зорилго бол сэтгэлийг бясалгах юм. Сүм хийдэд бясалгахад чамайг энэ сэтгэлээс чинь салгахын тулд эдгээр зүйлүүдийг хүчээр орхиулна. Чамайг энэ талаар бодохгүй байлгаж тэдгээрээс бүрмөсөн татгалзуулна, тэд ийм албадлагын арга хэрэглэдэг. Харин бид тийм байхыг чамаас шаардахгүй. Бид чамайг материаллаг ашгин дээр хөнгөн авч үзэхийг шаардана.

Иймээс манай энэ номоор бясалгаж гарсан хүн хамгийн бөх суурьтай. Чамайг лам хувраг, хандмаа бол гэж хэлээгүй. Бид энгийн хүмүүсийн дунд бясалгадаг, ирээдүйд манай бясалгал улам өргөн дэлгэрнэ. Хүн болгон лам хувраг биш мөртлөө лам хувраг шиг болж, Фалунь Дафа бясалгагч хүн болгон ийм байдалд орж болохгүй. Бид бясалгалын явцад хүн бүрээс дараахь зүйлийг шаардана: Чи бясалгадаг ч чиний гэр бүлийн хүн бясалгадаггүй бол, та нар бясалгалаас болж гэр бүлээсээ салах сарних дээр хүрч болохгүй. Өөрөөр хэлбэл бид энэ асуудлыг хөнгөн авч үзэх хэрэгтэй, чи үүнийг энгийн хүний адил чухалчилж болохгүй. Ялангуяа одоогийн нийгэмд бэлгийн харьцаа чөлөөтэй болж, садар самуун зүйлс хүмүүсийг завхруулж байна. Зарим хүн иймэрхүү зүйлийг их сонирхдог. Бясалгагч хүний хувьд бид эдгээрийг хөнгөн авч үзэх ёстой.

Дээд түвшнээс харахад энгийн хүмүүс нийгэмд ёстой шавар зуурч байна, заваан муухай гэж санахгүй шавхайн дунд наадаж байна. Бид хэлсэн, чи энэ асуудлаас болоод гэр бүлдээ эв зүйгээ олохгүйд хүрч болохгүй. Иймээс чи одоогийн шатанд үүнийг хөнгөн хар, гэр бүлийн амьдралаа эв зүйтэй хэвийн байлгавал хангалттай. Ирээдүйд, чи тодорхой нэг түвшинд хүрэхэд тэр түвшний байдал гарна. Одоогийн байдалд ийм байх хэрэгтэй, хэрэв чи энэ шаардлаганд нийцвэл хангалттай. Мэдээж чи одоогийн нийгэмд юу болж байгааг дагаж болохгүй. Тэгж яаж болох юм!

Үүнд бас өөр нэг асуудал байгаа, та бүгд манай бясалгагчдын бие энергитэй гэдгийг мэднэ. Одоо энэ лекцийг дуусахад та нарын нааяс ерэн хувь нь өвчингүй болохоос гадна, бас гон гарна. Тэгэхэд чиний бие маш хүчтэй энергитэй болно. Чамд байгаа гон чиний одоогийн зан чанарын түвшинтэй адил харьцаатай биш. Чиний гон түр өндөр болсон, чамайг дээш татсан, одоо зан чанараа

дээшлүүлэх ёстой. Аажмаар түүнд гүйцэж хүрнэ, энэ хэсэг хугацаанд гүйцэж хүрэх нь дамжиггүй. Иймээс бид үүнийг урьдчилаад хийсэн, өөрөөр хэлбэл чи зохих энергитэй болсон. Ариун номоор бясалгаж гарсан энерги нь ариун энэрэнгүй байдаг, иймээс энд суугаа хүн болгон амгалан нигүүлсэнгүй орчинг мэдэрдэг. Би өөрөө энэ замаар бясалгасан болохоор тийм зүйлс надад бий. Энд суугаа хүн болгон эв эеийг мэдэрдэг, муу санаа бодол байхгүй, тэр ч байтугай тамхи татах ч бодол төрдөггүй. Ирээдүйд чи бас манай Дафа-гийн шаардлага дагуу бясалгахад чамд гарсан гон мөн ийм нөлөөтэй байна. Чиний гон хүч байнга өсөх тусам биед чинь агуулагдах гон-оос цацрах энергийн хэмжээ бас нилээд хүчтэй болно. Тийм хүчирхэг биш байсан ч чиний энэ орны хүрээнд байгаа энгийн хүнийг эсвэл чи гэртээ байхдаа бас бусдыг хязгаарлаж чадна. Чиний гэр бүлийнхэнд нөлөөлж болно. Яагаад вэ? Чи үүнийг хийх гэж дотроо бодох ч хэрэггүй, яагаад гэвэл энэ нь энэрэнгүй, жинхэнэ эв зүйн орон, энэ бол ариун бодлын орон. Тиймээс хүмүүст муу бодол төрөхгүй, муу зүйл хийхэд амаргүй, ийм нөлөө үзүүлдэг.

Буддын туяа даяар гийхэд зүй бус бүхэн засагдана гэж би хэлсэн. Өөрөөр хэлбэл бидний биенээс цацрах энерги нь бүх буруу байдлыг засч чадна. Тэгвэл энэ орны нөлөөнд чи эдгээр зүйлийг бодохгүй бол санаандгүйгээр гэр бүлийн хүндээ бас нөлөөлнө. Чи энэ талаар бодохгүй, чамд ийм бодол ч байхгүй бол чиний ханьд ч бас санаанд нь орохгүй. Гэхдээ туйлаас биш, одоогийн нөхцөлд зурагтаар юу л бол юу гардаг, асаагаад л үзэхэд хүний хүслийг амархан өдөөдөг. Гэхдээ жирийн үед чамд ийм хязгаарлах нөлөө байдаг. Ирээдүйд чи дээд түвшинд бясалгахад надаар хэлүүлэлтгүй ямар байхаа өөрөө мэднэ. Тэр үед өөр байдал гарна, эв зүйгээр амьдарч байхад л болно. Иймээс чи үүнд их санаа зовох хэрэггүй, хэтэрхий санаа зовоод байвал энэ нь бас зууралдсан сэтгэл. Эхнэр нөхрийн хооронд шунал

татаалын асуудал байхгүй, харин хүсэл л байдаг. Чи үүнийг хөнгөн харж, сэтгэлээ тэнцвэртэй байлгахад л болоо.

Тэгвэл ямар янзын садар самууны шуламтай таарах вэ? Хэрэв чиний гүн амгаланд орох чадвар хүчгүй бол, чиний зүүдэнд үзэгдэнэ, чамайг унтаж байхад эсвэл бясалган сууж байхад гэнэт гардаг. Чи эрэгтэй бол царайлаг хүүхэн гарч ирнэ, чи эмэгтэй бол чиний мөрөөдлийн эр гарч ирнэ. Гэхдээ тэд нүцгэн байна. Чиний сэтгэл хөдлөнгүүт дур хүслээ тавиад бодит болчихно. Та бүхэн боддоо, манай бясалгалд биений охь, цусны чийг-г амь биеийг бясалгахад хэрэглэдэг, чи үргэлж ингэж алдаад байж болохгүй. Түүнчлэн чи энэ хүсэл татаалын давааг давсангүй. Тийм байж яаж болох юм? Тэгэхлээр энэ асуудал хүн болгонд тааралдана гэж би хэлье, тааралдах нь дамжиггүй. Би Ном заахдаа та нарын тархи луу их хүчтэй энергиэр дамжуулдаг. Чи үүдээр гараад миний юу хэлснийг тодорхой санахгүй байж мэднэ, гэхдээ чи энэ асуудалтай бодитоор тулгарахад миний юу гэж хэлснийг санаана. Чи өөрийгөө бясалгадаг хүн гэж үзвэл тэр агшинд толгойд чинь орж ирнэ, чи өөрийгээ барьж энэ давааг давж чадна. Хэрэв анхны давааг давж чадаагүй бол дараагийн давааг давахад хэцүү болно. Гэхдээ бас анхны удаа тэвчиж чадаагүй унасан бол сэрсний дараа маш их гутарч магад, ийм байдал нь сэтгэл санаанд нөлөөлж дахиад ийм асуудал тааралдахад чи өөрийгээ барьж чадна, давж чадна. Хэрэв зарим хүн даваагүй ч гэсэн тоохгүй байвал дараа өөрийгээ барихад бүр хэцүү болно, ийм байх нь гарцаагүй.

Чөтгөр шулам ийм янзын хэлбэрээр үймүүлж байдаг, бас багш нэг юмыг өөр зүйл болгон хувиргаж чамайг шалгаж байж болно. Ийм хоёр янзын хэлбэр байдаг, яагаад гэвэл хүн болгон энэ давааг давах ёстой. Бид энгийн хүн байхаасаа бясалгаж эхэлдэг. Анхны алхам бол энэ даваа, хүн болгонд тааралдана. Би та нарт нэг жишээ хэлье: Ухань

хотод лекц уншиж байхад манай ангид нэг сурагч байсан, гучин настай залуу. Намайг энэ лекцийг уншсаны дараа тэр гэртээ хариад бясалгахаар суусан. Тэр дорхноо гүн амгаланд орсон. Дараа нь гэнэт түүний нэг талд нь Будда Амитаба, нөгөө талд нь Лаози гарч ирэхийг харсан. Тэр үүнийг туршлага хуваалцахдаа өгүүлсэн. Тэд гарч ирснийхээ дараа түүн лүү хараад юу ч дугараагүй тэгээд алга болцгоосон. Дараа нь Бодьсадва Гуанинь гарч ирсэн, гартаа нэг ваар барьсан байсан түүнээс нь цагаан утаа гарч ирсэн. Тэр бясалган сууж байхдаа энэ бүгдийг маш тодорхой хараад сэтгэл нь их хөдөлсөн. Гэнэт тэр утаа нь үзэсгэлэнтэй тэнгэрийн дагинас болон хувирсан, тэдгээр тэнгэрийн нисдэг дагинас үнэхээр үзэсгэлэнтэй. Тэд түүний өмнө уран гоёмсгоор бүжиж байсан. Тэр, намайг энд бясалгаж байгааг хараад Бодьсадва Гуанинь урамшуулж тэнгэрийн дагинасыг гарган бүжүүлж байна гэж бодон баярлаж суутал тэдгээр дагинас гэнэт нүцгэн болж янз бүрээр хөдөлгөөн хийж хүзүү бэлхүүсээр нь тэвэрч эхэлсэн. Манай сурагчийн зан чанар дээшлэхдээ маш хурдан. Тэгэнгүүт тэр залууд дорхноо сэрэмж төрсөн. Тэр хамгийн түрүүнд, би энгийн хүн биш, би бясалгаж байгаа хүн, та нар надад ингэж хандаж болохгүй, би бол Фалунь Дафагийн бясалгагч гэж бодсон. Энэ бодол гарангуут тэд гэнэт алга болсон, тэгээд ч бүгд хиймлээр хувирч гарч ирсэн болохоор тэр дороо байхгүй болсон. Дараа нь Будда Амитаба болон Лаози дахин гарч ирсэн. Лаози залууг заагаад Будда Амитабад инээмсэглэн хэлсэн: Энэ хүүг сургаж болно. Өөрөөр хэлбэл, энэ залуу сайн байна, түүнд зааж болно гэсэн үг.

Түүхийн үеэс болон дээд түвшний орон зайнаас харахад хүний бясалгаж чадах үгүйг тодорхойлохдоо хүсэл тачаалын асуудалд яаж хандахыг нь маш чухалд хардаг. Тиймээс бид үнэхээр эдгээр асуудлыг хөнгөн авч үзэх ёстой. Гэхдээ бид энгийн хүмүүсийн дунд бясалгаж байгаа, чамайг үүнийг бүрмөсөн хязгаарла гэж шаардаагүй.

Одоогийн шатанд наад зах нь чи үүнийг хөнгөн авч үз, урьдын байсан шиг хэвээр байж болохгүй. Бясалгаж байгаа хүний хувьд ийм байх хэрэгтэй. Чигон бясалгалын явцад аливаа хэлбэрийн үймүүлэл гарах болгонд шалтгааныг өөрөөсөө хай, чамд орхиж чадаагүй өөр юу байгааг хар.

Өөрийн сэтгэлээс чөтгөрийн үймүүлэл үүсэх нь

Өөрийн сэтгэлээс чөтгөрийн үймүүлэл үүсэх гэж юу вэ? Хүний бие орон зай болгонд бүгдэд нь нэг нэг бие бодийн оронтой. Нэг онцгой оронд, орчлон ертөнцийн бүх зүйл чиний орон зайн тэр хүрээнд сүүдэр шиг тусдаг. Хэдийгээр тэдгээр нь сүүдэр боловч тэд бодитоор орших зүйл. Чиний орон зайн хүрээн доторхи бүх зүйлс чиний тархинаас гарах бодолд захирагддаг. Өөрөөр хэлбэл, чи юу ч бодохгүйгээр тэнгэрийн мэлмийгээрээ тайван харах юм бол тэр харагдсан зүйл нь үнэн. Харин чамд жоохон бодол гарах үед харсан зүйл хуурмаг болно. Үүнийг өөрийн сэтгэлээс чөтгөрийн үймүүлэл үүсэх буюу санаа дагаж хувирах гэдэг. Ийм байдал нь зарим бясалгагчид өөрийгөө бясалгагч гэж үзэж чаддаггүй, өөрийгөө барьж чаддаггүй, тэд ер бусын чадвартай болохыг хөөцөлддөг, мөн жижигхэн арга увьдсанд зууралддаг, тэр ч байтугай өөр орон зайнаас сонссон зарим зүйлд автах зэргээс болж гардаг. Тэд эдгээр зүйлийг л хөөцөлддөг, үүнд зууралдчихдаг. Ийм хүмүүст өөрийн бодлоос чөтгөрийн үймүүлэл үүсэх, доош унах нь амархан байдаг. Хэр өндөр бясалгасан ч хамаагүй ийм асуудал гарахад шууд ёроол руу унана, бүрмөсөн сүйрнэ. Энэ бол маш ноцтой асуудал. Энэ нь зан чанарын сорилтыг давж чадахгүй унаад дахин үргэлжлүүлж бясалгаад дээшилж болдог бусад тохиолдлуудтай адилгүй. Харин өөрийн сэтгэлээс чөтгөрийн үймүүлэл үүсэх асуудал гарвал тэгэх боломжгүй түүний энэ нас нь сүйднэ. Ялангуяа бясалгаад тэнгэрийн мэлмий нь тодорхой өндөрт нээгдсэн

хүнд ийм асуудал амархан гардаг. Зарим хүний бодол нь үргэлж гадны мэдээллээр үймүүлэгддэг, гадны мэдээлэл юу ярина түүнд итгэдэг хүмүүст ийм асуудал бас гардаг. Тиймээс тэнгэрийн мэлмий нээгдсэн зарим хүн янз бүрийн мэдээлэлд үймүүлэгдэнэ.

Би та нарт нэг жишээ хэлье: Доод түвшний бясалгалд хүн сэтгэлээ хөдөлгөөнгүй барьж байхад их хэцүү. Чи багшийгаа ямар дүр төрхтэйг тодорхой харж чадахгүй байж мэднэ. Гэнэт нэг өдөр чамд нэг том бурхан ирснийг харсан. Тэр чамайг хэдэн үгээр магтсан тэгээд ямар нэгэн зүйл чамд заана, чи түүнийг нь хүлээж авбал чиний гон замбараагүй болно. Чиний сэтгэл хөөрч түүнийг багшаа гэж хүлээн зөвшөөрөн түүнийг дагаад сурна. Гэхдээ тэр ч гэсэн жинхэнэ гэгээрлийн хутаг олоогүй, тэр орон зайнд түүний бие том жижгээр хувирч чаддаг. Энэ бүгд чиний нүдний өмнө илэрч том бурхан байхыг хараад чиний сэтгэл маш их догдолно, баярлах сэтгэлээр түүнийг дагаж сурахгүй гэж үү? Бясалгадаг хүн өөрийгээ барьж чадахгүй бол аврагдахад тун хэцүү, тэр өөрийгөө амархан сүйтгэнэ. Тэнгэрийн хүн бүгд бурхан, гэхдээ тэр бас жинхэнэ гэгээрлийн хутаг олоогүй учраас мөн адил зургаан замын тойргоор явна. Чи хамаагүй түүнийг багшаа болгон дагавал тэр чамайг хаана хүртэл дагуулах юм? Тэр өөрөө ч жинхэнэ гэгээрлийн хутаг олоогүй, чи үр дүнгүй бясалгасан биш гэж үү? Эцэст нь чиний гон аль хэдийн замбараагүй болсон. Хүн сэтгэлээ барихад хэцүү. Би та бүгдэд хэлье, энэ бол маш ноцтой асуудал, ирээдүйд олон хүнд энэ асуудал гарна. Би та нарт Ном ярилаа, өөрийгээ зөв барьж чадах чадахгүй нь чамаас шалтгаална, миний энэ ярьсан бол нэг янзын байдал. Өөр бясалгалын ямар ч гэгээрэгчийг харсан сэтгэл хөдлөхгүй нэг номоороо л бясалга. Ямар ч Будда, Дао, бурхан эсвэл ямар ч буг чөтгөр чиний сэтгэлийг хөдөлгөж чадахгүй байвал чи үр дүнд хүрэх нь лавтай.

Өөрийн сэтгэлээс буг чөтгөрийн үймүүлэл үүсэх нь бас өөр байдлаар илэрдэг. Магадгүй нас барсан төрөл садны хүний үймүүлэл байдаг, тэр уйлаад л чамайг энэ тэр зүйлийг хийж өгөхийг гуйна. Янз бүрийн зүйл тохиолдож болно. Чиний сэтгэл хөдлөхгүй байж чадах уу? Чи өөрийнхөө хүүхдэд дэндүү хайртай бас эцэг эхдээ их хайртай байсан, эцэг эх чинь аль хэдийн нас барсан, тэд чамайг ямар нэг зүйл хийхийг гуйсан, бүгд хийж болохгүй зүйл, чи хийчихвэл буруутна, бясалгагч хүн байхад ийм л хэцүү. Хүмүүс Буддын шашинг замбараагүй болсон гэж ярьдаг. Күнзийн шашнаас хүртэл эцэг эхээ халамжлах, үр хүүхдээ хайрлах сэтгэл гэх мэт зүйлс Буддын шашинд орсон. Буддын шашинд ийм ухагдахуун байхгүй. Энэ нь юу гэсэн үг вэ? Өөрийн жинхэнэ амь бол сүнс учраас чиний сүнсийг төрүүлсэн эх бол чиний жинхэнэ эх. Чи зургаан замын тойргоор явахад чиний эх хүн байсан бас хүн биш байсан, тэднийг тоолохын аргагүй. Төрлөөс төрөлд чиний хүүхдүүд хэр олон байсан нь мөн тоологдошгүй. Аль нь чиний ээж юм? Аль нь чиний хүүхэд юм? Нас барсны дараа хэн нь ч хэнийгээ танихгүй. Чи тавьсан өрөө ямар ч байсан төлөх болно. Хүн төөрөлтийн дунд эдгээр зүйлийг орхиж чаддаггүй. Зарим хүн хүүхдээ гэсэн сэтгэлээ орхиж чадахгүй, ямар сайн хүүхэд байсан тэр нас барчихлаа гэнэ. Бас нэг нь ямар сайн ээжтэй байсан, эх нь нас барсан гэж ярина. Энэ хүн үхтлээ гашуудаж үлдсэн насандаа хойноос нь явмаар санагдана. Чи энэ талаар бодож үзсэн үү? Энэ нь чамайг зовоож байгаа биш гэж үү? Тэд ийм хэлбэрээр чамд тайван амьдрах боломж өгөхгүй.

Энгийн хүн үүнийг магадгүй ойлгохгүй. Чи эдгээр зүйлд зууралдвал ер бясалгаж чадахгүй, тиймээс Буддын шашинд ийм ухагдахуун байхгүй. Чи бясалгах хүсэлтэй бол хүний сэтгэлээ орхих ёстой. Мэдээж бид энгийн хүний нийгэмд бясалгаж байгаа учраас эцэг эхийг халамжилна, үр хүүхдээ сурган хүмүүжүүлнэ, ямар ч байдалд бусад хүмүүст нинжин

сэтгэлтэй хандах төдийгүй гэр бүлийнхэндээ бас сайн байх ёстой. Эцэг эх, үр хүүхэддээ болон хэнд ч адил ингэж хандах хэрэгтэй, мөн юм болгон дээр бусдыг эхлээд бодох ёстой, ийм сэтгэл бол хувиа хичээсэн биш, энэ бол нинжин сэтгэл, энэрэнгүй сэтгэл. Сэтгэл бол энгийн хүний зүйл, энгийн хүн үүний тулд л амьдардаг.

Маш олон хүн сэтгэлээ сайн барьж чаддаггүйгээс бясалгалдаа бэрхшээл учруулдаг. Зарим хүн Будда түүнд ямар нэгэн зүйл хэлсэн гэдэг. Чамд өнөөдөр ямар нэгэн гай тохиолдоно, ямар нэгэн хэрэг гарна, түүнээс яаж тойрч гарахыг хэлнэ. Эсвэл чамд хонжворын дээд сугалааны дугаарыг хэлж очоод ав гэнэ. Чамд амь насны аюулаас яаж зайлахыг хэлснээс бусад аливаа энгийн хүний нийгэмд яаж ашиг олохыг хэлж өгсөн бүгд буг чөтгөрүүд. Чи энгийн хүмүүсийн дунд үргэлж тааваараа байгаад энэ сорилтыг давахгүй бол дээшилж чадахгүй. Чи энгийн хүний дунд маш тохитой сайхан амьдарвал яаж бясалгах юм? Чиний нүгэл яаж хувирах юм? Тэгвэл чамд яаж зан чанараа дээшлүүлэх, нүглээ хувиргах орчин нөхцөл бүрдэх юм? Хүн болгон үүнийг эрх биш санаж яваарай. Буг чөтгөр чамайг бас магтаж болно, чиний түвшинг их өндөр гэнэ, чамайг том Будда эсвэл том Дао гэнэ, чамайг их мундаг гэнэ, энэ бүгд бол хуурамч. Жинхэнэ дээд түвшин лүү бясалгадаг хүн янз бүрийн зууралдсан сэтгэлээ орхих ёстой. Ийм асуудал гарахад та бүгд сэрэмжтэй байх хэрэгтэй!

Бясалгалын явцад тэнгэрийн мэлмий нээгдэнэ. Тэнгэрийн мэлмий нээлттэй бясалгахад хэцүү тал байдаг. Тэнгэрийн мэлмий хаалттай бясалгахад бас хэцүү тал байдаг. Аль ч тохиолдолд бясалгахад амаргүй. Тэнгэрийн мэлмий нээгдсэний дараа янз бүрийн мэдээлэл чамайг үймүүлэх үед өөрийгээ барих үнэхээр хэцүү. Бусад орон зайд байгаа бүх зүйлс гялалзам гоё, маш үзэсгэлэнтэй сайхан харагдана, аль нь ч чиний сэтгэлийг булааж болно.

Сэтгэл чинь үүнд автахад чи магадгүй үймүүлэлд орж чиний гон замбараагүй болно, ер нь ийм л байдаг. Иймээс өөрийн сэтгэлээс буг чөтгөрийн үймүүлэл үүссэн хүн өөрийгээ барьж чадахгүй бол бас ийм байдал гарч болно. Жишээ нь, энэ хүнд нэг л буруу бодол үүсчихвэл энэ нь маш их аюултай. Нэг өдөр түүний тэнгэрийн мэлмий нээгдсэн, юмыг маш тодорхой хардаг болсон. Тэр ингэж бодсон: Бясалгал хийдэг энэ газарт миний тэнгэрийн мэлмий л хамгийн сайн нээгдсэн. Би магадгүй энгийн хүн биш байх аа? Би Ли багшийн Фалунь Дафаг сурч чадсан, би бүхнээс илүү маш сайн сурсан. Магадгүй би бас жирийн нэг хүн биш байх. Энэ бодол нь аль хэдийн буруутсан юм. Тэр бодно, Магадгүй би бас Будда байх. Өөрийгээ нэг хараадахъя байз. Тэр өөрийгөө харахад үнэхээр нэгэн Будда харагдана. Яагаад тэр вэ? Яагаад гэвэл түүний биеийн эргэн тойрны орон зайн хүрээн доторхи бүх зүйлс түүний бодлын дагуу хувирдаг. Үүнийг санаа даган хувирах гэдэг.

Орчлон ертөнцөөс тусгагдаж буусан бүх зүйлс өөрийн бодлын дагуу хувирдаг. Учир нь хүний орон зайн хүрээн доторхи бүх зүйлс өөрийн удирдлаган доор байдаг, дүрс болон бие бодийн оршил мөн адил. Тэр ингэж бодно, би Будда байх аа, миний өмссөн магадгүй Буддын орхимж байхаа. Тэр өөрийгээ харахад үнэхээр Буддын орхимжтой байна. Аая, би үнэхээр Будда юм байна. Түүний сэтгэл их хөөрсөн. Би магадгүй жижиг ч Будда биш байх аа. Дахиад нэг өөрийгээ харахад том Будда харагдана. Магадгүй би Ли Хонжигоос ч дээгүүр байх аа! Хараадахъя, Аая, би үнэхээр Ли Хонжигоос дээгүүр юм байна. Бас зарим хүний чихэнд ингэж сонсогдоно, буг чөтгөр түүнийг үймүүлж хэлнэ: Чи Ли Хонжигоос дээгүүр, чи Ли Хонжигоос хавьгүй дээгүүр. Тэр бас үүнд үнэмшинэ. Чи цаашдаа яаж бясалгах вэ гэж бодож үзсэн үү? Урьд нь чи бясалгаж байсан уу? Хэн чамд бясалгал заасан бэ? Жинхэнэ Будда ч ямар нэгэн зорилготойгоор бууж ирэхдээ бас эхнээсээ бясалгах ёстой,

урдных нь гон-ыг өгөхгүй зөвхөн бясалгал нь нэлээд хурдан явцтай байна. Тиймээс энэ хүн ийм байдалд ороход өөрийгөө татан авахад маш хэцүү, зууралдсан сэтгэл дорхноо гардаг. Түүнээс хойш тэр юу ч хэлж зүрхэлнэ. Би бол Будда, та нар бусдаас сурах хэрэггүй. Би Будда болохоор та нарт яаж хийхийг зааж өгье. Тэр ийм зүйл хийнэ.

Чанчуньд бидний дунд ийм хүн бас байсан биз дээ? Анхандаа тэр маш сайн хүн байсан, дараа нь ийм асуудал гарсан. Тэр Будда болсон гэж бодсон, эцэст нь тэр өөрийгөө хэнээс ч дээгүүр гэж үзсэн. Энэ нь хүн өөрийгөө барьж чадахгүй, зууралдсан сэтгэлд автсанаас болсон. Яагаад ийм байдал гардаг вэ? Буддын шашинд ингэж ярьдаг, чи ямар ч зүйл харсан битгий түүнийг анхаар, бүгд буг чөтгөрийн хуурмаг үзэгдэл, чи зөвхөн өөрийгөө самади-д оруулж дээш бясалга гэдэг. Яагаад чамд үзүүлэхгүй, чамайг тэдгээр зүйлд зууралдуулахгүй гэж байгаа вэ? Учир нь ийм асуудал гарахаас болгоомжилж байгаа юм. Буддын шашинд бясалгахад ямар ч эрчимт бясалгалын арга байхгүй, сударт мөн чамайг үүнээс яаж зайлах талаар заагаагүй. Шагжамүни тэр үедээ тийм Ном яриагүй. Өөрийн сэтгэлээс буг чөтгөр үүсэх, санаа дагаж хувирах асуудлаас зайлуулахын тулд бясалгалын дунд харсан бүх байдлыг чөтгөрийн хуурмаг үзэгдэл гэж хэлдэг. Тиймээс зууралдсан сэтгэл гарахад чөтгөрийн хуурмаг үзэгдэл үүсдэг, хүн түүнээс салахад тун хэцүү. Энэ хүн зөвөөр шийдвэрлэхгүй бол магадгүй дуусна, буг чөтгөрийн замаар орно. Тэр өөрийгөө Будда гэж хэлж байгаа учраас аль хэдийн буг чөтгөрийн замаар орсон юм. Эцэст нь түүнд магадгүй сүнс шүгэлж эсвэл өөр зүйлтэй учирч бүрмөсөн дуусна. Түүний бодол, сэтгэл нь бас буруутсанаас бүрмөсөн доош унана. Ийм хүн нилээд олон байдаг. Одоо энэ ангид зарим хүн өөрийгөө нэлээд дажгүй гэж үздэг, дээгүүр зангаар ярьдаг. Өөрийгөө чухам ямар учиртай байгаагаа ч мэдэхгүй, Буддын шашинд ийм зүйлийг

маш их цээрлэдэг. Миний сая ярьсан бол буг чөтгөр үймүүлэх өөр нэгэн хэлбэр бөгөөд үүнийг өөрийн сэтгэлээс буг чөтгөр үүсэх буюу санаа дагаж хувирах гэж хэлдэг. Бээжинд ийм сурагч байдаг, мөн зарим газарт бас гарсан, бясалгагчдыг маш их үймүүлж байна.

Нэг хүн надаас Багшаа, та яагаад энэ байдлыг арилгахгүй байгаа юм бэ? гэж асуусан. Та бүгд боддоо, хэрэв бид чиний бясалгалын зам дээрх бүх саад бэрхшээлийг арилгаад байвал чи яаж бясалгах юм? Буг чөтгөрийн үймүүлэл дор чамайг бясалгалаа үргэлжлүүлж чадах үгүйг, Дао-г үнэхээр ухамсарлаж чадах эсэхийг, үймүүлэлд автах автахгүйг, энэ Номын бясалгалд баттай зогсож чадах үгүйг чинь харна. Бясалгал бол далайн давалгаа элсийг шигшихтэй адил. Эцэст нь тунаж үлдэх нь бол шижир алт. Ийм үймүүлэх зүйл байхгүй бол бясалгал хэтэрхий амархан болно гэж би хэлнэ, миний харж байгаагаар чи маш амар бясалгаж байна. Дээд түвшний аугаа гэгээрэгчид үүнийг хэтэрхий шударга бус гэж магадгүй. Чи юу хийж байна вэ? Чи хүнийг ингэж аварч байгаа юм уу? Бясалгалын замд ямар ч саад тохиолдохгүй шууд эцэст нь хүрвэл үүнийг бясалгал гэх үү? Бясалгалын туршид хүнд улам ая тухтай болж ямар ч үймүүлэлгүй байхыг яаж зөвшөөрөх юм? Ийм асуудал байгаа, би бас энэ талаар бодож байгаа. Эхний үед би маш олон ийм буг чөтгөрийг дарсан. Миний бодлоор, хэрэв би үргэлж ингээд байвал бас болохгүй. Бас надад ингэж хэлсэн, чи тэдний бясалгалыг хэтэрхий амархан болгосон. Хүн зөвхөн өөрийн ийм л бага зовлонтой, хүн хүний хоорондын тэр жоохон зүйлүүд, бас олон сэтгэлээ орхиж чадахгүй! Эргэлзэл, үймүүллийн дунд чиний Дафа-г тэд өөрсдөө ухамсарлаж чадах уу үгүй юу гэдэг асуулт хэвээр үлдэж байна. Ийм асуудал байдаг учраас үймүүлэл сорилтууд байх болно. Энэ бол буг чөтгөр үймүүлэх нэг янзын хэлбэр гэж би хэлсэн. Хүнийг аврахад маш хэцүү, харин хүнийг сүйтгэхэд тун

амархан. Чиний сэтгэл нэг буруутвал чи тэр дорхноо сүйднэ.

Эзэн бодол хүчтэй байх ёстой

Төрөл төрөлдөө үйлдсэн муу үйл нь хүнд гай зовлон бий болгодог, бясалгагч хүнд нүглийн саад бий болдог, иймээс төрөлт, хөгшрөлт, өвчлөл, үхэл оршдог. Энэ бол жирийн нүгэл. Бас өөр нэг хэлбэрийн маш хүчтэй нүгэл байдаг, энэ нь бясалгадаг хүнд маш их нөлөөлдөг, үүнийг бодлын нүгэл гэдэг. Хүн амьд байвал юм бодно. Хүн энгийн хүний дунд төөрсний улмаас толгойд нь үргэлж нэр алдар, ашиг хонжоо, хүсэл тачаал, уур хилэнгийн гэх мэт бодол байнга орж ирж байдаг. Яваандаа ийм бодлууд нь хүчтэй бодлын нүгэл болдог. Өөр орон зайд бүх зүйлс амьтай болохоор нүгэл бас адилхан. Хүн ариун номоор бясалгаж эхлэхэд нүглээ арилгах ёстой. Нүглээ арилгах гэдэг нь нүглийг устгах, хувиргах юм. Мэдээж нүгэл эсэргүүцнэ, иймээс хүнд гай зовлон, саад бэрхшээл байдаг. Гэвч бодлын нүгэл хүний тархийг шууд үймүүлж чаддаг. Тийм учраас бодолд Багшийг загнасан, Дафа-г загнасан, муу ёрын санаа бодол, хүн загнасан үгнүүд орж ирдэг. Тэгэхэд зарим бясалгагч ямар учиртайг нь мэдэхгүй, тийм бодол өөрөөс нь гарсан гэж боддог. Бас зарим хүн үүнийг шүглэсэн сүнс гэж боддог гэхдээ энэ нь тийм биш, харин бодлын нүгэл хүний тархинд туссанаас болдог. Зарим хүний эзэн бодол хүчтэй биш, бодлын нүглийг дагаад муу зүйлийг хийдэг. Ийм хүн сүйрнэ, доош унана. Гэхдээ ихэнх хүмүүс өөрийн хүчтэй бодлоор (хүчтэй эзэн бодлоор) үүнийг зайлуулж, эсэргүүцэж чаддаг. Ингэж сайн мууг ялгах чадвартай байвал тэр хүн аврагдах боломжтой. Өөрөөр хэлбэл энэ хүний ухамсар нь сайн. Миний Номын бие энэ бодлын нүглийн ихэнх хэсгийг арилгаж өгнө. Ийм асуудал нилээд их гардаг. Ийм байдал гарахад чамайг өөрөө энэ муу бодлыг

ялан дийлж чадах эсэхийг чинь харна. Хэрэв чи тууштай зогсож чадвал энэ нүгэл устана.

Сэтгэл заавал зөв байх ёстой

Буруу сэтгэл гэж юу вэ? Энэ нь тэр өөрийгээ үргэлж бясалгагч хүн гэж үзэж чаддаггүй. Бясалгагч хүн бясалгалын явцад бэрхшээл зовлонтой тулгарна. Энэ бэрхшээл гарахдаа магадгүй хүн хүний хоорондын зөрчлөөр илэрдэг, бие биенээ чадах гэх мэт зүйл гарна, чиний зан чанарт шууд нөлөөлнө. Ийм тохиолдол нилээд их байдаг. Бас өөр юу тааралдах вэ? Бидний бие гэнэт таагүй болдог, яагаад гэвэл нүгэл хариулалт янз бүрийн байдлаар илэрдэг. Тодорхой нэг хугацаанд чамд үнэн ч юм шиг, хуурамч ч юм шиг санагддаг, чамд гон байгаа юм уу үгүй юу, бясалгаж чадах юм уу үгүй юу үндсэндээ дээш бясалгаж болох юм уу үгүй юу, эсвэл Будда байдаг юм уу үгүй юу, үнэн юм уу худал уу гэсэн эргэлзэх асуудал гарна. Ирээдүйд чамд ийм нэг байдал гарна, ийм нэг буруу мэдрэмж өгнө, чамд энэ бүгдийг оршдоггүй, хуурамч юм шиг санагдуулна, чиний тууштай байж чадах эсэхийг харна. Чи гуйвшгүй баттай зогсож чадна гэж хэлнэ, тэр үед ийм сэтгэлтэйгээр үнэхээр гуйвшгүй, баттай байж чадвал чи үүнийг жамаараа сайн давна, яагаад гэвэл чиний зан чанар аль хэдийн дээшилсэн. Гэхдээ чи одоо арай тийм тогтвортой байдалд хүрээгүй. Хэрэв чамд энэ бэрхшээл зовлонг одоо шууд гаргавал чи үндсэндээ ухамсарлаж чадахгүй, үндсэндээ бясалгаж чадахгүй болно. Тал бүрийн саад бэрхшээл гарч ирж магадгүй.

Бясалгалын явцад хүн ингэж л дээш бясалгах ёстой. Иймээс бидний зарим нь биеийнхээ аль нэг газар таагүй болонгуут л өөрийгөө өвчин туссан гэж боддог. Тэр үргэлж өөрийгөө бясалгагч хүн гэж үзэж чаддаггүй, ийм зүйл

тохиолдоход үүнийг өвчин гэж үздэг. Яагаад ийм их бэрхшээл гардаг вэ? Чамд хэлье, аль хэдийн чамд маш ихээр арилгаж өгсөн, чиний гай зовлон маш бага болсон. Чамд арилгаж өгөхгүй бол чи энэ гай зовлонтой учирч магадгүй нас барах байсан, эсвэл магад орноосоо хэзээ ч өндийж чадахгүй болох байсан. Үл ялих зүйл тохиолдонгуут л чамд таагүй болчихно, тийм таатай зүйл яаж байх юм? Нэг жишээ хэлье, намайг Чанчуньд лекц уншиж байхад нэг маш сайн төрөлхийн суурьтай хүн байсан, үнэхээр ирээдүйтэй хүн байсан. Би түүнд найдвар тавьж болохоор байсан тул түүний төлөх зовлонг жоохон хурдасгасан, нүгэл нь хурдан төлөгдөөд гон нь нээгдэг гэж би төлөвлөсөн. Нэг өдөр түүнд гэнэт цус харвалтын шинж тэмдэг илэрч газарт унасан. Түүний хөл гар нь мэдээгүй болж хөдөлж чадахгүй мэт болсон, эмнэлэгт хүргэгдэж эрчимт эмчилгээнд орсон. Дараа нь тэр сайжраад явж чаддаг болсон. Та бүгд боддоо, тархинд нь цус харвасан хүн яаж тийм хурдан сайжраад, гар хөлөө хөдөлгөөд явж чаддаг болох юм? Эсрэгээр тэр Фалунь Дафа сураад түүнийг ийм байдалд оруулсан гэж буруутгасан. Тархины цус харвалтаас яагаад ийм хурдан сайжрав гэж тэр бодоогүй. Өнөөдөр тэр Фалунь Дафаг сураагүй бол нэг унаад шууд нас барж мэдэх байсан. Эсвэл үнэхээр тархины цус харвалт өгч, үүрд саа өвчтэй болж болох байсан.

Тийм болохоор хүнийг аврах ийм л хэцүү, түүний төлөө хичнээн их зүйл хийсэн, гэтэл тэр үүнийг ухамсарлаагүй харин ийм юм ярьж байдаг. Зарим хуучин сурагч ингэж асуудаг, багшаа, яагаад миний энэ тэнд таагүй байгаа юм болоо? Би эмнэлэгт үзүүлж тариа хийлгэсэн ч тус болохгүй, эм уусан ч бас үйлчлэхгүй юм. Тэр надад ингэж хэлэхээсээ ч зовохгүй! Мэдээж тус болохгүй. Тэдгээр нь өвчин биш, яаж тэр нь нөлөөлөх юм? Чи яваад биеэ үзүүлж болно. Бүх зүйл хэвийн боловч чиний бие зүгээр л нэг зовиуртай. Манай нэг сурагч эмнэлэгт очиж тариулахдаа хэдэн зүүг

тахийлгасан, эцэст нь дахиад хатгахад зүү нь бас ороогүй тариа нь шахагдаж асгарсан. Тэр ойлгосон: Өө, би чинь бясалгагч хүн тариа хийлгэх хэрэггүй. Тэр тариа хийлгэх хэрэггүйгээ сая л ухаарсан. Иймээс чамд гай зовлон тохиолдох бүрт эрх биш энэ асуудал дээр анхаар. Зарим хүн би тэднийг эмнэлэгт очиж үзүүлэхийг зөвшөөрөхгүй байна гэж ойлгодог, тэгээд ингэж бодно: Чи намайг эмнэлэгт очиж үзүүлүүлэхийг зөвшөөрөхгүй бол би чигон багш олж үзүүлнэ. Тэр үүнийг бас өвчин гэж үзсэн хэвээр, тэр чигон багш олж үзүүлнэ гэнэ. Хаанаас жинхэнэ чигон багш олох юм? Хуурамч дээр нь очвол тэр чамайг дор нь сүйдэлчихнэ.

Бид хэлсэн, тэр чигон багш жинхэнэ үү хуурамч уу гэдгийг нь чи яаж ялгах юм? Олон чигон багш өөртөө энэ нэрийг өгчихсөн. Намайг эрдэм шинжилгээний байгууллагаас хэмжин тогтоосон гэрчилгээ, бичиг баримтууд миний гарт байна. Олон чигон багш хуурамч, өөрсдийгөө өргөмжилсөн, ингэж хуурч мэхэлдэг нь хаа сайгүй байдаг. Тийм хуурамч чигон багш бас өвчнийг эдгээж чадна. Яаж эдгээдэг вэ? Түүнд сүнс эсвэл, амьтан шүглэсэн байдаг, түүнгүйгээр тэр хүнийг залилж чадахгүй! Тэр шүглэсэн сүнс эсвэл амьтан гон гаргаж бас өвчнийг эдгээж чаддаг. Энэ нь энергийн нэг төрлийн орших хэлбэр, энгийн хүмүүст амархан нөлөөлдөг. Гэхдээ би хэлсэн, тэр шүглэсэн сүнс эсвэл амьтан чамайг эдгээхдээ чиний биенд ямар зүйл өгөх вэ? Маш бичил байдалд харахад энэ нь шүглэсэн сүнс эсвэл амьтны дүрс байдаг. Үүнийг чиний биенд гаргавал чи яах вэ? Сүнс даллахад амархан, явуулахад хэцүү. Энгийн хүмүүсийн талаар бид ярихгүй, тэд зөвхөн энгийн хүнээрээ байх хүсэлтэй, түр зуурын тааламжтай байдлыг л хүсдэг. Гэхдээ чи бол бясалгаж байгаа хүн, биеэ тасралтгүйгээр ариусгахыг хүсч байгаа биш гэж үү? Энэ зүйл чиний биен дээр гарчихвал хэзээ чи түүнийг биенээсээ зайлуулж чадах юм? Мөн тэр бас тодорхой хэмжээний энергитэй. Зарим хүн ингэж боддог,

Фалунь яагаад түүнийг оруулсан бэ? Багшийн Номын бие биднийг хамгаалдаг биз дээ? Манай энэ орчлон ертөнцөд нэг зарчим байдаг: Чи өөрөө хүссэн бол хэн ч оролцохгүй, чи өөрөө авах бодолтой бол хэн ч оролцохыг хүсэхгүй. Миний Номын бие чамайг хориглоно, чамд дохио сануулга өгнө. Гэхдээ чамайг үргэлж ийм байвал хариуцахаа болино. Хүнийг хүчээр бясалгуулна гэж хаана байх юм? Чамайг хүчилснээр, шахсанаар чи бясалгадаг болохгүй. Чиний жинхэнэ дээшлэх нь өөрөөс чинь шалтгаална. Чи өөрийгээ сайжруулах хүсэлгүй бол ямар ч арга байхгүй. Энэ зарчмыг чамд хэллээ, Номоо ч чамд ярилаа, чи өөрийгээ дээшлүүлэхийг хүсэхгүй байвал хэнийг буруутгах юм? Чи юу хүснэ түүнд Фалунь болон миний Номын бие оролцохгүй, энэ бол дамжиггүй. Зарим хүн өөр чигон багш нарын хичээлд хүртэл суусан, тэгээд гэртээ хариад бие нь эвгүйтсэн. Тэр бол мэдээж. Тэгвэл Номын бие чамайг яагаад хамгаалаагүй вэ? Чи юу хийхээр тэнд очсон юм? Юм сонсохоор очсон, энэ нь чи хүсч очсон юм биш гэж үү? Чи чихээрээ оруулаагүй бол тэр чиний биенд яаж орж чадах юм? Зарим хүн өөрийнхөө Фалуний хэлбэрийг гажуудуулсан. Би чамд хэлье, энэ Фалунь бол чиний аминаас илүү үнэтэй. Тэр бол нэгэн дээд зэргийн амь бодь, хамаагүй түүнийг сүйтгэж болохгүй. Одоо хуурамч чигон багш нар маш олон, зарим нь бүүр их нэрд гарсан. Би Хятадын чигон судлалын нийгэмлэгийн удирдагчидтай уулзахдаа эрт дээр үед байсан бага хатан Дажиг³, хааны ордонд ямар их гай барцад тарьсан тухай ярьсан. Тэр үнэг хорон зүйл их хийсэн ч одоогийн хуурамч чигон багш нарын бүх орон даяар учруулсан гай гамшигтай дүйцэхгүй. Хэр их хүнд гай тарьсан гээч?! Гадна талаас нь харахад энэ нь чамд их сайн юм шиг харагдаж магад гэхдээ хичнээн олон хүн биендээ тэдгээр зүйлсийг тээж явна вэ? Хэрэв тэр чамд өгвөл чамд орчихно, энэ бол тун ноцтой. Тиймээс энгийн хүн үүнийг гаднаас нь хараад танихад хэцүү.

Зарим хүн, өнөөдөр энэ чигон лекцэнд сууж Ли Хонжигийн ярихыг сонсоод чигон бол ёстой сайн юм байна бас их гүн гүнзгий гэдгийг ойлголоо! Дахиад өөр чигон лекцүүд байвал би бас очиж сонсох хэрэгтэй юм байна гэж бодож магад. Би чамайг хэрхэвч тийшээ бүү оч гэж хэлмээр байна. Муу зүйл сонсвол чихээр чинь орно. Хүнийг аврахад маш хэцүү, чиний бодол санааг өөрчлөхөд маш их хэцүү, чиний биеийг ариусгах бас маш их хэцүү. Хуурамч чигон багш их олон байдаг. Жинхэнэ уламжлагдсан чигон багш байсан ч тэр үнэндээ цэвэр гэж үү? Зарим амьтад маш их айхтар. Тэр зүйлс түүний биенд орж чадахгүй ч тэднийг бас зайлуулж чадахгүй. Тэр эдгээр зүйлсийг өргөн хэмжээнд зайлуулах чадваргүй, ялангуяа түүний сурагч бүр ч чадахгүй. Түүний гон гарахад янз бүрийн муу зүйлүүд дотор нь холилдсон байдаг. Хэдий тэр өөрөө ёс журамтай байсан ч түүний сурагчид ариун биш, янз бүрийн шүглэсэн сүнстэй.

Чи үнэхээр Фалунь Дафагаар бясалгах хүсэлтэй бол битгий очиж сонс. Фалунь Дафагаар бясалгахыг хүсэхгүй, юм болгоноор хичээллэх сонирхолтой бол чи оч. Би чамайг хориглохгүй, чамайг бас Фалунь Дафагийн шавь гэж үзэхгүй. Ямар нэгэн асуудал гарвал чи битгий Фалунь Дафаг бясалгаснаас боллоо гэж яриарай. Чи зан чанарын шалгуурын дагуу хийвэл, Дафагийн дагуугаар бясалгах юм бол жинхэнэ Фалунь Дафагийн сурагч. Зарим хүн би өөр чигон-оор хичээллэдэг хүнтэй харилцаж болох уу? гэж асуудаг. Би чамд хэлье, тэд бол зөвхөн чигон-оор хичээллэдэг, харин чи бол Дафа-гаар бясалгадаг. Энэ лекцийг дуусахад чиний түвшин тэд нарыг маш хол орхино. Энэ Фалунь бол олон үеийнхний бясалгаж бүтээсэн зүйл, бас зүйрлэшгүй хүчирхэг. Бололгүй яахав, хэрэв чи тэдэнтэй уулзахдаа ямар нэгэн зүйл хүлээж авахгүй, зүгээр энгийн найз нөхдийн хувьд бол асуудалгүй. Гэхдээ тэдний биенд үнэхээр ямар нэгэн зүйл байвал маш муу, тэдэнтэй

харьцахгүй байсан нь дээр. Эхнэр нөхрийн хувьд хэн нэг нь өөр чигон бясалгал хийдэг бол энэ нь бас их асуудалгүй гэж би бодож байна. Гэхдээ нэг зүйл байдаг, чи ариун номоор хичээллэдэг учраас чиний бясалгал бусдад ач тустай. Хэрэв чиний хань буруу номоор хичээллэдэг бол, тэр магадгүй биендээ муу зүйлс агуулдаг. Чиний аюулгүй байдлын тулд түүнд бас цэвэрлэж өгнө. Өөр орон зайд байгаа бүх муу зүйлийг чиний төлөө цэвэрлэж өгнө. Гэрийн чинь орчинг бас ариусгана. Орчин чинь цэвэр биш, янз бүрийн зүйл чамайг үймүүлбэл чи яаж бясалгах юм?

Гэхдээ нэг тохиолдолд миний Номын бие цэвэрлэж өгөхгүй. Манай нэг сурагч нэг өдөр миний Номын бие гэрт нь ирэхийг харсан. Тэр их баярласан, Багшийн Номын бие ирлээ, Багшаа та орооч. Миний Номын бие, чиний өрөө тун замбараагүй, их олон зүйлс байна гэж хэлээд яваад өгсөн. Ихэвчлэн өөр орон зайд олон муу сүнс байвал миний Номын бие чамд арилгаж өгнө. Гэхдээ түүний өрөөнд янз бүрийн замбараагүй чигон номнууд дүүрэн байсан. Тэр үүнийг ойлгоод тэдгээрийг шатаахыг нь шатааж, зарахыг нь зарж цэвэрлэсэн. Дараа нь миний Номын бие буцаж ирсэн. Үүнийг тэр сурагч надад ярьсан юм.

Бас мэрэгч төлөгчид очиж үзүүлдэг хүмүүс байдаг. Нэг хүн надаас асуусан: Багшаа, би Фалунь Дафагаар хичээллэдэг. Би Жоуи эсвэл мэрэг төлөг үзэх талын зүйлд бас их сонирхолтой. Би урьдын адил үзэж байж болох уу? Би үүнийг ингэж хэлье, хэрэв чи тодорхой хэмжээний энергитэй бол, чиний хэлсэн үг нөлөөтэй. Хэрэв чи ямар нэгэн зүйлийг тийм учиртай биш байхад түүнийг тийм учиртай гэж хэлбэл чи магадгүй муу зүйл хийчихнэ. Энгийн хүн бол их сул дорой. Түүний мэдээлэл нь тогтвортой биш, зарим нь өөрчлөгдөж магадгүй. Чи шууд хүнд ямар нэгэн зүйл хэлнэ, магадгүй тэр гай зовлон нь биеллээ олно. Хэрэв тэр хүн маш их нүгэлтэй, түүнийгээ төлөх ёстой байтал чи

дандаа түүнд сайн зүйл тохиолдоно гэж хэлээд байвал тэр нүглээ төлж чадахгүй, ийм байж болох юм уу? Чи түүнд муу юм хийж байгаа юм биш үү? Зарим хүн энэ зүйлээсээ салж чаддаггүй зууралдаад л байдаг, өөрийгээ их чадвартай гэж үздэг. Энэ нь зууралдсан сэтгэл биш гэж үү? Хэрэв чи үнэхээр мэдэж байсан ч бясалгагчийн хувьд зан чанараа сахих хэрэгтэй, бас хамаагүй тэнгэрийн нууцыг энгийн хүнд задалж болохгүй. Энэ бол зарчим. Жоуи-гээр яаж үзсэн ч зарим зүйл аль хэдийн өөрчлөгдсөн байдаг. Мэргэлээд байхад зарим зүйл үнэн, зарим нь худлаа байдаг. Энгийн хүний нийгэмд мэрэг төлөг үзэх асуудал байхыг зөвшөөрдөг. Чи бол жинхэнэ гон-той хүн, жинхэнэ бясалгагч хүн, дээд түвшний шалгуураар өөрийгөө шаардах хэрэгтэй гэж би чамд хэлнэ. Гэтэл зарим бясалгагч өөр хүнээр мэргэлүүлдэг, би хэр явна миний төөргийг үзээд өгөөч? Миний бясалгал ямаршуу байна? Эсвэл надад ямар нэгэн гай зовлон тохиолдох уу? Тэд хүнээр ийм зүйл мэргэлүүлдэг. Хэрэв тэр тохиолдох зовлон бэрхшээлийг үзээд хэлчихвэл чи яаж өөрийгээ дээшлүүлэх юм? Бясалгагч хүний үлдсэн амьдрал нь шинээр өөрчлөгдсөн, алганы хээ, царайны шинж байдал, төрсөн өдрийн төөрөг, мөн биеийн бүх мэдээллүүд нь урьдынхтай аль хэдийн таарахгүй болсон, бүгд өөрчлөгдсөн. Чи мэрэгч төлөгч дээр очвол тэр хүнд итгэнэ, итгэхгүй бол үзүүлэх гэж очих уу? Түүний хэлсэн нь өнгөцхөн, чамд хуучин байсан зүйлүүдийг л ярина, гэхдээ тэд аль хэдийн өөрчлөгдчихсөн. Тэгвэл та бүгд бодоод үз, чи мэрэгч төлөгч дээр очвол сонсоод түүнд итгэх юм биш үү? Тэгвэл энэ нь чамайг сэтгэл санааны дарамтанд оруулахгүй гэж үү? Шаналаад байвал зууралдсан сэтгэл биш гэж үү? Тэгвэл энэ зууралдсан сэтгэлийг яаж арилгах вэ? Чи өөртөө нэмэлт бэрхшээл учруулсан биш гэж үү? Энэ зууралдсан сэтгэлээс салахын тулд бас илүү зовох болно биз дээ? Сорилт болгон эсвэл гай зовлон болгон нь бясалгалдаа дээш ахих уу эсвэл доош унах уу гэсэн асуудалтай шууд холбоотой. Энэ зам нь угаасаа хэцүү, гэтэл

чи бас өөрөө өөртөө гай нэмээд, яаж үүнийг давах юм? Магадгүй үүнээс болоод чамд гай зовлон, төвөгтэй зүйл тааралдана. Чиний шинэчлэгдэн өөрчлөгдсөн амьдралын замыг өөр хүмүүсээр үзүүлэхийг зөвшөөрөхгүй. Энэ нь бусдад харагддаг бас чамд хэзээ гай зовлон тохиолдохыг нь хэлбэл чи яаж бясалгах юм? Иймээс үзүүлж хэрхэвч болохгүй. Өөр аль ч номын бясалгагчид үзэхийг зөвшөөрөхгүй. Ижил номын бясалгалын шавь нар байсан ч үүнийг үзэхийг зөвшөөрөхгүй. Хэн ч үүнийг зөв хэлж чадахгүй. Яагаад гэвэл энэ насны амьдрал нь өөрчлөгдчихсөн, энэ бол зөвхөн бясалгалын нэг нас юм.

Надаас нэг хүн өөр шашны болон чигон-ы ном уншиж болох уу гэж асуусан. Бид хэлсэн, шашны ном, ялангуяа Буддынх бол бүгд зан чанарыг яаж бясалгахыг заасан байдаг. Бид бас Буддын системийнх, уг нь асуудалгүй. Гэхдээ нэг зүйлийг онцлон хэлэх хэрэгтэй. Олон сударт зарим зүйлийг орчуулах явцад утга нь алдагдсан байдаг. Түүнээс гадна, судар номыг янз бүрийн түвшнээс тайлбарласан, дураараа томъёолсон байдаг. Энэ бол Номыг сүйтгэж байгаа хэрэг юм. Судар номыг хамаагүй тайлбарласан хүн Буддын ахуйн үзлээс маш хол, жинхэнэ ухагдахууныг ер ойлгоогүй, иймээс ойлголт нь өөр өөр байдаг. Чи өөрөө бүгдийг уншиж ойлгоно гэвэл бас амар биш, чи өөрөө ухамсраараа ойлгож чадахгүй. Гэхдээ, би судар номонд сонирхолтой гээд л үргэлж ном судар уншаад байвал чи тэр номын үүдэнд бясалгасан гэсэн үг, учир нь сударт тэр номын үүдний гон ба Ном нэгдмэл байдаг, нэг л сурах юм бол чи тэр номоор бясалгасан болно. Ийм асуудал байдаг. Хэрэв чи түүнд гүнзгий ороод тэр дагуу бясалгавал магадгүй тэр номын үүдэнд бясалгасан болно, манай номын үүднийх биш болно. Бясалгалыг угаасаа хослуулахгүй байхыг шаарддаг, чи үнэхээр энэ номын үүдэнд бясалгахыг хүсвэл энэ номын үүдний судрыг л унших ёстой.

Чигон номын тухайд гэвэл, чи бясалгахыг хүсч байвал тэдгээрийг битгий унш. Ялангуяа сүүлийн үед гарсан чигоны номнуудыг битгий үз. “Хуанди Нэйжин” (Шар хааны дотоод эмчилгээний ном), эсвэл “Шинмин Гуижи” (Дао жаяг) эдгээр номын тухайд гэвэл бас адилхан, бүү хар. Хэдийгээр эдгээрт муу зүйл байхгүй боловч, дотроо бас янз бүрийн түвшний мэдээлэл агуулдаг. Тэдгээр нь бас бясалгалын аргууд юм, нэг уншихад л чамд ямар нэгэн зүйл орж ирэн үймүүлнэ, энэ үгийг зөв гэж бодонгуут л гэнэт орчихно. Энэ нь муу зүйл биш боловч чиний гон-д гадны ямар нэгэн зүйл гэнэт нэмэгдвэл чи яаж бясалгах юм? Бас үүнээс болж асуудал гарахгүй гэж үү? Хэрэв чи телевиз дотор нэг хамаагүй электрон сэлбэг нэмчихвэл яах бол гэж бодож байна? Энэ нь дорхноо эвдэрнэ. Ийм л ёстой юм. Нэмж хэлэхэд одоогийн маш олон чигон ном хуурамч, мөн янз бүрийн мэдээлэлтэй. Манай нэг сурагч чигон номны хуудсыг эргүүлж байтал дотроос нь нэг том могой үсэрч гарч ирсэн. Би энэ талаар нарийн тайлбарлахыг хүсэхгүй. Миний саяны дурьдсан бол бясалгагч хүн өөртөө зөв хандаж чадаагүйн улмаас гардаг зарим байдал, эдгээр нь сэтгэл зөв биш болсноос үүссэн асуудал юм. Бид эдгээрийг та бүгдэд дурьдаж хэлэх нь зүйтэй, та бүхэнд юу хийх, тэдгээрийг яаж ялгах ёстойг мэдүүлснээр ирээдүйд ийм асуудал гарахаас сэргийлнэ. Би сая үүнийг ихэд онцолж хэлээгүй ч та бүгд эрх биш анхаараарай, яагаад гэвэл энэ зүйл дээр ихэвчлэн асуудал гардаг, үүнийг тойрсон асуудал үргэлж гардаг. Бясалгал бол туйлын хэцүү бэрх, бас маш нарийн. Хэрэв чи жоохон л хайхрамжгүй хандвал чи доош унаж тэр дороо сүйрч болно. Тиймээс сэтгэл заавал зөв байх ёстой.

Ушу чигон

Дотоод бясалгалын аргаас гадна Ушу чигон байдаг. Би Ушу чигон-ыг ярихдаа бас нэг асуудлыг чухалчилъя, одоо бясалгалын хүрээнд маш олон чигон-ы тухай ярьдаг.

Одоо дүрслэх урлагийн чигон, хөгжмийн чигон, уран бичгийн чигон, бүжгийн чигон гээд янз бүрийн төрлүүд гарч ирсэн. Эдгээр нь бүгд чигон гэж үү? Надад энэ нь их хачирхалтай, би үүнийг чигон-д гай болж байна гэж хэлнэ. Энэ нь чигон-д зөвхөн гай болоод зогсохгүй бас бусниулж байна. Тэдгээрийн онолын үндэслэл нь юу вэ? Зураг зурах, дуулах, бүжиглэх эсвэл үсэг бичиж байхдаа ховсдолын байдалд буюу тэдний хэлдэгээр чигон байдалд ордог. Ингэвэл чигон болчих юм уу? Үүнийг ийм байдлаар ойлгож болохгүй. Энэ нь чигон-ыг бусниулж байгаа хэрэг биш гэж үү? Чигон бол хүний биеийн бясалгалын өргөн бөгөөд гүн гүнзгий эрдэм юм. Ховсдолын байдалд орвол чигон болчих юм уу? Тэгвэл, хэрэв бид ийм байдалтайгаар бие засах газар орвол үүнийг юу гэж хэлэх вэ? Энэ нь чигон-ыг бусниулж байгаа юм биш үү? Би үүнийг чигон-ыг бусниулж байна гэж хэлнэ. Хоёр жилийн өмнө Дорно дахины Эрүүл Мэндийн Үзэсгэлэнд уран бичлэгийн чигон гэдэг зүйл байсан. Уран бичлэгийн чигон гэж юу вэ? Би тэнд очиж харахад нэг хүн бийрээр бичиж байсан. Тэр бичсэнийхээ дараа үсэг болгон дээр гараараа чий гаргаж байсан, гаргасан нь бүгд хар чий. Түүний ухаан бодолд нь мөнгө, нэр алдар дүүрэн бол түүнд гон байж чадна гэж хэлэх үү? Чий байсан ч гэсэн сайн чий биш. Тэдгээрийг өлгөөд нилээд үнэтэй зарж байсан, гэхдээ дандаа гадаадынхан очиж түүнээс авсан. Би тэдгээрийг худалдаж аваад гэртээ аваачсан хүнд сайн зүйл болохгүй гэж хэлнэ. Хар чий яаж сайн байх юм? Түүний царай нь тэр чигтээ хар бараан байсан. Тэр мөнгөний шуналд автсан, үргэлж л мөнгө бодсон, яаж гон байх юм? Гэсэн хэдий ч түүний нэрийн хуудсан дээр олон улсын уран бичлэгийн

чигон гэх мэт зөндөө цол хэргэм бичээстэй. Би хэлбэл ийм зүйл чигон-д тооцогдоно гэж үү?

Та бүхэн боддоо, миний энэ лекцэнд суусны дараа та нарын наяс ерэн хувь нь өнөөдөр өвчнөөсөө салаад зогсохгүй бас гон гаргана, жинхэнэ гон. Чиний биед бий болсон зүйлс аль хэдийн ердийн биш болсон. Чи өөрөө бясалгах юм бол, бүх насаараа бясалгаад ч гаргаж чадахгүй. Залуу хүн одооноос бясалгаж эхлээд, түүнд бас жинхэнэ сайн багш заасан ч миний өгсөн зүйлүүдийг энэ насандаа бясалгаад гаргаж чадахгүй. Бид их олон үеийн туршид энэ Фалунь болон эдгээр механизмыг бүтээсэн, эдгээр зүйлүүдийг бүгдийг нь чамд нэгэн зэрэг суулгаж өгсөн. Тийм болохоор та бүгд үүнийг битгий амархан олдсон гээд амархан алдчихаарай гэж захъя. Эдгээр нь туйлын үнэ цэнэтэй, мөнгөөр хэмжишгүй. Энэ ангийг төгсөөд чи жинхэнэ гон-той болно, энэ бол дээд энергийн бие бодь. Чи гэртээ хариад хэдэн үг бич, чиний бичгийн хэв ямар байх нь хамаагүй, энэ нь гон-той! Тэгвэл бидний энэ лекцэнд суусан хүн болгон “Багш” нэр зүүж бүгд уран бичлэгийн чигон багш болж болох уу? Би үүнийг тэгж ойлгож болохгүй гэж хэлнэ. Яагаад гэвэл жинхэнэ гон-той, энергитэй хүн үүнийг зориуд санаатайгаар гаргах гэсний хэрэггүй, чи хүрсэн юм болгондоо энерги үлдээнэ, бүгд гялалздаг.

Нэг сэтгүүл дээр уран бичлэгийн чигон-ы анги эхлэх гэж байгаа тухай байсан. Би үүнийг яаж заах талаар товчхон уншсан. Түүнд бичихдээ: Хүн эхлээд амьсгалаа авах гаргахаа зохицуулна, дараа нь 15-30 минут даньтиан дахь чий дээр бодлоо төвлөрүүлж суугаад бодлоороо энэ даньтианы чий-г гарын шуу луу явуулна, тэгээд бийрээ авч бэхэнд дүрээд чий-г бийрний үзүүрт шилжүүлнэ. Бодол нь тэнд хүрэхэд үсэг бичиж эхэлнэ. Энэ нь хүнийг мэхэлж байгаа хэрэг биш үү? Чий-г хаа нэгтээ шилжүүлбэл тийм нэгэн чигон болчих юм уу? Тийм бол бид хоол идэхийнхээ

өмнө хэсэг зуур завилж суугаад савхаа бариад чий-гээ савхны үзүүрт шилжүүлж хоолоо иднэ. Тэгвэл үүнийг хоол идэх чигон гэж нэрлэе, болох уу? Идсэн нь харин бүгд энерги, бид энэ талаар зүгээр санаа бодлоо л хэлж байна. Би үүнийг чигон-ыг бусниулж байна гэж хэлнэ, тэд чигон-ыг ийм өнгөцхөн зүйл гэж үздэг. Тиймээс үүнийг тэгж ойлгож болохгүй.

Гэхдээ Ушу чигон бол аль эртнээс бие даасан чигон гэж явдаг. Яагаад гэвэл энэ нь хэдэн мянган жилийн уламжлалтай, бүрэн цогц бясалгалын онол ба бүрэн цогц бясалгалын аргатай, иймээс тэр нэг бүрэн цогц зүйлд тооцогдоно. Хэдий тийм боловч Ушу чигон бол дотоод бясалгалын аргын хамгийн доод түвшинд харъяалагддаг. Хатуу чигон бол нэг төрлийн бие бодийн энергийн бөөгнөрөл, зөвхөн гар тулаанд хэрэглэдэг. Би та бүхэнд нэг жишээ хэлье. Бээжингийн нэг сурагч манай Фалуны Дафагийн ангид суусны дараа гараараа юм дарж болохгүй болсон. Тэр дэлгүүрт хүүхдийн тэрэг үзэж байгаад бат бөхийг нь шалгах гээд гараараа дартал тэрэг тасхийгээд хугарчихсан. Тэр их гайхсан. Гэртээ хариад сандал дээр суухдаа гараараа дарж болохгүй, дарах юм бол сандал нь хугараад уначихна. Тэр надаас ямар учиртай юм бол гэж асуусан. Би түүнд зууралдсан сэтгэл гаргахгүйн тулд хэлээгүй. Энэ бүгд жамаараа болж байгаа зүйл, үүнийг бүү тоо, энэ бол сайн зүйл гэж хэлсэн. Хэрэв энэ ер бусын чадварыг сайн эзэмших юм бол гараараа чулууг нэг базахад буталж үйрүүлж чадна. Энэ нь хатуу чигон биш гэж үү? Гэхдээ тэр хатуу чигон-оор хичээллэж үзээгүй. Дотоод бясалгалд эдгээр ер бусын чадварууд гардаг. Гэхдээ хүн зан чанараа барихад хэцүү учраас ер бусын чадвар гарсан ч хэрэглэхийг зөвшөөрөхгүй. Ялангуяа доод түвшинд бясалгадаг хүний зан чанар хараахан дээшлээгүй байхад доод түвшинд гарсан ер бусын чадварыг огтхон ч өгөхгүй. Яваандаа чиний түвшин дээшлэх тусам эдгээр зүйлүүдийн

хэрэг гэж байхгүй болно, үүнийг гаргах ч шаардлагагүй болно.

Ушу чигон-оор чухам яаж хичээллэдэг вэ? Ушу чигон-оор хичээллэхэд чий-г гүйлгэдэг. Гэхдээ чий-г гүйлгэхэд эхэндээ амаргүй. Хүн чий-г гүйлгэхийг хүссэн ч магадгүй хийж чадахгүй. Тэгвэл яах вэ? Өөрийнхөө гар, цээжний хоёр тал, хөлний тавхай, хөл, гарын шуу болон толгойгоо дасгалжуулах хэрэгтэй. Яаж дасгалжуулдаг вэ? Зарим хүн гараараа юмуу алгаараа мод цохино, зарим нь чулуу пад пад хийтэл алгодна. Ясаараа цохивол ямар их өвдөх вэ, жоохон хүчтэй цохивол цус гарна. Чий-г гүйлгэж чадахгүй хэвээр. Яах ёстой вэ? Тэр гараа эргүүлэхэд цус нь доош шахагдана, тэгээд гар нь хөөж эхэлнэ. Үнэндээ хөөсөн, дараа нь тэр чулуу алгадахад яс нь зөөлөвчтэй болж чулуунд шууд хүрэхгүй, тийм их өвдөхгүй болно. Тэр үргэлжлүүлэн хичээллэхэд багш нь түүнд заана, аажмаар чий гүйлгэж сурна. Гэхдээ зөвхөн чий-г гүйлгэж сурах нь хангалттай биш, жинхэнэ гар тулалдаанд өрсөлдөгч түүнийг хүлээхгүй. Мэдээж хүн чий-г гүйлгэж сурвал цохилтыг даана, бүдүүн саваагаар цохиулсан ч магадгүй өвдөхгүй. Чий-г гүйлгэсний дараа хөөнө. Гэхдээ чий бол эхэн үеийн хамгийн анхны зүйл, тасралтгүй сургуулилсны дүнд энэ нь дээд энергийн бие бодид хувирч болно. Дээд энергийн бие бодид хувираад энэ нь аажмаар маш нягтралтай энергийн бөөгнөрлийг үүсгэнэ. Энэ энергийн бөөгнөрөл нь оюун сэтгэхүйтэй. Иймээс тэр бас ер бусын чадвартай бөөгнөрөл, нэг төрлийн ер бусын чадвар юм. Гэхдээ энэ нь тулалдах, цохилтоос хамгаалахад л чиглэсэн ер бусын чадвар юм. Үүнийг өвчин эдгээхэд хэрэглэвэл үйлчлэхгүй. Яагаад гэвэл энэ дээд энергийн бие бодь нь өөр орон зайд оршдог, манай энэ орон зайд дамждаггүй, иймээс тэндхийн цаг хугацаа нь биднийхээс хурдан. Чи цохилт хийхдээ чий-г гүйлгэх юмуу бодлоо төвлөрүүлэх ч хэрэггүй, гон аль хэдийн тэнд хүрчихсэн байна. Хүний цохилтыг хаахад гон бас хэрэгтэй

газраа түрүүлээд ирчихнэ. Чи ямар ч хурдтай цохилт хийсэн энэ нь чамаас хурдан, хоёр талын цаг хугацааны ухагдахуун адилгүй. Ушу чигон-оор хичээллэхэд “Төмөр элсэн алга”, “Шунх улаан алга”, “Очирваань хөл” мөн “Архат тавхай” хэмээн нэрлэгдэх чадваруудыг гаргаж болно. Энэ бол энгийн хүнээс гардаг чадвар. Энгийн хүн сургуулилсны дүнд энэ хэмжээнд хүрч чадна.

Ушу чигон ба дотоод бясалгах арга хоорондын хамгийн том ялгаа нь бол Ушу чигон нь хөдөлгөөн дунд хичээллэхийг шаарддаг, иймээс чий-нь арьсан доогуур гүйдэг. Хөдөлгөөн дунд хичээллэх учраас амгалан байдалд орохгүй, мөн чий даньтианд бас орохгүй. Чий арьсан доогуур болон булчингаар дамжин гүйнэ. Тиймээс амь биеийг бясалгахгүй мөн дээд түвшний чадварыг гаргаж чадахгүй. Манай дотоод бясалгал амгалан байдалд хийхийг шаардана. Жирийн бясалгалд чий даньтианд ордог, хэвлийд ордог. Амгалан байдалд бясалгах, биеийг хувиргахыг эрхэмлэдэг. Амь биеийг бясалгаж болно, бүүр дээд түвшинд бясалгаж болно.

Та нар магадгүй уран зохиолын номноос Алтан хонх бүрхүүл, Төмөр цамц, мөн Зуун алхмын цаанаас Уд модны навчийг цоо цохих гэх мэтийн чадвар байдгийг уншсан байх. Хөнгөн гон-той хүн өндөрт нааш цаашаа дүүлж чадна, тэр ч байтугай зарим хүн өөр орон зайд орж чаддаг. Ийм чадвар байдаг уу? Тийм, энэ бол байдаг, гэхдээ энгийн хүний дунд байхгүй. Ийм дээд зэргийн Кунфу бясалгаж гаргасан хүн харуулж гайхуулж болохгүй. Яагаад гэвэл ийм хүн жирийн Ушу-гаар хичээллэдэг биш тэр нь энгийн хүний түвшнээс давсан зүйл учраас энэ хүн заавал дотоод бясалгалын аргын дагуу бясалгах ёстой. Тэр хүн зан чанараа эрхэмлэх ёстой, зан чанараа дээшлүүлэх ёстой, материаллаг ашиг гэх мэтийн зүйлийг хөнгөн авч үзэх ёстой. Тэр хэдийгээр иймэрхүү Кунфу бясалгаж гаргасан ч дараа нь

үүнийгээ энгийн хүний дунд хамаагүй хэрэглэж болохгүй. Харин хүнгүй газар өөрөө хэрэглэж үзэж болно. Чиний уншсан тэдгээр зохиолд тэр хүн сэлмээр тулалдах аргын зураг, алт эрдэнэс эсвэл хүүхний төлөө тулалдаж алалдаж гардаг, гайхамшигт илбийн байдлаар ирж очоод л. Та бүгд боддоо, жинхэнэ ийм Кунфу чадвартай хүн үүнийг дотоод бясалгалаар гаргасан биш гэж үү? Тэр зан чанараа чухалчилж бясалгаж гаргасан учраас алдар нэр, эд материалын болон янз бүрийн хүсэл сонирхлыг хөнгөн авч үздэг. Тэр яаж хүн алах юм? Тэр алт мөнгө хөрөнгийг тийм чухалд үзэх юм уу? Огтхон ч тэгэхгүй, тэдгээр нь зөвхөн уран сайхны хэтрүүлэг юм. Хүмүүс зөвхөн сонирхол татахын тулд тэр хүслээ тайлахын тулд юуг ч хийдэг. Зохиолчид эдгээр зүйлсийг онцлон харуулж чиний хүсэл сэтгэлд нийцүүлэхийн тулд чадлаараа бичдэг. Санаанд багтамгүй зүйлийг бичих тусам чи улам сонирхоно. Тэр нь зөвхөн урлагийн хэтрүүлэг. Жинхэнэ тийм Кунфу-тай хүмүүс тэгэхгүй. Ялангуяа нийтийн дунд тэдгээрийг огт үзүүлэхгүй.

Гайхуулах сэтгэл

Манай олон сурагч энгийн хүний дунд бясалгаж байгаа болохоор янз бүрийн сэтгэлээсээ салж чаддаггүй, ийм сэтгэл нь аль хэдийн жам ёсных болсон, тэд өөрсдөө ч мэдэрдэггүй. Гайхуулах сэтгэл нь ямар ч тохиолдолд гардаг, сайн зүйл хийхэд бас гайхуулах сэтгэл илэрч байдаг. Жирийн үед жоохон нэр хүнд, ашиг олмогцоо би их чадалтай, хүчтэй гэж өөрийгээ гайхуулдаг. Бидэнд бас ийм байдал гардаг, арай сайн бясалгасан, тэнгэрийн мэлмий нь илүү тод хардаг, дасгал хөдөлгөөнөө арай гайгүй хийдгээрээ гайхуулдаг.

Хэн нэг нь магад ингэж хэлнэ, би Ли багшийн ярьсан нэг зүйлийг сонссон. Хүмүүс түүнийг хүрээлээд юу хэлэхийг нь сонсоно. Тэр өөрийнхөө ойлгосноор нэмж хачирлан ярина. Зорилго нь юу вэ? Энэ нь өөрийгөө л гайхуулж байгаа юм. Зарим хүн ам дамжсан цуурхлыг тараадаг, нэг нэгэндээ амтархан яриад л, тэр л ганцаараа мэдээлэл сайтай юм шиг. Манай энэ олон сурагч түүн шиг ойлгодоггүй, бусад хүмүүс түүн шиг их мэддэггүй юм шиг ярина, энэ нь түүнд аль хэдийн зуршил болсныг өөрөө ч анзаарахгүй. Түүний дотор өөрийгээ гайхуулах далд сэтгэл оршдог, тийм биш бол ийм цуурхал тараах хэрэг байна уу? Бас зарим хүн Багш хэзээ ууланд буцах тухай цуу яриа тараадаг. Би уулнаас ирсэн биш, ямар уул руу буцах юм? Бас зарим нь намайг тэдийд тийм хүнд тэгж хэлсэн, эсвэл тийм хүнийг онцгой харж үзсэн гэж хов жив ярина. Иймэрхүү зүйл тараах нь ямар хэрэгтэй юм? Ямар ч хэрэг байхгүй. Гэхдээ энэ бол бидний харснаар тэдний зууралданги сэтгэл, гайхуулах сэтгэл юм.

Зарим хүн миний гарын үсгийг авах гэж ирдэг. Зорилго нь юу вэ? Бас л энгийн хүний зүйл, гарын үсгийг дурсгал болгон авна. Чи бясалгахгүй бол миний гарын үсэг чамд ямар ч хэрэг болохгүй. Миний номны үг болгонд миний дүрс болон Фалунь байгаа, мөн өгүүлбэр болгоныг би хэлсэн. Миний гарын үсэг авах хэрэг байгаа юм уу? Зарим хүн гарын үсэг авбал Багшийн мэдээлэл намайг хамгаална гэж боддог. Тэд бас мэдээлэл гэх мэтийн зүйлийг ярих юм, бид мэдээлэл ярихгүй. Энэ ном бол аль хэдийн үнээр цэгнэшгүй болсон. Чи өөр юу хүсч байгаа юм? Энэ бүгд бол тэдгээр сэтгэлээс илэрч гарсан зүйл. Бас зарим хүн намайг дагалдан явдаг сурагчдыг хараад тэдний дадал зуршлыг нь сайн муу гэж ялгалгүйгээр дуурайж сурна. Үнэндээ хэн ямар байх нь хамаагүй, зөвхөн нэг л Ном байгаа, зөвхөн энэ Дафа-гийн дагуу явбал тэр бол жинхэнэ шалгуур. Би хажууд ажилладаг хүмүүсээ тусгай харж үзсэн юм байхгүй, та бүгдтэй адилхан, тэд зөвхөн Судалгааны Нийгэмлэгийн

ажилчид. Ийм сэтгэл бүү гарга. Ийм сэтгэл гарахад чи санамсаргүйгээр Дафа-г эвдэх нөлөө үзүүлдэг. Чиний гаргасан дуулиантай цуу ярианаас болж зөрчил гарч болно, сурагчдын Багштай ойр байж илүү зүйл мэдэх гэсэн зууралдсан сэтгэлийг өдөөж болно, энэ мэт зүйлс бүгд асуудал биш гэж үү?

Энэ гайхуулах сэтгэл өөр бас ямар үр дагавар гаргаж болох вэ? Би бясалгал зааж эхлээд хоёр жил болж байна. Манай Фалунь Дафа-д бясалгадаг хуучин сурагчдаас зарим хүний гон магадгүй удахгүй нээгдэнэ. Зарим нь аажим гэгээрэх байдалд орно, гэнэт аажим гэгээрэх байдалд орно. Яагаад эдгээр ер бусын чадвар эрт гараагүй вэ? Учир нь би чамайг гэнэт тийм өндөр түвшинд түлхэж гаргасан, чи энгийн хүний сэтгэлээ орхиогүй байж болохгүй. Мэдээж чиний зан чанар аль хэдийн их дээшилсэн, гэхдээ бас маш олон зууралдсан сэтгэлээ орхиогүй, иймээс тэдгээр ер бусын чадварыг чамд гаргуулахгүй. Энэ хэсэг хугацаа өнгөрч чамайг бат гуйвшгүй болоход аажим гэгээрэх байдалд хүргэнэ. Ийнхүү аажмаар гэгээрэх байдалд ороход чиний тэнгэрийн мэлмий маш өндөр түвшинд нээгдэнэ, чамд их олон ер бусын чадвар гарна. Үнэндээ би та бүхэнд хэлэхэд, жинхэнэ бясалгахад дөнгөж эхлээд л олон ер бусын чадвар гардаг. Чи аль хэдийн тийм өндөр түвшинд хүрсэн, иймээс маш олон ер бусын чадвартай байдаг. Ойрын үед бидний олон хүнд магадгүй ийм байдал гарна. Бас зарим хүн өндөр түвшинд бясалгаж чадахгүй, түүний биенд байгаа зүйл, түүний тэвчих чадвар нь хамтдаа тогтоогдсон байдаг. Иймээс зарим хүн маш доод түвшинд гон-нь нээгдэх ба гэгээрнэ, бүрмөсөн гэгээрнэ, ийм хүн гарна.

Би энэ асуудлыг хэлдэг учир нь, нэг өдөр ийм хүн гарч ирэхэд та нар түүнийг мундаг гэгээрсэн хүн гэж битгий үзээрэй. Энэ бол бясалгал дахь маш ноцтой асуудал. Зөвхөн Дафа-гийн дагуу явбал зөв хийж чадна. Чи хүний ер бусын

чадвар, увидас, зарим зүйлийг нь харчихаад түүнийг дагана, түүнийг сонсоно. Бүү тэгээрэй. Чи ч түүнийг хохирооно, түүний сэтгэл хөөрөхөд тэр бүх зүйлээ алдана, бүгд хаагдчихна, эцэст нь доош унана. Гон нь нээгдсэн хүн бас доош унаж болдог, өөрийгөө сайн барьж чадахгүй бол гэгээрсэн байлаа ч бас доош унадаг. Энгийн хүний дунд бясалгаж байгаа та нар байтугай, Будда хүртэл өөрийгээ сайн барьж чадахгүй бол доош унана! Иймээс хэр их ер бусын чадвар, ямар их сүр хүчтэй гон чадвар гарсан ч, эсвэл чиний увидас чадвар ямар ихээр илэрсэн ч чи заавал өөрийгөө бариарай. Ойрд бидний дунд сууж байгаа зарим хүн алга болоод хэсэг байж байгаад гарч ирдэг болсон. Ийм л байдаг, үүнээс ч илүү увидас чадвар гарах болно. Чи ирээдүйд яах вэ? Ирээдүйд манай сурагч, шавь нарын хувьд ийм зүйл чамд гарсан ч бусдад гарсан ч битгий түүнийг шүтэн бишрээрэй, битгий энэ зүйлийг хүсээрэй. Чиний сэтгэл буруутвал бүх юм дуусна, чи доошоо унана. Магадгүй чи тэд нараас дээгүүр, гэхдээ зөвхөн чиний ер бусын чадвар хараахан гараагүй байж болно. Чи наад зах нь тухайн энэ асуудал дээр унасан, иймээс хүн бүр энэ асуудал дээр тун анхааралтай хандах хэрэгтэй. Бид үүнийг маш чухал асуудалд авч үзэж байна, яагаад гэвэл ийм байдал удахгүй гарах болно, тэгэхэд чи өөрийгээ сайн барьж чадахгүй бол болохгүй.

Бясалгагч хүн гон гарчихвал, гон нээгдвэл эсвэл жинхэнэ гэгээрвэл өөрийгээ онцгой хүн гэж үзэж болохгүй. Түүнд харагдсан зүйлс тэр хүний түвшинд хязгаарлагддаг. Яагаад гэвэл бясалгаад тэр түвшинд хүрсэн, түүний ухамсар нь тэнд хүрсэн, түүний зан чанарын шалгуур бас тэнд хүрсэн, түүний оюун ухаан тэр хэмжээнд хүрсэн. Иймээс түүнээс дээш түвшний зүйлд тэр магадгүй итгэхгүй. Итгэхгүй учраас өөрийнхөө харж байгаа зүйлийг туйлын үнэн гэж боддог, зөвхөн тийм зүйлс л байдаг гэж үздэг,

түүний түвшин тэнд байгаа учраас үнэн байдлаас хол зөрөөтэй.

Зарим хүний гон нь энэ түвшинд нээгдэнэ, түүнээс цааш бясалгая гэсэн ч бясалгаж чадахгүй, тиймээс зөвхөн энэ түвшинд гон нь нээгдэж гэгээрнэ. Бидний дундаас бясалгаж гарсан хүн, зарим нь дэлхийн жижиг замд гэгээрнэ, зарим нь янз бүрийн түвшинд гэгээрнэ, мөн зарим нь гэгээрлийн хутагт хүрнэ. Зөвхөн гэгээрлийн хутагт хүрч гэгээрсэн бол хамгийн өндөрт хүрсэн, өөр өөр түвшин дэх байдлыг харж чадна мөн өөрсдөө илэрч чадна. Дэлхийн жижиг замын хамгийн доод түвшинд гэгээрсэн ч гэсэн зарим орон зай болон зарим гэгээрэгсдийг харах бас тэдэнтэй харилцаж чадна. Тэр үед чи сэтгэл хангалуун болох хэрэггүй, яагаад гэвэл дэлхийн жижиг замын доод түвшинд гон нээгдсэн болохоор гэгээрлийн хутагт хүрч чадахгүй, энэ бол гарцаагүй. Тэгвэл яах вэ? Тэр зөвхөн энэ түвшинд л үлдэнэ. Дээд түвшин лүү бясалгах нь ирээдүйн хэрэг болно. Түүний бясалгал зөвхөн ийм өндөрт л хүрч чадна, үүнээс хойш гон-ыг нь түгжээд байх хэрэг байна уу? Чи өөрөө энэ янзаараа цааш бясалгаад байсан ч үүнээс илүү ахиж чадахгүй, чиний бясалгал эцэсдээ хүрсэн учраас гон чинь нээгдэнэ, ийм хүмүүс их гарах болно. Ямар ч байдал гарсан зан чанараа сайн барих хэрэгтэй. Зөвхөн Дафа-гийн дагуу хийвэл жинхэнэ зөв. Чи ер бусын чадвартай ч бай, гон чинь нээгдсэн ч бай, энэ бүгдийг чи Дафа-д бясалгаж байж олж авсан. Хэрэв чи Дафа-г хоёрдугаарт тавьж өөрийнхөө увидас ер бусын чадварыг үүнээс дээгүүр тавьбал, эсвэл гэгээрээд өөрийнхөөрөө танин мэдсэнийг л зөв гэж үзвэл, тэр ч байтугай өөрийгөө их мундаг, Дафа-гаас дээгүүр гэж үзвэл, чи аль хэдийн доош унаж эхэлсэн гэж би хэлнэ, энэ нь их аюултай бүр ч болохгүй болно. Тэр цагт чи жинхэнэ хүнд байдалд орно, чиний бясалгал ямар ч үр дүнгүй дуусна, чи доош унана, тэгээд бясалгал талаар болно.

Би бас нэг зүйлийг чамд хэлье, миний энэ номын агуулга нь миний хэдэн лекцээр заасан Номыг нэгтгэсэн. Бүгд миний зааснаар, өгүүлбэр болгон нь миний хэлснээр байгаа. Үг болгоныг дуу бичлэгийн хальснаас буулгаж үг үгээр нь хуулан бичсэн. Миний шавь нар, сурагчид надад тусалж хураасан бичлэгнээс бүгдийг буулгаж бичсэн. Дараа нь би дахин дахин хянасан. Энэ бол бүгд миний Ном, миний ярьсан бол зөвхөн энэ л нэг Ном.

Долдугаар лекц

Амь хороох асуудал

Амь хороох бол маш эмзэг асуудал. Бясалгаж байгаа хүний хувьд бид амь хороож болохгүй гэсэн хатуу шаардлага тавьдаг. Буддын систем, Дао-гийн систем эсвэл Чимэнь бясалгал аль нь ч байсан ямар бясалгал байхаас үл хамааран энэ нь ариун номын бясалгал л бол энэ асуудлыг туйлаас болохгүй гэж үзнэ, амь хороохыг цээрлэнэ, энэ бол гарцаагүй юм. Яагаад гэвэл амь хороосноос болж маш том асуудал үүсдэг, бид үүнийг тодорхой авч ярих хэрэгтэй. Анхны Буддын шашинд амь хороох асуудал дээр гол нь хүний амь хороохыг авч үздэг байсан, энэ нь хамгийн ноцтой үйлдэл. Дараа нь том биетэй амийг, бод малыг эсвэл харьцангуй том амьтдыг алахыг бас их ноцтойд үздэг болсон. Бясалгагчдын хүрээнд яагаад амь хороох асуудлыг үргэлж их ноцтойд авч үздэг вэ? Урьд өмнө Буддын шашинд ярихдаа үхэх болоогүй амийг хороовол орох оронгүй өнчин сүнс болно гэдэг байсан. Урьд тийм хүмүүсийн сүнсийг энэ зовлонгоос гэтэлгэх зан үйл хийдэг байсан. Энэ зан үйлийг хийхгүй бол тэдгээр сүнснүүд идэж уух юмгүй маш хэцүү зовлонт байдалд орно. Урьд Буддын шашинд ингэж л ярьдаг байсан.

Нэг хүн нөгөөдөө муу зүйл хийвэл хариуд нь их хэмжээний буянаар төлөх ёстой болдог гэж бид ярьдаг. Энд гол нь хэн нэгний юмыг авах гэх мэтийн зүйлийг л ярьж байна, харин гэнэт нэг амийг бүрэлгэвэл, тэр нь амьтан ч бай, эсвэл өөр амь бодь ч бай маш том нүгэл бий болгоно. Урьд амь бүрэлгэхийг гол нь хүн дээр ярьдаг байсан, тэр нь маш их том нүгэл болно. Гэхдээ бусад жирийн амьтны амийг хорооход багад тооцогдохгүй, шууд их хэмжээний

нүгэл үүсдэг. Ялангуяа бясалгагч хүнд, бясалгалын явц дахь үе шат болгонд зарим бэрхшээл зовлонг хуваарилдаг. Тэр бүгд бол чиний өөрийн нүгэл, өөрийн чинь гай зовлон, түүнийг чиний янз бүрийн түвшинд хувааж чамайг дээшлүүлэхийн тулд тавьдаг. Чи зөвхөн зан чанараа дээшлүүлэхэд давж чадна. Гэхдээ гэнэт тийм их нүгэл ирчихвэл, чи яаж түүнийг давах юм? Чиний зан чанарын хэмжээнд түүнийг туулж давах ямар ч арга байхгүй. Энэ нь чамайг бясалгах ямар ч аргагүй болгоно.

Бид хүн төрөхөд энэ орчлон ертөнцийн тодорхой орон зайн хүрээнд түүний маш олон биес нэгэн зэрэг төрдөг болохыг олж мэдсэн. Тэд бүгд хоорондоо адилхан харагдана, нэг ижил нэртэй мөн тэдний хийж байгаа зүйлс нь төстэй. Тиймээс тэднийг тэр хүний бүтэн биений нэг хэсэг гэж хэлж болно. Үүнээс үүдэн ийм асуудал гардаг, хэрэв тэдний нэг нь (өөр том амьтны амь бас адилхан) гэнэт үхчихвэл түүний бусад орон зай болгонд байгаа амины урьдын оноосон амьдрал нь дуусаагүй, бас олон жил амьдрах хугацаа үлдсэн байдаг. Тэгвэл тэр үхсэн хүн орчлон ертөнцийн орон зайд хоргодох газаргүй хэсүүчлэн байх болно, энэ ертөнцийн орон зайд тэнүүчлэн явдаг. Үүнийг урьд цагт өнчин сүнс гэдэг, идэж уух юмгүй өлсөж цангаж, шаналан зовдог гэдэг байсан, магадгүй ийм л байдаг. Гэхдээ бид тийм хүн үнэхээр маш аймшигтай байдалд ордгийг харсан, бусад бүх орон зайд байгаа түүний амьдралын явц дуусах хүртэл хүлээсээр л байх болно, зөвхөн түүний дараа л тэд бүгд хамтдаа цаашдынхаа тавилант газраа очдог. Удаан хүлээх тусам улам их зовлон амсана. Тэр их зовж шаналах тусам үүнээс үүдэн гарах нүглийн хэмжээ түүнийг алсан хүний биед тасралтгүйгээр нэмэгдсээр байх болно. Тэгвэл боддоо, чи хэр их нүгэл хураах вэ? Үүнийг бид ер бусын чадвараараа харсан юм.

Бид бас ийм нэг байдлыг харсан: Хүн төрөхөд, тусгай нэг орон зайд түүний энэ насны амьдрах хэлбэр нь оршдог. Өөрөөр хэлбэл, энэ амь хэдийд юу хийх ёстой нь бүгд тэнд байдаг. Хэн түүний амьдралыг урьдчилан төлөвлөсөн бэ? Энэ нь мэдээж дээд зэргийн амь энэ зүйлийг хийсэн байж таарна. Жишээлбэл, манай энгийн хүний нийгэмд хүн төрснийхээ дараа нэг тодорхой гэр бүлд өснө, тухайн нэг сургуульд сурна, мөн том болоод ямар нэгэн ажлын газарт ажиллана, тэр ажил төрлийнхөө замаар янз бүрийн нийгмийн харилцаанд орно. Бүхэл нийгэм дэх зүй тогтол ингэж төлөвлөгдсөн байдаг. Гэтэл энэ амь гэнэт үхсэн учраас энэ бүгд урьд зохицуулсны дагуу явагдахгүй өөрчлөлт гарна. Тэгвэл хэн үүнийг будлиантуулсан, түүнийг дээд түвшний амь өршөөхгүй. Та бүхэн боддоо, бид бясалгагч хүний хувьд дээд түвшин лүү бясалгахыг хүснэ. Тэр дээд түвшний амь бодь түүнийг уучлахгүй. Тэгвэл чи хэлдээ, тэр хүн яаж бясалгах юм? Зарим багш нарын түвшин энэ төлөвлөлт хийсэн дээд түвшний амины хэмжээнд ч хүрэхгүй. Тэгэхээр тэр хүний багш бас шийтгэгдэж доош унана. Чи боддоо, энэ жирийн асуудал гэж үү? Тэгэхээр ийм зүйл хийсэн хүн бясалгахад маш их хэцүү.

Фалунь Дафа-гийн бясалгагчдын дунд зарим нь магадгүй дайны үед байлдаж явсан хүн байгаа. Тэдгээр дайнууд нь бүхэл тэнгэрийн том өөрчлөлтөөс үүдэн гарсан байдал, чи бол тэр байдлын зөвхөн нэг элемент нь юм. Тэнгэрийн өөрчлөлт болоход хүмүүс оролцохгүй бол ийм байдал энгийн хүний нийгэмд нөлөөлөхгүй, мөн түүнийг тэнгэрийн өөрчлөлт гэж хэлэхгүй. Тэдгээр үйл явдлууд бол том өөрчлөлтийн дагуу гарсан, тэр бүгдийг чамд тооцож болохгүй. Бид энд бол хувийн ашиг хонжоо хөөцөлдөн, өөрийн хүсэл сонирхлыг хангахын үүднээс эсвэл өөр ямар нэгэн нөлөөллөөс болж муу зүйл хийхэд үүсдэг нүглийг ярьж байна. Энэ нь бүхэл бүтэн том орон зайг хамарсан

юмуу нийгмийн чухал өөрчлөлттэй холбоотой гарсан бол чамд хамаарах асуудал биш.

Амь хороох нь маш их нүглийг бий болгодог. Зарим хүн ингэж бодож магад, амь хороож болохгүй, би гэртээ хоол хийдэг, амь алахгүй бол манай гэрийнхэн юу идэх юм? Ийм бодит асуудал дээр би ярихгүй. Би бясалгагч хүнд Ном ярьж байгаа, зүгээр энгийн хүнд яаж амьдрахыг зааж байгаа юм биш. Бодит асуудалд яаж хандахыг Дафа-гийн дагуу цэгнэ. Чи яаж хийвэл зохистой гэж үзнэ, тэгж хий. Энгийн хүн бол хүссэн болгоноо л хийнэ, энэ нь тэдний хэрэг, хүн болгон жинхэнэ бясалгах боломжгүй. Харин бясалгагч хүн бол дээд шалгуурын дагуу өөрийгээ шаардах хэрэгтэй, тиймээс би энд бясалгагчдад энэ шаардлагыг тавьж байна.

Хүн, амьтнаас гадна ургамал бас амьтай. Бусад орон зайнуудад орших аливаа бие бодь бүхэн амьтай байдаг. Чиний тэнгэрийн мэлмий Номын нүдний түвшинд нээгдэхэд чулуу, хана болон юм бүхэн чамтай ярьж мэндчилж байхыг үзнэ. Магадгүй зарим хүн ингэж бодно: Бидний иддэг үр тариа болон ногоо бүгд амьтай, гэрт бас ялаа шумуул байвал яах ёстой вэ? Зун цагт шумуул хазаад тун таагүй байдаг, хазуулаад зүгээр л хараад суугаад байх уу, хоол ундан дээр ялаа суугаад завааруулж байхыг харвал алж болохгүй. Би та бүгдэд хэлье, бид хамаагүй шалтгаангүйгээр амь хороож болохгүй. Гэхдээ бид бас юм болгонд хэт болгоомжилж болохгүй, үргэлж ялихгүй зүйлд анхаарч, алхахдаа хүртэл шоргоолжин дээр гишгэхээс болгоомжлон цовхорч явна. Би хэлье, чи тэгвэл их ядарч амьдрах болно. Энэ нь бас зууралдал биш гэж үү? Чи цовхорч яваад шоргоолж гишгэж алаагүй, гэхдээ магадгүй маш олон бичил организмыг гишгээд алсан. Бичил орчинд маш олон өчүүхэн жижиг амь бодь байдаг, нян бактери бас багтана. Чи гишгээд тэдгээрээс зөндөө олныг алсан байж магадгүй. Тэгвэл бид амьдрах аргагүй болно. Бид тийм

байна гэсэн үг биш, тэгвэл бясалгах боломжгүй болно. Хүн юмыг уужим харж зөв зохистой бясалгах хэрэгтэй.

Бид амьдарч байвал хүний амьд байх эрхийг сахин хамгаалах эрхтэй, иймээс амьдрах орчин хүний амьдралын шаардлаганд нийцсэн байх ёстой. Бид хамаагүй амь бодийг хохироож бас хороож болохгүй, гэхдээ бид бас үл ялиг зүйлд хэт болгоомжлоод байж болохгүй. Жишээ нь, бидний ургуулдаг ногоо, тарьсан үр тариа бүгд амьтай. Эдгээр нь амьтай гээд бид юм идэж уухаасаа татгалзаж болохгүй. Тэгвэл бид яаж бясалгах юм? Түүнээс цаадахыг харах хэрэгтэй. Жишээ нь чамайг явж байхад зарим шоргоолж шавьж чиний хөлний доор өртөөд гишгүүлж үхнэ, тэдний үхэх цаг нь магадгүй болсон, яагаад гэвэл чи тэднийг санаатайгаар алаагүй. Амьд бие бодь, бичил организмын орчинд бас байгалийн тэнцвэрийн асуудал байдаг, хэтэрхий олширвол болохгүй. Бид тийм учраас юмыг уужим харж зөв зохистой бясалгах хэрэгтэй. Гэрт ялаа шумуул байвал бид хөөж гаргаж болно эсвэл цонхондоо тор татаад оруулахгүй болгоно. Заримдаа хөөж гаргаж чадахгүй бол албал тэр л биз, хүмүүсийн амьдардаг орон байранд хүн хазаад хор учруулж байвал тэднийг мэдээж хөөж гаргах хэрэгтэй, хөөж гаргах боломжгүй бол хүн хазахыг нь хараад зүгээр суугаад байж болох юм уу. Чи бясалгагч хүн учраас дархлалтай айхгүй, танай гэрийнхэн бясалгадаггүй энгийн хүмүүс, тэдгээрээс халдварт өвчин авах аюултай. Хүүхдийн нүүрэн дээр шумуул хазаж байхад зүгээр хараад сууж болохгүй.

Би та нарт нэг жишээ хэлье. Шагжамүнигийн эртний үеийн нэгэн түүх байдаг. Нэг өдөр Шагжамүни ой модонд усанд орохоор болж шавиа ваннаа цэвэрлүүлэхээр явуулсан. Түүний шавь очоод харахад ванн дотор энд тэндгүй зөндөө хорхой шавьж явж байсан. Ванныг цэвэрлэх юм бол хорхой шавьжнууд үрэгдэнэ. Шавь нь буцаж ирээд Шагжамүнид хэлсэн: Ванн дотор зөндөө хорхой шавьж байна.

Шагжамүни түүн лүү харалгүйгээр хэлсэн: Чи очоод ванныг цэвэрлэхийг. Тэр шавь нь ванны дэргэд буцаж очоод яаж цэвэрлэхээ мэдэхгүй байсан, цэвэрлэвэл хорхой шавьж үхэх болно. Тэр дахин Шагжамүнид эргэж ирээд хэлсэн: Багшаа, ванн дотор дүүрэн хорхой шавьж байна. Хэрэв би цэвэрлэвэл хорхой шавьж үхнэ. Шагжамүни түүн лүү харангаа хэлсэн: Би чамд ванныг цэвэрлэ гэж л хэлсэн. Шавь нь гэнэт ухаарсан, тэгээд тэр очоод ванныг тэр дор нь цэвэрлэсэн. Энэ түүх нь нэг асуудлыг ойлгомжтой болгож өгч байна. Бид хорхой шавьжнаас болоод усанд орохоо больж болохгүй, мөн шумуулнаас болж өөр амьдрах байр хайж явах хэрэггүй. Бас үр тариа болон ногоо бүгд амьтай учраас бид хүзүүгээ боогоод идэж уухаа больж болохгүй, тийм биш. Бид энэ харилцааг зөв зохицуулах хэрэгтэй, мөн зохистой байдлаар бясалгах хэрэгтэй. Бид санаатайгаар амь хөнөөхгүй байвал л хангалттай. Түүнчлэн хүмүүст амьдрах орчин мөн амьдрах нөхцөл байх ёстой, энэ нь сахин хамгаалагдах ёстой. Хүн бас амьдралын нөхцөл байдлаа хадгалах ёстой, хэвийн амьдрах ёстой.

Урьдны зарим хуурамч чигон багш ингэж ярьдаг байсан: Билгийн тооллын нэгэнд эсвэл арван таванд амь алж болно. Тэдний зарим нь хоёр хөлтэй амьтдыг алж болно гэж хэлдэг. Хоёр хөлтэй нь амь биш юм шиг. Билгийн тооллын нэгэнд эсвэл арван таванд албал амь хороосонд тооцогдохгүй гэж үү? Энэ ямар шороо ухааж байгаатай адил юм уу? Зарим хуурамч чигон багш нарыг үгнээс нь, үйлдлээс нь мөн юу ярьж байгаагаар нь эсвэл юу хүсдэгээр нь таньж болно. Аливаа иймэрхүү зүйл хэлдэг чигон багш нарт ер нь сүнс болон амьтан шүглэсэн байдаг. Биед нь үнэг шүглэсэн чигон багшийг тахианы мах идэж байхыг нь хараарай, амаа олохгүй ясыг нь хүртэл үлдээх дургүй үмхлэн иднэ.

Амь хөнөөх нь зөвхөн маш их нүгэл авчраад зогсохгүй бас энэрэнгүй сэтгэлийн асуудалтай холбоотой. Бид бясалгаж байгаа хүний хувьд энэрэнгүй сэтгэлтэй байх ёстой биз дээ? Бидний энэрэнгүй сэтгэл гарахад бид магадгүй бүх амь зовлонтой амьдарч байгааг, хэн бүхэн зовж явааг нь харна. Ийм байх болно.

Мах идэх асуудал

Мах идэх нь бас нэг эмзэг асуудал, гэхдээ мах идэх бол амь хороож байгаа хэрэг биш. Та нар Номонд суралцаад өдий хугацаа өнгөрөхөд бид та нарыг мах идэхээ боль гэж шаардаагүй. Олон чигон багш чамайг ангид нь оронгуут мах идэхээ боль гэж хэлдэг. Магадгүй чи ингэж бодно: Гэнэт мах идэж болохгүй, сэтгэл санааны хувьд бэлэн болж амжаагүй байна. Магадгүй өнөөдөр гэрт нь хийсэн хоол нь чанасан тахиа эсвэл шарсан загас байна. Тэдгээр нь их сайхан үнэртэх боловч идэж болохгүй. Шашинд бясалгахад бас адилхан, хүчээр идүүлэхгүй. Ер нь Буддын системийн бясалгалд болон зарим Дао-гийн системийн бясалгалд бас тэгж хэлдэг, мах идэхийг хориглодог. Бид энд чамайг ингэж хий гэж хэлээгүй, гэхдээ бид бас энэ асуудлыг авч ярьдаг. Тэгвэл бид юу шаарддаг вэ? Манай энэ бясалгалд Ном хүнийг бясалгадаг. Ном хүнийг бясалгахад зарим байдал нь гон-оос гардаг, Номноос илэрч гардаг. Бясалгалын явцад, өөр өөр түвшинд өөр өөр байдал гардаг. Тэгвэл ямар нэг өдөр эсвэл өнөөдрийн миний хичээлийн дараа зарим хүн ийм байдалд орж болно: Мах идэж чадахгүй болно, шинхэг муухай үнэртэнэ, идэх юм бол бөөлжмөөр болно. Та нар хэнээр ч албадуулаагүй, та нар өөрсдийгээ ч мах идэхгүй гэж хүчлээгүй. Харин энэ байдал бол чиний өөрийн сэтгэлээс гарна. Энэ шатанд хүрэхэд гон-оос гарсан нөлөө чамайг мах идэж чадахгүй байдалд оруулдаг. Хэрэв чи мах залгивал үнэхээр бөөлжиж гаргана.

Манай хуучин сурагчид Фалунь Дафа бясалгалд ийм байдал гардгийг бүгд мэднэ, өөр өөр түвшинд өөр өөр байдлаар илэрдэг. Бас зарим сурагчид хүсэл нь нилээд хүчтэй, мах идэх сэтгэл нь их. Жирийн үед мах их иддэг. Бусад хүмүүст мах шинхэг үнэртэй байхад тэдэнд тэгж санагдахгүй, мах идсэн хэвээр л байна. Энэ зууралдсан хүслийг нь арилгахын тулд яах хэрэгтэй вэ? Тэр мах идвэл гэдэс нь өвдөнө, идэхгүй байвал өвдөхгүй. Ийм байдал гарна, учир нь түүнийг мах битгий ид гэсэн үг. Манай сургуулийн бясалгалд үүнээс хойш махны асуудал байхгүй болно гэсэн үг үү? Энэ нь тийм биш. Бид энэ асуудалд яаж хандвал зохих вэ? Мах идэж болохгүй нь өөрийн сэтгэлээс гардаг. Зорилго нь юу вэ? Хийдэд бясалгахад чамайг албадлагаар мах идүүлэхгүй, харин манай энэ мах идэж чадахгүй болдог байдал нь хүний мах идэх хүсэл ба зууралдсан сэтгэлийг орхиулах зорилготой юм.

Зарим хүн аяганд нь мах байхгүй бол хоол нь хоолойгоор нь давахгүй. Энэ бол энгийн хүний хүсэл. Нэг өглөө би Чанчуны Шэнли цэцэрлэгийн хойд хаалганы хажуугаар өнгөрч явтал гурван хүн чанга хашгиралдсаар гарч ирсэн. Тэдний нэг нь: Ямар гээчийн чигон бэ мах ч идэж болохгүй? Арван насаа хассан ч хамаагүй би мах иднэ! гэж ярьж байсан. Тийм хүчтэй хүсэлтэй. Та бүгд боддоо, ийм хүслийг орхих хэрэгтэй биш гэж үү? Заавал орхих ёстой. Бясалгалын явц бол хүний янз бүрийн хүсэл, зууралдсан сэтгэлийг орхих явдал юм. Энгийнээр хэлбэл, хэрэв мах идэх хүслээ орхиогүй бол, энэ зууралдсан сэтгэлээсээ салаагүй гэсэн үг биш үү? Бясалгал яаж үр дүнд хүрэх юм? Тиймээс зууралдсан сэтгэл байх л юм бол түүнийг орхих ёстой. Гэхдээ үүнээс хойш хэзээ ч мах идэхгүй гэсэн үг биш, мах идэхээ болих нь гол зорилго биш. Зорилго нь бол чамд энэ зууралдсан сэтгэлийг орхиулахад юм. Хэрэв мах идэж болохгүй энэ хэсэг хугацаанд чи энэ зууралдсан сэтгэлээ орхивол дараа нь чи магадгүй дахиад

мах идэж чадна. Идэхэд дургүй хүрэхгүй муухай амтагдахгүй болно. Тэр үед чи мах идэж болно, ямар ч асуудалгүй.

Чи дахин мах идэж чаддаг болоход чиний зууралдсан сэтгэл, мах идэх хүсэл аль хэдийн байхгүй болсон байна. Гэхдээ нэг том өөрчлөлт гарна, дараа мах идэхэд тийм амттай биш болно. Гэрт чинь махтай хоол хийвэл чи хамт иднэ, хийхгүй бол бодогдохгүй, идвэл тийм амттай санагдахгүй, ийм байдал гарах болно. Гэхдээ энгийн хүний дунд бясалгахад тун амаргүй, гэрт чинь үргэлж махтай хоол хийдэг бол яваандаа чамд мах идэхэд дахиад их амттай санагдах болно. Ирээдүйд ингэж маханд дуртай, дургүй болох байдал гарна, мөн энэ нь бясалгалын бүхий л явцын туршид олон удаа давтагдана. Чи дахиад гэнэт мах идэж чадахгүй болж магад. Чи идэж чадахгүй байх үедээ идэх хэрэггүй. Чи тэр үед үнэхээр идэж чадахгүй, идчихвэл бөөлжинө. Дахиад мах идэж чаддаг болтлоо аясаараа бай. Мах идэх идэхгүйдээ учир нь байгаа юм биш, гол зорилго нь тэр зууралдсан сэтгэлийг орхиод юм.

Манай Фалунь Дафа-гаар бясалгахад хурдан явцтай, чи зан чанараа сайжруулаад л байвал түвшин болгоныг их хурдан нэвтэрнэ. Маханд угаасаа тийм их дуртай биш хүмүүс байдаг, хоолонд нь мах байсан байгаагүй тэд тоохгүй. Ийм хүмүүс ганц хоёр долоо хоногт л мах идэх сэтгэлээ орхидог. Зарим хүнд энэ бол магадгүй нэг, хоёр эсвэл гурван сар, магадгүй хагас жил ч үргэлжилж болно. Маш ховор тохиолдлоос бусад үед нэг жил хүрэхгүй, дараа нь эргээд мах идэж чаддаг болно. Яагаад гэвэл мах бол хэдийнээс хүмүүсийн иддэг үндсэн хоол нь болсон. Гэхдээ сүм хийдэд шавилан сууж бясалгадаг хүн мах идэж болохгүй.

Буддын шашинд мах идэх асуудлыг яаж авч үздэг талаар ярья. Хамгийн эртний Буддын шашинд мах идэхийг хорьдоггүй байсан. Шагжамүни шавь нараа дагуулаад ойд очиж хүнд нөхцөлд бясалгаж байх үед мах идэхийг хорьсон сахил санваарь байгаагүй. Яагаад байхгүй байсан бэ? Учир нь Шагжамүни 2500 жилийн өмнө номоо зааж байх үед хүний нийгэм их дорой хөгжилтэй байсан. Зарим бүс нутагт газар тариалан байхад заримд нь байгаагүй. Тариалангийн талбай маш цөөхөн, үр тариа хүрэлцээгүй их ховор, харин ой мод хаа сайгүй байсан. Дөнгөж балар эртний нийгмээс гарч ирсэн хүн гол нь ан гөрөө хийж амьдардаг, олонхи газарт зөвхөн махан хоол зонхилдог байсан. Шагжамүни хүний зууралдсан сэтгэлийг боломжийн ихээр орхиулахын тулд шавь нараа ямар ч эд хөрөнгө, материаллаг зүйлстэй харьцахыг хориглодог байсан. Тэр шавь нараа дагуулаад хоол гуйна. Тэд хүмүүсийн юу өгснийг л иддэг байсан, бясалгагчдын хувьд хоолыг шилж сонгож болохгүй, өгсөн хоолонд нь магадгүй мах байна.

Эртний Буддын шашинд зарим хүнс идэхийг хориглодог байсан. Иймээс хориотой хүнс нь эртний Буддын шашинаас гаралтай, гэхдээ одоо махыг хориотой хүнс болгосон. Үнэндээ тэр үед махыг хориотой хүнсэнд оруулаагүй, харин сонгино, цагаан гаа, сармис гэх мэт зүйлийг хэлдэг байсан. Яагаад эдгээр зүйлийг хориотой хүнс гэдэг байсан бэ? Одооны лам хувраг үүний учрыг тодорхой тайлбарлаж чаддаггүй. Яагаад гэвэл тэдний ихэнх нь жинхэнэ бясалгаагүй, тэд олон зүйлийн талаар мэдэхгүй. Шагжамүнигийн зааж байсан зүйлийг “цээрлэх, самади-д орох, гэгээрэх” гэж нэрлэдэг байсан. Цээрлэх нь энгийн хүний бүхий л хүслийг хориглох, самадид орох нь гүн ховсдолын байдалд сууж бясалгана, хүн амгаланд бүрэн орох ёстой. Самади-д орж бясалгахад саад болж байгаа бүх зүйлийг ноцтой үймүүлэлд тооцдог. Хэн нэгэн сонгино,

цагаан гаа эсвэл сармис идвэл хурц үнэр ханхлуулна. Тэр үед лам хувраг голдуу ой модонд эсвэл агуйд байрладаг байсан. Долоо наймуулаа нэг тойрог болж сууна, бясалгахдаа олон тойрог болцгоодог байсан. Хэрэв хэн нэгэн эдгээрээс идсэн бол их хурц үнэр ханхлуулж хүнийг самани-д ороход нь саад болно, тэдний бясалгалыг ноцтой үймүүлдэг. Иймээс энэ журам тогтож ийм хүнсийг хориотой болгосон, идэхийг цээрлэсэн. Бясалгалаар хүний биед үүссэн маш олон амь бодь энэ хурц үнэрээс дайждаг. Сонгино, цагаан гаа, сармис бас хүний хүслийг өдөөдөг. Их идвэл амтанд нь ордог, тиймээс үүнийг хориотой хүнс болгосон.

Урьдны олон лам хувраг маш өндөр түвшинд бясалгаж хүрсэний дараа гон нь нээгдэхэд эсвэл гон нь хагас нээгдэх байдалд ороход, бясалгалын явцад тэдгээр журам нь тийм их чухал биш гэдгийг ухаарсан. Хэрэв энэ сэтгэлээ орхивол, тэдгээр зүйл нь ямар ч нөлөө байхгүй, харин хүнийг жинхэнэ үймүүлдэг нь сэтгэл юм. Тиймээс үе үеийн хутагт дээд лам хуврагууд бас мах идэх идэхгүй нь гол асуудал биш гэдгийг олж мэдсэн. Асуудлын гол гогцоо нь бол тэр сэтгэлээ орхиж чадах эсэхэд л байгаа юм, зууралдсан сэтгэл байхгүй бол юу ч идсэн, цадаж л байвал асуудалгүй. Хийдийн дотор ингэж л бясалгаж ирсэн болохоор хүмүүс тэр заншилд хэзээнээс дасчихсан. Мөн энэ нь зүгээр нэг хориглосон журам төдий байхаа больсон, харин махыг огт идэж болохгүй гэсэн хийдийн доторхи хууль болсон, тэгээд лам хуврагууд ингэж бясалгаад хэвшчихсэн байдаг. Жигон хуврагын талаар ярьцгаая, тэр уран зохиолд их нэрд гарсан. Хувраг мах идэх ёсгүй, харин тэр мах идээд энэ асуудлыг их дуулиан болгосон. Үнэндээ, Жигон Лининь хийдээс хөөгдсөний дараа амь зогоох хоол хүнсний асуудал түүний хувьд маш чухал болсон. Гэдсээ дүүргэхийн тулд тэр юу олдсоныг л иддэг байсан, ямар ч идэх юманд зууралдсан сэтгэлгүй зөвхөн өлсөхгүй байхыг л бодсон. Бясалгаад энэ

түвшинд хүрсэн, энэ зарчмыг ойлгосон, үнэндээ Жигон зөвхөн ганц хоёр удаа л мах идсэн. Мах иддэг хуврагын тухай сонсоод зохиолчид их сонирхсон. Өгүүлэл хичнээн гайхалтай сэдэвтэй байх тусам хүмүүс их сонирхож уншина. Уран зохиолын бүтээл амьдралын эх сурвалжаас үүсч гараад түүнээс хальдаг, тэгээд олон нийтэд энэ нь их дуулиан тарьсан. Үнэндээ зууралдах сэтгэлээ орхивол хүн гэдсээ цагтахын тулд юу ч идсэн хамаагүй.

Зүүн урд Азид болон Гуандунь болон Гуанси зэрэг Хятадын урд хэсгийн мужаар зарим Буддын сүсэгтнүүд ярихдаа өөрсдийгээ Буддын бясалгагчид гэдэггүй, тэгж хэлэх нь хоцрогдсон юм шиг. Тэд мацаглаж байна эсвэл цагаан хоол иддэг гэж хэлдэг, түүний утга нь цагаан хоол идээд Буддад бясалгадаг гэсэн үг. Тэд Буддад бясалгахыг тийм амар зүйлд бодсон. Цагаан хоол идээд л Буддад бясалгаж болох юм уу? Мах идэх бол зөвхөн нэг л зууралдсан сэтгэл, хүсэл гэдгийг та бүгд мэднэ, энэ бол зөвхөн ийм л нэг сэтгэл, зөвхөн энэ нэг сэтгэлийг л орхидог. Бас атаархах сэтгэл, тэмцэлдэх, баярлах, гайхуулах сэтгэл гээд янз бүрийн сэтгэл байдаг, хүний сэтгэл маш олон. Эдгээр бүх сэтгэлийг, янз бүрийн хүслийг бүгдийг нь орхих ёстой. Тэгж байж бясалгалынхаа төгс төгөлдөрт хүрнэ. Харин зөвхөн мах идэх сэтгэлийг орхисноор Буддад бясалгасан болох юм уу? Энэ яриа бол буруу.

Хоолны асуудалд зөвхөн мах хамаатай биш, хүн бусад аль ч төрлийн хоол хүнсэнд зууралдаж болохгүй. Бусад зүйлүүдэд мөн адил. Зарим хүн би үүнийг л идэх дуртай гэж ярьдаг, энэ бас хүсэл. Бясалгадаг хүн нэг тодорхой түвшинд хүрэхэд ийм сэтгэл байхгүй болно. Мэдээж, манай Ном маш өндөр түвшинд яригдаж байгаа, мөн янз бүрийн түвшинг багтаан зааж байгаа. Шууд энэ шатанд хүрэх боломжгүй. Чи ямар нэг зүйл идэх дуртай, энэ сэтгэлээ орхих ёстой тэр мөчид бясалгаад хүрэхэд чи идэж чадахгүй болно. Чи идвэл

амт нь өөр санагдана, ямар ч амттай байж магадгүй. Миний урьд ажилладаг байсан газрын гуанз дандаа алдагдалд ордог байсан тэгээд хаагдсан. Хаагдсаны дараа хүн болгон хоолоо гэрээсээ авчирдаг болсон. Өглөө болгон хоол бэлдэх нь төвөгтэй бас цаг давчуу. Заримдаа би хоёр мантуу, цуунд дүрсэн дүпү-тэй авдаг байсан. Уг нь бол ийм хөнгөн хоол идэхэд болно л доо, гэхдээ дандаа идэхэд бас болохгүй, энэ сэтгэлийг бас орхиулна. Чи дүпү-г дахиад харахад дотор муухай оргино, хүчилсэн ч идэж чадахгүй, чамаас зууралдсан сэтгэл гаргахгүйн тулд юм. Мэдээж ийм байдал бясалгаад нэг тодорхой түвшинд хүрсний дараа гардаг. Дөнгөж эхлэх үед ийм байхгүй.

Буддын системд архи уухыг хориглодог. Чи гартаа лонхтой дарс барьсан Будда байхыг харсан уу? Байхгүй. Би хэлсэн, хүн мах идэж чадахгүй болж болно гэхдээ энгийн хүмүүсийн дунд бясалгахад зууралдсан сэтгэлээ орхисны дараа дахиад мах идвэл болохгүй юм байхгүй. Харин чи архи уухаа больсны дараа дахин ууж болохгүй. Бясалгагч хүний биен дээр гон байдаг биз дээ? Янз бүрийн хэлбэрийн гон, бас зарим ер бусын чадварууд чиний биений гадаргуу дээр илэрдэг, тэдгээр нь бүгд ариун. Чамайг архи уунгуут тэд чиний биенээс тэр дорхноо явна. Агшин зуурд чиний бие дээр юу ч үлдэхгүй болно, тэд энэ үнэрээс зугтана. Чи тийм зуршилд автвал тун жигшмээр, архи ууснаас хүн ухаанаа алддаг. Яагаад зарим Аугаа Дао-гийн бясалгалд архи уудаг вэ? Түүний учир нь бол тэд өөрийнхөө Эзэн сүнснийг бясалгадаггүй, архи ууж Эзэн сүнснийг мансууруулдаг.

Зарим хүн архинд амиа өгөхөөс буцахгүй. Зарим нь архи уугаад бүүр донтчихсон байдаг. Нэг хэсэг нь аль хэдийн архины хордлогонд орчихсон, уухгүйгээр аягаа ч өргөж чадахгүй, уухгүй байж чадахгүй болчихсон. Бясалгагчийн хувьд бид ийм байж болохгүй. Архи уугаад байвал

гарцаагүй автана. Энэ бол хүсэл, мөн хүний автах сэтгэлийг өдөөдөг. Хүн их уух тусам улам автана. Бодоод үз, бясалгагч хүний хувьд бид энэ зууралдсан сэтгэлийг орхих ёстой биз дээ? Үүнийг орхих ёстой. Зарим хүн “Тэр бүтэхгүй яагаад гэвэл би зочин хүлээж авдаг ажилтай” эсвэл “Би бизнесийн уулзалт хийдэг, архи уухгүйгээр ажил бүтээх амаргүй” гэдэг. Би үүнийг тийм байх шаардлагагүй гэж хэлнэ. Ер нь ажил төрлийн хэлцэл хийхэд, ялангуяа гадаадынхантай бизнесийн талаар ярихад, харилцахад чи ундаа авна, тэр аршаан ус авна, өөр нэг хүн пиво авна. Хэн ч чамайг архи уу гэж шахахгүй, чи өөрөө уух зүйлээ сонгож хүссэн хэмжээгээрээ ууна. Ялангуяа сэхээтэн хүмүүсийн дунд ийм асуудал бүр ч байхгүй, ер нь ийм л байдаг.

Тамхи татах бас зууралдсан сэтгэл, зарим хүн тамхи татахад толгой сэргэдэг гэж ярьдаг, харин би үүнийг өөрийгээ ч мэхэлж, бусдыг ч хуурч байна гэж хэлнэ. Зарим хүн ажил хийгээд эсвэл бичиг цаасны ажилтай зууралдаад ядрахдаа завсарлага авч тамхи татах дуртай. Тэдэнд тамхи татсаны дараа оюун ухаан нь сэргэсэн мэт болдог. Үнэндээ энэ нь тийм биш, тэд жоохон амарсандаа л учир нь байгаа юм. Хүний бодол хуурамч мэдрэмжийг төрүүлдэг, бас нэг тийм янзын хий үзэгдэл гаргадаг. Сүүлдээ энэ нь нэг янзын төсөөлөл болсон, нэг буруу ойлголт үүсдэг, тэгээд чи тамхи татахад сэтгэл чинь сэргэсэн юм шиг болдог, энэ нь огт тийм биш, тийм нөлөө ч байхгүй. Тамхи татсанаас хүний биед ямар ч сайн юм болохгүй. Олон жил тамхи татдаг байсан хүний биед эмч задлан шинжилгээ хийхэд амьсгалын хоолой, уушиг доторхи нь тэр чигээрээ хар байдаг.

Бид бясалгагчид биеэ ариусгахыг ярьдаг биз дээ? Тасралтгүйгээр биеэ ариусгаж, тасралтгүйгээр дээд түвшин лүү ахина. Гэтэл чи түүгээр биеэ бохирдуулаад байвал бидний эсрэг зүг рүү явж байгаа юм биш үү? Тэрнээс гадна

энэ нь бас нэг хүчтэй хүсэл юм. Зарим хүн тамхи татах нь муу гэдгийг мэднэ, гэхдээ хаяж чадахгүй. Би та нарт хэлье, түүнд удирдах зөв бодол байхгүй, энэ байдлаараа тамхинаас гарах амаргүй. Бясалгагч хүний хувьд чи өнөөдөр үүнийг зууралдсан сэтгэл гэж үзээд орхи, чи гарч чадах үгүйгээ үз. Би та бүгдэд зөвлөхөд, хэрэв чи жинхэнэ бясалгахыг хүсч байгаа бол одооноос тамхинаас гарах хэрэгтэй, чиний гарч чадна гэдэг нь гарцаагүй. Энэ танхимд тамхи татах бодол хэний ч толгойд орохгүй. Чи гарах хүсэлтэй л байгаа бол үүнийг орхиж найдвартай чадна. Чи дахиад тамхи татвал амт нь өөр байх болно, номон дахь энэ лекцийг уншвал бас ийм нөлөөтэй байх болно. Мэдээж чи бясалгах хүсэлгүй байвал бид чамайг хариуцахгүй. Бясалгагч хүний хувьд чи үүнээс гарах хэрэгтэй гэж би бодож байна. Би урд нь ийм нэг жишээ хэлсэн, чи аль нэг Будда эсвэл Дао амандаа тамхи зуугаад сууж байхыг харсан уу? Яаж тийм байх юм? Бясалгагч хүний хувьд чиний зорилго юу вэ? Үүнээс гарах хэрэгтэй биш үү? Тиймээс би хэлсэн, чи бясалгах хүсэлтэй бол тамхинаас гарах хэрэгтэй. Энэ нь чиний биеийг хордуулдаг, бас нэг янзын хүсэл юм. Яг бидний бясалгагч хүний тавих шаардлагад харшилж байна.

Агаархах сэтгэл

Би Ном заахдаа үргэлж атаархах сэтгэлийн талаар ярьдаг. Яагаад вэ? Яагаад гэвэл атаархал бол Хятадад маш хурцаар илэрдэг, ийм хүчтэй байдал нь аль хэдийнээс хэвшмэл болсон, өөрсдөө ч үүнийг анзаарахаа больсон. Яагаад Хятад хүмүүст атаархах сэтгэл тийм хүчтэй байдаг вэ? Энэ нь үндэслэлтэй юм. Хятад хүмүүст урьд нь Күнзийн шашны нөлөө их байсан, тэгээд зан ааш даруу, тэд уурласан ч ил гаргадаггүй баярласан ч ил гаргахгүй. Тэд хүмүүжилтэй байх, тэвчээртэй байх асуудлыг ярьдаг. Яагаад гэвэл ийм байдалд дасчихсан, тиймээс манай үндэстэн бүхэлдээ бүрэг,

дотогшоо чанартай. Мэдээж үүнд сайн тал байгаа, дотоод сэтгэлийн хөдөлгөөнөө ил гаргадаггүй. Тэгэхдээ бас муу тал байдаг, мөн сөрөг үр дагавартай. Ялангуяа энэ Номын төгсгөлийн үед үүний муу тал нь улам давамгайлах болсон, мөн хүний атаархах сэтгэлийг гүнзгийрүүлэх дэм болсон. Хэн нэгэнд сайн зүйл гарвал бусад хүмүүс тэр дороо атаархана. Ажлаасаа эсвэл өөр газраас шагнал урамшуулал авбал хүнд хэлэхээс айна, учир нь бусад хүмүүс сонсоод сэтгэл нь тайван биш болчихно. Баруунд үүнийг “Дорны атаархал” эсвэл “Азийн атаархал” гэдэг. Азийн бүс нутаг даяар Хятадын Күнзийн шашин нэлээд нөлөөлсөн учраас ийм байдал бас бага хэмжээгээр илэрдэг. Ганцхан Хятадад энэ нь их хүчтэй илэрдэг.

Энэ нь хуучны баримталдаг байсан туйлын тэгшитгэн хуваарилах үзэлтэй холбоотой: тэнгэр хөмөрвөөс бүгд хамтдаа үхнэ, ямар нэгэн ашиг олбол бүгдэд тэнцүү хуваана, цалин нэмэхэд хүн болгонд ижил хуваарилна гэнэ. Энэ үзэл бодлыг харахад зөв мэт санагдана, хүн болгон адилхан. Үнэндээ хүмүүс яаж адилхан байх юм? Тэдний хийдэг ажил нь адилгүй, түүнчлэн үүрэг хариуцлагаа биелүүлэх нь адилгүй. Энэ орчлон ертөнцөд “алдахгүй бол олохгүй” гэсэн зарчим байдаг. Олж авахын тулд алдах ёстой. Энгийн хүний ярьдагаар ажиллахгүй бол олохгүй. Их ажиллавал их олдоно, бага ажиллавал бага олдоно гэсэн үг. Их зүтгэл гаргавал илүү үр өгөөж хүртэнэ. Хуучин туйлын тэгшитгэн хуваарилах үзэл баримталдаг байх үед хүн болгон төрөхдөө адилхан, төрсний дараахь үеийн амьдрал нь хүнийг өөрчилдөг гэж үздэг байсан. Би үүнийг хэт туйлширсан дүгнэлт гэнэ. Ямар ч юм хэтэрхий туйлширвал буруутна. Яагаад зарим хүмүүс эрэгтэй зарим нь эмэгтэй төрдөг вэ? Яагаад хоорондоо адилхан харагддаггүй вэ? Хүмүүс төрөхдөө зарим хүн өвчтэй, эсвэл эрэмдэг зэрэмдэг төрдөг, адил биш. Бид дээд түвшнээс харахад хүний бүхий л амьдрал өөр орон зайд оршиж байдаг. Яаж ижилхэн байх

юм? Бүгд нэг ижил байхыг хүсдэг, гэвч түүний амьдралын насанд байхгүй бол яаж тэд ижил байх юм? Адилгүй.

Барууны орнуудын хүмүүсийн зан ааш нь харьцангуй ил байдаг. Баяртай байгаа нь ил харагдана, ууртай байгаа нь бас ил харагдана. Үүнд сайн тал ч бий гэхдээ бас муу тал ч байдаг, энэ нь тэвчээр муу. Энэ хоёр зан байдал нь өөр, сэтгэлгээ нь өөр учраас ямарваа юм хийхэд гарах үр дагавар нь өөр байдаг. Хятад хүн даргадаа магтуулж бас урамшуулал авахад бусдынх нь сэтгэл таагүй болдог. Хэрэв тэр арай илүү мөнгөн шагнал авбал бусдад мэдэгдэхгүйн тулд кармандаа сэмхэн шиг хийчихнэ. Одоо үед тэргүүний ажилтан байх хэцүү. Чи хөдөлмөрийн гавшгайч, чи үүнийг сайн хийж чадна, чи эрт ирж орой бууж бай, энэ ажлыг чи бүгдийг нь хийчих, бид бол чадахгүй гэж хошигнон ёжилно, сайн хүн байх ч хэцүү.

Хэрэв гадаадад бол шал өөр. Дарга нь энэ ажилтныг өнөөдөр ажлаа сайн хийснийг нь хараад нэмэгдэл цалин урамшуулал өгнө. Тэр баяртайгаар мөнгөө нэг нэгээр нь бусдын өмнө тоолно, пөөх дарга өнөөдөр надад ийм их мөнгө өглөө. Тэр энэ тухай бусдад хөөртэйгээр чөлөөтэй ярина, ямар ч асуудалгүй. Хятадад хэрвээ хэн нэгэн хүн нэмэгдэл урамшуулал авбал дарга нь хүртэл түүнд бушуу далд хий, бусдад битгий харуул гэж хэлнэ. Хэрэв гадаадад хүүхэд сургуульдаа зуун оноо авсан бол гэрлүүгээ хөгжилтэй хашгиран гүйнэ: “Би өнөөдөр зуун оноо авсан! Би зуун оноо авсан!” Тэр хүүхэд сургуулиасаа гүйсээр гэртээ ирнэ. Нэг хөрш нь хаалгаа онгойлгоод, “Хэеэ Том, сайн хүү” гэнэ. Өөр нэг хөрш нь магадгүй цонхоо онгойлгоод, “Хөөе Жайк, мундаг байна.” гэнэ. Хятадад ийм явдал болбол байдал эсрэгээр эргэнэ. “Би зуун оноо авсан, би зуун оноо авсан!” Энэ хүүхэд сургуулиас гэр хүртлээ гүйгээд харина. Хаалгандаа хүрч амжаагүй байхад хөрш нь гэр дотроосоо загнана: “Юундаа гайхуулаад байгаа юм,

зуун оноо аваа л биз, онгирох юу байгаа юм! Зуун оноо авч үзээгүй хэн байгаа юм!” Ийм хоёр өөр сэтгэлгээ, үүнээс гарах үр дагавар нь адилгүй. Энэ нь хүний атаархах сэтгэлийг өдөөнө, хэрэв өөр хүн сайн явбал түүнд баяртай байхын оронд харин сэтгэл нь тавгүй болно. Ийм асуудал гардаг.

Хэдэн жилийн өмнө туйлын тэнцвэрт идеализмын үед хүмүүсийн үзэл санаа их замбараагүйтсэн. Тодорхой жишээ хэлье: Ажлын газарт нэг хүн өөрийгээ бусдаас илүү чадвартай гэж бодно. Тэр ямар ч ажлыг сайн хийж чадна, өөрийгээ үнэхээр гарамгай гэдэгт итгэлтэй. Тэр дотроо намайг үйлдвэрийн дарга эсвэл менежер болгосон ч би хийж чадна, түүнээс дээгүүр албан тушаалд тавьсан ч би хийж чадна, ерөнхий сайд болсон ч хийж дөнгөнө гэж бодно. Дарга нь бас түүнийг их чадвартай хүн, юу ч хийсэн чадна гэж ярина. Хамтран ажиллагсад нь бас тэр ёстой чадвартай, их авьяаслаг гэж хэлнэ. Гэтэл түүнтэй хамт нэг ажлын хэсэгт юмуу нэг албан тасалгаанд цуг ажилладаг хүн ямар ч юм хийх чадваргүй, юу хийсэн ч сайнгүй байж мэднэ. Нэг өдөр энэ чадваргүй хүн дарга болсон харин түүнийг болгоогүй, бүр түүний дарга нь болсон. Түүний сэтгэл тайван байж чадахгүй, нааш цааш холхин бухимдаж, атаархаад болохгүй.

Би та нарт энгийн хүний ойлгож мэдэхгүй ёсыг ярья. Чи өөрийгөө бүх юманд чадвартай гэж бодно, гэтэл чиний хувь заяанд энэ нь байхгүй. Тэр хүн юу ч чадахгүй, харин түүний хувь заяанд нь байгаа учраас тэр дарга болно. Энгийн хүн юу гэж бодох нь хамаагүй, тэр бол зөвхөн энгийн хүний бодол. Дээд зэргийн амь бодь харахад, хүн төрөлхтний нийгмийн хөгжил нь тодорхой зүй тогтлын дагуу явагддаг. Иймээс хүний нэг насандаа юу хийхийг нь түүний чадварынх нь дагуу зохицуулдаг биш. Буддын шашинд үйлийн үрийг төлөх тухай ярьдаг. Тэр чиний үйлийн үрийн

дагуу зохицуулсан байдаг, чи ямар ч их чадвартай байсан буянгүй бол магадгүй энэ насанд чамд юу ч байхгүй. Чи тэр хүнийг юу ч чадахгүй гэж боддог, гэтэл түүний буян их. Тэр дээгүүр албаны дарга болно, эсвэл их баян чинээлэг болно. Энгийн хүн үүнийг харж чадахгүй, тэр үргэлж өөрийнхөө чадварт таарсан зүйлийг хийх ёстой гэж үздэг. Иймээс тэр амьдралынхаа туршид өрсөлдөнө тэмцэлдэнэ, сэтгэл нь шархална, түүнд юм бүхэн их зовлонтой санагдана, юм бүхэн шударга бус санагдана. Сайн идэж унтаж ч чадахгүй, сэтгэл санаа нь цөхөрнө. Өтлөх насандаа олон янзын өвчинд баригдаж бие нь муудна.

Тэгвэл бидний бясалгагчид бүр ч ийм байж болохгүй, бясалгагч хүн жам ёсыг дагах хэрэгтэй. Чиний зүйл мөн л бол чи түүнийг алдахгүй, чинийх биш бол чи тэмцээд ч олж авч чадахгүй. Мэдээж энэ нь туйлын биш. Хэрэв бүгд туйлын байвал хүн буруу зүйл хийх асуудал байхгүй болно. Өөрөөр хэлбэл зарим тогтвортой биш хүчин зүйлүүд байдаг. Гэхдээ бясалгаж байгаа хүний хувьд, угаас багшийн Номын биеэр зохицуулагдсан байдаг, өөр хүн чиний юмыг авъя гэсэн ч авч чадахгүй. Иймээс бид жам ёсыг дагана гэж ярьдаг. Заримдаа чамд ямар нэгэн зүйл чинийх юм шиг санагдана, бусад хүмүүс бас энэ зүйл чинийх гэж хэлнэ. Үнэндээ тэр чинийх биш. Чи үүнийг өөрийнхээ гэдэгт итгэж магадгүй, эцэст нь тэр чинийх биш болно, ийм байдал дунд чамайг энэ зүйлээ орхиж чадах эсэхийг харна. Хэрэв чи үүнийгээ орхиж чадахгүй бол энэ нь зууралдсан сэтгэл, энэ аргаар чиний ашигт зууралдсан сэтгэлийг орхиулна. Энэ бол ийм л асуудал юм. Энгийн хүн энэ зарчмыг ухамсарлаж чадахгүй учраас ашиг хонжоон дээр булаацалдан тэмцэлдэнэ.

Атаархах сэтгэл энгийн хүмүүсийн дунд маш хүчтэй илэрдэг. Энэ нь бас бясалгагчдын хүрээнд нилээд цухуйх хандлагатай байдаг. Янз бүрийн чигон бясалгалын хооронд

нэгнийгээ үл ойшоох байдал гардаг, “чиний чигон сайн” эсвэл “түүний чигон сайн” гэж сайн, муугаар нь дуудна. Минийхээр бол тэд бүгдээрээ өвчин эдгээх бие сайжруулах тэр түвшинд харъяалагдана. Хоорондоо маргалдаж нэг нэгэнтэйгээ сөргөлцөж байгаагийн ихэнх нь шүглэсэн сүнс эсвэл амьтны авчирсан замбараагүй чигон юм, тэд зан чанар дээр анхаарч үздэггүй. Хэн нэгэн хүн магадгүй хорь гаруй жил хичээллээд ер бусын чадвар нь гараагүй, гэтэл өөр нэг хүн дөнгөж хичээллээд л ер бусын чадвартай болсон. Тэр хүн үүнийг шударга бус гэж үзэн: Би хорь гаруй жил бясалгаад надад ямар ч ер бусын чадвар гараагүй байхад түүнд гарсан гэнэ. Түүнээс ямар юмных нь ер бусын чадвар гардаг юм? Тэр сэтгэлдээ бухимдан: Түүнд сүнс эсвэл амьтан шүглэсэн, тэр хэт автаж солиорсон! гэнэ. Чигон багш хичээл зааж байхад тэр тэнд суугаад үл тоомсорлоно, “За, энэ ямар юмных нь чигон багш байдаг юм? Түүний ярьж байгаа нь надад огтхон ч сонирхолтой биш байна” гэнэ. Тэр чигон багш энэ хүн шиг сайн ярьж чадахгүй байж болно. Гэхдээ тэр чигон багшийн ярьж байгаа нь түүний өөрийнх нь бясалгалын зүйл. Энэ хүн юм болгоныг сурна, зөндөө олон төгсөлтийн гэрчилгээтэй, чигон багш болгоны ангид суудаг. Тэр үнэхээр их мэднэ, тэр чигон багшаас илүү зүйл мэднэ. Гэхдээ тэр нь ямар хэрэгтэй юм? Бүгд өвчин эдгээх бие сайжруулах талын л зүйлүүд. Тэр иймэрхүү зүйл их сурах тусам мэдээлэл нь улам замбараагүй, улам төвөгтэй болно, түүнд бясалгахад бүр хэцүү болно, бүгд холилдож замбараагүйтнэ. Жинхэнэ бясалгахад тууштай байхыг ярьдаг, буруу зүйл гарахгүй. Жинхэнэ Дао-гийн бясалгагчдын дунд бас нэг нэгнийгээ ойшоодоггүй, өрсөлдөх сэтгэлээсээ салдаггүй, бас амархан атаархах сэтгэл үүсдэг явдал байдаг.

Бид нэг домог ярья: “Бурханд зэрэг өргөмжилсөн нь” гэдэг номонд Шэнь Гонбао, Жиан Зияа-г хөгшин бас чадваргүй гэж боддог. Гэтэл Тэнгэрийн анхдагч бурхан,

Жиан Зияа-гаар бурханд хэргэм зэрэг олгуулахаар болсон. Шэнь Гонбао-д энэ нь шударга бус санагдсан, яагаад түүгээр бурханд хэргэм зэрэг олгуулж байгаа юм? Миний ямар чадвартайг хар даа. Би толгойгоо цавчуулаад буцаагаад мөрөн дээрээ тавьж чадна. Яагаад надаар хийлгүүлдэггүй юм? Тэр Жиан Зияа-д их атаархаж түүнд дандаа төвөг удах болсон.

Шагжамүнигийн үеийн анхны Буддын шашинд ер бусын чадварыг ярьдаг байсан. Одоогийн Буддын шашинд ер бусын чадварыг хэн ч зүрхэлж дурсахаа болсон. Хэрэв чи ер бусын чадварыг ярих юм бол тэд чамайг бясалгалын солиотой гэнэ. Юун ер бусын чадвар? Тэд үүнийг хүлээн зөвшөөрөхгүй. Яагаад вэ? Одоо үед, лам хуврагууд хүртэл тэдгээрийг ямар учиртайг нь мэдэхгүй. Шагжамүнид арван их шавь байсан, тэднээс Мужуанлиан ер бусын чадвараар нэгд орно гэж тэр хэлсэн. Шагжамүнид бас эмэгтэй шавь байсан, тэдний дотроос Лянхуасэ³¹ ер бусын чадвараар нэгд байсан. Буддын шашин Хятадад орж ирсний дараа бас адилхан байдал гарсан. Түүхийн үеэс үед олон том хутагт хувилгаад лам хуврагууд байсан. Бодьдарма Хятадад ирэхдээ нэг хулсаар мөрөнг гаталсан. Гэхдээ түүхийн хөгжлийн явцад ер бусын чадварыг улам үгүйсгэх болсон. Түүний гол учир нь бол хийдийн ахмад лам, тэргүүн лам эсвэл хамба лам нь төрөлхийн аугаа суурьтай хүн байх албагүй. Хэдийгээр тэд хамба лам юмуу ахмад лам байлаа ч энэ нь зөвхөн энгийн хүмүүсийн дундах хэргэм зэрэг, тэд ч бясалгаж байгаа хүмүүс, зүгээр л мэргэжлийн бясалгагчид юм. Чи гэртээ сайн дураар бясалгадаг. Хүн бясалгаж үр дүнд хүрэх үгүй нь сэтгэлээ яаж бясалгаснаас шалтгаална, бүгд адилхан, жоохон ч зөрж болохгүй. Гэтэл тэр нэгэн гал тогоонд хоол хийдэг залуу хуврагын төрөлхийн суурь муугүй байж болно. Залуу хувраг улам их зовлон зүдүүр

³¹ Лянхуасэ- Будда Шагжамүний эмэгтэй арван шавийн нэг

амсах тусам гон нээгдэхэд хүрэх нь амар. Ахлах лам хэр их тав тухтай байна тэр тусам түүний гон нь нээгдэхэд хэцүү, учир нь үүнд нүгэл хувирах асуудал байдаг. Залуу хувраг үргэлж ядарч зовно. Тэр нүглээ төлж илүү хурдан гэгээрэлд хүрнэ. Магадгүй гэнэт нэг өдөр гон нь нээгдэнэ. Гон нь нээгдсэн, гэгээрэх эсвэл хагас гэгээрэхэд ер бусын чадвар гарч ирнэ, хийдийн бүх лам нар ирж түүнээс юм асууна, бүгд түүнийг биширнэ. Гэхдээ хамба үүнийг тэвчихгүй, “Миний хамба цол юунд хэрэгтэй болж байна? Юуных нь гэгээрэл? Тэр бясалгалын солиоролд автсан байна. Түүнийг эндээс зайлуул.” Тэгээд залуу лам хийдээс хөөгдсөн. Яваандаа Хятадын Буддын шашинд ер бусын чадварын талаар ярьж зүрхлэх хүнгүй болсон. Жигоныг³² ямар мундаг чадвартай байсныг та нар мэднэ. Тэр Эмэй³³ уулны гуалин модыг худагнаас нэг нэгээр шидэн гаргаж байсан. Гэхдээ эцэст нь тэр Линень сүмээс хөөгдсөн.

Атаархах сэтгэлийн энэ асуудал их ноцтой, яагаад гэвэл үүнээс бидний төгс бясалгалдаа хүрч чадах эсэх нь шууд хамаарна. Атаархах сэтгэлээ орхихгүй бол хүний бясалгасан бүх сэтгэл маш хэврэг болно. Энд ийм нэг тогтолцоо байдаг: Хүн бясалгалын явцад атаархах сэтгэлээ орхихгүй бол гэгээрлийн хутагт хүрч чадахгүй, туйлаас үгүй. Та нар Будда Амитаба диваажинд нүгэлтэй очих тухай хэлснийг сонссон байх. Гэхдээ атаархах сэтгэлээ орхихгүй бол болохгүй. Зарим зүйл дээр бага зэрэг дутагдал байвал диваажинд нүгэлтэй очиж цааш бясалгана. Гэхдээ атаархах сэтгэлээ орхиогүй бол энэ нь хэрхэвч болохгүй. Өнөөдөр би үүнийг бясаллагч хүнд ярьж өгч байна, тэгэхээр чи битгий ингэж буруу үзэлтэйгээ зууралдаарай. Хэрэв чи илүү дээд

³² Жигон- Өмнөд Сон гүрний үед нэрд гарсан лам

³³ Эмэй уул- Лингвин сүмийн худагнаас ойролцоогоор нэг мянган майл зайтай

түвшин лүү бясалгах зорилготой бол атаархах сэтгэлээ заавал орхих ёстой, тиймээс би энэ асуудлыг онцолж хэллээ

Өвчин эдгээх асуудал

Өвчин эдгээх талаар ярихдаа би чамд өвчин эдгээхийг зааж байгаа юм биш. Фалунь Дафагаар жинхэнэ бясалгадаг шавь, хэн ч бусдын өвчнийг эдгээж өгч болохгүй. Чамайг өвчин эдгээхэд чиний биед байгаа Фалунь Дафагийн бүх зүйлүүдийг миний Номын бие буцаагаад хурааж авна. Яагаад энэ асуудлыг ийм ноцтой авч үздэг вэ? Учир нь энэ бол Дафа-г эвдэж байгаа хэрэг. Чи өөрийнхөө биеийн эрүүл мэндийг хохироохоос гадна зарим хүн хэзээ нэгэн цагт хүний өвчинг эдгээдэг болчихбол гар нь загатнана, тэр хэнийг ч хамаагүй авчраад өвчнийг нь эдгээж гайхуулна. Энэ нь зууралдсан сэтгэл биш гэж үү? Бясалгаж байгаа хүнийг ноцтойгоор үймүүлдэг.

Энгийн хүний чигон заалгаад өвчнийг эдгээдэг болох гэсэн хүслийг олон хуурамч чигон багш нар ашиглаж чамд энэ зүйлийг заана, тэгээд чий гаргаад өвчнийг эдгээж чаддаг болно гэнэ. Энэ нь инээдтэй биш гэж үү? Чамд ч чий байгаа, түүнд ч бас чий байгаа. Чи хүнийг өөрийнхээ чий-гээр яаж эдгээх юм? Магадгүй түүний чий чинийхээс давамгайл! Чий хооронд ямар ч хязгаар байхгүй. Хүн дээд түвшинд бясалгахад гон гардаг, гаргасан нь дээд энергийн бие бодь бөгөөд үнэхээр өвчнийг эдгээж, намдааж бас хязгаарлаж чаддаг, гэхдээ үндсээр нь арилгаж чадахгүй. Иймээс өвчнийг үнэхээр бүрмөсөн эдгээе гэвэл ер бусын чадвартай байх ёстой. Тухайн өвчин болгоныг эдгээхэд тодорхой нэг ер бусын чадвар байдаг. Миний үзэж байгаагаар өвчнийг эдгээх ер бусын чадвар мянга гаруй байдаг, хэдэн төрлийн өвчин байна төдий хэмжээний ер бусын чадвар байдаг.

Эдгээр ер бусын чадваргүйгээр чиний эмчилгээ ямар ч сайн байгаад нэмэргүй.

Ойрын жилүүдэд зарим хүн бясалгагчдын дунд их будлиан тарьсан. Хүмүүсийн өвчинг эдгээж биеийг нь сайжруулахад туслах гэж гарч ирсэн жинхэнэ чигон багш нар, хамгийн анх чигон-ы эхлэлийг тавьсан багш нараас өвчин эдгээхийг хэн нь зааж байсан юм? Тэр чиний өвчнийг эдгээж өгнө эсвэл яаж бясалгах, яаж биеэ сайжруулах нэг цогц бясалгалын арга чамд заадаг, чи тэр дасгалаар өөрийнхээ өвчнийг эдгээж болно. Дараа нь хуурамч чигон багш нар гарч ирж будлиантуулсан. Чигон-оор хүний өвчнийг эдгээхийг хүссэн хэн боловч өөртөө сүнс болон амьтан даллаж ирүүлнэ, ийм байх нь ойлгомжтой. Тэр үеийн нөхцөл байдлын улмаас зарим чигон багш өвчтөнийг үзэж эдгээж өгдөг байсан. Энэ нь тэр үеийн тэнгэрийн байдалд нийцэхийн тулд гарсан. Гэхдээ чигон бол энгийн хүний мэргэжил биш, үүрд хадгалагдан үлдэхгүй. Энэ нь тухайн цаг үеийн тэнгэрийн байдлын өөрчлөлтөөс үүдэн гарсан зөвхөн тэр үеийн л зүйл юм. Дараа нь зарим хүн өвчин эдгээх зорилгоор бусдад заах болсон, ингэснээр их замбараагүй болгосон. Нэг энгийн хүн гурваас таван өдөр сураад л өвчнийг эдгээж чаддаг болох юм уу? Зарим хүн, би энэ өвчнийг эсвэл тэр өвчнийг эдгээж чадна гэж ярина. Би та нарт хэлэхэд аливаа ингэж ярьдаг хүмүүс бүгд шүглэсэн сүнс эсвэл амьтан тээж явдаг. Тэр нуруунд нь юу зүүгдэж явааг мэдэх юм уу? Түүнд шүглэсэн сүнс эсвэл амьтан байгаа, гэвч тэр үүнийг мэдрэх ч үгүй мэдэх ч үгүй. Харин тэр өөрийгөө чадалтай гэдэг, их чадвартай гэж боддог.

Жинхэнэ чигон багш нар олон жилээр бясалгаж их хүнд бэрхшээлийг туулж энэ зорилгодоо хүрдэг. Чи хүний нүглийг арилгаж чадах тийм хүчирхэг ер бусын чадвар өөртөө байгаа юу гэж бодож үзсэн үү? Чамд жинхэнэ уламжилсан юм уу үгүй юу? Чи хоёр гурван өдрийн дотор

сураад өвчнийг эдгээж чадна гэж үү? Чи энгийн хүний гараар өвчнийг эдгээж чадах юм уу? Гэхдээ тэдгээр хуурамч чигон багш чиний сул талыг, хүний зууралдсан сэтгэлийг ашигладаг. Чи өвчин эдгээдэг болохыг хүссэн биз дээ? Тэр тэгвэл эмчилгээний сургалт зохион байгуулж чамд чий зүү тавих эмчилгээ, гэрлээр эмчлэх арга, өвчний чий-г гадагшлуулах, чий нөхөх, цэгийн даралт болон гараар шүүрэх гэх мэт өвчин эдгээх арга барилыг зориуд заана. Олон төрлийн аргууд байдаг, энэ бүгдийн гол зорилго нь чиний мөнгийг авахад юм.

Бид гараар шүүрэх аргын талаар ярья. Бид ийм нэг байдлыг харсан. Хүн яагаад өвчилдөг вэ? Хүний өвчтэй байх, гай зовлонд учрахын бүх үндсэн шалтгаан бол нүгэл, хар биет нүглийн орон юм. Энэ нь билиг шинжтэй ба муу зүйлд харьяалагддаг. Тэдгээр муу амь бодиуд бас билгийн зүйл, бас бүгдээрээ хар. Тиймээс ийм орчин тэдэнд тохиромжтой учраас ирнэ. Энэ бол хүн өвчин тусахын үндсэн шалтгаан, өвчний хамгийн гол эх сурвалж нь юм. Мэдээж өөр бас хоёр янзын хэлбэр байдаг. Нэг нь бол их нягтшилтай маш бичил амь бодь, багц нүгэлтэй адил. Өөр нэг нь бол хоолойгоор дамжиж ирэхтэй адил гэхдээ энэ нь их ховор тохиолддог, энэ бол бүгд өвөг дээдсээс хуримтлагдаж ирдэг нүгэл. Ийм тохиолдол ч байдаг.

Хамгийн түгээмэл байдаг өвчний талаар ярилцъя. Хүний биеийн хаа нэгтээ хавдар, ямар нэгэн үрэвсэл, яс ургах гэх мэт, өөр орон зайн тэр газарт нэг амь бодь сууж байдаг, энэ амь бодь маш гүн орон зайд байдаг. Жирийн чигон багш харж чадахгүй мөн энгийн ер бусын чадвараар түүнийг илрүүлэх боломжгүй, тэд зөвхөн хүний биенд хар чий байгааг л харна. Хаана хар чий байна тэнд өвчин байна гэж хэлж болно. Гэхдээ хар чий бол өвчин үүсгэсэн гол шалтгаан нь биш. Харин нэлээд гүн нэгэн орон зайд тийм нэг амь бодь байдаг, тэр энэ оронг үүсгэдэг. Иймээс зарим

хүн хар чий-г гадагшлуулах мөн авч хаях талаар ярьдаг. Чи түүнийг гадагшлуулах гээд үз! Дараа нь тун удалгүй энэ нь дахиад л үүснэ, зарим амь бодь их хүчирхэг, хар чий-г авч хаянгуут л дахиад гаргадаг, өөрөө дахин сэргээдэг. Чи эдгээх гэж яаж оролдсон ч үр дүн гарахгүй.

Ер бусын чадвартай хүний харснаар бол хаана хар чий байна тэнд өвчний чий байна гэж үздэг. Хятад уламжлалт эмчилгээгээр ярьвал тэр газарт судал бөглөрсөн, чий цусны эргэлт түгжирсэн гэж үздэг. Барууны анагаах ухааны эмч нарын оношлогоогоор бол тэр газарт шархлаа, хавдар үүссэн, яс ургасан, эсвэл үрэвслийн гэх мэт шинж байдал харагддаг, бидний орон зайд ийм хэлбэрээр илэрдэг. Тэр амь бодийг зайлуулсны дараа энэ орон зайн биен дээр юу ч байхгүй болно. Энэ нь нурууны үений зөөлөн эдийн гэмтэл байна уу, ясны үрэвсэл ч байна уу тэр зүйлийг зайлуулсны дараа, тэр оронг гаргасны дараа чи тэр дорхноо сайжирна. Чи дахиад рентген зураг авахуулбал ясны үрэвсэл алга болсныг харна. Үндсэн шалтгаан нь бол тэр амь бодь л ийм нөлөө гаргасных юм.

Зарим хүн гурван өдөр, таван өдрийн дотор өвчин эдгээж чаддаг болно гэдэг, чамд гараар шүүрэх аргыг заана. Чи яаж шүүрхээ надад харуул даа! Хүн бол хамгийн дорой, харин тэдгээр амь бодь их айхтар. Тэр чиний бодлыг удирдаж чамайг амархан дөнгөж чадна, тэр ч байтугай чиний амийг амархан хөнөөж чадна. Чи түүнийг барьж авч чадах юм уу, яаж шүүрэх юм? Чи өөрийн энгийн хүний гараар түүнд хүрч чадахгүй. Чи таамгаар шүүрэх гэж оролдож магад, тэр чамайг тоохгүй ард чинь чамайг шоолно, таамгаар шүүрэх гээд байгаа нь их инээдтэй харагдана. Үнэхээр чи түүнд хүрч чадвал чиний гарыг тэр дор нь гэмтээнэ, чи жинхэнэ гэмтэнэ! Би урьд ийм хүмүүсийг харсан, тэдний хоёр гар нь ямар ч шинжилгээгээр гэмтэлгүй гардаг. Тэдний биед болон гарт

нь ямар ч өвчин байхгүй, гэхдээ гараа өргөж чадахгүй гар нь доошоогоо сул унжаастай. Би нэг ийм өвчтөнтэй тааралдсан. Түүний өөр орон зайн бие нь гэмтсэн байсан, энэ бол үнэхээр зэрэмдэг болсон. Чиний тэр бие гэмтвэл чи жинхэнэ зэрэмдэг болсон биш гэж үү? Зарим хүн надаас: Багшаа, би үргүй болох мэс засал хийлгэсэн, эсвэл би хагалгаа хийлгэж ямар нэг эрхтнээ авхуулсан, тэгвэл би чигон-оор хичээллэж болох уу? гэж асуудаг. Би тэдэнд, энэ нь хамаагүй, яагаад гэвэл өөр орон зайд байгаа чиний биед хагалгаа хийгдээгүй, чигон бясалгал тэр биед нөлөөлдөг гэж хэлдэг. Иймээс би саяхан хэллээ, чи түүнийг шүүрэх гэж оролдоод хүрч чадахгүй бол тэр чамайг тоохгүй, чи түүнд хүрвэл тэр чиний гарыг гэмтээж магадгүй.

Орон даяархи чигон-ыг сурталчлах хөдөлгөөнийг дэмжих зорилгоор би зарим шавь нараа дагуулаад Бээжинд болсон Дорнын эрүүл мэндийн үзэсгэлэнд оролцсон. Хоёр удаагийн үзэсгэлэн дээр бид нар тэргүүлсэн. Анхны үзэсгэлэнд манай Фалунь Дафа нь “Од” Чигон болсон. Дараагийн үзэсгэлэн дээр манай хэсэгт маш их хүн шавсан, бусад хэсэгт цөөн хүнтэй байсан. Манай тэнд эргэн тойронд чихэлдсэн хүнтэй, гурван эгнээгээр дугаарлаж зогссон байсан. Эхний эгнээнд өвчнөө үзүүлэх өглөөний ээлжийн дугаар авсан хүмүүс, хоёр дугаар эгнээнд үдээс хойш дугаар авсан хүмүүс, гурав дахь эгнээнд миний гарын үсэг авах гэж оочирлосон хүмүүс байсан. Бид өвчин үздэггүй. Бид яагаад үүнийг хийсэн бэ? Учир нь бид орон даяархи чигон-ы хөдөлгөөнийг дэмжихийн тулд энэ арга хэмжээнд оролцож хувь нэмрээ оруулсан юм.

Би өөрийнхөө гон-оос дагуулж ирсэн шавь нартаа хувааж өгсөн, хүн бүрт нэг хэсэг хувь, бүгд зуу гаруй ер бусын чадвар багтсан энергийн нэг багц байсан. Би тэдний гарыг гон-оор битүүмжлэн боосон, тэгсэн ч гэсэн заримынх нь гар хазуулж гэмтээд цэврүүтсэн, эсвэл цус гарсан байсан.

Ийм байдал нилээд гарч байсан. Тэдгээр амь бодь ийм айхтар, чи бод доо, энгийн хүний гараар түүнд хүрч зүрхлэх юм уу? Тэгээд ч чи түүнийг шүүрч чадахгүй, тусгай ер бусын чадваргүйгээр яаж ч чадахгүй. Яагаад гэвэл чамайг дөнгөж бодонгуут өөр орон зайнаас тэр чиний юу хийх гэж байгааг мэдчихнэ. Чи түүнийг шүүрэх гэвэл тэр аль хэдийн зугтчихна. Өвчтөн үүдээр гарангуут тэр дахин биед нь буцаад орчихно, тэгээд өвчин дахин хөдөлнө. Үнэхээр түүнийг барья гэвэл гараа сунгаад тэнд нь хөшингө болгох ер бусын чадвар хэрэгтэй. Хөдлөхгүй болгосны дараа бид бас өөр нэг ер бусын чадвар хэрэглэнэ. Урьд үүнийг “Сүнс шүүрэх аугаа арга” гэдэг байсан, энэ ер бусын чадвар нь бүр ч хүчирхэг. Үүгээр хүний биенээс амин сүнсийг татан гаргаж болно, тэгэхэд хүн тэр дороо хөдөлж чадахгүй болж хөшнө. Энэ ер бусын чадварыг тэр зүйлийг шүүрэх зорилгоор хэрэглэдэг. Рулай Будда гартаа барьсан тагшаараа тийм том Сунь Укуныг³⁴ өчүүхэн жижиг болгосныг та бүхэн мэднэ. Энэ ер бусын чадвар ийм нөлөө гаргадаг. Тэр амь бодь хэр том, жижиг байх нь хамаагүй гарт дорхноо баригдаж маш өчүүхэн болдог.

Үүнээс гадна, гараа өвчтөний махан биед оруулаад шүүрч гаргаж ирэхийг зөвшөөрөхгүй. Тэгвэл энгийн хүний нийгэмд хүний сэтгэхүйг үймүүлнэ, үүнийг туйлаас зөвшөөрөхгүй. Тэгж чадах байсан ч ийм маягаар хийж болохгүй. Биед оруулж байгаа гар нь өөр орон зайд байгаа гар юм. Зүрхний өвчтэй хүн байлаа гэхэд энэ гарыг түүний зүрхний тушаа тэр амь бодийг шүүрэхээр сунгахад өөр орон зайд байгаа тэр гар орно. Агшин зуурт маш хурдан шүүрч барьсны дараа чи гадна талын бодит гараа базахад хоёр гар нийлж түүнийг барьж авна. Тэр маш их айхтар, заримдаа гар дотор чинь тийчигнэн хөдөлнө, дотогш өрөмдөнө, заримдаа хазна бас орилно. Чиний гар дотор байхдаа их

³⁴ Сунь Укун- "Барууны оронд аялсан түүх" романы сармагчны хааны дүр

жигжиг боловч гарнаасаа тавьбал маш том болж хувирна. Энэ нь хэн ч хамаагүй хүрч чадах зүйл биш. Тийм ер бусын чадваргүйгээр түүнд хүрч огтхон ч чадахгүй, энэ нь хүмүүсийн бодож байгаа шиг тийм хялбархан зүйл огт биш.

Мэдээж ирээдүйд чигон-оор өвчин эдгээх ийм хэлбэрийг байлгаж магадгүй, энэ нь урьд өмнө үргэлж байдаг байсан. Гэхдээ нэг нөхцөлтэй, энэ хүн заавал бясалгагч байх ёстой. Бясалгалын явцад тэр энэрэнгүй сэтгэлийн үүднээс цөөн тооны сайн хүмүүст ийм зүйл хийж болно. Гэхдээ түүний аугаа буян нь хүрэхгүй учраас тэдний нүглийг бүрмөсөн арилгаж чадахгүй. Тиймээс гай зовлон байсаар байна, гэхдээ тухайн өвчин нь эдгэрнэ. Жирийн чигон багш бол бясалгаад Дао-д хүрсэн хүн биш, тэр зөвхөн хүний өвчнийг хойшлуулж эсвэл хувиргаж л чадна, магадгүй өөр гай зовлонд хувиргадаг. Гэхдээ ингэж хойшлуулж байгаа явцыг тэр өөрөө магадгүй мэдэхгүй, хэрэв дэд бодлоор бясалгадаг чигон бол, түүний дэд бодол нь үүнийг үйлдэж байгаа юм. Зарим чигон-оор бясалгадаг хүн их нэр цуутай, тэдгээр олон алдартай чигон багшид гон байхгүй, гон нь дэд сүнсний биед байдаг. Өөрөөр хэлбэл, бясалгалын явцад тийм зүйл хийж болдог. Яагаад гэвэл, эдгээр хүмүүс үргэлжлэн энэ түвшиндээ арван хэдэн жил бясалгана, хэдэн арван жил ч бясалгаад тэр түвшнээсээ ахиж чаддаггүй, тиймээс тэд амьдралынхаа туршид дандаа хүний өвчнийг үзэж өгдөг. Тэд энэ түвшинд байгаа учраас үүнийг хийхийг зөвшөөрнө. Фалунь Дафа-гаар бясалгадаг шавь нарт өвчин үзэж өгөхийг туйлаас зөвшөөрөхгүй. Чи өвчтэй хүнд энэ номыг уншиж өгч болно. Хэрвээ тэр хүн үүнийг хүлээж авбал өвчин нь эдгэрч болно, гэхдээ тухайн хүний нүглийн их багаас шалтгаалж үр дүн нь ялгаатай байна.

Эмнэлгийн эмчилгээ ба чигон эмчилгээ

Бид эмнэлгийн эмчилгээ ба чигон эмчилгээний хоорондын харилцан холбоог ярья. Зарим барууны эмчилгээний эмч нар чигон-ыг хүлээн зөвшөөрдөггүй, тэдний ихэнх нь ийм байдаг гэж хэлж болно. Тэдний ярьдгаар бол чигон өвчнийг эдгээдэг юм бол бидэнд эмнэлэг байх хэрэг байна уу? Та нар бидний эмнэлгийг оролчих! Та нарын чигон өвчнийг гараараа эдгээдэг болохоор тариа хийх, эм уух, бас эмнэлэгт хэвтэх шаардлагагүй болно. Тэгэхээр манай эмнэлгийг оролбол мөн амар болох юм биш үү гэдэг. Энэ үг их ёс зүйгүй, бас учир утгагүй. Зарим хүн чигон-ыг ойлгодоггүй. Үнэндээ чигон эмчилгээг энгийн хүний эмчилгээний аргатай адилтган үзэж болохгүй, энэ нь энгийн хүний мэргэжил чадвар биш, энэ нь ер бусын зүйл. Тэгвэл, ер бусын зүйлийг өргөнөөр хэрэглэж энгийн хүний нийгмийг үймүүлбэл зөвшөөрөх юм уу? Будда аугаа их чадалтай, аль нэгэн Будда гараа ганц даллахад л бүх хүн төрөлхтний өвчнийг арилгаж чадна. Тэр яагаад үүнийг хийдэггүй вэ? Тэр тусмаа тийм их олон Будда байдаг, тэд яагаад нигүүлсэнгүй сэтгэл гаргаж хүний өвчнийг эдгээж өгдөггүй юм бэ? Яагаад гэвэл энгийн хүний нийгэм ийм л байдаг, төрөх, хөгшрөх, өвчлөх, бас үхэх ийм л жамтай. Бүгд хувь тавилантай холбоотой, үйлийн үрээс үүддэг, чи өртэй бол төлөх ёстой.

Хэрэв чи хүний өвчнийг эдгээчихвэл тэр зарчмыг эвдэж байгаатай адил, бүгд муу зүйл хийж болно, өрөө төлөхгүй, тийм байж болох уу? Бясалгаж байгаа хүнд нинжин сэтгэл гарахад, энэ асуудлыг бүрэн шийдэх том чадваргүй байхад өвчнийг эдгээж өгөхийг зөвшөөрнө. Яагаад гэвэл чамаас энэрэнгүй сэтгэл гарсан, үүнийг хийхийг зөвшөөрнө. Гэхдээ чи энэ асуудлыг бүрэн шийдэж чадах чадвартай бол өргөн хэмжээнд үүнийг хийхийг зөвшөөрөхгүй. Хэрэв тэгвэл чи энгийн хүний нийгмийн байдлыг ноцтойгоор эвдэнэ, үүнийг

зөвшөөрөхгүй. Иймээс чигон-оор энгийн хүний эмнэлгийг орлоно гэвэл ерөөсөө байж болшгүй, учир нь тэр бол ер бусын Ном.

Хэрэв Хятадад чигон эмнэлгүүд байгуулахыг зөвшөөрөөд олон нэртэй чигон багш гарч ирээд эмчилгээ хийвэл юу болох бол? Ингэхийг зөвшөөрөхгүй, учир нь бүгд энгийн хүний нийгмийн байдлыг сахин хамгаалж байгаа. Хэрэв чигон-ы эмнэлгүүд, чигон-ы клиникүүд, эрүүл мэндийн төвүүд мөн эмчилгээ сувиллын газрууд байгуулагдвал чигон багш нарын эмчилгээний хүч нөлөө нь шууд суларна мөн эмчилгээний үр дүн дорхноо унана. Яагаад вэ? Нэгэнт тэд энгийн хүний дунд ийм зүйл хийж байгаа учраас тэдний Ном заавал энгийн хүний түвшинд, энгийн хүний байдалтай нэг түвшинд байх ёстой. Мөн тэдний эмчилгээний үр нөлөө эмнэлгийнхтэй адилхан байх ёстой. Иймээс тэдний эмчилгээ тийм сайн үйлчлэхгүй болчихно, өвчнийг эдгээхийн тулд мөн адил хэдэн курс эмчилгээ хийх хэрэгтэй болно, ер нь ийм л байдаг.

Чигон эмнэлэг байсан байгаагүй чигон өвчнийг эдгээж чадахыг хэн ч үгүйсгэхгүй. Чигон нийтэд дэлгэрээд олон жил болж байна. Маш олон хүн чигон-оор хичээллээд үнэхээр өвчнөө эдгээж, биеэ сайжруулах зорилгодоо хүрч чадсан. Тэр чигон багш өвчнийг хойшлуулсан ч бай яаж эмчилсэн ч бай ямар боловч энэ өвчин одоо байхгүй болсон, өөрөөр хэлбэл чигон өвчнийг эдгээж чадна, үүнийг хэн ч үгүйсгэж чадахгүй. Чигон багшид өвчнөө үзүүлсэн хүмүүсийн ихэнх нь эмнэлгээр эмчлэгдэхгүй болсон хүнд хэцүү өвчтэй хүмүүс. Тэд азаа үзэж чигон багш дээр очдог, тэгээд эцэст нь өвчин нь эдгэрсэн. Эмнэлэг эдгээж чаддаг бол хэн ч чигон багш дээр очихгүй. Ялангуяа эхний үед хүмүүс бүгд ингэж боддог байсан, иймээс чигон өвчнийг эдгээж чадна. Гэхдээ үүнийг энгийн хүний нийгэмд хийдэг зүйлтэй адил хийж болохгүй. Өргөн хэмжээнд хийж

үймүүлэхийг туйлаас зөвшөөрөхгүй, бага хүрээнд юмуу их нөлөө дуулиангүйгээр хийхэд бол болно. Гэхдээ энэ нь өвчнийг бүрмөсөн эдгээж чадахгүй, энэ бол гарцаагүй. Өөрөө чигон-оор хичээллээд өвчнөө эдгээх нь хамгийн зөв зам юм.

Бас зарим чигон багш эмнэлэгт өвчинг эмчилж чаддаггүй, эмнэлгийн эмчилгээний үр дүн нь ийм тийм, гэж ярьдаг. Юу ч гэмээр юм дээ? Мэдээж энэ нь олон талын учир шалтгаантай. Минийхээр гол шалтгаан нь бол хүн төрөлхтний ёс суртахуун маш доод хэмжээнд хүртэл унасан, иймээс эмнэлгээр эмчлэгдэшгүй янз бүрийн хачин өвчнүүд үүссэн, эм уусан ч нэмэр болохгүй, хуурамч эмнүүд ч бас олширсон. Энэ бүгд бол хүн нийгмийг ийм хэмжээнд хүртэл доройтуулснаас болсон юм. Үүнд хэн ч бусдыг буруутгах хэрэггүй, хүн болгон гал дээр тос нэмсэн. Тиймээс бясалгахад хүн болгонд зовлон бэрхшээл тулгарах болно.

Эмнэлэг зарим өвчнийг шинжилгээгээр илрүүлж чадахгүй, гэхдээ үнэхээр өвчин байна. Зарим хүн өвчнийг шинжилгээгээр илрүүлсэн ч ямар нэртэйг нь мэдэхгүй, урьд өмнө үзэгдэж байгаагүй тул үл мэдэгдэх өвчин гэж оношлоно. Эмнэлэгт үүнийг ерөнхийд нь “Орчин үеийн өвчин” гэж нэрлэдэг. Эмнэлэгт өвчнийг эмчилж чадах уу? Мэдээж чадна. Хэрэв эмнэлэгт өвчнийг эмчилж чаддаггүй байсан бол хүмүүс юунд итгэж эмчлүүлэхээр тэнд очих юм? Эмнэлэгт өвчнийг эмчилж чадна. Гэхдээ эмчилгээний арга нь энгийн хүний түвшинд харьяалагддаг, харин тэр өвчин бол энгийн бус, зарим өвчин маш ноцтой. Иймээс өвчтэй бол эмнэлэгт эртхэн эмчлүүл гэж хэлдэг. Хүндэрвэл эмнэлэг эмчилж чадахгүй, хэт их тунгаар эм өгвөл хүн хордоно. Одоогийн анагаах ухааны эмчилгээ нь бидний шинжлэх ухаан техникийн түвшинтэй адил, бүгд энгийн хүний түвшинд байгаа учраас зөвхөн тэр л хэмжээний

эмчилгээний үр нөлөөтэй. Тодруулж хэлэх хэрэгтэй нэг зүйл бол жирийн чигон эмчилгээ ба эмнэлгийн эмчилгээ, зөвхөн өвчнийг үүсгэх үндсэн шалтгаан болсон гай барцдыг хүний үлдсэн амьдралд нь эсвэл түүнээс цааш хойшлуулдагт байгаа юм, харин нүглийг огт арилгадаггүй.

Бид Хятадын уламжлалт эмчилгээний талаар ярья. Хятадын уламжлалт эмчилгээ нь чигон эмчилгээтэй их ойролцоо. Эртний Хятадад уламжлалт эмчилгээний бараг ихэнх эмч нар ер бусын чадвартай байсан. Жишээ нь Сунь Симиао, Хуа Туо, Ли Шижэнь мөн Биан Чуэ³⁵ гэх мэтийн анагаах ухааны их эрдэмтдийг дурьдаж болно. Тэд бүгд ер бусын чадвартай байсныг эмчилгээний сурах бичгүүдэд тэмдэглэсэн байдаг. Гэхдээ одоо эдгээр охь зүйлс нь үргэлж шүүмжлэлд өртдөг. Хятад эмчилгээнээс уламжилж үлдсэн нь бол зөвхөн тэдгээр эмийн жор эсвэл туршлагын судалгаа л юм. Эртний Хятадын эмчилгээ их дэвшингүй байсан, одоогийн анагаах ухааны хөгжлөөс хавьгүй давуу юм. Зарим хүн орчин үеийн анагаах ухаан их хөгжсөн шүү дээ, компьютер томографын төхөөрөмжөөр дотор эд эрхтнийг хардаг, түүнчлэн Эхо оношлогоо, гэрэл зураг авах, рентгенээр харах гээд л байдаг. Хэдийгээр одоогийн тоног төхөөрөмж хөгжингүй мэт байвч минийхээр бол Хятадын эртний анагаах ухааныг гүйцэхгүй.

Хуа Туо, Цао Цаогийн³⁶ тархинд хавдар байгааг нь хараад түүний толгойд хагалгаа хийх хэрэгтэй гэсэн. Цао Цао үүнийг сонсоод Хуа Туо түүнийг алах санаатай байна гэж бодсон, тэгээд Хуа Туог баривчилж шоронд хийлгүүлсэн, эцэст нь Хуа Туо шоронд нас барсан. Цао

³⁵ Хуа Туо, Ли Шижэнь, Биан Чуэ-Хятадын түүхэнд байсан нэртэй эмч нар

³⁶ Цао Цао-Гурван гүрний үеийн нэг хаан (220-265)

Цаогийн өвчин илэрч гарахад Хуа Туогийн хэлсэн санаанд нь орсон, тэгээд Хуа Туог хайлгахад тэр аль хэдийн нас барчихсан байсан. Тэгээд дараа нь Цао Цао үнэхээр энэ өвчнөөр нас барсан. Хуо Туо үүнийг яаж мэдсэн бэ? Тэр харсан, энэ бол хүний ер бусын чадвар, хуучны аугаа эмч нар бүгд ийм чадвартай байсан. Тэнгэрийн мэлмий нээгдсэний дараа нэг талаас хүний биеийн дөрвөн талыг зэрэг харж чаддаг, урдаас харахдаа хүний ар тал, зүүн бас баруун талыг нь зэрэг хардаг. Мөн хөндлөн огтлолоор үе давхаргаар нь харж чаддаг бас энэ орон зайг нэвтэрч өвчин үүсгэсэн үндсэн голомтыг харж чадна. Одоогийн эмчилгээний аргаар ингэж чадах уу? Үүнээс тун хол байна, дахиад мянган жил хэрэгтэй! СТ, Эхо, мөн рентгэн туяагаар хүний биеийн дотрыг хардаг, гэхдээ тоног төхөөрөмж нь хэт нүсэр, их том авсаархан зөөврийн биш, тоггүй бол бас ажиллахгүй. Харин энэ тэнгэрийн мэлмий бол хаана явсан ч хамт, бас цахилгаан эрчим хүчний хэрэг байхгүй. Тэдгээртэй яаж харьцуулж болох юм!

Зарим хүн орчин үеийн эмийг их сайн гэж ярьдаг. Би тийм биш гэнэ, харин эртний Хятадын ургамлын бэлдмэлүүдийг хэрэглэхэд үнэхээр өвчин эдгэнэ. Маш олон зүйлс уламжлагдаж үлдээгүй гэхдээ бас өөр олон зүйлс гээгдээгүй ард түмний дунд хэрэглэсээр ирсэн. Би Чичихар хотод лекц уншиж байхдаа гудамжинд нэг хүн хүмүүсийн шүдийг авч байхыг харсан. Түүнийг харахад урд зүгээс ирсэн хүн гэдгийг хэлэхэд амархан байлаа, зүүн хойд нутгийн хүн шиг хувцаслаагүй байсан. Түүн дээр хэн ч ирсэн татгалзахгүй, ирсэн бүгдийн өвчтэй шүдийг авч өгнө, авсан шүднүүдээ тэнд овоолсон байсан. Түүнд хүмүүсийн шүдийг авч өгөх нь гол зорилго байгаагүй харин эмийн уусмалаа зарах нь байсан. Уг эмийн уусмалаас их өтгөн шар уур гарч байсан. Шүдийг нь авахдаа тэр эмийн шилний тагийг онгойлгоод хүний өвчтэй шүд талын хацарт барина. Тэгээд шүдээ авахуулах хүнийг тэр шар уусмалын уурнаас

сор гэж хэлнэ. Тэгэхэд эм нь бараг хорогдохгүй, тэгээд таглаад цааш нь тавина. Тэр карманаасаа шүдэнзний мод гаргаж ирээд эмнийхээ талаар ярингаа шүдэнзний модоор муу шүдийг нь түлхээд л унагачихна. Тэгэхэд өвдөхгүй, шүдэнд жоохон цусны судалтай гэхдээ бараг цус гарахгүй. Та бүгд боддоо, хүчилбэл шүдэнзний мод дорхноо хугарчихна биз дээ, гэхдээ тэр үүгээр шүдийг жоохон хөшөөд л унагачихсан.

Хятадын эртний зарим зүйлүүд ард түмний дунд уламжлагдан үлдсэн байдаг, харин барууны эмчилгээний тоног төхөөрөмж яасан ч түүнийг гүйцэхгүй гэж би хэлсэн. Алиных нь үр дүн сайн болохыг хар даа. Тэр хүн шүдэнзний модоор шүдийг авч чадна. Барууны шүдний эмч бол эхлээд мэдээ алдуулах тариа хийнэ, энд тэнд нь хатгана. Тарианы зүүгээр хатгахад их өвдөнө, тэгээд мэдээ алдуулах эм үйлчилж эхэлтэл хүлээх хэрэгтэй. Дараа нь эмч бахиар шүдийг сугалж авна. Их цаг хүч зарцуулсны эцэст авна, хэрэв эмч болгоомжгүй бол шүдний ёзоор буйланд хугараад үлдэнэ. Тэгвэл алх цүүц бариад ёзоорыг ухааж эхэлнэ, ингэхэд магадгүй өвчтөн айснаас болоод бие нь салганан чичирнэ. Дараа нь нарийн төхөөрөмжөөр өрөмдөнө. Зарим хүн өрөмдөлтийн өвдөлтнөөс болоод бараг үсчих шахна. Их ч өвдөнө, их ч цус гарна. Чи аль эмчилгээг нь дээр гэж хэлэх вэ? Хэнийх нь илүү дэвшингүй вэ? Бид зөвхөн тоног төхөөрөмжийн талаас нь харж болохгүй харин бас үр дүнг нь харах хэрэгтэй. Хятадын эртний эмчилгээ их өндөр хөгжилтэй байсан, одоогийн Барууны анагаах ухаан хичнээн олон жилийн дараа ч тэр хэмжээнд хүрч чадахгүй.

Хятадын эртний шинжлэх ухаан нь бидний баруунаас сурсан одоогийн шинжлэх ухаантай адилгүй, тэр нь өөр замаар явсан өөр байдалд хүргэдэг. Тиймээс бид Хятадын эртний шинжлэх ухаан, технологийг өөрсдийн одоогийн ойлголтын хүрээнд төсөөлж болохгүй. Яагаад гэвэл

Хятадын эртний шинжлэх ухаан хүний бие, амь, орчлон ертөнц, эдгээр зүйлсийг шууд чиглэн судалдаг, иймээс өөр арга замаар явсан. Тэр үеийн сургуулийн сурагчид завилж суухыг, эгц зөв суухыг эрхэмлэдэг байсан. Тэд бийрээ бариад бичихдээ амьсгалаа зөв авах, чий-гээ гүйлгэхэд анхаардаг байсан. Бүх төрлийн ажил төрөл хийхдээ сэтгэлээ ариусгах, амьсгалаа зохицуулахыг эрхэмлэдэг байсан нь нийгэм даяар хэвшсэн зүйл байв.

Зарим хүн ингэж хэлдэг, бид Хятадын эртний шинжлэх ухааны дагуу явсан бол өнөөгийн машин, галт тэрэг байх байсан уу? Бид өнөөдрийн орчин үеийн хөгжилтэй байх байсан уу? Би хэлэхэд, чи энэ орчин хүрээн дотроос цаадах байдлыг танин мэдэж чадахгүй, чи үзэл бодолдоо хувьсал хийх хэрэгтэй. Телевиз байхгүй ч гэсэн хүний духанд тийм зүйл байдаг, тэгээд юу хүссэнээ харж чадна. Тэд бас ер бусын чадвартай байна. Галт тэрэг, онгоц байхгүй ч гэсэн хүмүүс сууж байсан газраасаа шууд хөөрч чадна, цахилгаан шат ч хэрэггүй. Энэ нь нийгэмд хөгжлийн өөр нэг байдлыг авчирна, зөвхөн энэ хүрээнд бас хязгаарлагдахгүй. Харь гаригийнхны нисдэг таваг нааш цааш санаанд багтамгүй хурдтайгаар ирж, явж чаддаг, мөн том жижиг болж өөрчлөгддөг. Тэд хөгжлийн огт өөр замыг баримталсан, энэ нь өөр шинжлэх ухааны хэлбэр юм.

Наймдугаар лекц

Бигү³⁷ мацаг

Зарим хүмүүс бигү мацагийн талаар ярьдаг. Бигү мацагийн энэ байдал үнэхээр оршдог, бясалгалын хүрээнд байдаг төдийгүй бидний бүхий л хүн төрөлхтний нийгмийн дунд цөөнгүй хүмүүст ийм байдал гарч байсан. Зарим хүн хэдэн жилээр эсвэл арав гаруй жилээр идэж уудаггүй, гэхдээ тэд дажгүй сайн амьдардаг. Зарим хүмүүс бигү мацагийг тодорхой нэг түвшний илрэл гэж ярьдаг, зарим нь үүнийг биеийн ариуслын илрэл гэж үздэг, бас зарим нь дээд түвшин дэх бясалгалын явц гэдэг.

Үнэн хэрэгтээ энэ нь тэдгээрийн аль нь ч биш. Тэгвэл тэр нь ямар учиртай юм бэ? Бигү мацаг бол үнэндээ тодорхой нэг орчинд бясалгах онцгой бясалгалын арга юм. Ямар онцгой байдалд үүнийг хэрэглэдэг вэ? Хятадад эрт дээр үед, ялангуяа шашин үүсэхээс өмнө олон бясалгагч нууцаар бясалгах, ганцаар бясалгах аргуудыг хэрэглэдэг байсан, алс бөглүү ууланд эсвэл агуйд хүмүүсээс зайдуу бясалгадаг байсан. Тэд энэ хэлбэрийг сонгоход хоол хүнсний асуудалтай тулгардаг. Хэрэв тэр бигү мацагийн аргыг хэрэглэхгүй бол бясалгаж огт чадахгүй, тэндээ өлсөж цангаад үхнэ. Би Ном заахаар Чончингоос Ухань руу усан онгоцонд сууж Хөх мөрнөөр зүүн зүгт явж байхдаа хоёр талаар өнгөрөх Саншиа уулсын дунд хэсэгт байдаг хадан агуйнуудыг харсан. Их олон алдартай ууланд бүгдэд нь ийм агуй байдаг. Урьд өмнө бясалгагч хүн олсоор агуй руу орсны дараа олсоо тасалж агуйд үлдэн бясалгадаг байсан.

³⁷ Бигү-хоол усгүйгээр байх гэсэн эртний үг

Тэр хүний бясалгал амжилтгүй болбол агуй дотор үхнэ. Ус хоолгүй ийм онцгой нөхцөлд тийм нэг өвөрмөц бясалгах аргыг хэрэглэдэг байсан.

Их олон бясалгал ингэж уламжлагдаж ирсэн учраас бигү мацаг байдаг. Мөн их олон бясалгалд бигү мацаг байдаггүй. Өнөөдөр нийтэд тархсан ихэнх бясалгалд бигү мацаг байдаггүй. Бид нэг бясалгалдаа тууштай байх хэрэгтэй гэж хэлсэн, тиймээс чи хүслээрээ юу ч хамаагүй хийж болохгүй. Чи бигү мацгийг сайн гэж бодно, мацаг барихыг хүсч байна, чи бигү мацаг хийж яах юм? Зарим хүн үүнийг сайн гэж сонирхдог, эсвэл өөрийгөө их чадвартай гэж гайхуулна, янз бүрийн бодол санаатай хүмүүс байдаг. Энэ аргыг хэрэглээд бясалгавал өөрийнхөө энэ махан бие бодийн энергийг зарцуулах шаардлагатай. Иймээс олз нь бага, гарз нь их. Та бүгд мэднэ, ялангуяа шашин үүссэнээс хойш бясалгаж суух явцад эсвэл сүм дуганаас гарахгүй бясалгахад цай хоолоор хангагдана, бигү мацагийн хэрэг байхгүй. Ялангуяа бид энгийн хүний нийгэмд бясалгаж байгаа, чамд энэ аргыг хэрэглэх ямар ч шаардлага байхгүй. Түүнчлэн, хэрэв чиний Номын үүдний бясалгалд байдаггүй бол чи дураараа хийж болохгүй. Гэхдээ чи үнэхээр бигү мацаг хийхийг хүсээд байвал дураараа л бол. Миний мэдэхээр, гол төлөв дээд түвшинд бясалгал заахад, жинхэнэ шавьд уламжлахад тэр Номын үүдний бясалгалд бигү мацаг байдаг бол ийм байдал гарч болно. Гэхдээ нийтэд дэлгэрүүлж болохгүй, дандаа шавийг нууцаар, тусад нь бясалгуулахаар авч явдаг, эсвэл ганцаараа бясалгадаг.

Одоо бас зарим чигон багш бигү мацаг заадаг. Үнэхээр бигү мацаг барьж чадсан уу? Эцэст нь үгүй, хэн үүнд хүрч чадсан бэ? Миний харснаар олон хүн эмнэлэгт хэвтсэн, мөн цөөнгүй хүмүүсийн амь нас нь дэнсэн дээр байгаа. Тэгвэл яагаад ийм байдал гарсан бэ? Бигү мацаг байдаггүй гэж үү? Байдаг. Гэхдээ нэг зүйл бий, энгийн хүний нийгмийн

байдлыг дураараа үймүүлэхийг хэнд ч зөвшөөрөхгүй, үүнийг эвдэхийг зөвшөөрөхгүй. Бясалгаад орон даяар хичнээн хүн юм идэж уухгүй болохыг ярихаа больё, зөвхөн Чанчунь хавийн хүмүүс идэж уухгүй болчихвол минийхээр энэ нь маш их зүйлийг хөнгөвчилнө! Бид хоол унд бэлдэх гэж санаа зовох хэрэггүй болно. Тариачид талбай дээр их зовж зүдэрч ажиллана, бүгд хоол идэхгүй бол энэ ёстой амар болно, зөвхөн ажил хийнэ, хоол идэхгүй. Ийм байж болох юм уу? Үүнийг хүн төрөлхтний нийгэм гэх юм уу? Ингэж болохгүй нь ойлгомжтой, ийм өргөн хэмжээгээр энгийн хүний нийгмийг үймүүлэхийг зөвшөөрөхгүй.

Зарим чигон багш бигү мацаг барихыг заахад аюултай байдал их олон удаа гарсан. Зарим хүн бигү мацаг барих аргыг сурах гэж зууралдан хөөцөлддөг, гэхдээ тэр зууралдсан сэтгэл болон энгийн хүний элдэв дур хүслээ орхиж чадаагүй байдаг. Ямар нэгэн амттай хоол харангуутаа хорхой нь хүрнэ, энэ сэтгэл нь гарангуут болохгүй болно. Тэр яарна, юм идэхийг хүснэ, түүний энэ хүсэл нэг гарахад юм иднэ, идэхгүй бол өлсөнө. Гэхдээ идвэл бөөлжинө, хоол орохгүй. Түүний сэтгэл нь бухимдана, их айна. Их олон хүн эмнэлэгт хэвтсэн, үнэндээ их олон хүний амь нас аюул учирсан. Хүмүүс намайг хайж ирээд эдгээр замбараагүй зүйлийг зохицуулж өгөхийг гуйдаг байсан, би үүнийг хийхийг хүсдэггүй. Зарим чигон багш юманд тун хариуцлагагүй ханддаг. Тэдний тарьсан энэ асуудалтай хэн ч зууралдахыг хүсдэггүй.

Түүнээс гадна, хэрэв чи бигү мацаг бариад асуудал гарвал энэ нь чиний өөрийн хүслээс болсон биш гэж үү? Бид ийм байдал байдаг гэж хэлсэн, гэхдээ энэ нь ямар ч дээд түвшинд гардаг байдал биш, бас ямар нэг онцгой үзэгдэл ч биш. Тэр бол зөвхөн онцгой нөхцөл байдалд хэрэглэдэг нэг төрлийн бясалгах арга юм, гэхдээ үүнийг өргөнөөр дэлгэрүүлж болохгүй. Цөөнгүй хүн бигү мацаг

сурахын хойноос хөөцөлддөг, тэд үүнийг бүтэн бигү, хагас бигү гэж ангилдаг. Зарим хүн зөвхөн ус уудаг гэж ярина, зарим нь зөвхөн жимс иддэг гэнэ. Тэд бүгд хуурамч бигү мацаг юм, яваандаа болохгүй болох нь лавтай. Жинхэнэ бясалгадаг хүн агуй дотор идэж уухгүйгээр бясалгавал тэр бол жинхэнэ бигү мацаг юм.

Чий хулгайлах

Чий хулгайлахыг ярихад зарим хүн балмагдан сандардаг, айгаад чигон бясалгал хийж зүрхлэхгүй болдог. Бясалгагчдын хүрээнд зарим хүн бясалгалын солиорол, чий хулгайлах гэх мэтийн талаар цуу ярьдагаас болж маш олон хүн ихэд айж чигон-оор хичээллэхээс татгалздаг болсон, харилцахаас ч зүрхшээдэг болсон. Хэрвээ эдгээр яриа байхгүй байсан бол чигон-оор бясалгадаг хүмүүс магадгүй бүр олон байхсан. Гэтэл зарим зан чанар муутай чигон багш зориуд эдгээр зүйлийг заадаг, ингэснээр бясалгагчдын хүрээнд маш замбараагүй байдлыг бий болгосон. Үнэндээ энэ бүгд нь тэдний ярьсан шиг тийм аймаар биш. Тэд бас анхдагч холимог чий, ийм ч чий тийм ч чий гэж нэрлэдэг ч бид чий л бол чий гэдэг. Хүний биед чий байхад л тэр хүн өвчин эдгээх бие сайжруулах түвшинд байгаа гэсэн үг, иймээс бясалгадаг хүний тоонд орохгүй. Хүнд чий байвал энэ хүний бие дээд хэмжээнд хүртэл цэвэршээгүй, мөн өвчний чий бас л байна гэсэн үг, энэ бол лавтай юм. Чий хулгайлдаг хүн бас чий-н түвшинд л байдаг. Манай бясалгагчдаас хэн тэр бохир чий-г хүсэх юм? Бясалгадаггүй хүний биеийн чий их бохир, чигон-оор хичээллэсний дараа энэ нь цэвэршиж болно. Өвчин байгаа газарт их том маш нягт бөөгнөрсөн хар бие бодь харагддаг. Үргэлжлүүлэн бясалгасаар жинхэнэ өвчин эдгэж бие нь сайжрах үед хүрвэл түүний чий аажмаар шардуу өнгөтэй болно. Цаашид

үргэлжлүүлэн бясалгасаар байвал өвчин жинхэнэ арилна, мөн чий ч байхгүй болно, сүүн цагаан биеийн байдалд орно.

Өөрөөр хэлбэл, чий л байвал өвчин байна гэсэн үг. Бид бясалгагчид, бясалгал хийдэг хүн чий авах юм уу? Өөрийнхөө биеийг цэвэршүүлэх хэрэгтэй, тэр бохир чий-г авах ямар хэрэгтэй юм? Мэдээж авахгүй. Чий-г хүсдэг хүн бас чий-н түвшинд байдаг. Чий-н түвшинд байгаа хүн сайн чий-г муу чий-гээс ялгаж чадахгүй, тийм чадвар байхгүй. Чиний биеийн даньтиан-д байгаа жинхэнэ амин чий-г тэр хөдөлгөж чадахгүй, тэр амин чий-г зөвхөн дээд түвшний чадвартай хүн л хөдөлгөж чадна. Чиний бие дэх бохир чий-г тэр хүсвэл хулгайлаг, үүнд санаа зовох юмгүй. Би дасгал хийхдээ хэрэв чий-г өөртөө оруулъя гэж хүсвэл, дөнгөж ингэж бодоход л миний гэдэс чий-гээр дүүрчихнэ.

Дао-гийн системд тианзи³⁸ багана зогсолт гэж ярьдаг, Буддын системд чий-г толгойн оройгоор оруулах тухай ярьдаг. Орчлон ертөнц чий-гээр арвин, чи өдөр болгон өөртөө дүүргэн авч болно. Лаогон³⁹ сүв болон Байхуй⁴⁰ сүвээ нээгээд чи даньтиан дээрээ анхаарлаа төвлөрүүлж байгаад гараараа чий-г хураан авч биендээ дүүргэж болно. Удалгүй чий-гээр дүүрчихнэ. Чий-гээр яаж ч биеэ дүүргэсэн ямар хэрэгтэй юм? Зарим хүн чий-гээр их хичээллэхэд хуруунууд нь болон бие нь хөөсөн мэт болдог. Бусад хүн түүнд ойртоход эргэн тойронд нь нэг хүрээ байгааг мэдэрдэг. Пөөх, чи үнэхээр сайн хичээллэсэн байна. Би үүнийг юу ч биш гэж хэлнэ. Гон хаана байна? Энэ бол ердөө л чий-н дасгал, хичнээн их чий байсан ч энэ нь гон-ыг орлож чадахгүй. Чий-гээр хичээллэх зорилго нь гадны сайн

³⁸ тианзи- Дао систем дэх зогсоо дасгал

³⁹ лаогон- гарын алганы голд байрлах биологийн идэвхтэй цэг

⁴⁰ байхуй- толгойн оройд байрлах биологийн идэвхтэй цэг

чий-гээр биен доторхи чий-г солих, биеэ цэвэршүүлэх явдал юм. Чий-г байлгаад яах юм? Энэ түвшинд байхад үндсэн өөрчлөлт гараагүй байхад энэ нь гон биш. Чи хэр ихээр чий хулгайлсан ч зөвхөн нэг том чий-н уут л болно. Тэгэх нь ямар хэрэгтэй юм? Энэ нь дээд энергийн бие бодиор хувираа ч үгүй. Тэгэхээр чамд айх хэрэг байна уу? Тэр үнэхээр чий хулгайлахыг хүсээд байвал хулгайлаг.

Та бүхэн бодоод үз, хэрэв чиний биед чий байвал өвчин байна гэсэн үг. Тэгвэл тэр хулгайлахдаа чиний өвчтэй чий-тэй хамт хулгайлсан биш гэж үү? Тэр үндсэндээ эдгээр зүйлийг ялгаж огт чадахгүй, яагаад гэвэл чий авдаг хүн бас чий-н түвшинд байдаг, түүнд ямар ч чадвар байхгүй. Гон энергитэй хүн чий-г авахгүй, энэ бол зайлшгүй. Үнэмшихгүй бол бид туршиж үзье. Хэн нэгэн чиний чий-г үнэхээр хулгайлахыг хүсвэл чи тэндээ зогсоод түүгээр хулгайлуул. Чи энд зогсоод бодлоороо ертөнцөөс чий-г бие рүүгээ оруул, тэр чиний ард чий-г чинь хулгайлна. Чи үүнийг ямар сайн юм болохыг хардаа, энэ нь чиний биений цэвэршилтийг хурдасгана, чамд чий-г оруулах, гаргах шаардлагагүй болно. Тэр гарсан сэтгэл нь муу, хүний юмыг хулгайлсан болохоор буянаа алдах үйл хийсэн, муу зүйл авсан ч тэр чамд буянаасаа өгнө. Энэ нь ийм нэгэн солилцоо үүсгэнэ, тэр энд чиний чий-г авахад нөгөө талд чамд буяанаасаа өгч байдаг. Чий хулгайлж байгаа хүн үүнийг мэддэггүй, тэр мэдвэл үүнийг хийж зүрхлэхгүй!

Аливаа чий хулгайлдаг хүний царай хөхөвтөр харагддаг, бүгд ийм байдаг. Паркад очиж чигон-оор хичээллэдэг хүмүүсийн ихэнх нь өвчнөө арилгах бодолтой байдаг, тэд янз бүрийн өвчин хуучтай. Хүн өвчнөө арилгахын тулд өвчний чий-г гадагшлуулах хэрэгтэй. Гэтэл чий-г хулгайлдаг хүн үүнийг гадагшлуулдаггүй харин төрөл бүрийн өвчний чий-г бүх биендээ хуримтлуулаад л байдаг. Түүний бие доторхи нь хүртэл хар болно. Тэр үргэлж

буянаа алдаж байдаг болохоор гаднах байдал нь бүхэлдээ бараан харагддаг, нүглийн хүрээ нь томорч бас буянаа ихээр алдсанаас гадна дотногүй харлана. Чий хулгайлдаг хүн өөртөө ийм өөрчлөлт гарсныг мэдвэл, хүнд буянаа өгч байгаа ийм тэнэг зүйл хийж байгаагаа мэдвэл тэр хэрхэвч ингэж хийхгүй.

Зарим хүн чий-г их нууцлаг зүйл гэж ярьдаг. Чи Америкт байхад миний энд гаргасан чий-г хүлээж авч чадна, чи хананы цаана байж бай, тэгээд миний дамжуулах чий-г хүлээж авна. Зарим хүн их мэдрэмтгий, чий гаргахад хүлээж авдаг. Гэхдээ энэ чий энэ орон зайд явдаггүй, өөр орон зайд явдаг. Өөр орон зайд энд хана байхгүй. Тэгвэл яагаад зарим чигон багш задгай газар чий-г дамжуулахад чамд юу ч мэдрэгддэггүй вэ? Өөр орон зайд тэнд хаалт байна. Иймээс чий нь хүмүүсийн ярьдаг шиг тийм их нэвтрэх хүчтэй биш.

Жинхэнэ нөлөө гаргадаг нь гон юм. Бясалгагч хүн гон гаргаж чаддаг бол түүнд аль хэдийн чий байхгүй болсон, тэр дээд энергийн бие бодийг гаргадаг, тэнгэрийн мэлмийгээр харахад энэ нь нэг янзын туяа юм. Хүний биед хүрэхэд дулаан мэдрэмж төрдөг, энгийн хүнд нөлөөлдөг. Гэхдээ энэ нь өвчнийг бүрмөсөн эдгээж чадахгүй, зөвхөн намжаах нөлөөтэй. Өвчнийг үндсээр нь арилгахын тулд ер бусын чадвар байх хэрэгтэй. Өвчин болгонд тохирсон өөр өөр ер бусын чадвар байдаг. Микро түвшинд гон-ы бичил ширхэг болгон чиний өөрийн дүр төрхийг агуулдаг. Тэр нь хүнийг таньдаг, бүгд оюун сэтгэхүйтэй дээд энергийн бие бодь юм. Өөр хүн хулгайлбал тэр тэнд байх юм уу? Тэнд үлдэхгүй, тэр хүний өөрийн зүйл биш учраас түүнийг тогтоон барьж чадахгүй. Аливаа жинхэнэ бясалгадаг хүнд гон гарсны дараа бүгд багшийнхаа хяналтан дор байдаг. Чиний юу хийж байгааг багш чинь харж байдаг, өөр хүний зүйлийг авах гэвэл багш ч зөвшөөрөхгүй.

Чий хураах

Бид дээд түвшинд бясалгал заахад чий хулгайлах ба чий хураах асуудлыг та бүгдэд шийдэж өгөх гэж байгаа юм биш. Яагаад гэвэл би бясалгалын нэрийг цэвэрлэх, мөн зарим тустай зүйл хийх зорилготой, би урьд өмнө хэн ч ярьж байгаагүй эдгээр муу үзэгдлийг илчлэн ярина. Та бүхэнд үүнийг ойлгуулна, тэгвэл зарим хүн үргэлж муу зүйл хийдгээ болино. Чигон-ы талаар жинхэнэ үнэнийг мэддэггүй хүмүүс энэ тухай ярихад үргэлж айж байдаг.

Энэ орчлон ертөнцөд хангалттай чий байгаа. Зарим хүн тэнгэрийн арга чий, газрын билиг чий гэж ярьдаг. Чи бас орчлон ертөнцийн нэгэн элемент, чи хүссэнээрээ хурааж авч болно. Гэхдээ зарим хүн ертөнцийн чий-г хурааж авдаггүй. Тэд хүмүүст ургамлын чий хурааж авахыг дагнан заадаг, бүр хуримтлуулсан туршлага байдаг: улиас модны чий цагаан, нарс модны чий шар, яаж хурааж авах, ямар үед хурааж авах гээд. Бас нэг хүн ингэж хэлсэн, манай гэрийн үүдэнд нэг мод байсан. Би энэ модны чий-г хурааж авснаас тэр мод үхсэн. Үүнийг ямар янзын чадвар гэх юм? Энэ нь муу зүйл хийж байгаа биш гэж үү? Та бүгд мэднэ, бид жинхэнэ бясалгаж байгаа, бид сайн мэдээлэл хүсдэг, орчлон ертөнцийн мөн чанарт уусахыг эрхэмлэдэг. Чи Нинжин (Шань) байх ёстой биш үү? Орчлон ертөнцийн мөн чанар болох Үнэн, Нинжин, Тэвчээр (Жэнь-Шань-Рэн)-д уусах, Нинжинг эрхэмлэх ёстой. Чи үргэлж муу зүйл хийгээд байвал гон өсөх юм уу? Өвчин эдгэрэх юм уу? Энэ нь манай бясалгагч хүнээс эсрэг болсон юм биш үү? Тэр нь бас амь хөнөөж муу зүйл хийсэнд тооцогдоно! Магадгүй зарим хүн ингэж хэлнэ, чи их ярих тусам санаанд улам багтамгүй болох юм, амьтныг албал амийг хөнөөсөн гэсэн үг, мөн ургамлыг үхүүлбэл бас амийг алсан болох юм уу. Үнэндээ бол тийм юм. Буддын шашинд зургаан замын тойргоор дахин төрөл олох гэж ярьдаг. Чи магадгүй зургаан замын

тойрогт ургамал болж төрж байсан, Буддын шашинд ингэж л ярьдаг. Энд бид ингэж ярихгүй, гэхдээ бид мод бас амьтай гэж та бүхэнд хэлнэ. Тэд зөвхөн амьтай байгаад зогсохгүй бас их дээд хэмжээний сэтгэхүйтэй.

Нэг жишээ хэлье, Америкт нэг хүн тусгай электроник судалдаг, тэр худал хэлэхийг шалгадаг төхөөрөмжийг яаж ашиглахыг заадаг. Нэг өдөр түүний бодолд гэнэт нэг санаа орж ирсэн. Тэр энэ төхөөрөмжний хоёр электрод залгуурыг цахирмаа цэцгэнд холбосны дараа үндэс рүү нь ус хийсэн. Тэгтэл уг төхөөрөмжний бичигч электрон бал хоромхон зуур нэг муруй зурахыг харсан. Энэ зурсан муруй зураас нь хүний баярлах үед тархинаас гардаг бичлэгтэй яг адилхан байсан. Энэ мөчид тэр маш цочирдсон. Ургамалд яагаад сэтгэл хөдлөл байдаг гэж? Түүнд гудамжинд гүйж гараад ургамалд сэтгэл хөдлөл байдаг юм байна! гэж хашгирмаар санагдсан. Энэ үед түүнд урам орж энэ чиглэлээр судалгаагаа үргэлжлүүлэн их олон туршилтуудыг хийсэн.

Тэр нэг удаа хоёр ургамлыг зэрэгцүүлж тавиад сурагчаараа нэгийг нь нөгөөгийх нь дэргэд дэвслүүлж үхүүлсэн. Дараа нь тэр нөгөө ургамлыг авч өөр өрөөнд оруулаад төхөөрөмжиндөө залгасан. Тэр өөрийн таван сурагчаа гаднаас өрөө лүү нэг нэгээр нь ээлжлэн оруулсан. Эхний дөрвөн сурагч өрөөнд орж ирэхэд ургамалд ямар ч өөрчлөлт гараагүй. Тав дахь сурагч, ургамлыг дэвсэлсэн сурагч өрөөнд орж ирэнгүүт түүнийг ургамлын дэргэд дөхөж ирээгүй байхад электрон бал маш хурдан нэг муруйг зурсан, энэ нь хүн айх үед бичигддэг зураас байсан. Тэр үнэхээр мэл гайхсан! Энэ байдал маш чухал асуудлыг тайлбарласан. Бид үргэлж хүн бол юмыг ялгаж таних мэдрэхүйн чадвартай бас тархиндаа юмыг дүгнэж цэгнэж чаддаг дээд зэргийн амь бодь гэж үзсээр ирсэн. Ургамал юмыг яаж ялгаж таньж чадаж байна вэ? Энэ нь ургамалд бас сэрлийн эрхтэн байдаг гэсэн үг биш үү? Хэрэв урьд өмнө

хэн нэгэн ургамал бол мэдрэх эрхтэнтэй, сэтгэн боддог, сэтгэлийн хөдөлгөөнтэй, бас хүнийг ялган таньж чаддаг гэж хэлбэл түүнийг мухар сүсэг гэхсэн. Түүнчлэн эдгээрээс гадна зарим талаараа манай өнөөдрийн хүмүүсээс давуу мэт байна.

Нэг өдөр тэр мэдрэгч төхөөрөмжийг нэг ургамалд залгаад бодсон, одоо ямар туршилт хийх вэ? Би энэ ургамлын навчийг нь шатааж ямар өөрчлөлт гарахыг нь харъя. Энэ бодол гарахад, навчийг нь шатаахаас өмнө бичигч электрон бал хурдхан нэг муруй шугам зурсан. Тэр нь хүн зөвхөн амь авраарай гэж орилоход гардаг бичлэгтэй адил байсан. Үүнийг урьдчилан мэдэх чадвар гэдэг, мөн урьд үүнийг хүний бодлыг унших чадвар гэдэг байсан, энэ бол хүний далд увидас, төрөлх чадвар юм. Гэхдээ өнөөдрийн хүн төрөлхтөн доройтож байна. Энэ чадварыг сэргээхийн тулд чи эхнээс нь бясалгаж эхлэх хэрэгтэй, тэгээд өөрийнхөө үүссэн эх үндсэндээ буцах, үнэнд хүрэх, жинхэнэ өөртөө буюу анхныхаа мөн чанарт буцаж орох ёстой. Харин энэ чадвар нь ургамалд байдаг, тэр чиний юу бодож байгааг мэддэг. Үүнийг сонсоход санаанд багтамгүй, гэхдээ энэ бол шинжлэх ухааны бодит туршилт байсан. Тэр холын зайнаас удирдах чадварыг турших гэх мэт янз бүрийн туршилтуудыг хийсэн. Түүний судалгааны талаархи мэдээлэл хэвлэгдэн гарахад дэлхий даяар шуугиан тарьсан.

Олон орны ургамал судлаачид болон манай орны ургамал судлаачид энэ талаар судалгаа шинжилгээ хийж эхэлсэн, энэ нь одоо мухар сүсэг гэж тооцогдохоо аль хэдийн больсон. Би дээр хэлэхдээ, өнөөдөр манай хүн төрөлхтөнд гарсан зүйл, зохион бүтээсэн, нээн илрүүлсэн зүйлүүд нь манай өнөөгийн сурах бичгийг өөрчлөхөд хангалттай гэсэн. Гэхдээ хүмүүс хуучинсаг төсөөллийн нөлөөллөөр үүнийг хүлээн зөвшөөрөхийг хүсдэггүй, мөн

эдгээр зүйлсийг системтэй цэгцэлж янзлах хүн байхгүй байна.

Би зүүн хойд нутгийн нэг паркт байдаг хэсэг нарс моднууд үхсэнийг харсан. Тэнд байсан хэсэг хүмүүс юугаар хичээллэж байгаа нь мэдэгдэхгүй, газраар өнхөрнө, дараа нь хөлөөрөө болон гараараа модноос чий хураана. Удалгүй тэр хэсгийн бүх нарс моднууд шарлаж үхсэн. Тэдний хийсэн нь сайн үйл үү эсвэл муу үйл үү? Манай бясалгадаг хүний өнцгөөс харахад энэ бол амь алж байгаа хэрэг. Чи бясалгаж байгаа хүний хувьд сайн хүн байх ёстой, тэгэхээр орчлон ертөнцийн мөн чанарт аажмаар уусах, өөрийнхөө муу зүйлүүдээс салах ёстой. Энгийн хүний өнцгөөс харсан ч энэ нь сайн үйлдэл биш юм. Энэ бол нийтийн өмч хөрөнгийг сүйтгэсэн, цэцэрлэгжүүлэлт болон экологийн тэнцвэрт хор учруулсан хэрэг. Аль ч талаас нь харсан энэ бол сайн хэрэг биш. Орчлон ертөнцөд хангалттай их чий байгаа, чи хүссэн хэмжээгээрээ хураан авч болно. Зарим хүн маш их энергитэй. Тэд дасгал сургууль хийсээр нэг тодорхой түвшинд хүрэхэд, үнэхээр гараараа нэг даллаад л том хэмжээний газрын ургамлын чий-г нэг дор хураан авч чадна. Гэсэн ч тэр бол зөвхөн л чий. Хэр ихээр хураасан ч тэр ямар хэрэгтэй юм? Зарим хүн паркт очоод үүнээс өөр зүйл хийдэггүй. Нэг хүн ингэж хэлсэн, надад чигон-оор хичээллэх хэрэг байхгүй. Би тэрүүгээр алхаж байхдаа л чий хураагаад авчихна, тэгээд л дасгал хийсэн гэсэн үг. Чий-г хурааж аваад л болоо гэж үү. Тэд чий-г гон гэж ойлгодог. Хүмүүс тэр хүнд ойртоход түүний биенээс сэрүү татахыг мэдэрдэг. Ургамлын чий билгийн шинж чанартай биш гэж үү? Бясалгаж байгаа хүн арга билгийн тэнцвэрийг барьж байх ёстой. Түүний биенээс нарс модны тосны үнэр ханхалж байхад харин тэр өөрийгөө сайн хичээллэсэн гэж боддог.

Хэн бясалгана тэр гон олж авна

Хэн бясалгана тэр гон олж авна. Энэ бол маш чухал асуудал юм. Хүмүүс надаас Фалунь Дафа-д ямар давуу тал байдаг вэ гэж асуухад Фалунь Дафа-д гон хүнийг бясалгадаг, бясалгах хугацааг богиносгодог гэж би хариулдаг. Энэ нь дасгал хийх завгүй байсан ч гон үргэлж хүнийг бясалгуулдаг, ийм асуудлыг шийдэж өгсөн. Мөн түүнчлэн манай энэ бясалгал бол жинхэнэ амь бие, сэтгэлийн хос бясалгал юм. Бидний энэ бодит биед маш том өөрчлөлт гарч байдаг. Фалунь Дафа-д бас нэг маш том давуу тал бий, урьд нь би хэлж байгаагүй. Зөвхөн өнөөдөр л бид үүнийг ил гаргаж байна. Яагаад гэвэл энэ нь түүхийн эх сурвалж бүхий том асуудлуудтай холбоотой, мөн бясаллагчдын хүрээнд бас их хүчтэй нөлөөлнө. Түүхэнд хэн ч үүнийг задлахыг зүрхлээгүй, хэнд ч үүнийг илчлэхийг бас зөвшөөрөөгүй, гэхдээ би үүнийг хэлэхгүй бол бас болохгүй.

Зарим шавь нар ингэж хэлдэг, Ли Хонжи багшийн хэлсэн үг болгон тэнгэрийн нууц, бас тэнгэрийн нууцыг задалж байна. Гэхдээ бид хүмүүсийг жинхэнэ дээд түвшин лүү дагуулж байгаа, өөрөөр хэлбэл хүн аварч байгаа. Та бүгдэд хариуцлагатай хандах ёстой, ийм хариуцлагыг дааж чадна. Тиймээс энэ нь тэнгэрийн нууцыг задалсан хэрэг биш. Харин энэ талаар дураараа хариуцлагагүй ярих юм бол тэнгэрийн нууцыг задалсан болно. Өнөөдөр бид энэ асуудлыг авч ярьж, хэн бясалгана тэр гон олж авна. Миний үзэж байгаагаар одоогийн бүх бясалгалын аргууд, үе үеийн Буддын, Дао-гийн энэ хоёр системд болон Чимэнь бясалгалуудад бүгд хүний Дэд сүнс (Дэд бодол) бясалгаж ирсэн, бүгдэнд Дэд сүнс гон олж авдаг. Бидний энд ярьж байгаа Эзэн сүнс гэдэг нь бидний өөрийн оюун ухааныг хэлж байгаа юм. Хүн өөрийнхөө юу бодож байгааг болон юу хийж байгаагаа мэдэж байх ёстой, тэгвэл энэ бол жинхэнэ чи өөрөө юм. Харин Дэд сүнсний юу хийж байгааг

чи огт мэдэхгүй. Хэдийгээр тэр нь чамтай хамт нэгэн зэрэг төрсөн нэг нэртэй бас гадаад төрхөөрөө ижил, нэг биеийг эзэмшдэг ч гэсэн нарийн яривал энэ нь чи биш.

Энэ орчлон ертөнцөд нэг зарчим байдаг: Хэн алдана тэр олно. Хэн бясалгана тэр гон олно. Үе үеийн бүх бясалгалуудад хүн бясалгал хийж байхдаа ховсдолтын байдалд орж юу ч бодохгүй байхыг заадаг. Тэгээд эцэст нь гүн самадид орж юу ч мэдэхгүй болтол суудаг. Зарим хүнд магадгүй гурван цаг бясалгаж суусан ч түүнд зөвхөн хоромхон хугацаа өнгөрсөн мэт санагдана. Бусад хүмүүс түүний самуди хүчинд биширнэ. Үнэндээ тэр бясалгасан юм уу? Тэр өөрөө юу ч мэдэхгүй. Ялангуяа Дао-гийн системийн бясалгалд Шишэнь (Эзэн сүнс) үхэж Анхдагч сүнс төрдөг гэж заадаг. Шишэнь гэж хэлж байгаа нь биднийхээр бол Эзэн сүнс, Анхдагч сүнс гэдэг нь бидний хэлдэгээр Дэд сүнс юм. Хэрэв чиний Шишэнь үнэхээр үхвэл чи үнэн хэрэгтээ үхнэ, чамд Эзэн сүнс гэж үнэхээр байхгүй болно. Өөр бясалгалаар хичээллэдэг хүн надад ингэж хэлсэн: Багшаа, би хичээллэх үедээ гэрийнхээ хэнийг ч танихгүй болдог. Бас өөр нэг хүн хэлэхдээ, би бусад хүмүүсийн адил өглөө эрт юмуу эсвэл шөнө дөлөөр хичээллэдэггүй. Би гэртээ хариад буйдан дээр хэвтээд өөрөөсөө гараад бясалгадаг. Хэвтэж байхдаа өөрийгөө хичээллэж байгааг хардаг гэсэн. Би үүнийг харамсалтай гэнэ, гэхдээ тийм ч харамсалтай бас биш.

Тэд яагаад Дэд сүнсийг авардаг вэ? Люй Донбин⁴¹ хүн аврахаас амьтан аварсан нь дээр гэж хэлдэг байсан. Жирийн хүмүүс энгийн хүний нийгэмд төөрөлдсөн учраас ухамсарлахад үнэхээр хэцүү. Бодит ашигийн дэргэд энэ сэтгэлээсээ салж чаддаггүй. Чи үүнд итгэхгүй бол хардаа, зарим хүн энэ лекцэнд суугаад гарахдаа эргээд энгийн хүн

⁴¹ Люй Донбин- Даогийн найман гэгээрэгчийн нэг

болчихдог, хэн нэгэн түүнийг өдөх юмуу түүнд халдвал тэр тэвчин өнгөрөөж чаддаггүй. Хэсэг хугацаа өнгөрсний дараа тэр өөрийгөө бясалгаж байгаа хүн гэж үзэхээ бүүр болино. Түүхэнд Дао-д бясалгасан олон хүн бүгд энэ байдлыг олж мэдсэн, хүнийг аврахад тун хэцүү, хүний Эзэн сүнс нь хэт их төөрсөн. Зарим хүний ухамсарлах чадвар нь сайн, жоохон санаа өгөхөд дор нь ойлгодог. Зарим хүмүүст яаж ч ярьсан тэд үнэмшихгүй. Тэд чамайг хэтрүүлж байна гэж боддог. Бид өөрийн зан чанарыг бясалгах талаар маш их ярьдаг боловч тэр энгийн хүмүүсийн дунд орохоороо бас л юу хүссэнээ хийдэг. Тэр хүрч барьж болох энгийн хүний материаллаг ашиг сонирхлыг жинхэнэ бодит гэж үздэг учраас тэдгээрийг л хүсдэг, түүнд Багшийн заасан Ном бас ёс зүйтэй сонсогдсон ч үүний дагуу хийж чадахгүй. Хүний Эзэн сүнсийг аврахад хамгийн их хэцүү, харин Дэд сүнс бол өөр орон зайн байдлыг харж чаддаг. Иймээс тэд ингэж боддог, би чиний Эзэн сүнсийг аварч яах юм? Дэд сүнс чинь бас чи. Би түүнийг аварвал адилхан биш гэж үү? Хоёулаа л чи юм чинь, хэн нь ч олж авсан ялгаагүй чи олж авсантай адил.

Би тэдний бясалгах аргыг тодорхой тайлбарлан хэлье. Хэрэв хүнд далдыг харах чадвар байвал ийм нэг байдлыг магадгүй харна: Чи завилан суун бясалгахад гэнэт чамтай адил төрхтэй хүн чиний биеэс гараад явна. Гэхдээ чи ялгах гээд үз, чи өөрөө хаана байгаа юм? Энд сууж байна. Тэр чиний биенээс гарч явсны дараа багш нь түүнийг дагуулж хувирган гаргасан орон зайд бясалгуулж байгаа нь харагдана. Магадгүй өмнөх үеийн нийгмийн байдалтай, одоогийн нийгмийн байдалтай эсвэл өөр орон зайн нийгмийн байдалтай газарт түүнд бясалгал заана, тэр их зовлон амсч байж өдөр бүр нэгээс хоёр цагийн турш бясалгана. Тэр хичээллээд буцаж ирэхэд чи бас самади-гаас гарна. Энэ нь харж чаддаг хүмүүсийн байдал юм.

Хэрвээ хүн харж чадахгүй бол бүр харамсалтай, юуг ч мэдэхгүй хоёр цаг сууж байгаад самади-гаас гарна. Зарим хүн унтдаг, нэг унтахдаа хоёр гурван цагаар унтдаг, тэр үүнийг бясалгал хийсэнд тооцдог, өөрийгөө хүнд бүрэн өгдөг. Энэ бол завсарлагатайгаар бясалгасан, өдөр болгон ийм хугацаагаар гүн ховсдлын байдалд бясалгаж суудаг. Бас зарим нь нэг мөсөн дуусгадаг, та бүгд магадгүй Бодьдарма есөн жил хана руу харж суусныг сонссон байх. Урьд өмнө хэдэн арван жилээр суудаг олон лам хувраг байсан. Түүхэнд тэмдэглэгдсэн хамгийн удаан суусан хугацаа нь ер гаруй жил байдаг, бас үүнээс ч удаан суусан байдаг, тэдний зовхи нь зузаан тоосонд дарагдчихсан, биен дээр нь өвс ургачихсан тэндээ суусан хэвээр л байдаг. Дао-гийн системд үүнийг бас ярьдаг, ялангуяа зарим Чимэнь бясалгалд унтаж бясалгахыг ярьдаг, нэг унтахдаа хэдэн арван жилээр гүн ховсдолтоос гарахгүй, унтаад сэрдэггүй. Гэхдээ хэн бясалгасан бэ? Түүний Дэд сүнс гарч яваад бясалгасан. Хэрвээ тэр үүнийг харж чадвал, багш нь Дэд сүнсийг дагуулж бясалгуулж байгааг харна. Дэд сүнс бас маш том нүглийн өртэй, багш нь энэ бүх нүглийг нь арилгаж өгөх чадваргүй. Гиймээс багш нь түүнд хэлнэ: Чи энд сайн бясалгах хэрэгтэй. Би явчихаад удахгүй буцаад ирнэ. Чи намайг эндээ хүлээж бай.

Багш нь ямар зүйл тохиолдохыг мэднэ, гэхдээ ингэж хийхээс өөр аргагүй. Удалгүй чөтгөр шулам ирж түүнийг айлгана эсвэл хөөрхөн бүсгүйн дүрд хувираад түүний толгойг эргүүлнэ, янз бүрийн байдал гарна. Түүний сэтгэл үнэхээр хөдлөхгүй, яагаад гэвэл Дэд сүнсэнд бясалгахад харьцангуй амар, тэр үнэн байдлыг мэддэг. Буг чөтгөр аргаа бараад занал хорслоо тайлахын тулд түүнийг алахыг оролдоно, тэгээд үнэхээр ална, түүний бүх өр нэг мөсөн төлөгдөнө. Үхсэний дараа Дэд сүнс утаа шиг суунаглан гарна тэгээд нэг ядуу гэр бүлд дахин төрнө. Тэр хар багаасаа гашуун зовлон амсана, учраа мэддэг болоход багш

нь ирнэ. Мэдээж тэр танихгүй. Багш нь ер бусын чадвараараа түүний хадгалагдсан санамжийг сэргээнэ, тэгээд гэнэт санасан, миний багш уу даа? Багш нь түүнд одоо бясалгаж болно гэж хэлнэ, тэгээд олон жил өнгөрсний дараа номоо уламжилна.

Номоо зааж дууссаны дараа багш нь түүнд хэлсэн: “Чамд орхих ёстой олон зууралдсан сэтгэл байна. Чи явж бадарчлах хэрэгтэй.” Нийгмийн дунд орж бадарчлан явахад их зовно, хоол гуйна, янз бүрийн хүмүүстэй тааралдана, түүнийг шоолно, загнана зандрана, доромжлоно бас дээрэлхэнэ, янз бүрийн зүйл тохиолдоно. Тэр өөрийгөө бясалгагч хүн гэж үзэн бусадтай эв зүйтэй харьцана, зан чанараа барьж тасралтгүй дээшилнэ. Тэр энгийн хүний янз бүрийн ашиг сонирхолд сэтгэл нь хөдлөхгүй. Олон жил бадарчилж явсны дараа тэр буцаж ирнэ. Багш ингэж хэлнэ: Чи Дао-д хүрсэн, төгс гэгээрлээ. Өөр зүйлгүй бол юмаа янзлаад явахдаа бэлд. Чамд өөр хийх зүйл үлдсэн бол тэр энгийн хүний асуудлаа дуусгачих. Ингээд олон жил өнгөрсний дараа Дэд сүнс буцаж ирнэ. Дэд сүнс буцаж ирэхэд Эзэн сүнс бас гүн ховсдолын байдлаас гарч Эзэн бодол нь сэрднэ.

Гэхдээ тэр үнэндээ бясалгаагүй, Дэд сүнс нь бясалгасан иймээс Дэд сүнс гон олно. Гэхдээ Эзэн сүнс бас зовлон амссан, тэр бүхэл залуу насаараа энд суусан, энгийн хүний амьдралын он жилүүд нь ингээд өнгөрсөн. Тэгвэл яах вэ? Тэр хүн самади-гаас гарахдаа өөрөө бясалгаад гон-той болсон бас ер бусын чадвартай болсон гэж мэдэрнэ. Хэрэв тэр өвчтөнг эдгээх, эсвэл ямар нэгэн зүйл хийхийг хүсвэл хийж чадна, Дэд сүнс түүний хүслийг хангана. Яагаад гэвэл тэр ямар боловч Эзэн сүнс, Эзэн сүнс нь биеэ эзэмшдэг, мөн шийдвэр гаргадаг. Тэгээд ч ийм олон жил тэр энд сууж хамаг амьдралаа зориулсан. Энэ хүн нас барахад Дэд сүнс гараад явна, өөр өөрийнхээ замаар явна. Буддын шашинаар

бол тэр хүн бас л зургаан замын тойрогт орно. Түүний биенээс нэг аугаа гэгээрэгч бясалгаж гарсан учраас энэ хүн их хэмжээний буян хураасан. Тэгвэл яах вэ? Тэр дараачийн амьдралдаа магадгүй өндөр албан тушаалын дарга болно, эсвэл их баян хүн болно. Зөвхөн ийм л болж чадна. Түүний бясалгал үр дүнгүй өнгөрсөн биш гэж үү?

Энэ асуудлыг ярих зөвшөөрөл авахын тулд бид маш их чармайлт гаргасан. Би мөнхийн нууцыг задаллаа, энэ бол хэрхэвч задалж болохгүй нууцын нууц байсан юм. Би бүх түүхийн турш дахь янз бүрийн бясалгалуудын үндсийг илчиллээ. Би үүнийг түүхийн гүн эх сурвалжтай холбоотой гэж хэлсэн биз дээ? Ийм л учиртай юм. Үүнийг бодоод үз, аль ч системд, аль ч номын үүдэнд бүгд ингэж бясалгасан биш гэж үү? Чи бясалгаад л байна гэхдээ гон олж авахгүй, чамд энэ нь харамсалтай биш үү! Тэгээд хэнийг буруутгах юм? Хүн ийм л төөрөлтөнд байдаг, яасан ч ухамсарлахгүй, яаж сануулсан ч ойлгохгүй. Дээд хэмжээнд ярихад тэдний санаанд багтахгүй, доод хэмжээнд ярихад дээшээ ухамсарлаж чадахгүй. Би ингэж ярьж байхад зарим хүн надаар бас л өвчнөө эдгээхийг хүссэн хэвээр. Би үнэхээр түүнд юу хэлэх вэ дээ. Бид бясалгал зааж байгаа, бид дээд түвшин лүү бясалгадаг хүмүүсийг л хариуцна.

Манай номын бясалгалд Эзэн сүнс гон олж авна. Тэгвэл Эзэн сүнс гон олно гэвэл чиний хэлснээр болчих юм уу? Хэн зөвшөөрөл өгөх юм? Ийм биш юм, үүнд заавал урьдчилсан нөхцөл байх ёстой. Та бүгд манай номын бясалгалд энгийн хүний нийгмээс холдолгүй бясалгадаг гэдгийг мэднэ, мөн зөрчилдөөнөөс зайлсхийдэггүй, зугтдаггүй. Энгийн хүний энэ төвөгтэй орчинд чи саруул ухаантайгаар, ухамсартайгаар бодит ашиг сонирхол дээр хохирол амсдаг, бусдад эрх ашгаа алдахад энгийн хүнтэй адил тэмцэлдэн булаацалдахгүй. Янз бүрийн зан чанарын үймүүлэлд чи хохирол амсана. Чи ийм хэцүү зовлонтой

орчинд сэтгэл санаагаа хатуужуулна, зан чанараа дээшлүүлнэ. Чи энгийн хүний янз бүрийн муу санаа бодлын нөлөөнөөс гарч ангижирна.

Та бүгд боддоо, ухамсартайгаар зовлон эдэлж байгаа нь чи биш гэж үү? Өөрийгөө зориулсан нь чиний Эзэн сүнс биш гэж үү? Энгийн хүмүүсийн дунд алдсан зүйл нь чиний санаатай хүлээсэн хохирол биш гэж үү? Тэгвэл энэ гон чамд очих ёстой, хэн алдана, тэр олно. Тиймээс энэ нь яагаад манай Номонд энгийн хүний төвөгтэй орчноос зайлсхийхгүй бясалгадгийн учир нь юм. Бид яагаад энгийн хүний зөрчил дунд бясалгадаг вэ? Учир нь бид өөрсдөө гон олж авна. Ирээдүйд сүм хийдэд шавилан сууж бясалгагчид энгийн хүмүүсийн дунд орж бадарчлан бясалгах хэрэгтэй болно.

Зарим хүн ингэж асуудаг, одоо энгийн хүмүүсийн дунд хичээллэдэг өөр бясалгалууд байдаг биз дээ? Гэхдээ тэдгээр нь бүгд өвчин эдгээх, бие сайжруулах аргыг л дэлгэрүүлж байгаа, жинхэнэ дээд түвшинд бясалгал заахад зөвхөн ганц шавьдаа уламжилж байснаас биш нийтэд хэн ч зааж байгаагүй. Жинхэнэ уламжлан зааж байгаа нь шавь нараа аль хэдийн авч явсан, нууцаар заадаг. Энэ олон жил өнгөрөхөд хэн ийм зүйлийг нийтэд зааж байсан юм? Хэн ч үүнийг хийгээгүй. Манай бясалгалд үүнийг заадаг, яагаад гэвэл бид энэ замаар л бясалгана мөн ингэж л гон олж авна. Мөн түүнчлэн манай бясалгалаар чамд мянга мянган, түүнээс ч олон зүйлийг чиний Эзэн сүнсэнд суулгаж өгнө, чамайг өөрөөр чинь гон олуулна. Би урьд өмнө хэн ч, хэзээ ч хийж байгаагүй зүйлийг хийж байгаа гэж хэлсэн, мөн хамгийн том үүдийг нээсэн. Зарим хүн миний хэлснийг ойлгосон, би үнэхээр тийм санаанд багтамгүй зүйл яриагүй. Би ийм нэг зантай хүн, хэрэв надад нэг алд байвал би зөвхөн нэг ямх дайны зүйлийг л ярьдаг, чи намайг онгирч байна гэж хэлсэн ч болно. Би үнэндээ өчүүхэн зүйл ярьсан, асар

их түвшний ялгаа байгаа учраас бүр дээд Номыг чамд ярьж болохгүй.

Манай номонд ингэж л бясалгана, жинхэнэ чамаар өөрөөр чинь гон олуулна, энэ нь тэнгэр газар үүссэнээс хойш анхны удаа юм, чи түүхээс хайж үзэж болно. Чи өөрөө гон олж авч байгаа болохоор энэ нь манай бясалгалын сайн тал, гэхдээ бас их хэцүү. Энгийн хүний төвөгтэй орчинд, хүн хүний хоорондын зан чанарын зөрчилдөөн дунд чи дээш сугаран гарна гэвэл хамгийн хэцүү. Үүний хэцүү нь гэвэл чи энгийн хүмүүсийн дунд ашиг сонирхол дээр бодитоор хохирол амсаж байгаа юм. Бодит ашгин дээр сэтгэл чинь хөдлөхгүй байж чадах уу, үгүй юу? Хүн хүний хооронд бие биенээ чадахад чиний сэтгэл хөдлөх үү, үгүй юу? Чиний гэр бүл, ойр дотны хүмүүст гай зовлон учрахад чиний сэтгэл хөдлөх үү, үгүй юу? Чи эдгээрийг яаж цэгнэх вэ? Бясалгагч хүн байх ийм л хэцүү! Нэг хүн надад ингэж хэлсэн: Багшаа, энгийн хүний дунд сайн хүн байхад л болоо. Хэн дээшээ бясалгаж чадах юм? Ингэж хэлэхийг сонсоод миний сэтгэл үнэхээр гонсойсон! Би түүнд нэг ч үг дугараагүй. Янз бүрийн зан чанартай хүмүүс байдаг, тэр хэр өндөр ухамсарлаж чадна тэр хэмжээнд олно. Хэн ухамсарлана тэр олно.

Лаози ингэж хэлсэн: “Дао бол ярьж болох ном, гэхдээ энгийн ном биш.” Хэрэв үүнийг хаа сайгүй олж болдог, бясалгаад дороо үр дүнд хүрчихдэг бол энэ нь нандин биш болно. Бидний энэ номын үүд бол чамайг зөрчлийн дунд гон олуулна, иймээс бид энгийн хүмүүсийн нөхцөл байдалд боломжийн хэрээр зохицож байх хэрэгтэй, эд материалын хувьд чамайг үнэндээ алдуулах гэж байгаа юм биш. Гэхдээ энэ материаллаг орчинд чи зан чанараа дээшлүүлэх хэрэгтэй. Хамгийн тохиромжтой нь гэвэл манай номын үүдэнд энгийн хүмүүсийн дунд бясалгаж болно, лам эсвэл хандмаа болох шаардлагагүй. Хэцүү нь гэвэл энгийн хүний

хамгийн ээдрээтэй орчинд бясалгах болохоор маш хэцүү. Гэхдээ хамгийн сайн давуу тал нь гэвэл чи өөрөө гон олж авна, энэ бол манай бясалгалын хамгийн чухал нь юм, өнөөдөр би энэ нууцыг та бүгдэд задаллаа. Мэдээж, Эзэн сүнс гон олоход Дэд сүнс бас гон олно. Яагаад вэ? Чиний биеийн бүх мэдээллүүд, амь бодиуд мөн чиний эсүүд бүгдэд нь гон өснө, мэдээж Дэд сүнсэнд ч гон өснө. Гэхдээ түүний гон хэзээ ч чинийхээс өндөр биш, чи бол Эзэн, тэр бол Ном сахиулагч.

Энэ талаар ярингаа нэмж хэлэхэд бясалгагчдын хүрээнд олон хүн үргэлж дээд түвшин лүү бясалгахыг хүсдэг. Тэд хаа сайгүй явж ном хайна, их мөнгөө үрнэ, уулсыг даван усыг гатлан явж хайгаад ч нэртэй багшийг олоогүй. Нэртэй байсан ч магадгүй жинхэнэ мэдлэгтэй биш. Нааш цааш явж их мөнгө хүчээ зарцуулаад эцэст нь юу ч олоогүй. Өнөөдөр бид энэ сайн бясалгалыг та нарт гардууллаа, би үүнийг чиний гэрийн үүдэнд хүргэж өглөө. Чиний бясалгах эсэх нь, чадах чадахгүй нь чамаас өөрөөс чинь шалтгаална. Чи чадвал бясалгалаа цааш үргэлжлүүлнэ, чадахгүй бол, бясалгаж чадахгүй бол, үүнээс хойш бясалгах талаар бодсоны ч хэрэггүй. Буг чөтгөр чамайг залилахаас өөр хэн ч чамд багшлахгүй, тэгээд ирээдүйд чи бясалгаж чадахгүй болно. Би чамайг аварч чадахгүй бол, хэн ч чамайг аварч чадахгүй. Үнэндээ одоо жинхэнэ ариун номын багш олж заалгах нь тэнгэрт авирахаас хэцүү. Үндсэндээ хариуцах хүн байхгүй. Номын төгсгөлийн үед, маш өндөр түвшнүүд ч бүгд төгсгөлийн сүйрэлд байгаа. Энгийн хүмүүсийг хариуцах хэн ч байхгүй болсон. Энэ бол хамгийн хялбар номын үүд. Мөн энэ бол шууд орчлон ертөнцийн мөн чанарын дагуу бясалгадаг. Энэ бол хамгийн хурдан, шулуун зам бөгөөд шууд хүний сэтгэл рүү чиглэдэг.

Тэнгэрийн эргүүлэг

Дао-гийн системд их, бага тэнгэрийн эргүүлгийн талаар ярьдаг. Бид тэнгэрийн эргүүлэг гэж юуг хэлдгийг тайлбарлая. Ер нь бидний ярьдаг тэнгэрийн эргүүлэг гэдэг нь “Рэнь, Дү” гэсэн хоёр энергийн судал⁴² холбогдохыг хэлдэг. Энэ тэнгэрийн эргүүлэг бол арьс шиг өнгөцхөн зүйл, зөвхөн өвчнийг арилгах бие сайжруулахаас өөр ач холбогдолгүй. Үүнийг бага тэнгэрийн эргүүлэг гэдэг. Бас өөр нэг тэнгэрийн эргүүлэг байдаг, түүнийг бага тэнгэрийн эргүүлэг ч гэдэггүй, мөн их тэнгэрийн эргүүлэг ч гэдэггүй, энэ бол гүн амгаланд орж суун бясалгадаг тэнгэрийн эргүүлгийн нэг хэлбэр юм. Энэ нь эхлээд ниванийг тойрч биеийн дотуур бууж ирээд даньтиан-ыг нэг тойроод буцаад дээшээ явна, энэ дотуур эргэлт бол жинхэнэ гүн амгаланд орж суун бясалгах тэнгэрийн эргүүлэг юм. Тэнгэрийн эргүүлэг үүссэний дараа энэ нь их хүчтэй энергийн урсгал болж улмаар нэг энергийн судлаар дамжуулж зуу зуун энергийн судлыг, бусад бүх энергийн судлыг дагуулж нээнэ. Дао-гийн системд тэнгэрийн эргүүлэг гэж заадаг, харин Буддын шашинд тэнгэрийн эргүүлэг гэж ярьдаггүй. Буддын шашинд үүнийг юу гэж заадаг вэ? Шагжамүни өөрийнхөө тэр цогц Номыг заахдаа дасгалаар хичээллэхийг онцолж яриагүй төдийгүй бас тэдгээрийг заагаагүй. Гэхдээ түүний ном нь бас бясалгалаар хувирах өөрийн гэсэн хэлбэртэй. Буддын шашинд энерги судлаар яаж гүйдэг вэ? Байхуй цэгийг нээгээд эндээс эхлээд мушгирсан хэлбэрээр толгойн оройгоос биений доош бууна. Эцэст нь энэ хэлбэрээр зуу зуун энергийн судлуудыг дагуулж нээдэг.

Тантрын шашинд ярьдаг гол судал бас ийм зорилготой. Зарим хүн энергийн гол судал байдаггүй гэж ярьдаг. Тэгвэл

⁴² Энергийн судал- Хядад эмчилгээнд үүнийг энергийн сүлжээг бүрдүүлдэг чий дамжуулах судал гэдэг

яагаад Тантрын шашинд энэ энергийн гол судлыг үүсгэж чаддаг вэ? Үндсэндээ хэрэв хүний биен дэх бүх энергийн судлуудыг нэгтгэвэл тэдгээр нь хэдэн арван мянгаас ч илүү, эдгээр нь судастай адил хөндлөн гулд сүлжилдсэн байдаг ба судасны тооноос ч олон. Дотор эрхтнүүдийн хооронд судас байдаггүй, гэхдээ энергийн судлууд байдаг. Тэдгээр нь толгойн оройноос биеийн бусад бүх хэсгүүд рүү хөндлөн гулд мөн дагуу холбогдсон байдаг. Тэдгээр нь холбогдоогүй байхдаа анхандаа шулуун биш байдаг, тэгээд аажимдаа нээгдэж өргөссөөр шулуун энергийн судал үүсгэнэ. Энэ энергийн судал нь тэнхлэг болж өөрөө эргэнэ, тэнхлэгийн дагуу байрлах хэд хэдэн хүрдийг эргэх хөдөлгөөнд оруулж байна гэж төсөөлнө. Зорилго нь биеийн бүх энергийн судлуудыг нээхэд оршино.

Манай Фалунь Дафагийн бясалгалд нэг энергийн судлаар зуу зуун энергийн судлыг идэвхжүүлэх энэ хэлбэрээс зайлсхийдэг. Бүр эхнээсээ бид зуу зуун энергийн судлууд нь онгойж зэрэг эргэлтэнд орохыг шаарддаг. Бид шууд маш өндөр түвшнээс хичээллэж эхэлдэг, доод түвшний зүйлийг алгасна. Зарим хүний хувьд нэг энергийн сувгаар дамжуулж зуу зуун энергийн сувгийг онгойлгоход магадгүй бүх нас нь ч хүрэхгүй, зарим хүний хувьд хэдэн арван жилээр бясалгах шаардлагатай, энэ нь маш хэцүү. Их олон бясалгалын аргуудад нэг насаараа бясалгаад үр дүнд хүрэхгүй гэж ярьдаг. Олон аугаа номоор бясалгагчид амь насаа уртасгаж чаддаг. Тэд амь биеийг бясалгахыг ярьдаг биш гэж үү? Тэд бясалгахын тулд амь насаа уртасгаж чаддаг, ингэж маш удаан хугацааны турш бясалгадаг.

Бага тэнгэрийн эргүүлэг бол үндсэндээ өвчин эдгээх, бие сайжруулахын тулд байдаг. Харин их тэнгэрийн эргүүлэг бол гон бясалгана, ингэвэл хүн жинхэнэ бясалгаж байгаа юм. Дао-гийн системд ярьдаг их тэнгэрийн эргүүлэг нь манай зуу зуун энергийн судлыг нэг зэрэг нээдэг шиг

хүчтэй биш. Тэр нь бол зөвхөн хэдхэн энергийн судлын эргэлт юм, гарын Гурван билиг, Гурван арга⁴³ -аас хөлний ул хүртэл, хоёр хөлнөөс үс хүртэл бүх биеэр гүйж нэг эргэлт болдог. Үүнийг их тэнгэрийн эргүүлэг гэдэг. Их тэнгэрийн эргүүлгийн бясалгал бол жинхэнэ гон бясалгаж байгаа юм. Тиймээс зарим чигон багш их тэнгэрийн эргүүлгийг заадаггүй, тэдний заадаг зүйл нь зөвхөн өвчин эдгээх бие сайжруулах талын зүйлс юм. Зарим хүн их тэнгэрийн эргүүлгийн талаар бас ярьдаг, гэхдээ тэд чиний биед юу ч суулгаж өгөөгүй, мөн тэдгээрийг чи өөрөө нээж чадахгүй. Чамд юу ч суулгахгүй бол чи зөвхөн өөрийнхөө бодлын нөлөөгөөр үүнийг яаж амархан нээх юм? Чи үүнийг гимнастиктай адил хийгээд яаж нээж чадах юм? Бясалгал өөрөөс шалтгаална, гон багшаас шалтгаална. Дотоод механизмыг бүрэн чамд суулгаж өгсний дараа ийм нөлөө гардаг.

Үеэс үед Дао-гийн системд хүний биеийг нэг жижиг орчлон ертөнц гэж үздэг, орчлон ертөнцийн гадна талыг дотор тал шигээ асар уудам, мөн гадна талын харагдах байдал нь дотор талынхтай адилхан гэж үздэг. Энэ төсөөлөл нь санаанд багтамгүй санагдана, мөн ойлгоход амаргүй. Энэ орчлон ертөнц нь ийм аугаа том, үүнийг яаж хүний биетэй харьцуулж болох юм? Бид ийм тайлбар хийе, манай өнөөгийн физикийн ухаанд бие бодийн бүтцийг молекулаас авхуулаад атом, электрон, протон, кварк гээд нейтрино хүртэл судалж байна, харин цааш үргэлжлүүлбэл ямар бичил хэмжээний хэсгүүд байх вэ? Тэр хэмжээнд микроскопоор харж чадахгүй, тэгвэл түүнээс бүр цааш бичил ширхэг нь юу байдаг вэ? Энэ нь тодорхойгүй. Үнэндээ одоогийн бидний физик судлалд таньж мэдсэн нь орчлон ертөнцийн хамгийн бичил ширхэгтэй харьцуулбал маш хол зөрөөтэй юм. Хүнд энэ махан бие байхгүй байхад

⁴³ Гурван билиг, Гурван арга-гар хөлийн голч судлууд

нүдээрээ юмсыг томруулж харж чаддаг, тэгээд микро түвшингийн зүйлсийг хардаг. Түвшин өндөр байх тусам улам микро түвшинд харж чадна.

Шагжамүни өөрийнхөө түвшинд гурван мянган хорвоо ертөнцийн тухай сургааль ярьсан, тухайлбал энэ тэнгэрийн заадас галагтикд манай хүн төрөлхтөн шиг махбодитой хүмүүс оршдог. Бас нэг ширхэг элсэн дотор гурван мянган хорвоо ертөнц агуулагддаг гэж хэлсэн, энэ нь бидний орчин үеийн физикийн ойлголттой нийцэж байна. Электрон атомын цөмийг тойрч эргэдэг хэлбэр нь дэлхий нарыг тойрон эргэдэгтэй ямар ялгаа байгаа юм? Иймээс Шагжамүни микро түвшинд нэг ширхэг элсэн дотор гурван мянган хорвоо ертөнц байдаг гэж хэлсэн. Энэ нь яг нэг орчлон ертөнцтэй адил, дотор нь амь бодь болон матери оршдог. Хэрэв энэ үнэн бол бодоод үз, элсний ширхэг доторхи тэр орчлон ертөнцөд бас элс байгаа биз дээ? Тэр элсэн доторхи ширхэг элсэнд бас гурван мянган хорвоо ертөнц байгаа биз дээ? Тэгвэл элсэн доторхи ширхэг элсний гурван мянган хорвоо ертөнц дотор бас л элс байна биз дээ? Хэрэв ингэж үргэлжлүүлэн яривал энэ нь хязгааргүй. Иймээс Шагжамүни Рулай түвшинд хүрээд ингэж хэлсэн, “Тадарга нь хязгаар үгүй уудам, доторхи нь хязгаар үгүй өчүүхэн”. Орчлон ертөнцийн хязгаар нь харагдашгүй уудам, материйг үүсгэсэн хамгийн бичил эх сурвалж нь үзэгдэшгүй жижиг гэсэн.

Зарим чигон багш арьсан дахь хөлсний нүхэнд хот байдаг, дотор нь галт тэрэг, машин явдаг гэж хэлдэг. Сонсоход төсөөлөхийн аргагүй, гэхдээ бид үүнийг шинжлэх ухааны үүднээс үнэхээр судалж бас ойлгох юм бол тэр хэлсэн нь санаанд багтамгүй зүйл биш юм. Би урьд нь тэнгэрийн мэлмий нээгдэх тухай ярихад олон хүний тэнгэрийн мэлмий нээгдсэн, тэгээд ийм байдлыг харсан: Тэд духан дахь урт хонгилоор гадагш хурдалж байсан, гэхдээ

хонгилын эцэст хүрч чадашгүй. Өдөр болгон бясалгал хийх үед хоёр талаар нь уултай устай энэ өргөн замаар гадагшаа хурдалж байгаагаа мэдэрдэг. Гүйж явахдаа тэд хотуудаар дайрч өнгөрөхөд нилээд олон хүмүүс харагддаг, үүнийг тэд хий үзэгдэл гэж бодож магадгүй. Ямар учиртай вэ? Харсан зүйлүүд нь маш тодорхой, хий үзэгдэл биш юм. Би хэлье, хэрэв хүний бие микро түвшинд үнэхээр тийм энгүй уудам юм бол, энэ нь хий үзэгдэл биш. Яагаад гэвэл Дао-гийн системийн бясалгалд хүний биеийг нэг орчлон ертөнц гэж үздэг. Хэрэв энэ нь үнэхээр нэгэн орчлон ертөнц юм бол духнаас булцуут булчирхай хүртэл 108 мянган “ли” хол зайтай болно. Чи гадагшаа гарах гээд тэмүүд, гэвч энэ нь маш хол зай юм.

Хэрэв бясалгалын явцад их тэнгэрийн эргүүлэг бүрэн нээгдвэл бясалгаж байгаа хүнд нэг ер бусын чадвар гарна. Ямар ер бусын чадвар вэ? Та нар их тэнгэрийн эргүүлгийг бас Голч (меридиан) тэнгэрийн эргүүлэг, Тэнгэр газрын эргэлт бас Хөчэ эргэлт гэж нэрлэдгийг мэднэ. Маш гүехэн түвшинд их тэнгэрийн эргүүлэг нь энергийн урсгал үүсгэдэг бөгөөд тэр нь аажмаар нягтаршиж дээд түвшин лүү хувирна, улмаар их нягтралтай энергийн том бүслүүр болдог. Энэ энергийн бүслүүр нь эргэх хөдөлгөөнтэй. Үүний эргэх явцыг их доод түвшний тэнгэрийн мэлмийгээр харахад тэр нь биен доторхи чий-н байршлыг сольдог болохыг харж болно. Зүрхний чий гэдэс рүү шилжинэ эсвэл элэгний чий ходоод руу очино... Хэрэв микро байдалд харвал түүний зөөж байгаа зүйл нь маш том зүйл байдаг. Хэрэв энэ энергийн бүслүүрийг биеийн гадна гаргавал юмыг зайнаас удирдан зөөх ер бусын чадвар болно. Маш хүчтэй гон энергитэй хүн ямар нэгэн том зүйлийг зайнаас удирдан зөөж чаддаг, үүнийг том зөөлт гэдэг. Сулавтар гон хүчтэй хүн жижиг зүйлийг зайнаас удирдан зөөж чаддаг, үүнийг жижиг зөөлт гэнэ. Энэ бол зөөх ер бусын чадварын хэлбэрүүд ба түүний үүсвэр юм.

Их тэнгэрийн эргүүлэг бол бясалгал. Тиймээс энэ нь янз бүрийн байдал ба гон хэлбэрийг үүсгэдэг. Тэр бас маш онцгой байдлыг бий болгодог. Ямар байдал вэ? Та бүхэн магадгүй Бурханы намтар, Данжин (Үрлийн судар), Даозан (Бумбын жаяг) ба Шиньмин Гүйжи (Зан чанар амийн судар) зэрэг эртний номонд Гэгээн цагаан өдрөөр газраас хөөрөх тухай бичсэнийг уншсан байх. Энэ нь гэгээн цагаан өдрөөр хүн дээш хөөрөх гэсэн үг. Үнэндээ би та бүгдэд хэлье, их тэнгэрийн эргүүлэг нээгдэхэд хүн дээш хөөрч чадна, ийм л хялбархан юм. Зарим хүн ингэж бодно, энэ олон жил бясалгаж байхад их тэнгэрийн эргүүлэг нээгдсэн хүн цөөнгүй байх учиртай. Би үүнийг бүр хэдэн арван мянган хүн энэ түвшинд хүрсэн гэхэд итгэмээргүй зүйл биш гэж хэлнэ. Яагаад гэвэл их тэнгэрийн эргүүлэг бол бясалгалын дөнгөж эхний шат юм.

Тэгвэл яагаад эдгээр хүмүүсийг газраас хөндийрч эсвэл агаарт хөөрч байхыг нь хэн ч хараагүй вэ? Энгийн хүний нийгмийн байдлыг үймүүлж болохгүй, мөн энгийн хүний нийгмийн хэлбэрийг хамаагүй эвдэж, өөрчилж болохгүй. Хүн болгон тэнгэрт нисээд байвал болох юм уу? Тэр энгийн хүний нийгэм мөн үү? Энэ бол нэн тэргүүний асуулт юм. Нөгөө талаас нь авч үзэхэд, хүн энгийн хүмүүсийн дунд хүн байхын тулд амьдардаггүй, харин өөрийн үүссэн эх үндсэндээ буцах, үнэнд хүрэхийн төлөө юм, иймээс ухамсарлалтын асуудал байдаг. Маш олон хүн үнэхээр агаарт хөөрч байхыг харсан хүн бас бясалгахыг хүснэ, тэгвэл ухамсраар бясалгах асуудал байхгүй болно. Иймээс чи бясалгасан ч үүнийг бусдад үзүүлж болохгүй, учир нь тэд бас бясалгах хэрэгтэй. Тийм болохоор чиний их тэнгэрийн эргүүлэг нээгдсэний дараа чиний хурууны өндөг, хөлний хурууны үзүүр эсвэл чиний биеийн аль нэг хэсгийг түгжвэл чи агаарт хөөрч чадахгүй болно.

Бидний их тэнгэрийн эргүүлэг нээгдэх үед ийм нэг байдал гардаг, зарим хүн завилан суугаад бясалгахад бие нь урагш бөхийдөг. Тэр хүний ар талын эргэлт арай сайн нээгдсэн учраас нуруу нь маш хөнгөхөн мэдрэгдэж байхад биеийнх нь урд тал нь хүнд мэдрэгдэнэ. Зарим хүмүүс хойшоо гэдийнэ, тэдний ар тал нь хүнд мэдрэгдэж байхад урд тал нь хөнгөн мэдрэгддэг. Хэрэв бүх тал чинь жигд сайн нээгдвэл чамд дээшээ өргөгдөж байгаа мэт, өөрөө газраас дээш хөндийрч байгаа мэт мэдрэгддэг. Хэрвээ чи үнэхээр хөөрч чаддаг болоход чамд хөөрөхийг зөвшөөрөхгүй, гэхдээ огт зөвшөөрөхгүй биш. Ер бусын чадвар гол төлөв насны хоёр хязгаарын хүмүүст гардаг, хүүхдэд автсан сэтгэл байдаггүй, настай хүмүүст, ялангуяа настай эмэгтэйчүүдэд зууралдсан сэтгэл байхгүй, амархан ер бусын чадвар гардаг, бас хадгалагдан үлдэхдээ амар. Эрэгтэй хүнд, ялангуяа залуучуудад ер бусын чадвар гарахад өөрийгээ гайхуулах сэтгэлээ барьж чаддаггүй. Мөн түүнчлэн тэд магадгүй энэ чадварыг энгийн хүмүүсийн дунд өрсөлдөх аргаа болгодог. Иймээс түүнд байхыг зөвшөөрөхгүй, бясалгаж гарангуут түүнийг түгждэг. Хүний аль нэг хэсгийг нь түгжвэл тэр хүн газраас хөөрч чадахгүй. Гэхдээ чамд ийм байдал гарахыг бүрмөсөн хорино гэсэн үг биш. Чамд магадгүй туршиж үзэхийг зөвшөөрнө, зарим хүмүүст энэ чадвар нь хадгалагдаж үлддэг.

Ийм байдал миний лекц заасан газар болгонд гардаг. Намайг Шандон мужид лекц уншиж байхад тэнд Жинань бас Бээжин хотуудаас ирсэн сурагчдад бүгдэд нь ийм байдал гарч байсан, тэдний нэг нь надаас асуусан: Багшаа, энэ юу болоод байна аа? Би алхаж явахдаа газраас хөндийрээд байх юм. Гэртээ унтаж байхад бас хөөрөөд байх юм, нөмөрсөн хөнжил хүртэл хамт дээшээ хөөрөөд, дандаа шаар шиг хөөрөөд байх юм. Би Гүйянь хотод лекц уншихад Гүйжоу-гийн хуучин сурагч, нэг настай эмэгтэй байсан. Тэр эмэгтэй өрөөндөө хоёр ортой байсан, нэг ор нь нэг талын

хана дагуу нөгөө ор нь эсрэг талын хана дагуу байрласан байсан. Тэр орон дээрээ бясалган сууж байтал тэр дээш хөөрөхөө мэдэрсэн, тэгээд нүдээ нээгээд хартал нөгөө талын орон дээр хөөрөөд очсон байсан. Тэр ор луугаа буцах хэрэгтэй гэж дотроо бодонгуут эргээд өөрийн орон дээрээ ирсэн.

Чиндао хотын нэг сурагч байсан, өдрийн цайны цагаар ажлын өрөөнд нь хэн ч байхгүй байхад орон дээр суугаад бясалгал хийсэн. Тэр дөнгөж хийж эхэлтэл дээш нэг метр орчим өндөрт хөөрч огцом доош унаж дахин дээш хөөрөх, доош унах давтагдсан. Түүний хөнжил хүртэл шалан дээр унаад ойж байсан. Түүний сэтгэл бага зэрэг хөөрсөн бас жоохон айсан. Ингэж дээш доош болох нь өдрийн завсарлага турш үргэлжилсэн. Эцэст нь ажил эхлэх хонх дугарахад тэр ингэж бодсон: Би үүнийг хүнд үзүүлж болохгүй. Тэд энэ юу болж байна? гэж гайхна, хурдхан больё. Тэгээд тэр зогссон. Энэ нь настай хүн өөрийгөө яаж барьж чаддагийг харуулж байна. Хэрэв залуу хүнд энэ тохиолдсон бол ажилд гарах хонх дугарахад тэр ингэж бодох байсан: “Бүгдээрээ энд ирээд миний хөөрөхийг хардаа.” Хүн өөрийгөө гайхуулах сэтгэлийг амархан барьж чаддаггүй нь энэ юм. “Хардаа би ямар сайн бясалгасан байна, би хөөрч чадаж байна.” Тэр ингэж нэг гайхуулангуут энэ чадвар нь алга болно, ийм байхыг зөвшөөрөхгүй. Ийм зүйл маш их байдаг, энд тэндхийн сурагчдад бүгдэнд нь гардаг.

Бид зуу зуун энергийн судлыг бүр эхнээсээ л бүгдийг нээхийг шаарддаг. Одоогийн байдлаар манай сурагчдын наяс ерэн хувь нь бие нь хөнгөн бөгөөд өвчингүй эрүүл байдалд хүрсэн. Мөн түүнчлэн бид ингэж хэлсэн, энэ лекцэнд чамайг ийм нэг байдалд түлхэж хүргэнэ, чиний биеийг бүрэн цэвэршүүлнэ, бас маш олон зүйлийг чамд суулгаж өгнө, чамд энэ лекцэнд гон гаргуулна. Би чамайг

дээш татан гаргаж ирээд улам цааш явуулж байгаатай адил юм. Би энэ лекцэнд та нарт Ном ярьж өгч байгаа, мөн та бүгдийн зан чанарт тасралтгүй өөрчлөлт гарч байна. Та нарын ихэнх нь энэ танхимаас гараад өөрийгээ өөр хүн болсныг мэдрэх болно, чиний ертөнцийг үзэх үзэлд өөрчлөлт гарах нь дамжиггүй. Чи ирээдүйд өөрийгээ яаж авч явбал зохистойг мэдэх болно, хойшид учраа мэдэхгүй төөрөлдөж явахаа болино, ийм байдалд хүрэх нь дамжиггүй. Тиймээс та нарын зан чанар аль хэдийн дагаад дээшилсэн.

Их тэнгэрийн эргүүлгийн талаар ярихад чамайг дээш хөөрөхийг зөвшөөрөхгүй ч гэсэн чиний бие хөнгөрсөн болохыг мэдэрнэ, явахдаа салхи татуулна. Урьд нь хэд алхаад л ядардаг байсан бол одоо чамд хэр хол алхсан ч биеийнхээ хөнгөнийг мэдэрнэ. Дугуй унасан ч араас чинь хүн түлхэж байгаа юм шиг, шатаар дээшээ хэр өндөрт гарсан ч ядрахгүй, ийм байхыг батална. Энэ номыг уншаад өөрөө бясалгаж байгаа хүн мөн адил хүрэх ёстой байдалд хүрч чадна. Би хэлэхийг хүсээгүй зүйлээ ярьдаггүй хүн, харин миний ярьсан зүйл үнэн байх ёстой. Ялангуяа ийм нөхцөлд би Ном заахдаа үнэнийг хэлэхгүй бол, хэрэв би утга учиргүй зүйл яривал, эсвэл би оновчтой бус хамаагүй яривал, би буруу Ном зааж байгаа болно. Надад ийм зүйлийг хийхэд амаргүй, бүхэл орчлон ертөнц даяар харж байна, үүнийг гажуудуулахыг зөвшөөрөхгүй.

Жирийн хүн зөвхөн ийм нэг тэнгэрийн эргүүлгийг мэдээд л боллоо гэдэг, үнэндээ энэ бол хангалтгүй. Бие нь бүрмөсөн дээд энергийн бие бодиор аль болох хурдан солигдох, хувирах байдалд хүрнэ гэвэл бас өөр нэг тэнгэрийн эргүүлгийн эргэлт байх ёстой. Үүнийг хүний биений бүх судлыг идэвхжүүлэх Мао-ю тэнгэрийн эргүүлэг гэж нэрлэдэг, энэ талаар мэддэг хүн бараг байхгүй. Ийм нэр хэллэгийг номонд хааяа нэг дурьдсан байдаг, гэхдээ үүнийг ярьдаг хүн байхгүй, чамд хэлэхгүй. Бүгд онолын

хүрээнд л яригддаг нууцын нууц юм. Бид энд бүгдийг нь чамд хэлье. Энэ нь Байхуй сүвээс эхэлнэ (эсвэл Хуйэнь сүвээс эхэлж болно), эндээс гараад арга билиг талуудын хиллэдэг заагаар явдаг. Энэ нь чихний захаар доош явж мөрөнд бууна, мөрнөөс доошилж хуруу болгоны завсраар, биеийн хажуугаар явна тэгээд хөлийн улаар хөндлөн гарч хөлний дотор талаар дээшээ явна, тэгээд нөгөө хөлний дотор талаар доош буугаад хөлний улаар хөндлөн гарч биений нөгөө талаар дээш өгсөнө. Мөн нөгөө гарын хуруу болгоны завсраар өнгөрсний дараа толгойн оройд хүрч нэг бүтэн эргэлт болно. Энэ бол Мао-ю тэнгэрийн эргүүлэг юм. Хүмүүс энэ талаар бүтэн ном бичиж болно, харин би үүнийг хэдхэн үгээр л хэллээ. Би үүнийг тэнгэрийн нууцад тооцох ёсгүй гэж боддог, харин бусад хүн үүнийг маш нандин зүйл гэж үздэг, үндсэндээ ярьдаггүй, зөвхөн шавьдаа жинхэнэ уламжлахдаа л Мао-ю тэнгэрийн эргүүлгийг ярьдаг. Хэдийгээр би үүний нууцыг задалсан ч хэн ч үүнийг бодлоор удирдах гэж оролдож болохгүй. Хэрэв чи тэгж хийвэл энэ нь манай Фалунь Дафагийн бясалгал биш болно. Жинхэнэ дээд түвшин лүү бясалгахад үйлгүй байдаг, ямар ч бодлын хөдөлгөөн байхгүй, бүгдийг чамд бэлнээр суулгаж өгсөн. Эдгээр нь бүгд автоматаар үүсдэг, энэ дотоод механизм чамайг бясалгана, цаг нь болоход тэд өөрсдөө эргэлтэнд орно. Нэг өдөр чи дасгал хийхэд толгой чинь хоёр тийшээ ганхаж магадгүй. Толгой энэ тал руу хазайвал тэр нь энэ зүг рүү эргэж байдаг, толгой нөгөө тал руу хазайвал тэр зүг рүү эргэж байдаг, хоёр тал руу эргэдэг.

Их, бага тэнгэрийн эргүүлэг нээгдсэний дараа бясалгаад сууж байхад толгой урагш дохино, энэ бол энерги дамжин өнгөрч байгаа шинж юм. Бидний бясалгадаг Фалунь тэнгэрийн эргүүлэг бас адилхан, бид ингэж бясалгадаг. Үнэндээ чи дасгал хийгээгүй байхад ч гэсэн тэр өөрөө эргэдэг. Энгийн үед үргэлж зогсолтгүйгээр эргэдэг, чи дасгал хийхэд энэ механизмд хүч нэмдэг. Бид Ном хүнийг

бясалгадаг гэж ярьсан биз дээ? Жирийн үед чиний тэнгэрийн эргүүлэг үргэлж эргэлдэж байдгийг чи мэднэ. Чамайг дасгал хийгээгүй байхад биеийн гадна суулгасан энэ давхаргын чий механизм нь биеийн том энергийн судлын адил чиний биеийг удирдан бясалгаж байдаг, бүгд автоматаар хийгддэг. Тэр бас эсрэг зүг рүү эргэж чадна, хоёр тийшээ эргэнэ, чиний энергийн судлыг үргэлж нээж өгч байдаг.

Тэгвэл тэнгэрийн эргүүлгийг нээх зорилго нь юу вэ? Тэнгэрийн эргүүлгийг нээх нь дасгалын гол зорилго биш. Чиний тэнгэрийн эргүүлэг нээгдсэн ч, би үүнийг юу ч биш гэж хэлнэ. Цаашид үргэлжлүүлэн бясалгавал, тэнгэрийн эргүүлгийн аргаар нэг энергийн судлаар дамжуулж зуу зуун энергийн судлыг нээхийг зорьдог, биеийнхээ бүх энергийн судлыг бүгдийг дагуулж нээнэ. Бид аль хэдийн үүнийг хийж эхэлсэн. Цаашид бясалгахад их тэнгэрийн эргүүлгийн эргэлтэнд энергийн судлууд бүдүүрнэ, зарим хүн үүнийг хуруу шиг бүдүүрч дотроо нилээд өргөн болохыг үзнэ. Яагаад гэвэл энергийн хүч бас нэмэгдэнэ, энергийн урсгал бүрэлдсэний дараа энергийн судал их өргөсөж бас гэгээтэй болж ирнэ. Энэ нь бас л болоогүй. Тэгвэл ямар хэмжээнд хүртэл дасгал хийхэд хангалттай вэ? Хүний биеийн зуу зуун энергийн судал аажмаар өргөсөж, энерги нь улам хүчтэй, улам гэрэлтдэг болдог. Эцэст нь мянга мянган энергийн судал хоорондоо нийлж нэг бүхэл болсноор хүний бие энергийн судалгүй, сүвгүй байдалд хүрнэ, тэр бүгд нэгэн бүхэл бие болж нэгдэнэ. Энэ бол энергийн судлыг нээхийн эцсийн зорилго юм. Түүний зорилго нь хүний биеийг дээд энергийн бие бодиор бүрэн хувиргахад оршино.

Энэ хэмжээнд хүрэхэд хүний бие үндсэндээ дээд энергийн бие бодиор хувирдаг. Өөрөөр хэлбэл Гурамсан ертөнцийн номын бясалгалын хамгийн дээд түвшинд хүрлээ гэсэн үг, хүний махан бие туйлын хэмжээнд хүртлээ

бясалгасан болно. Энэ үед хүнд бас өөр нэг байдал гардаг. Ямар байдал гардаг вэ? Түүний гаргасан гон маш баялаг. Энгийн хүний биеийн бясалгал буюу Гурамсан ертөнцийн номын бясалгалын явцад хүний бүх ер бусын чадварууд (далдын чадварууд) болон бүх зүйл бүгд гарч ирдэг. Гэхдээ энгийн хүний дунд бясалгахад эдгээрийн ихэнх нь түгжигддэг. Мөн түүний гон багана аль хэдийн маш өндөр болсон. Бүх гон-ын хэлбэрүүд маш хүчтэй гон-оор дэмжигдэж нилээд хүчирхэг болно. Гэхдээ тэдгээр нь зөвхөн бидний одоо байгаа энэ орон зайд нөлөөлж чадна, энэ нь жирийн хүний махан бие бодиор бясалгаж гаргасан ер бусын чадвар учраас бусад орон зайнд үйлчилж чадахгүй. Тийм ч гэсэн тэдгээр нь аль хэдийн маш их баялаг биет болсон. Орон зай болгонд, өөр өөр орон зайд орших биесийн янз бүрийн хэлбэрийн хувьд маш том өөрчлөлт гарах болно. Тэр биеийн агуулах зүйлс, орон зай болгоны биед байгаа зүйлс бүгд маш баялаг бөгөөд их цочмоор харагдана. Зарим хүн биен дээрээ энд тэндгүй нүдтэй, мөн хөлсний бүх сүвүүд нь нүд болно. Түүний бүхэл орон зайн хүрээн дотор нүднүүд байна. Буддын системийн гон учраас зарим хүн бүх биеэрээ Бодьсадва, Буддын дүрсээр дүүрэн байдаг. Янз бүрийн гон хэлбэр нь их баялаг хэмжээнд хүрсэн, мөн маш олон амь бодь илэрч гардаг.

Энэ үед “Толгойн оройд гурван цэцэг цуглах” байдал гарна. Энэ бол маш ил тод нэгэн байдал юм, бас нүд булаам. Тэнгэрийн мэлмийн түвшин өндөр биш байгаа хүнд ч харагдана. Толгойн дээр гурван цэцэг гарч ирнэ. Тэдний нэг нь лянхуа цэцэг, гэхдээ тэр бол бидний энэ материаллаг орон зайд байдаг лянхуа цэцэг биш. Нөгөө хоёр цэцэг нь бас өөр орон зайн цэцгүүд бөгөөд маш үзэсгэлэнтэй. Гурван цэцэг толгой дээр ээлжлэн эргэнэ. Тэд цагийн зүүний дагуу эсвэл эсрэгээр эргэнэ, цэцэг болгон бас өөрөө эргэлдэнэ. Цэцэг болгоны багана нь цэцгийн диаметртэй адил өргөнтэй. Гурван өндөр багана тэнгэр өөд цойлсон, гэхдээ

тэдгээр нь гон багана биш тийм л нэг хэлбэртэй бөгөөд ер бусын гайхамшигтай. Хэрэв чи харж чадах юм бол мэлрэн зогтусна. Энэ түвшинд бясалгаад хүрэхэд, бие нь сүүн цагаан ариун, арьс нь цайвар зөөлөн болдог. Энэ цагт хүн Гурамсан ертөнцийн номын бясалгалын хамгийн дээд хэлбэрт хүрнэ. Гэхдээ энэ нь эцсийн төгсгөл нь биш, үргэлжлүүлэн бясалгаж улам дээш ахих хэрэгтэй.

Цааш урагшлан бясалгахад Гурамсан ертөнцийн номын болон Гурамсан ертөнцөөс гарсан номын дундах шилжилтийн түвшинд орно. Үүнийг ариун-цагаан биеийн хэлбэр бас “болор тунгалаг-цагаан бие” гэдэг. Биеийн бясалгалаар Гурамсан ертөнцийн номын хамгийн дээд хэлбэрт хүрэхэд хүний зөвхөн махан бие хувираад хамгийн дээд хэлбэртээ хүрнэ. Жинхэнэ тэр хэлбэрт хүрэхэд бүх бие бүрэн дээд энергийн бие бодиор солигддог. Яагаад энэ нь ариун-цагаан бие гэж нэрлэгддэг вэ? Энэ нь туйлын ариуслын дээд хэмжээнд хүрсэн юм. Тэнгэрийн мэлмийгээр харахад бүх бие нь тунгалаг, яг тунгалаг шил шиг, харахад юу ч байхгүй тийм нэг байдал илэрнэ. Шуудхан хэлбэл тэр аль хэдийн Будда-биетэй болсон. Яагаад гэвэл дээд энергийн бие бодиос бүрдсэн бие нь бидний энэ төрөлх биетэй аль хэдийн адилгүй болсон. Энэ шатанд хүрэхэд биед гарсан бүх ер бусын чадварууд болон увидасын зүйлс гэнэт бүгд хаягдана, тэдгээрийг маш гүн нэг орон зайд орхидог. Хэрэгцээгүй, үүнээс хойш дахиад ямар ч хэрэггүй болсон. Зөвхөн чи ирээдүйд бясалгаад Дао-д хүрэх тэр өдөр эргээд өөрийнхээ бясалгалын явцыг харахдаа тэдгээрийг гаргаж үзэж болно. Энэ үед зөвхөн хоёр зүйл л үлдэнэ: Гон багана байсаар байна, мөн бясалгаж гарсан Мөнхийн нярай хүүхэд хэдийнэ их том болсон байна. Гэхдээ энэ хоёр зүйл бүгд маш гүн орон зайд оршдог, хүний тэнгэрийн мэлмийн түвшин өндөр биш бол харагдахгүй, тэр зөвхөн энэ хүний бие тунгалаг болохыг нь харна.

Ариун цагаан биеийн байдал бол зөвхөн шилжилтийн үе учраас цааш бясалгахад жинхэнэ Гурамсан ертөнцийн номоос гарсан бясалгалд орно, үүнийг мөн Будда биеийн бясалгал гэдэг. Бүх бие нь гон-оос бүтнэ, энэ үед хүний зан чанар тогтвортой болсон байна. Бүхнийг шинээр бясалгаж эхэлнэ, дахиад ер бусын чадвар гарна. Гэхдээ үүнийг ер бусын чадвар гэж хэлэхгүй болно харин “Буддын номын увидас чадвар” гэж хэлэх нь зүйтэй. Тэр бүх орон зайд үйлчилж чадна, сүр хүч нь зүйрлэшгүй. Чи үргэлжлүүлэн бясалгаад байвал ирээдүйд дээд түвшний зүйлүүдийг өөрөө яаж бясалгах, бясалгалын ямар хэлбэр байдаг зэргийг мэдэх болно.

Баярлах сэтгэл

Би баярлах сэтгэлтэй холбоотой асуудлаар ярья. Маш олон хүн урт удаан хугацааны турш чигон-оор хичээллэсэн, бас чигон-оор хэзээ ч бясалгаж үзээгүй хүн байдаг. Гэхдээ тэд энэ насандаа үнэнийг мэдэх, амьдралын утга учрыг ойлгох гэж хөөцөлддөг бас боддог. Тийм хүн манай Фалунь Дафагаар хичээллэсний дараа амьдралдаа мэдэхийг хүссэн ч чадахгүй байсан олон асуултынхаа хариултыг шууд ойлгодог. Тэдний үзэл бодол нь дээшлэх тусам магадгүй сэтгэл санаа нь бас маш их хөдлөх нь лавтай. Би жинхэнэ бясалгагч хүн үүний үнэ цэнийг ойлгоно, тэгээд нандигнан үздэг гэдгийг мэднэ. Гэхдээ ийм асуудал үргэлж гардаг, хүн баярласны улмаас хэрэгцээгүй хөөрөх сэтгэл үүсдэг. Ингэснээр тэд энгийн хүний нийгмийн орчинд, хүн хүний хоорондын харьцаанд орохдоо хэвийн бус байдал гаргадаг. Би тийм байж болохгүй гэж хэлж байна.

Манай бясалгалын замаар ихэнх хүн энгийн хүний нийгэм дунд бясалгана, чи өөрийгөө энгийн хүний нийгмээс салгаж болохгүй, мөн саруул ухаантай бясалгах хэрэгтэй.

Хүн хүний хооронд бас нэг энгийн харилцаа байх хэрэгтэй. Мэдээж чиний зан чанарын түвшин их өндөр, сэтгэл санаа чинь зөв, өөрийнхөө зан чанарыг дээшлүүлнэ, түвшинг ахиулна, муу зүйлийг хийхгүй зөвхөн сайн үйлийг хийнэ. Ийм байдлаар л илэрдэг. Зарим хүн өөрийгөө сэтгэл мэдрэл нь хэвийн бус гэж харагдмаар авч явдаг, эсвэл энгийн хүний хорвоог хангалттай туулж үзсэн мэт ханддаг. Юм ярьсан ч хүнд ойлгогдохгүй. Хүмүүс ингэж хэлнэ, Фалунь Дафагаар хичээллэсэн хүн яагаад ийм болдог байна аа? Сэтгэл мэдрэлийн согогтой юм шиг. Үнэндээ тийм биш, тэр зүгээр л маш их догдолсон, энэ нь зүй зохисгүй, энгийн ёсонд нийцэхгүй. Та бүгд боддоо, ийм байвал бас буруу, чи хэт туйлшраад явчихлаа, энэ бол бас зууралдсан сэтгэл. Чи үүнийг орхих ёстой, энгийн хүмүүсийн дунд бусдын адил хэвийн амьдарч бясалгах хэрэгтэй. Энгийн хүмүүсийн дунд хүн болгон чамайг ухаан санаа нь согогтой гэж харвал, тэд чамтай харьцахгүй чамаас зайгаа барина. Хэн ч чамд зан чанараа дээшлүүлэх боломж олгохгүй, мөн тэд чамайг эрүүл ухаантай хүн гэж үзэхгүй. Би хэлье, энэ бол буруу! Тиймээс та бүгд эрх биш энэ асуудалд анхаарах хэрэгтэй, өөрийгөө сайн барих хэрэгтэй.

Манай бясалгал бол гүн ховсдолд орж ухаан санаагаа эзэнгүй орхидог, хэвийн бус байдалд ордог жирийн бясалгалуудтай адилгүй. Манай бясалгалд чамайг өөрөө бүрэн мэдрэмжтэйгээр бясалгахыг шаарддаг. Зарим хүн үргэлж ингэж хэлдэг: Багшаа, би нүдээ анингуут найгаад байх юм. Би хэлбэл тийм биш, чи аль хэдийн өөрийнхөө эзэн бодлыг орхидог байдалд ороод дасчихсан байна. Чи нүдээ аниад л өөрийнхөө эзэн бодлыг сул тавьчихдаг, байхгүй болгодог, ийм байдалд чи аль хэдийн дасчихсан. Энд сууж байхад чи яагаад найгахгүй байгаа юм? Чи нүдээ нээлттэй байхдаа байдаг шигээ нүдээ хөнгөн анихад бие чинь найгаж эхлэх юм уу? Ердөө тэгэхгүй. Чи чигон-оор хичээллэхдээ ингэж хийх ёстой гэж боддог, тэгээд чамд

тийм төсөөлөл бий болсон. Чи нүдээ аниад л замхардаг, өөрийнхээ хаана байгааг мэдэхээ больдог. Бид хэлсэн, чиний Эзэн бодол заавал өөрийн ухаантай байх ёстой, яагаад гэвэл энэ бясалгал чамайг өөрийг чинь бясалгуулдаг. Чи ухамсарт бодолтой байж дээшлэх ёстой. Бидэнд бас гүн амгаланд орж хийх дасгал байдаг. Бид яаж гүн амгаланд орж бясалгах вэ? Та бүгд ямар ч гүн амгаланд орсон өөрийгөө энд бясалгаж байгаагаа мэдэж байхыг бид шаардана. Чамайг гүн ховсдолын байдалд орж юугаа ч мэдэхгүй байдалд орохыг туйлаас зөвшөөрөхгүй. Тэгвэл ямар тодорхой байдал гарах вэ? Бясалгаж суухад чамд нэг тааламжтай сайхан, бас тухтай мэдрэмж төрнө, төсөөлбөл өндөгний хальсан бүрхүүл дотор сууж байгаа юм шиг санагдана. Чи дасгал хийж байгаагаа мэднэ, гэхдээ чиний бүхэл бие хөдөлж чадахгүйг мэдэрдэг. Энэ байдал манай бясалгалд заавал гарах ёстой. Бас өөр нэг байдал байдаг, энэ нь хэсэг хугацаанд суусны дараа хөл нь байхгүй болсныг мэдэрнэ, хөл нь хаачсаныг санахгүй. Бие нь алга болно, гар нь байхгүй болно, зөвхөн толгой л үлдэнэ. Үргэлжлүүлэн бясалгахад толгой ч бас алга болсныг мэднэ, өөрөө энд бясалгаж байгаа гэсэн өчүүхэн бодол л үлддэг. Хэрэв бид ийм байдалд хүрвэл хангалттай. Яагаад вэ? Хүн ийм байдалд бясалгахад бие нь бүрэн хувирах байдалд хүрнэ, энэ бол хамгийн тохиромжтой байдал юм. Тиймээс бид чамайг ийм амгалан байдалд орохыг шаардана. Гэхдээ чи унтаж юмуу ухаанаа алдаж болохгүй, тэгвэл магадгүй сайн зүйлээ өөр хэн нэгэнд бясалгуулчихна.

Манай бүх бясалгагч энгийн хүний дунд хэзээ ч хэвийн бус байдал гаргаж болохгүй гэдгийг анхаарах хэрэгтэй. Чи энгийн хүмүүст муу үлгэр дууриалал үзүүлбэл тэд Фалуны Дафаг сурч байгаа хүн яагаад ийм болчихдог юм бэ? гэж ярина. Энэ нь Фалуны Дафагийн нэр хүндийг унагаж байгаагаар адил, тэгэхээр энэ асуудал дээр заавал анхаар. Бясалгалын бусад хэрэгт болон бясалгалын явцад баярлах

сэтгэлд автахгүй байхыг анхаар, ийм сэтгэлийг буг чөтгөр амархан ашиглаж чадна.

Үг яриагаа бясалгах

Урьд өмнө шашинд үг яриагаа бясалгахыг бас чухалд үздэг байсан. Гэхдээ шашинд яригддаг байсан үг яриагаа бясалгах нь гол төлөв зарим мэрэгжлийн бясалгагчид-лам хувраг болон Дао-гийнхантай холбоотой байсан, тэд амаа жимийгээд юм ярихгүй. Учир нь тэд мэрэгшсэн бясалгагчид, дээд хэмжээгээр хүний зууралдсан сэтгэлээс салах зорилготой юм. Хүний бодол нэг гарвал үйлийн үр бий болно гэж үздэг. Шашинд үйлийн үрийг сайн ба муу үйлийн үр гэж хуваадаг. Сайн үйлийн үр байна уу муу үйлийн үр байна уу ялгаагүй Буддын системийн хоосон чанараар болон Дао-гийн системийн үл оршихуйн дагуу алийг нь ч хийх ёсгүй. Тиймээс тэд ямар ч зүйл хийхгүй гэдэг. Тэд хэрэг явдлын хувь тавилангийн харилцааг харж чадахгүй, өөрөөр хэлбэл тэдгээр асуудлыг сайн, эсвэл муу болохыг, ямар хувь тавилангийн холбоо оршиж байгааг мэддэггүй. Тийм дээд түвшинд хүрээгүй энгийн бясалгагч тэдгээр зүйлийг харж чадахгүй учраас гаднаас нь харахад сайн мэт боловч хийчихвэл муу зүйл болж болно гэхээс айдаг. Иймээс тэр аль болохоор аливаа үйл хийхгүй байхыг хичээдэг, тэр юу ч хийхгүй байснаар дахин нүгэл үүсгэхээс зайлсхийж чадна. Учир нь нүгэл үүсвэл түүнийг арилгах ёстой, тэгэхийн тулд зовлон амсах болно. Жишээ нь манай бясалгагчдын хувьд ямар үе шатандаа гон нь нээгдэхийг урьдчилан тогтоосон байдаг. Чи тэр дунд ямар нэгэн зүйлийг хамаагүй оруулбал энэ нь бүх бясалгалын явцад хүндрэл учруулна, иймээс тэд үйлгүй байхыг ярьдаг.

Буддын системд үг яриагаа бясалгахыг шаарддаг. Тухайлбал хүн яриагаа өөрийн бодлоор удирддаг. Тэгвэл

энэ бодол санаа үйлдэлтэй гэсэн үг. Хүний бодол нэг гарахад ямар нэг юм хэлбэл, ямар нэг зүйл хийхэд, мэдрэх эрхтэн болон дөрвөн мөчөө удирдахад тэр нь энгийн хүний зууралдсан сэтгэл байж магадгүй. Жишээ нь, хүн хүний хооронд зөрчил байдаг, “чи сайн, харин тэр муу, ” эсвэл “чи сайн бясалгасан, тэр муу бясалгасан” гэх мэт. Энэ нь угаасаа зөрчил юм. Бид энгийн байдлыг ярьж, “Би үүнийг эсвэл тэрийг хиймээр байна” эсвэл “Энэ зүйлийг ингэж эсвэл тэгж хийх хэрэгтэй” гэх мэт. Энэ нь хэн нэгнийг санаандгүй гомдоож мэднэ. Яагаад гэвэл хүн хүний хоорондын зөрчил их нарийн төвөгтэй, магадгүй санаандгүйгээр нүгэл үүсгэчихнэ. Иймээс тэр амаа жимийгээд юу ч ярихгүй болдог. Урьд өмнө шашинд үг яриагаа бясалгахыг их чухалд авч үздэг байсан, энэ бол шашинд заадаг байсан зүйл.

Манай Фалунь Дафагийн ихэнх бясалгагчид (зарим мэргэжлийн бясалгагчдаас бусад нь) энгийн хүмүүсийн дунд бясалгадаг. Тиймээс энгийн хүний нийгэмд хэвийн амьдрах нь зайлшгүй, мөн олон түмэнтэй харьцахгүй байх аргагүй. Хүн болгон ажил төрөлтэй мөн ажлаа сайн хийх хэрэгтэй. Зарим хүн ярьж хийдэг ажилтай. Тэгвэл энэ нь харшлах уу? Энэ нь харшлахгүй. Яагаад харшлахгүй вэ? Бидний авч үзэж байгаа үг яриагаа бясалгах нь шашныхаас маш их ялгаатай. Учир нь бясалгалын Номын ялгаанаас шалтгаалж тавигдах шаардлага нь бас өөр. Бид бүгдээрээ бясалгагч хүний зан чанарын дагуу ярих хэрэгтэй, ямар нэгэн зүй зохисгүй юм ярьж зөрчил үүсгэхгүй, муу үг ярихгүй. Бясалгагч хүний хувьд бид тухайн зүйлийг ярих, ярихгүйгээ Номын шалгуурын дагуу өөрийгөө дүгнэж шийдэх хэрэгтэй. Хэрэв чиний хэлсэн үг Номоор цэгнэж бясалгагч хүний зан чанарын шалгуурт нийцэж байвал асуудалгүй. Тэгээд ч бид Номыг ярих, олны хүртээл болгох ёстой, иймээс юм ярихгүй байхын аргагүй. Бид үг яриагаа бясалгахад холбогдуулж хэлдэг зүйлст: Энгийн хүний салж

чаддаггүй тэр алдар нэр, ашиг хонжоо орно, мөн нийгэм дэх бясалгагч хүний тухайн ажил үйлст ямар ч ач холбогдолгүй зүйлс, нэг бясалгалын номын үүдний шавь нар хоорондын утга учиргүй цуурхал, эсвэл зууралдах сэтгэлээс болж өөрийгээ гайхуулах, дам үг ба эсвэл ам дамжсан хов жив тараах, эсвэл зарим сэтгэл хөдөлгөсөн нийгмийн асуудлаар маргалдах зэрэг орно. Миний эдгээр дурьдсан бол бүгд энгийн хүний зууралдсан сэтгэл. Эдгээр асуудал дээр бид юу ярихаа цэгнэх хэрэгтэй гэж би бодож байна. Энэ бол бидний ярьж байгаа үг яриагаа бясалгах юм. Хүний бодол гарахад үйлийн үр үүсдэг гэж үздэг учраас урьд лам хуврагууд эдгээр зүйлсийг их ноцтойд авч үздэг байсан. Тиймээс тэд “Бие, Үг яриа, Бодол” гэж бясалгадаг байсан. Тэдний ярьдаг байсан Биеэ бясалгах гэдэг нь муу үйл хийхгүй байх, Үг яриагаа бясалгах гэдэг нь юм ярихгүй байх, Бодлоо бясалгах гэдэг нь юу ч бодохгүй байх юм. Урьд үед сүм хийдийн мэргэжлийн бясалгалд эдгээр зүйлст хатуу шаардлага тавьдаг байсан. Бид өөрсөддөө бясалгагч хүний зан чанарын шалгуурын дагуу шаардах ёстой, юуг ярьж болох юуг ярьж болохгүйгээ мэдэж байвал зохино.

Есдүгээр лекц

Чигон ба биеийн тамир

Энгийн түвшинд хүмүүс чигон-ыг биеийн тамирын дасгалтай шууд холбоотой гэж үздэг. Мэдээж доод түвшинд биеийг сайжруулах талаас нь авч үзэхэд чигон ба биеийн тамирын дасгал хоорондоо адилхан. Гэхдээ дасгалын хэлбэр болон хэрэглэж байгаа аргын хувьд биеийн тамирын дасгалаас маш их ялгаатай. Биеийн тамираар хичээллээд эрүүл биетэй болохын тулд дасгалын хэмжээг нэмэгдүүлэх, биеийн тамирын дасгал бэлтгэл сургуулилтаа улам эрчимжүүлэх ёстой. Харин чигон бясалгалын хувьд бол яг эсрэгээр, хөдөлгөөнийг шаарддаггүй. Хөдөлгөөн хийсэн ч энэ нь зөөлөн, удаан бас дугуйрсан, тэр ч байтугай хөдлөхгүй, зогсонги хийдэг. Энэ нь биеийн тамирын дасгалаас хэлбэрийн хувьд маш их ялгаатай. Дээд түвшнээс авч үзэхэд чигон бол зөвхөн өвчин эдгээх бие эрүүлжүүлэхэд хязгаарлагдахгүй, бас дээд түвшний зүйлийг багтаадаг ба гүн агуулгатай юм. Чигон бол энгийн хүний түвшин дэх тэр өнгөцхөн зүйлүүд биш. Тэр бол ер бусын, мөн өөр өөр түвшинд өөр өөрөөр илэрдэг. Тэр бол энгийн хүний зүйлээс маш хол давсан зүйл юм.

Дасгалын мөн чанарыг авч үзэхэд тэдгээр нь бас их ялгаатай. Орчин үеийн спортын тэмцээний түвшинд биеэ бэлтгэх мөн тэр шаардлагад нийцэхийн тулд тамирчин хүн, ялангуяа одоогийн тамирчин дасгал сургуулилтаа нэмэгдүүлэх хэрэгтэй болдог. Тиймээс биеийнхээ эрч хүчийг үргэлж дээд хэмжээнд байлгадаг. Энэ зорилгод хүрэхийн тулд дасгал сургуулилтаа нэмэгдүүлж биеийн цусны эргэлтийг сайжруулах хэрэгтэй. Ингэснээр бодисын солилцоог хурдасгаж бие организмтаа үргэлж дээд

хэмжээнд байлгадаг. Яагаад бодисын солилцоог сайжруулах хэрэгтэй вэ? Учир нь тамирчин биеэ үргэлж хөгжүүлж тэмцээнд орох хамгийн дээд хэмжээнд байх хэрэгтэй. Хүний бие тоологдошгүй олон эснээс бүтдэг. Бүх эсүүд нь ийм нэг явцтай байдаг: Дөнгөж хуваагдсан эсийн амьдрах чадвар нь их хүчтэй, дээш хөгжих байдалд байдаг. Туйлдаа хүрэхэд эс нь цааш хөгжихгүй болно, зөвхөн доош унаж эхэлнэ, хамгийн доод хэмжээнд хүртлээ унана, дахиад шинэ эс түүнийг орлоно. Үүнийг өдрийн 12 цагаар жишээ болгон тайлбарлалбал, өглөөний 6:00 цагт эс хуваагдана гэж үзье, тэгээд өсөлтийн үедээ ордог. 8:00, 9:00 мөн 10:00 цаг бол бүгд маш сайн үе нь юм. Үд дунд болоход дахин дээшээ ахиж чадахгүй болно, зөвхөн доош уруудаж эхэлнэ. Энэ үед эсийн амьдрах хугацааны тал нь үлдсэн байдаг, гэхдээ энэ үлдсэн үе нь тамирчны тэмцээний нөхцөлд тохиромжгүй.

Тэгвэл яах хэрэгтэй вэ? Тэр хүн бэлтгэл сургуулилтаа нэмэгдүүлэх хэрэгтэй, цусны эргэлт сайжирч хуучин эсүүд шинэ хуваагдсан эсүүдээр солигдоно. Тэр ийм замаар явдаг. Өөрөөр хэлбэл эсийн амьдралын бүх явц нь дуусаагүй байхад дөнгөж тал амьдрах хугацаа өнгөрөнгүүт солигддог. Иймээс бие нь үргэлж хүчтэй ахицтай байдаг. Гэхдээ хүний эс нь ингэж хязгааргүй хуваагдаж чадахгүй, эсийн хуваагдал нь хязгаартай. Жишээ нь, хүний нэг насанд эс нь зөвхөн зуун удаа л хуваагдаж чадна гэж бодъё. Үнэндээ эс нь нэг саяас ч олон удаа хуваагдана. Энгийн хүний эс нь зуун удаа хуваагдахад тэр хүн зуу насална гэж бодъё. Гэтэл одоо энэ эс зөвхөн тал хугацаандаа амьдарсан, тэгэхээр тэр хүн зөвхөн тавь насалж л чадна. Гэхдээ бид тамирчдад ийм ноцтой асуудал гарахыг хараагүй, яагаад гэвэл өнөөгийн тамирчид гучин нас хүрэхээс өмнө тэмцээнээс гардаг. Ялангуяа одоогийн тэмцээний шаардлага их өндөр, шигшигдэж хасагдсан тамирчдын тоо бас их байдаг. Тэгээд тамирчин хүн хэвийн амьдралдаа буцаж орно, тийм их

өөрчлөлт гарсан харагдахгүй. Онолын хувьд үүний мөн чанар нь ийм байдаг: Биеийн тамирын дасгал хүнд биеэ эрүүл чийрэг байлгах боломж өгдөг, гэхдээ энэ нь хүний насыг богиносгоно. Гаднаас нь харахад арван хэдэн настай тамирчин хорин хэдэн настай хүн шиг, хорин хэдэн настай тамирчин гучин хэдтэй юм шиг харагддаг. Тамирчин хүн ихэвчлэн наснаасаа илүү овортой харагддаг. Хэрэв юманд давуу тал байвал бас сул тал байдаг, диалектикийн үүднээс харахад үнэндээ ийм л замаар явдаг.

Чигон-ы бясалгал бол биеийн тамирын дасгал сургуулилтын яг эсрэг, эрчимтэй хөдөлгөөн шаарддаггүй. Хөдөлгөөн хийсэн ч тэр нь хөнгөн, удаан мөн дугуйрсан хэлбэртэй. Энэ нь их зөөлөн аажмаар хийдэг, тэр байтугай хөдөлгөөнгүй зогсонги байдалд ордог. Та бүгд мэднэ, гүн амгаланд орж бясалгах арга бол хөдөлгөөнгүй суудаг, зүрхний цохилт, цусны эргэлт болон бүх зүйлс удааширна. Энэтхэгт усан дотор юмуу эсвэл шороонд булуулж хэдэн өдрөөр сууж чаддаг йогийн олон мастерууд байдаг. Тэд өөрсдийгээ бүрэн хөдөлгөөнгүй болгодог, түүнчлэн зүрхний цохилтоо хүртэл удирдаж чаддаг. Хүний эс өдөрт нэг удаа хуваагддаг гэж бодъё. Тэгвэл бясалгадаг хүн эсээ хоёр өдөрт нэг удаа, долоо хоногт нэг удаа, хагас сард нэг удаа эсвэл түүнээс урт хугацаанд нэг удаа хуваагддаг болгож чадна. Тэгвэл тэр аль хэдийн өөрийнхөө насыг уртасгасан болно. Энэ бол зөвхөн зан чанараа бясалгадаг амь биеэ бясалгадаггүй арга, ийм хэмжээнд хүрч чадна, бас өөрийнхөө насыг уртасгаж болно. Зарим хүн ингэж бодох байх, хүний амьдрал ба амьдрах нас нь урьдаас тогтоогдсон байдаг биш гэж үү? Хүн амь биеэ бясалгахгүйгээр яаж удаан насалж чадах юм? Тийм, хэрэв бясалгагч хүний түвшин Гурамсан ертөнцийг давах юм бол түүний нас уртасч болно, гэхдээ тэр маш их хөгшин харагдана.

Жинхэнэ амь биеийн бясалгалд цуглуулсан дээд энергийн бие бодь биеийн эсүүдэд тасралтгүйгээр хуримтлагддаг, түүний нягтрал нь улам нэмэгдэнэ, яваандаа энгийн хүний эсийг хязгаарлана, мөн аажмаар энгийн хүний эсийг орлоно. Тэр үед чанарын өөрчлөлт гарна, энэ хүн үүрд залуугаараа үлдэнэ. Мэдээж бясалгалын явц бол маш удаан бөгөөд аажим, мөн үүнд бүхнийгээ зориулах ёстой. Бие сэтгэлийн зовлонг тэсвэрлэн туулахад амаргүй. Хүн хүний хоорондох зан чанарын зөрчилд сэтгэл хөдлөхгүй байж чадах уу? Хувийн ашиг сонирхол дээр сэтгэл хөдлөхгүй байж чадах уу? Үүнийг хийхэд тун хэцүү, ийм зорилгод хүрье гээд л хүрчихдэг зүйл биш. Хүний зан чанар, хүний буян бүгд бясалгаж дээшилсэн цагт энэ зорилгод хүрч чадна.

Маш олон хүн чигон-ыг жирийн биеийн тамирын дасгалтай адилхан үздэг, үнэндээ энэ нь маш том ялгаатай, хоорондоо ижилхэн зүйл огт биш. Зөвхөн хамгийн доод түвшинд чий-гээр хичээллэхэд өвчнөө арилгах биеэ сайжруулахыг эрхэмлэдэг, эрүүл биетэй байх гэсэн хамгийн доод түвшний зорилго нь биеийн тамирын дасгалтай адилхан шинжтэй. Харин дээд түвшинд үндсээрээ ялгаатай. Чигон-д биеийг ариусгах нь бас зорилготой, мөн бясалгагчийг ер бусын зарчмын дагуу шаарддаг, энгийн хүний ёсоор шаардаж болохгүй. Харин биеийн тамирын дасгал бол зөвхөн энгийн хүний зүйл юм.

Бодол

Бодол гэдэг нь хүний сэтгэхүйн үйл ажиллагаа юм. Бясалгагчдын хүрээнд хүний бодлыг тархины үйл ажиллагаатай холбон хэрхэн авч үздэг вэ? Хүний сэтгэхүй (бодол)-ын янз бүрийн хэлбэрийг яаж авч үздэг вэ? Мөн эдгээр хэлбэрүүд нь яаж илэрдэг вэ? Орчин үеийн анагаах

ухаан хүний тархийг судлаад их олон асуултанд хариулж чадахгүй хэвээр байна, яагаад гэвэл энэ нь бидний биеийн гадаргыг судалдаг шиг амар зүйл биш. Улам гүн түвшинд, өөр өөр орон зайд бүгд янз бүрийн хэлбэртэй байдаг. Гэхдээ энэ нь бас зарим чигон багшийн хэлсэнтэй адилгүй. Зарим нэг чигон багш өөрсдөө ч ямар учиртайг нь мэдэхгүй, үүнийг тодорхой ч тайлбарлаж чадахгүй. Тэр тархины нөлөөгөөр үүссэн бодол ямар нэгэн зүйл хийж чаддаг гэж үздэг, түүний санаагаар эсвэл түүний бодлын нөлөөгөөр хийгддэг гэдэг. Үнэн хэрэгтээ тэр бодлоороо хийсэн биш.

Бид эхлээд хүний бодол хаанаас үүсдэг талаар ярья. Эртний Хятадад “зүрхний бодол” гэсэн үг байдаг. Яагаад зүрхний бодол гэж хэлдэг вэ? Хятадын эртний шинжлэх ухаан маш өндөр хөгжилтэй байсан, учир нь тэр судалгаа шинжилгээ нь хүний бие, амь болон орчлон ертөнц эдгээр зүйлд шууд чиглэн судалдаг байсан. Зарим хүн үнэхээр тэдний зүрх юм бодож байгааг мэдэрдэг, харин заримд нь тэдний тархи юм бодож байгаа мэт мэдрэгддэг. Яагаад ийм байдал гардаг вэ? Түүний хэлдэг зүрхний бодол гэдэг нь бас үндэслэлгүй зүйл биш юм. Яагаад гэвэл бидэнд жирийн хүний Эзэн сүнс нь маш жижигхэн байгаа нь харагддаг. Хүний тархинаас гардаг бодит мэдээлэл нь тархины өөрийн үйл ажиллагаанаас үүсдэггүй, тэдгээрийг тархи гаргадаггүй харин Эзэн сүнс гаргадаг. Хүний Эзэн сүнс зөвхөн ниван ордонд оршдоггүй. Дао-гийн системд ярьдаг ниван ордон бол бидний орчин үеийн анагаах ухаанд илрүүлсэн тархины булцуут булчирхай юм. Хэрэв Эзэн сүнс ниван ордонд байрлаж байвал хүн үнэхээр тархи юм бодож байна, мэдээлэл гаргаж байна гэж мэдэрнэ. Хэрэв энэ нь зүрхэнд байвал, хүн үнэхээр зүрх юм бодож байна гэж мэдэрнэ.

Хүний бие бол нэг жижиг орчлон ертөнц. Бясалгагч хүний бие дэх маш олон амь бодь байршлаа сольж болно. Хэрэв Эзэн сүнс байраа сольж гэдсэнд очвол, үнэхээр гэдэс

юм бодож байгаа мэдрэгдэнэ, хэрэв Эзэн сүнс хөлний булчинд эсвэл өсгийд очвол, хөлний булчин эсвэл өсгий юм бодож байх шиг мэдэрнэ. Ийм л байдаг, сонсоход үнэмшмээргүй юм шиг. Чиний бясалгалын түвшин тийм өндөр биш байхад ийм байдал гардгийг мэдэрнэ. Хүний биед Эзэн сүнс, зан ааш, зан чанар болон хувийн мөн чанар гэх мэт зүйлс байхгүй бол энэ нь зүгээр нэг мах, өөрийн гэсэн өвөрмөц шинжтэй бүхэл бүтэн хүн болж чадахгүй. Тэгвэл хүний тархи ямар үүрэг гүйцэтгэдэг вэ? Миний харж байгаагаар хүний тархи бол энэ бодит орон зайд зөвхөн боловсруулалт хийдэг үйлдвэр. Жинхэнэ мэдээлэл нь Эзэн сүнснээс гардаг. Гэхдээ тэр гаргадаг нь үг хэл биш, харин тодорхой утга санаа илэрхийлсэн орчлон ертөнцийн мэдээлэл юм. Бидний тархи ийм үүрэг, мэдээллийг хүлээж аваад түүнийг боловсруулан бидний энэ үг яриа, ийм илтгэх хэлбэр болгон хөрвүүлнэ. Бид гарын хөдөлгөөнөөр, нүдний харцаар болон бүх үйл хөдлөлөөр түүнийг илэрхийлдэг, тархи бол зөвхөн ийм л нөлөө үзүүлдэг. Жинхэнэ тушаал, жинхэнэ бодол нь хүний Эзэн сүнснээс гардаг. Хүмүүс үүнийг үргэлж тархины шууд ба биеэ даасан үйл ажиллагаа гэж ойлгодог. Үнэн хэрэгтээ Эзэн сүнс заримдаа зүрхэнд байхад хүн үнэхээр түүний зүрх нь юм бодож байна гэж мэдэрдэг.

Одоо хүний бие шинжлэн судлаачид хүний тархинаас гардаг зүйл нь цахилгаан долгион шиг хэлбэртэй зүйл гэж үздэг, бид үнэн хэрэгтээ ямар зүйл гаргадгийг одоо ярихгүй, гэхдээ тэд үүнийг бие бодиор оршдог гэж хүлээн зөвшөөрсөн, тиймээс энэ бол мухар сүсэг биш юм. Энэ гаргасан зүйл нь ямар нөлөөтэй байдаг вэ? Зарим чигон багш “Би бодлоор юм зөөнө, бодлоор чиний тэнгэрийн мэлмийг нээнэ, бодлоор өвчнийг чинь эдгээнэ” гэх мэтийн зүйл ярьдаг. Үнэндээ зарим чигон багш өөрсдийгөө ямар ер бусын чадвартайгаа мэддэггүй, бас ойлгодоггүй. Тэр юу хийхийг хүснэ түүнийгээ нэг бодлоор л хийж чаддаг.

Үнэндээ бол түүний бодол нь үйлчилж байна, ер бусын чадвар нь тархины бодлоор удирдагддаг, энэ удирдлагын дор тодорхой зүйлийг хийдэг. Гэхдээ бодол нь өөрөө ямар ч зүйл хийж чадахгүй. Бясалгагч хүн ямар нэгэн зүйл хийхэд түүний ер бусын чадвар нь нөлөө гаргаж байгаа юм.

Ер бусын чадвар бол хүний биеийн далдын чадвар юм. Бидний хүн төрөлхтөний нийгмийн хөгжлийн явцад хүний тархины сэтгэхүй улам нарийн төвөгтэй болж ирсэн, бодит зүйлийг улам чухалд үзэх болсон, орчин үеийн багаж хэрэгсэлд улам их найдах болсон. Үүний улмаас хүний төрөлхийн чадварууд аажмаар буурсан. Дао-гийн системд, үүссэн эх үндсэндээ буцах, үнэнд хүрэх гэж ярьдаг. Бясалгалын явцад чи үнэнд тэмүүлэх ёстой, эцэст нь үүссэн эх үндсэндээ буцна, үнэнд хүрнэ, төрөлх мөн чанартаа буцна, чи өөрийнхөө эдгээр төрөлх чадварыг илрүүлж чадна. Одоо бид үүнийг ер бусын чадвар гэж нэрлэдэг, үнэндээ эдгээр нь бүгд хүний төрөлх чадвар юм. Хүний нийгэм дэвшингүй болж байгаа мэт харагдавч харин үнэн хэрэг дээрээ уруудаж байна, бидний орчлон ертөнцийн мөн чанараас улам холдож байгаа юм. Урд би Жан Гуолао⁴⁴ хойшоо харж илжгээ унадаг байсан тухай ярьсан, хүмүүс үүнийг ямар учиртайг нь магадгүй ойлгоогүй байх. Тэр урагшаа явах нь хойшоо ухарч байна, хүн орчлон ертөнцийн мөн чанараас улам бүр холдож байна гэж олж мэдсэн. Орчлон ертөнцийн хувьслын явцад, ялангуяа одоогийн таваарын эдийн засгийн том давалгаанд орсноос хойш маш олон хүний ёс суртахуун эвдэрч тэд Үнэн, Нинжин, Тэвчээр гэсэн орчлон ертөнцийн мөн чанараас холдож байна. Энгийн хүний тэр урсгалаар явсан хүмүүс хүн төрөлхтөний ёс суртахуун ямар хэмжээнд хүртэл доройтсоныг

⁴⁴ Жан Гуолао-Дао-г үндэслэгч найман гэгээрэгчийн нэг

мэдрэхгүй, иймээс зарим хүн эдгээрийг сайн зүйл гэж боддог, зөвхөн зан чанар нь бясалгаад дээшилсний дараа эргээд харахад хүн төрөлхтөний ёс суртахуун ийм ялзарсан аймшигтай байдалд хүрсэнийг олж мэднэ.

Зарим чигон багш ингэж ярьдаг, би чиний ер бусын чадварыг нээж өгч чадна. Тэр ямар ер бусын чадварыг нээж өгөх юм? Түүний ер бусын чадвар энергигүй бол үйлчлэхгүй. Түүнд ер бусын чадвар үүсээгүй байхад чи түүнийг яаж нээх юм? Түүний ер бусын чадвар нь өөрийн энергиэр адислагдаж гараагүй байхад чи түүнийг нээж өгч чадах юм уу? Үндсэндээ боломжгүй. Тэдний ярьж байгаа ер бусын чадварыг нээх гэдэг нь зөвхөн аль хэдийн чамд үүссэн ер бусын чадварыг чиний тархитай холбож өгч чиний бодлын удирдлагаар нөлөө гаргадаг. Үүнийг тэд ер бусын чадвар нээж өгсөнд тооцдог, үнэндээ тэд ямар ч ер бусын чадвар чамд нээж өгөөгүй, зөвхөн ийм л нэг жоохон үйлдэл хийсэн.

Бясалгагч хүний хувьд, хүн бодлоороо өөрийн ер бусын чадварыг удирдаж үйл хийдэг, харин энгийн хүний хувьд, бодол нь хүний дөрвөн мөч, мэдрэлийн эрхтэнг удирдаж үйлдэл хийдэг. Энэ нь үйлдвэрийн контор шиг, захирлын албан тасалгаанаас тушаал гарч бодит ажлыг цех тасгууд хийж гүйцэтгэхтэй адил. Мөн цэргийн удирдах төв шиг, командын штаб тушаал өгч бүх армийг удирдаж үүрэг гүйцэтгэхтэй адил. Би өөр газруудаар явж лекц уншиж байхдаа орон нутгийн чигон судлалын нийгэмлэгийн удирдагчтай энэ асуудлаар байнга ярьдаг байсан. Тэд бүгд их гайхширдаг байсан, бид үргэлж хүний сэтгэхүй хэр их далдын энерги, далдын мэдрэхүйтэй болохыг судалсаар ирсэн. Үнэн хэрэгтээ энэ нь тийм биш, тэд эхнээсээ л замаасаа хазайсан юм. Би хэлбэл, хүний биеийн шинжлэх ухааныг судалъя гэвэл хүн бодол санаандаа хувьсал хийх

хэрэгтэй. Энгийн хүний зүйлчлэн судалдаг танин мэдэхүйн аргаар ер бусын зүйлсийг ойлгож болохгүй.

Бодлыг ярихад бас хэдэн хэлбэртэй байдаг. Жишээ нь зарим хүн далд мэдрэхүй, зөн мэдрэхүй, онгод, зүүд гэх мэтийг ярьдаг. Зүүдний талаар ярихад үүнийг аль ч чигон багш тайлбарлахыг хүсдэггүй. Учир нь чи төрөхдөө орчлон ертөнцийн маш олон орон зай болгонд чиний биес нэгэн зэрэг төрдөг, тэдгээр чиний биес чамтай хамт бүхэл бүтэн нэг цогц бие болдог, бүгд хоорондоо харилцаатай байдаг, сэтгэхүйгээрээ холбоотой байдаг. Түүнчлэн чиний биед Эзэн сүнс, Дэд сүнс, мөн бусад янз бүрийн амь бодийн хэлбэрүүд оршдог. Эс болгонд болон таван цул зургаан саванд бусад орон зайнд орших чиний хэлбэртэй дүрст мэдээлэл агуулагддаг, тиймээс энэ нь туйлын их нарийн төвөгтэй, зүүдэнд магадгүй нэг хоромд ийм янзтай байхад, дараагийн хоромд өөр нэг байдалтай болдог. Ер нь тэдгээр нь хаанаас ирдэг вэ? Анагаах ухаанд үүнийг хүний тархины бор давхаргад өөрчлөлт гарснаас болдог гэж үздэг. Энэ нь бодит хэлбэрээр гарсан реакцийн илрэл. Үнэндээ энэ бол өөр орон зайны мэдээллийн нөлөөлөл юм. Тиймээс чи зүүд зүүдлэхдээ самуурсан ухаантай юм шиг байдаг. Энэ бүгд чамтай ямар ч хамаа байхгүй, чамд үүнд анхаарлаа хандуулах хэрэггүй. Чамтай шууд хамааралтай нэг янзын зүүд байдаг. Бид ийм зүүдийг “зүүд” гэж хэлж болохгүй. Чиний Эзэн бодол, өөрөөр хэлбэл Эзэн сүнс зүүдэндээ магадгүй чиний ойрын хүн чам дээр ирсэн гэж зүүдэлсэн, эсвэл үнэхээр ямар нэгэн зүйлийг мэдэрсэн, харсан эсвэл ямар нэгэн зүйлийг хийсэн гэж зүүдэлж болно. Тэгвэл энэ нь чиний Эзэн сүнс үнэхээр өөр орон зайд ямар нэгэн зүйл хийсэн, ямар нэгэн зүйл харсан бас үйлдсэн, бодол нь тов тодорхой бас бодит байдаг. Ийм зүйлс үнэндээ оршдог, гэхдээ энэ нь өөр материаллаг орон зайд болдог, өөр цаг хугацааны орон зайд хийгддэг. Чи үүнийг зүүд гэж хэлж болох юм уу? Болохгүй. Чиний бодит бие энд үнэндээ

унтаж байгаа болохоор үүнийг зүүд гэж хэлэхээс. Зөвхөн ийм зүүд л чамтай шууд хамаатай байдаг.

Хүний онгод, зөн мэдрэхүй, далд мэдрэхүй гэх мэт нэрсийг эрдэмтэд сэдсэн биш гэж би хэлнэ. Эдгээр нь зохиолчид энгийн хүний заншил дээр тулгуурлан өгсөн нэр үг, шинжлэх ухааны мөн чанартай биш. Хүмүүсийн ярьдаг далд мэдрэхүй гэж чухам юу вэ? Үүнийг тодорхой ярихад хэцүү, бүрхэг. Учир нь хүний янз бүрийн мэдээлэл нь маш их нарийн төвөгтэй, бүдэг бадаг жоохон ой санамж байгаатай адил юм. Хүмүүсийн ярьдаг зөн мэдрэхүйн талаар тайлбарлахад амархан. Зөн мэдрэхүй гэдгийг тайлбарлахдаа ер нь хүн ямар нэгэн зүйлийг өөрөө санаандгүйгээр хийхийг хэлдэг. Хүмүүс үүнийг дандаа санаандгүйгээр хийсэн, зориудаар хийсэн биш гэж ярьдаг. Энэ зөн мэдрэхүй гэдэг нь бидний ярьсан Дэд бодолтой адил. Хүний Эзэн бодол суларсан үед буюу тархийг удирдахгүй байхад хүн унтаж байгаа юм шиг эсвэл зүүдэндээ санаандгүй байдалд Дэд бодлоор өөрөөр хэлбэл Дэд сүнсэнд амархан эзэмдүүлдэг. Энэ үед Дэд бодлоор зарим зүйлийг хийж чаддаг, өөрөөр хэлбэл чи санаандгүй байдалд хийсэн гэсэн үг. Гэхдээ эдгээр хийгдсэн зүйлүүд нь ихэвчлэн муу болдоггүй, яагаад гэвэл Дэд сүнс өөр орон зайнаас асуудлын мөн чанарыг хардаг, манай энгийн хүний нийгэмд төөрдөггүй. Иймээс тэр хийсэн зүйлээ эргэж хараад, “Би үүнийг ямар муу хийгээ вэ? Би өөрийн ухаантай байсан бол ингэж хийхгүй байсан” гэнэ. Гэхдээ одоо чи үүнийг муу хийсэн гэж хэлж магад, харин үүнийг арав хоногийн дараа эсвэл хагас сарын дараа эргэж харвал “Пөөх, үүнийг ямар сайн хийгээ вэ! Би яаж ингэж хийж чадав аа?” гэж хэлдэг. Ийм зүйл их гардаг. Учир нь Дэд бодол нь тухайн үед ямар үр дүн үзүүлэхийг чухалчилдаггүй, гэхдээ ирээдүйд энэ нь сайн үр дүн харуулна. Гэхдээ зарим зүйлүүд нь ирээдүйд ямар ч ач холбогдолгүй зөвхөн тэр үедээ л нөлөө үзүүлдэг. Дэд бодол

нь эдгээр зүйлийг хийвэл магадгүй тэр дор нь маш сайн хийнэ.

Бас өөр нэг хэлбэр байдаг, энэ нь зарим маш сайн төрөлхийн суурьтай хүн дээд амиар удирдуулж зарим зүйлийг хийдэг. Мэдээж энэ бол өөр асуудал, энд ярихгүй. Бид хүний өөрөөс нь гардаг бодлын талаар голчлон ярилцана.

Онгодын хувьд гэвэл энэ нь бас бичгийн хүмүүсийн гаргасан хэллэг. Онгод гэдгийг ерөнхийд нь хүний амьдралын туршид хуримтлуулсан мэдлэг боловсрол хоромхон зуур гарахыг хэлдэг гэж ойлгодог. Би хэлбэл, хэрэв материализмын үүднээс харвал хүн амьдралдаа хичнээн их мэдлэг хуримтлуулна, тархи ухаанаа хэр сайн ашиглана тэр хүн улам хурц ухаантай болно гэж үздэг. Хүн тархи ухаанаа ажиллуулж байхад өөрийн мэдлэг тасралтгүй гарах ёстой, онгод орох гэсэн асуудал байх учиргүй. Аливаа онгод гэдэг нь, эсвэл онгод ороход ийм байдлаар гардаггүй. Ер нь хүн тархиа ажиллуулахдаа мэдлэг ухаанаа шавхтал хэрэглэвэл эцсийн мухардалд орсон мэт болдог, бичиг номоо цааш нь үргэлжлүүлж чадахгүйд хүрдэг. Хөгжмийн нэг ая зохиоход санаа орж ирэхгүй сэтгэхүй нь дутна, эсвэл ямар нэгэн судалгаа шинжилгээний төсөл дээр ажиллаад үргэлжлүүлж чадахгүйд хүрнэ. Ийм үед хүн ихэнхдээ ядарна, тамхины иш шалаар нэг хөглөрнө, бухимдаад толгой нь өвдөнө бас юу ч толгойд нь орохоо болино. Эцэст нь ямар нөхцөлд онгод ирдэг вэ? Тэр хүн их ядраад ингэж бодно, “Заа больё, жоохон амраадахъя.” Учир нь Эзэн бодол тархийг хүчтэй эзэмдэх тусам өөр амь бодь оролцож улам чадахгүй. Тэр завсарлага авч тархиа амраахад гэнэт түүний толгойд нь ямар нэгэн зүйл санаандгүй орж ирнэ. Ихэнхдээ онгод ингэж ирдэг.

Тэгвэл яагаад энэ үед онгод ордог вэ? Учир нь хүний тархи Эзэн бодлын нөлөөн дор байхад, хүн толгойгоо улам ажиллуулах тусам Эзэн бодол тархийг улам эзэмддэг, тиймээс Дэд бодол орж чадахгүй. Хүн толгойгоо өвдтөл юм бодож шаналахад, Дэд бодол энэ биеийн нэг хэсэг, нэг эхийн хэвлийгээс зэрэг төрсний хувьд энэ биеийн зарим хэсгийг удирддаг, тэр бас дагаж таагүй болно, толгой нь өвдөнө, их өвдөнө. Эзэн бодол суларсан үед Дэд бодол өөрийнхөө мэддэг зүйлээ тархинд тусгадаг. Тэр өөр орон зайд хэргийн мөн чанарыг харж чаддаг учраас түүний дагуу ажлыг зохих ёсоор хийж дуусгана, бичгийн ажлыг гүйцэтгэнэ, бас зохионо.

Зарим хүн “Тэгвэл бид Дэд бодлыг ашиглая” гэнэ. Дөнгөж саяхан нэг хүн бичгээр: Яаж Дэд бодолтой холбогдох вэ? гэж асуусан. Чи дөнгөж бясалгаж эхэлж байгаа учраас холбогдож чадахгүй, чамд ямар ч чадвар байхгүй. Чи холбогдох гэж бодохгүй хол байсан нь дээр, тэр бол зууралдсан сэтгэл. Зарим хүн ингэж бодож магад, “Бид Дэд бодлыг хэрэглээд өөрсдийнхөө эд баялгийг өсгөж мөн хүн төрөлхтөний нийгмийн хөгжлийг хурдасгаж болох юм биш үү?” Болохгүй! Яагаад вэ? Учир нь чиний Дэд бодлын мэдэж байгаа зүйл нь их хязгаарлагдмал. Орон зай их нарийн төвөгтэй, их олон давхаргатай байдаг учраас орчлон ертөнцийн бүтэц зохион байгуулалт нь тун их нарийн. Дэд бодол зөвхөн өөрийн байгаа орон зайн зүйлийг л мэднэ, түүний орон зайнаас гарсан зүйлийг тэр мэдэхгүй. Түүнээс гадна маш олон босоо давхаргын янз бүрийн орон зай байдаг. Хүн төрөлхтний хөгжлийг зөвхөн маш өндөр түвшний дээд зэргийн амь бодиуд удирддаг, мөн энэ нь хөгжлийн зүй тогтлын дагуу явагддаг.

Бидний энгийн хүний нийгмийн хөгжил нь түүхийн зүй тогтлын дагуу явагддаг. Та нар үүнийг тодорхой замаар хөгжүүлж тодорхой зорилгод хүргэхийг хүсч магад, гэвч

тэдгээр дээд амь бодь ингэж боддоггүй. Дээр үеийн хүмүүс өнөөгийн нисэх онгоц, галт тэрэг болон унадаг дугуйн талаар бодож байгаагүй гэж үү? Тэд энэ талаар бодож байгаагүй биш гэж би хэлнэ. Түүх тэр шатанд хүртэл хөгжөөгүй учраас тэд ч бүтээж чадаагүй. Үүнийг гаднаас нь энгийн хүний онолоор юмуу одоогийн хүн төрөлхтний мэдлэгийн хүрээнээс авч үзвэл тэр үеийн шинжлэх ухаан тухайн түвшинд хүрээгүй байсан учраас түүнийг бүтээж чадаагүй гэж тайлбарлана. Үнэндээ хүн төрөлхтний шинжлэх ухаан яаж хөгжвөл зүй зохистой нь түүхийн зохицуулалтын дагуу явагддаг. Хэрэв чи үүнийг хүний хүслээр өөрчилж тодорхой зорилгодоо хүрэх гэвэл чадахгүй. Мэдээж зарим хүнд Дэд бодол нь амархан нөлөөлдөг. Нэгэн зохиолч хэлэхдээ: Би ном бичихдээ өдөрт хэдэн арван мянган үгс бичиж чадна, ердөө ч ядардаггүй. Хэрэв би хүсвэл үүнийг маш хурдан бичиж чадна, тэгсэн ч хүмүүс уншиж үзээд их сайн болж гэдэг. Яагаад тийм байдаг вэ? Энэ бол түүний Эзэн бодол, Дэд бодол хамт оролцсоны үр дүн, түүний Дэд бодол нь тал үүргийг гүйцэтгэдэг. Гэхдээ үргэлж ийм байдаггүй, ихэнх Дэд бодол ердөө оролцдоггүй. Чи түүгээр юм хийлгэх бодолтой байвал энэ нь сайнаар эргэхгүй, харин ч эсрэгээр нөлөөлнө.

Ариун амгалан сэтгэл

Олон хүн бясалгахдаа амгалан байдалд орж чаддаггүй, энд тэнд чигон багш хайж очоод ингэж асуудаг: Багшаа, би бясалгахдаа яагаад амгалан байдалд орж чадахгүй байна вэ, бясалгалгахаар суунгуут л толгойд элдвийн зүйл бодогдоно, янз бүрийн бодол санаа орж гарна гэдэг. Энэ нь яг уулыг хөмрүүлж, гол мөрнийг эргүүлж бүх зүйлсийг ил гаргасан мэт толгойд бүгд эргэлдэж амгаланд орж ердөө ч чаддаггүй. Яагаад амгаланд орж чаддаггүй вэ? Зарим хүн үүнийг

ойлгохгүй, ямар нэгэн нууц арга байх ёстой гэж үздэг. Тэд нэртэй Багшийг олж очоод гуйна: Надад амгаланд ордог болох ямар нэгэн онцгой арга зааж өгөөч гэнэ. Миний харснаар энэ бол гаднаас хүссэн. Чи өөрийгөө дээшлүүлэх бодолтой байвал дотроосоо хайх хэрэгтэй, сэтгэлдээ анхаар. Зөвхөн тэгж чадвал л чи жинхэнэ дээшилнэ, мөн бясалгаж суухдаа амгаланд орж чадна. Амгаланд орох чадвар бол гон юм, хэр гүн амгаланд орж чадахаас тэр хүний түвшин харагдана.

Энгийн хүн хүслээрээ яаж амгалан байдалд орж чадах юм? Төрөлхийн маш сайн суурьтай хүн биш бол амгаланд орж огтхон ч чадахгүй. Өөрөөр хэлбэл хүн амгалан байдалд орж чаддаггүйн үндсэн учир нь бол арга барилын асуудал биш, ямар нэг онцгой чадварт байгаа юм биш, харин энэ бол чиний бодол, сэтгэл ариун бишээс юм. Чи энгийн хүний нийгэмд хүн хүний хоорондын зөрчил дунд хувийн ашиг, янз бүрийн хүсэл, зууралдсан сэтгэлийн төлөө хүнтэй тэмцэлдэнэ, булаацалдана. Эдгээр зүйлийг орхиж чадахгүй, үүнд хөнгөн хандаж чадахгүйгээр чи амгаланд орохыг хүсвэл тийм амархан гэж үү? Зарим хүн чигон-оор хичээллэхдээ би үүнд итгэхгүй, би элдвийн юм бодохгүйгээр амгаланд орчихно гэнэ. Дөнгөж ингэж бодож дуустал түүний бодол нь оволзоод гарч ирнэ. Энэ бол чиний сэтгэл санаа ариун бус байгаагийнх юм, иймд чи амгаланд орж чадахгүй.

Зарим хүн миний үзэл бодолтой санал нийлэхгүй байж мэднэ, “зарим чигон багш хүмүүст ямар нэгэн арга барил хэрэглэхийг заадаг биз дээ? ” гэнэ. Бодлоо төвлөрүүлэх, төсөөлөх, анхаарлаа даньтиан дээрээ төвлөрүүлэх, дотогшоо даньтиан луугаа ажиглах, эсвэл Буддын нэрийг унших гэх мэт. Эдгээр нь бол нэг төрлийн арга юм, гэхдээ зөвхөн арга барилын төдий зүйлс биш, харин нэг төрлийн чадварын илрэл юм. Тэгэхээр энэ чадвар нь бидний бясалгаж байгаа

зан чанар болон бидний дээшилж байгаа түвшинтэй шууд холбоотой. Тэр ч зөвхөн иймэрхүү арга барил хэрэглээд амгаланд орж чаддаг болохгүй. Чи итгэхгүй бол туршаад үз. Чиний янз бүрийн хүсэл, зууралдсан сэтгэл маш хүчтэй байгаа, юуг ч орхиж чадахгүй байхад амгаланд орж чадах үгүйгээ өөрөө үз. Зарим хүн Буддын нэрийг уншихад үйлчилдэг гэдэг. Буддын нэрийг уншаад чи амгаланд орж чадна гэж үү? Зарим хүн ингэж хэлдэг, Будда Амитабагийн бясалгалын номоор хичээллэхэд амархан. Буддын нэрийг уншаад байхад л болоо. Чи уншаад үздээ? Би үүнийг чадвар гэнэ. Чи үүнийг амархан гэж хэлнэ, харин би үүнийг амархан биш гэж хэлнэ. Аль ч номын бясалгал амаргүй.

Та бүгд Шагжамүни “самадид орох” гэж заасныг мэднэ. Самадид орохын өмнө тэр юу заасан бэ? Тэр “цээрлэх” дэг заасан, бүх дур хүсэл, автах сэтгэлийг хориглоно юу ч байхгүй болно, дараа нь самадид орж чадна. Ийм л ёстой биш гэж үү? Гэхдээ “самадид орох” бол бас нэгэн чадвар юм, чи шууд цээрлэх дэгд бүр мөсөн хүрч чадахгүй. Аажмаар бүх муу зүйлийг цээрлэсний дараа самадид орох чадвар гүехнээс гүнд хүрнэ. Хүн Буддын нэрийг уншихдаа нэг сэтгэлээр уншина, сэтгэлдээ өөр юу ч бодохгүй, тархиныхаа бусад хэсгийг ямар ч мэдрэмжгүй болтол уншина, юу ч мэдэхгүй нэг бодлыг арван мянган бодлын оронд ортол уншина, “Будда Амитаба” гэсэн үг болгон нүдэнд харагдтал уншина. Энэ нь чадвар биш гэж үү? Ийм хэмжээнд шууд хүрч чадна гэж үү? Чадахгүй. Ингэж хийж чадахгүй бол амгаланд орж чадахгүй нь мэдээж. Үнэмшихгүй бол туршаад үз. Амандаа давтан уншаад л гэхдээ сэтгэлдээ элдвийг бодно: Манай ажлын газрын дарга яагаад надад дургүй байдаг юм бол? Миний энэ сарын нэмэгдэл цалин их бага гарлаа. Энэ талаар бодох тусам улам уур нь хүрнэ, амандаа Буддын нэрийг давтан уншсаар л байна. Чи хэлдээ энэ нь бясалгал хийж байгаа гэж үү? Энэ нь чадвартай холбоотой асуудал биш гэж үү? Энэ нь чиний

сэтгэл санаа ариун бус байгаа хэрэг биш гэж үү? Зарим хүний тэнгэрийн мэлмий нээгдсэн, дотогшоо даньтиан луугаа харж чаддаг. Хэвлийн доод хэсэгт хуримтлагддаг дань энэ энергийн бие бодь улам ариусах тусам улам гэрэлтдэг болно. Харин ариун биш бол хар бараан харагддаг. Даньтиан луу харж дотогшоо дань-ийг ажиглаад амгаланд орж чадах уу? Амгаланд орж чадахгүй, энэ нь арга барилаар хийдэг зүйл биш. Гол учир нь хүний сэтгэл санаа, бодол нь цэвэр ариун бишээс юм. Чи дотогшоо даньтиан луугаа харахад дань гэрэлтсэн гоё харагдана. Хормын дараа энэ дань орон сууцны байр болж хувирна. “Энэ өрөөнд манай хүү гэрлэхдээ орно, тэр өрөөнд манай охин сууна, нөгөө өрөөнд хөгшин бид хоёр амьдарна, дунд талын өрөөг зочны өрөө болгоно. Ямар гоё вэ! Энэ байрыг надад хувиарлах болов уу? Би үүнийг ямар аргаар авахаа бодох хэрэгтэй. Яах хэрэгтэй вэ?” Хүн эдгээр зүйлд л зууралддаг. Чи хэлдээ, чи амгаланд орж чадах юм уу? Ийм нэг үг байдаг, “Би энэ энгийн хүний нийгэмд ирэхэд зочид буудалд хэдэн өдөр буухтай адил, тэгээд яараад буцна.” Зарим хүн энэ газарт хоргодоод өөрийнхөө жинхэнэ гэрээ мартчихдаг.

Жинхэнэ бясалгалд хүн дотоод сэтгэлээ, өөрийнхөө дотор луу бясалгах ёстой, дотроосоо хай гаднаас хайж болохгүй. Зарим номын бясалгалд Будда бол өөрийн сэтгэлд байна гэдэг нь бас ёс зүйтэй. Зарим хүн энэ үгийг буруу ойлгодог, Будда сэтгэлд байдаг гэж ярихад өөрийгээ Будда мэт, сэтгэлдээ нэг Будда байгаа юм шиг боддог. Түүний ингэж ойлгох нь буруу биш гэж үү? Үүнийг ингэж ойлгож яаж болох юм. Учир нь, чи дотогшоо сэтгэлээ бясалгаад үр дүнд хүрч болно, ийм л утгатай юм. Чиний биед Будда яаж байх юм? Чи өөрөө бясалгаж үр дүнд хүрэх ёстой.

Чиний амгалан байдалд орж чадахгүй байгаа шалтгаан нь бол чиний бодол санаа хоосон биш, тийм өндөр түвшинд

хүрээгүй учраас юм. Түүнд зөвхөн шат шатаар ахиж байж хүрнэ, чиний түвшин дээшлэхтэй уялдан явагдана. Чи зууралдсан сэтгэлээсээ салахад чиний түвшин өснө, мөн чиний гүн амгаланд орох чадвар ч бас сайжирна. Хэрэв чи ямар нэгэн арга барил хэрэглэж амгаланд орохыг хүсвэл би үүнийг гаднаас хүсч байна гэж хэлнэ. Харин чигон бясалгалд буруудах, ариун бус замаар орох гэдгийг хүн гаднаас хүсэхийг хэлдэг. Ялангуяа Буддын шашинд, чи гаднаас хүсвэл чамайг буг чөтгөрийн замаар орсон гэж хэлнэ. Жинхэнэ бясалгалд хүн сэтгэлээ бясалгах ёстой, зөвхөн өөрийнхөө зан чанарыг дээшлүүлсэн цагт чиний сэтгэл ариун амгалан, үйлгүй болно. Чи зөвхөн зан чанараа дээшлүүлэхэд манай энэ орчлон ертөнцийн мөн чанарт уусч хүний янз бүрийн дур хүсэл, зууралдсан сэтгэл болон бусад муу зүйлүүдээсээ салж чадна. Зөвхөн тэр үед чи өөрийнхээ муу зүйлээ хаяж дээшилж чадна. Орчлон ертөнцийн мөн чанарт хязгаарлагдахгүй бол чиний буяны бие бодь гон-д хувирна. Энэ нь ийм уялдаа холбоотой биш гэж үү? Энэ бол зарчим!

Хүн яагаад амгалан байдалд орж чадахгүй байгаагийн шалтгаан бол бясалгагч хүний шаардлагын хэмжээнд хүрээгүйгээс юм. Одоо хүмүүст дээд түвшин лүү бясалгахад ноцтой үймүүлдэг бодит зүйлс байдаг, тэдгээр нь бясалгагч хүнд маш хүчтэй нөлөөлдөг. Та бүгд мэдэж байгаа, шинэчлэл өөрчлөлт нээлттэй байдал гарснаар эдийн засаг чөлөөтэй болсон, улс төрөөс хязгаарлах байдал бас багассан. Шинэ технологи маш ихээр нэвтрэн орж мөн хүний амьдралын түвшин дээшилсэн. Энгийн хүн бүгд үүнийг сайн зүйл гэж боддог. Гэхдээ үүнийг диалектикийн үүднээс хоёр талаас нь авч үзэхэд шинэчлэл өөрчлөлт нээлттэй байдлын хажуугаар өөр хэлбэрийн муу зүйлс бас орж ирсэн. Уран зохиолын бүтээлд жоохон садар самуун зүйл бичихгүй бол тэр ном зарагдахгүй янзтай, учир нь борлуулалтын хэмжээг ярьдаг. Хэрэв кинонд болон

телевизийн нэвтрүүлэгт эротик үзэгдэл гаргахгүй бол үзэгчидгүй болчих юм шиг үзэгчдийн тооны асуудал яригддаг. Урлагийн бүтээлийн хувьд жинхэнэ урлаг юм уу эсвэл юу хийж байгаа нь мэдэгдэхгүй болсон, эртний Хятадын урлагт ийм зүйлс байхгүй. Түүнчлэн Хятад үндэстний уламжлал нь хэн нэгэн хүний үүсгэсэн зүйл биш, хэн нэгнээр бүтээгдсэн биш. Би түүхийн өмнөх үеийн соёлыг ярихдаа юм бүхэнд өөрийн эхлэл байдаг гэж хэлсэн. Хүн төрөлхтний ёс суртахууны хэм хэмжээ гажуудсан, өөрчлөлт гарсан, сайн мууг цэгнэдэг шалгуур бүгд өөрчлөгдсөн, энэ бол энгийн хүмүүсийн асуудал. Энэ орчлон ертөнцийн мөн чанар болох Үнэн, Нинжин, Тэвчээр гэсэн шалгуур нь сайн муу хүнийг цэгнэх цорын ганц шалгуур юм, энэ нь өөрчлөгдөхгүй. Бясалгагч хүний хувьд чи дээш сугарч гарах хүсэлтэй бол энэ шалгуураар цэгнэх ёстой, энгийн хүний шалгуураар цэгнэж болохгүй. Иймээс бодит байдалд ийм нэг төрлийн гадны үймүүлэл байдаг. Үүгээр зогсохгүй бас ижил хүйстэн болох, чөлөөт секс, хар тамхи хэрэглэх гэх мэтийн замбараагүй зүйлс бүгд гарч ирсэн.

Хүн төрөлхтний нийгэм өнөөдрийг хүртэл хөгжихдөө ийм байдалд хүрсэн, бодоод үз, энэ янзаараа цааш үргэлжилбэл юу болох вэ? Үргэлж ингэж оршихыг зөвшөөрөх юм уу? Хүн өөрөө засахгүй бол тэнгэр засна. Хүн төрөлхтөнд сүйрэл, гай гамшиг тохиолдох бүрт үргэлж ийм байдалд байсан. Би энэ олон лекц заахдаа хүн төрөлхтний том сүйрлийн асуудлыг яриагүй. Энэ талаар шашинд болон олон хүмүүсийн дунд яригдсаар ирсэн. Би та бүгдэд ийм нэг асуудлыг хэлж өгье, та бүгд энэ талаар боддоо, бидний энгийн хүний нийгэмд хүний ёс суртахууны хэм хэмжээ ийм байдалд хүртлээ өөрчлөгдлөө! Хүн хүний хоорондын зөрчил ийм хурц байдалд хүрсэн! Энэ нь туйлын аюултай байдалд хүрсэн биш гэж үү? Тиймээс одоогийн энэ бодит орчин байдал нь манай бясалгагчдыг дээд түвшин лүү

бясалгахад ноцтой үймүүлдэг. Гудамжинд нүцгэн зурагнууд өлгөөстэй, толгойгоо жоохон өндийлгэхэд л харагдана.

Лаози ийм нэгэн үг хэлсэн: Гэгээлэг хүн Дао-г сонсонгуутаа шаргуу хичээллэнэ. Гэгээлэг хүн Дао-г сонвол ингэж бодно: Арай гэж ариун номтой учирлаа, өнөөдөр бясалгахгүй юм бол хэзээ бясалгах юм? Миний бодлоор хэцүү төвөгтэй орчинд бясалгахад харин сайн. Улам хэцүү байдал байх тусам улам аугаа хүмүүсийг гаргадаг. Хэрэв эндээс сугаран гарч чадвал түүний бясалгал хамгийн суурь баттай байх болно.

Жинхэнэ тууштай бясалгахаар зорьсон хүний хувьд ийм орчин нь миний хэлснээр бол харин сайн зүйл юм. Ямар ч зөрчил гарахгүй бас чамд зан чанараа сайжруулах боломж олдохгүй бол чи дээшлэхгүй. Чи ч сайн, би ч сайн, хоорондоо зөрчилгүй байвал яаж бясалгах юм? Жирийн нэг бясалгагч хүн Дао-г сонссон дундаж хүнд тооцогддог, бясалгасан ч болно, бясалгахгүй байсан ч болно гэдэг ийм хүнд энэ нь хэцүү. Энд байгаа зарим хүмүүс багшийн ярьж байгааг учир зүйтэй гэж ойлгоно. Дараа нь энгийн хүний нийгэмд буцаж орохоороо тэдгээр бодит ашгийг илүү үнэнд үзнэ. Тэдгээр нь мэдээж үнэн бодитой зүйл. Зөвхөн чиний хувьд биш бас барууны олон саятнууд, баячууд нас барсны дараа юу ч байхгүй болдог гэж олж мэдсэн. Материаллаг баялаг төрөхөд хамт ирэхгүй, үхэхэд бас дагаад явахгүй их хийсвэр зүйл. Тэгвэл гон яагаад ийм нандин байдаг вэ? Яагаад гэвэл энэ нь чиний Эзэн сүнсний биед холбоотой байдаг, чамайг төрөхөд цуг ирнэ, чамайг нас барахад бас хамт явна. Бид Эзэн сүнс устдаггүй гэж хэлсэн, энэ бол мухар сүсэг биш. Бидний махан бие бодийн эсүүд салж мөхөхөд бусад бие бодийн орон зайнуудад оршдог эснээс жижиг хэмжээний хэсгүүд устдаггүй үлддэг. Зөвхөн гадар бие нь салж унадаг.

Миний саяны ярьсан бүгд хүний зан чанартай холбоотой асуудлууд юм. Шагжамүни болон Бодьдарма тэр үедээ ингэж хэлсэн: “Энэ дорны Хятад орон бол аугаа буянтай хүмүүс төрдөг газар”. Хятадын үе үеийн их олон лам хуврагууд, олон хятад хүмүүс үүгээрээ их бахархаж ирсэн. Учир нь дээд түвшний гон бясалгаж чаддаг гэж үздэг, иймээс маш олон хүн үүнд сэтгэл хангалуун байдаг, омогшин хөөрдөг. Манай Хятад хүнээс, Хятадын газар нутгаас төрөлхийн аугаа суурьтай хүн, аугаа буянтай хүн их гардаг гэдэг. Үнэндээ маш олон хүн үүний далд утгыг нь ойлгоогүй. Яагаад Хятадын энэ газар нутгаас аугаа буянтай, өндөр түвшний гон-той хүмүүс гардаг вэ? Олон хүн тэдгээр дээд түвшинд хүрсэн хүмүүсийн хэлсэн үгний жинхэнэ утгыг ойлгодоггүй, бас дээд түвшинд, дээд ахуйн хүний оюун санаа, түүний бодлын цар хэмжээг мэдэхгүй. Мэдээж бид тэр үгний ямар утгатай болохыг нарийн хэлэхгүй. Та бүгд боддоо, зөвхөн хамгийн төвөгтэй хүмүүсийн дунд мөн хамгийн хэцүү орчинд өндөр түвшний гон бясалган гаргаж чадна. Ийм л утгатай юм.

Төрөлхийн суурь

Төрөлхийн суурь нь хүний өөр орон зайд байгаа биен дэх буяны бие бодийн их, багаар тодорхойлогддог. Буян нь бага бол хар бие бодь их, нүглийн хүрээ нь том байдаг. Ийм байвал төрөлхийн суурь мууд ордог. Буян их бол цагаан бие бодь их, нүглийн хүрээ бага байна. Тэгвэл энэ нь төрөлхийн суурь сайнд ордог. Хүний цагаан бие бодь, хар бие бодь хоорондоо нэг нь нөгөөдөө хувирч болдог. Яаж хувирдаг вэ? Сайн үйл хийвэл цагаан бие бодь үүсдэг. Цагаан бие бодийг гашуун зовлон амсч бэрхшээлийг даван туулснаар, сайн үйл хийснээр олж авдаг. Харин хар бие бодь бол муу зүйл хийснээс, муу хэрэг үйлдсэнээс үүсдэг, тэр бол нүгэл. Тэр нь ийм хувирах явцаар явагддаг, мөн түүнд бас дагаж

явах холбоо байдаг. Учир нь тэр Эзэн сүнсийг шууд дагаж явдаг, энэ нь зөвхөн нэг амьдралын насны зүйл биш өнө эртний үеэс хуримтлагдсан юм. Иймээс нүгэл нэмэх, буян хураах гэж ярьдаг, мөн өвөг дээдсээс бас хуримтлагддаг. Би заримдаа, эртний Хятад хүмүүс болон настай хүний хэлдэг байсан: “Өвөг дээдэс буян хураасан, буян хураах эсвэл буянаа алдах” гэсэн үгийг боддог. Энэ бол маш үнэн үг! Үнэхээр тун зөв.

Төрөлхийн суурийн сайн муугаар нь тэр хүний ухамсрын сайн мууг тодорхойлж болно. Төрөлхийн суурь муутай хүний ухамсарлах чадвар бас муу байдаг. Яагаад вэ? Учир нь төрөлхийн суурь сайтай хүнд цагаан бие бодь их байдаг, энэ цагаан бие бодь манай орчлон ертөнцтэй нийцдэг. Үнэн, Нинжин, Тэвчээр мөн чанартай нийцдэг, тусгаарлалт байхгүй. Орчлон ертөнцийн мөн чанар шууд чиний биед илэрнэ, шууд чиний биетэй холбогддог. Харин хар бие бодь бол яг эсрэг, муу үйл хийснээс үүсдэг учраас манай орчлон ертөнцийн мөн чанартай эсрэг байдаг. Тиймээс энэ хар бие бодь манай орчлон ертөнцийн мөн чанараас тусгаарлагддаг. Хэрэв энэ хар бие бодь их хэмжээтэй байвал тэр хүний биеийн эргэн тойронд нэг хүрээ үүсдэг, хүнийг бүрхдэг. Тэр хүрээ нь том байх тусам нягтрал нь улам их, улам зузаан, үүнээс болж энэ хүний ухамсар улам муу байна. Яагаад гэвэл орчлон ертөнцийн Үнэн, Нинжин, Тэвчээр гэсэн мөн чанарыг хүлээн авч чадахгүй, тэр муу үйл хийснээс болж хар бие бодь олж авсан. Ер нь ийм хүн бясалгалд итгэхгүй. Ухамсар нь муу байх тусам нүглийн саад улам их. Зовлон бэрхшээл их амсах тусам улам итгэхгүй болно, бясалгахад ч хэцүү болно.

Цагаан бие бодь ихтэй хүн бясалгахад амар байдаг. Бясалгалын явцад тэр зөвхөн орчлон ертөнцийн мөн чанарт уусвал түүний зан чанар нь дээшилнэ, түүний буян шууд гон болж хувирна. Харин хар бие бодь ихтэй хүнд, үйлдвэрт

бүтээгдэхүүн гардаг шиг нэмэлт дамжлага хэрэгтэй, бусад хүмүүст бэлэн материал ирэхэд түүнд түүхий эд ирдэг, эхлээд боловсруулах хэрэгтэй, ийм нэг явц байдаг. Иймээс тэр эхлээд бэрхшээл зовлон туулж нүглээ арилгаад үүнийг цагаан бие бодь болгон хувиргана, буяны бие бодь үүссэний дараа түүнд өндөр түвшний гон гарч болно. Гэхдээ ер нь ийм хүний ухамсар угаасаа муу, чи түүнийг илүү зовлон амс гэвэл тэр бүр ч итгэхгүй, бүр ч тэсэхгүй, иймээс хар бие бодь ихтэй хүн бясалгахад хэцүү. Дао-гийн системд юмуу эсвэл зөвхөн ганц шавьд уламжилдаг бясалгалд багш нь шавийг хайдаг гэж ярьдаг, шавь багшийг хайдаггүй. Энэ нь түүний биед байгаа эдгээр зүйлс хир их байгаагаас болдог.

Төрөлхийн суурь хүний ухамсрыг тодорхойлдог, гэхдээ туйлаас биш. Зарим хүн төрөлхийн суурь муутай байдаг, гэхдээ гэр бүлийн орчин нь их сайн, олон хүн бясалгадаг. Зарим нь бас шашин шүтдэг, мөн бясалгалд их үнэмшилтэй. Ийм орчин бас түүний итгэл үнэмшил, ухамсарыг сайн болгодог, иймээс туйлаас биш юм. Зарим хүний төрөлхийн суурь их сайн, гэхдээ манай энэ бодит нийгмийн хүмүүжилд олж авсан тэр өчүүхэн мэдлэг боловсрол нь, ялангуяа урьд хэдэн жилийн өмнөх туйлшрах үзлээр хүмүүжүүлэх арга барилаас болж хүний оюун санааг их явцуу болгосон, өөрсдийн мэдлэгээс давсан бүх зүйлд итгэдэггүй болсон. Энэ байдал бас тэдний ухамсрыг ноцтойгоор үймүүлдэг.

Нэг жишээ хэлье, би нэг удаа лекц заахдаа хоёр дахь өдрийн хичээл дээр тэнгэрийн мэлмий нээгдэх талаар ярьсан. Төрөлхийн суурь сайтай нэг хүний тэнгэрийн мэлмийг шууд маш өндөр түвшинд нээж өгсөн. Тэр бусад олон хүний харж чаддаггүй байдлыг харсан. Тэр бусдад ингэж хэлсэн: Пөөх, би энэ лекцийн танхим даяар Фалунийг цасны ширхэг шиг хүмүүс дээр бууж байхыг харлаа. Би Ли Багшийн жинхэнэ бие ямар болохыг, Ли Багшийн туяаг, Фалунь ямар дүрстэйг болон хэр олон Номын бие байгааг

харсан. Өөр өөр түвшин бүгдэд Ли Багш ном ярьж байхыг, Фалунь сурагчдын биеийг хэрхэн засч өгч байгааг харсан. Бас Багш лекц унших явцад Багшийн гон бие өөр өөр давхарга болгонд ном ярьж байхыг харсан. Мөн тэнгэрийн дагинас цэцэг тараан шидэж байсан гэх мэтийн зүйлсийг харсан. Тэр ийм гайхамшигтай гоё зүйлүүдийг бүгдийг харсан нь түүний төрөлхийн суурь их сайн гэсэн үг. Тэр үргэлжлүүлэн ярьж байснаа эцэст нь ингэж хэлсэн: “Би эдгээр зүйлст үнэмшихгүй. Зарим зүйлүүд нь аль хэдийн шинжлэх ухаанд нотлогдсон, мөн маш олон зүйлийг одоогийн шинжлэх ухаанаар тайлбарлаж болно, заримаас нь бид бас ярьсан.” Учир нь чигон-оор танин мэдсэн зүйлүүд нь үнэхээр орчин үеийн шинжлэх ухаанаар олж мэдсэнээс хол давсан юм. Энэ бол лавтай. Үүнээс үзэхэд хүний төрөлхийн суурь хүний ухамсрыг бүрэн шийддэггүй болохыг харуулж байна.

Ухамсар

“Ухамсар” гэж юу вэ? “Ухамсар” гэдэг нь шашнаас үүсэлтэй үг юм. Буддын шашинд үүнийг бясалгагч хүн Буддын номыг ойлгох байдал, мөн танин мэдэхүйн ухамсар, эцсийн ухамсар гэж ярьдаг, энэ бол оюун санааны гэгээрлийг хэлж байгаа юм. Гэхдээ үүнийг одоогийн энгийн хүмүүс авч хэрэглэдэг болсон. Энэ хүн их сэргэлэн ухаантай, даргынхаа юу бодож байгааг нь гадарладаг, дорхноо ойлгодог, даргын аргыг яаж олохоо мэддэг. Хүмүүс ийм хүнийг сэргэлэн ухаантай гэж хэлдэг, ер нь ингэж ойлгодог болсон. Чи энгийн хүний түвшнөөс гараад арай дээд түвшнөөс харахад энгийн хүний танин мэдэхүйн энэ түвшний ёс зүйг үргэлж буруу гэдгийг олж мэднэ. Бидний ярьж байгаа ухамсар бол ийм ухамсар огт биш. Нэг зальтай хүний ухамсар нь бол яг эсрэгээр муу юм, учир нь их овсгоотой хүн даргынхаа үнэлгээг авахын тулд зөвхөн

өнгөцхөн төдий ажил нүдэн дээр нь хийнэ, тэгвэл жинхэнэ ажлыг өөр хүн хийж байгаа юм биш үү? Тиймээс энэ хүн бусдад өртэй болно. Тэр сэргэлэн овсгоотой, бусдын аргыг олж чаддаг учраас илүү сайныг нь авна, харин бусдад нь муу нь үлдэнэ. Тэр овсгоотой болохоор ямар ч хохирол амсахгүй, юугаа ч амархан алдахгүй. Тэгэхээр бусад нь хохирол амсах болно. Тэр улам энэ бодит орлогынхоо хойноос хөөцөлдөхөд улам явцуу сэтгэлтэй болж энгийн хүний материаллаг ашгийг орхих нь боломжгүй мэт санагдана, тэр өөрийнхөө бодит байдлыг чухалчилдгийг зөв гэж үздэг, тэр хохирол амсахгүй.

Зарим хүн түүгээрээ бахархдаг! Би чамд түүгээр бүү бахарх гэж хэлье. Чи түүнийг ямар их шаналгаатай амьдардгийг мэдэхгүй, тэр сайн идэж ууж чадахгүй, сайн унтаж чадахгүй, тэр зүүдэндээ хүртэл хувийн ашгаа алдахаас айна, хувийн ашгийнхаа төлөө эцсээ хүртэл зүтгэнэ. Чи түүнийг хэцүү амьдардаг гэж хэлэхгүй гэж үү? Тэр бүх насаа үүнд л зориулна. Бид зөрчил тулгарахад нэг алхам ухарваас тэнгис далай, тэнгэр огторгуй хязгааргүй уудам болохыг мэдэрнэ, өөр нэг байдал гарах нь лавтай. Харин тийм хүн буулт хийхийг хүсэхгүй, тэгээд ядарч амьдрах болно. Чи түүнээс бүү суралц. Бясалгагчдын хүрээнд ингэж ярьдаг: Ийм хүн бол гүн төөрөлдсөн, тэр материаллаг ашгийн төлөө энгийн хүний дунд бүрмөсөн төөрсөн. Түүнд буянаа бүү алд гэж хэлбэл, ёстой амар биш! Чи түүнд бясалгал хийхийг зөвлөвөл тэр чамд итгэхгүй: Бясалгах аа? Та нар бясалгагч учраас хүнд зодуулсан ч хариу цохихгүй, загнуулсан ч урдаас нь хэрэлдэхгүй. Хүмүүс чамайг дээрэлхэж байхад тэдэнтэй адилхан үзэлцэхийн оронд харин чи тэдэнд дотроо баярлах ёстой. Та нар бүгдээрээ адилхан А-Кю болчихсон! Бүгд мэдрэлийн өвчтэй! Ийм хүн бясалгал ойлгох ямар ч арга байхгүй. Тэр чамайг итгэхийн аргагүй тэнэг гэнэ. Чи хэлдээ, түүнийг аврахад хэцүү биз дээ?

Энэ бол бидний ярьж байгаа ухамсар биш. Харин энэ хүний ярьсан шиг, хувийн ашиг сонирхлын хувьд жоохон “тэнэг” байх нь бидний ярьж байгаа ухамсар юм. Үнэндээ бол тэнэг биш. Бид зөвхөн л хувийн ашиг сонирхол гэх мэтийг хөнгөн авч үздэг, гэхдээ бусад тал дээр бид маш ухаалаг. Эрдэм шинжилгээний төсөл дээр ажиллахдаа ч юмуу эсвэл даргын өгсөн үүрэг даалгаврыг биелүүлэх, бусад ажил төрөл хийхдээ бид их саруул ухаантай, маш сайн гүйцэтгэдэг. Зөвхөн хувийн ашиг сонирхол дээр, хүн хүний хоорондын зөрчлийн дунд бид даруухан ханддаг. Хэн чамайг тэнэг гэх юм? Хэн ч чамайг тэнэг гэж хэлэхгүй, энэ бол мэдээж.

Бид жинхэнэ тэнэг хүнийг авч ярья. Дээд түвшний зарчмаар авч үзвэл бүгд яг эсрэгээр байдаг. Тэнэг хүн энгийн хүмүүсийн дунд том муу зүйл хийх магадлалгүй, бас өөрийн ашиг сонирхлын төлөө тэмцэлдэж өрсөлдөхгүй, нэр хүнд хөөцөлдөхгүй, тэр буянаа алдахгүй. Харин бусад хүмүүс түүнд буянаа өгнө. Түүнийг зодох, загнахад түүнд бүгд буянаа өгнө, харин энэ бие бодь бол тун нандин юм. Манай энэ орчлон ертөнцөд ийм зарчим байдаг: “Алдахгүй бол олдохгүй. Олдвол алдана”. Хүмүүс тэр тэнэгийг харахаараа бүгд түүнийг загнана, “Чи ёстой усан тэнэг.” Ингэж хэл амаар доромжлоход хэсэг буян түүн лүү шидэгдэнэ. Чи түүнийг дээрэлхэж давамгайлсан болохоор олсон тал, тэгэхээр чи алдах ёстой. Түүнийг очиж өшиглөөд “Чи шал тэнэг амьтан” гэхэд дахиад нэг хэсэг буян түүн дээр бууна. Хэн түүнийг дээрэлхэнэ, хэн түүнийг өшиглөнө тэр инээмсэглээд “Тэг тэг, надад буянаа өгч байгаа юм бол авахаас жоохон ч татгалзахгүй!” Тэгвэл дээд түвшний зарчмаар үүнийг бодоод үз, хэн овсгоотой байна? Энэ хүн овсгоотой биш гэж үү? Тэр хамгийн овсгойтой нь, жоохон ч буянаа алдахгүй. Чи түүнд буян шидэж өгөхөд тэр огтхон ч буцааж түлхэхгүй, бүгдийг нь авна, баяртайгаар хүлээн авна. Тэр энэ насандаа тэнэг байж болно, харин хойд

насандаа тийм биш, Эзэн сүнс нь тэнэг биш. Шашинд хэлэхдээ, хүн их буянтай бол хойд насандаа өндөр албан тушаалын хүн, эсвэл их баян чинээлэг хүн болно гэдэг, энэ бүгдийг буянаараа солилцдог.

Бид буян шууд гон-д хувирч болдог гэж хэлсэн. Чиний хэр өндөр бясалгасан нь буян хувирснаас биш гэж үү? Энэ нь шууд гон болж хувирч болдог. Хүний түвшний өндөр нам, гон хүчний их багыг тодорхойлдог гон нь энэ буяны бие бодиос хувиран гардаг биш үү? Чи үүнийг маш нандин гэж үзэхгүй гэж үү? Энэ нь төрөхөд хамт ирж, үхэхэд дагаж явна. Буддын шашинд чиний хэр өндөр бясалгах нь чиний хүрэх бүтээлийн орон гэдэг. Чи хэр их зориулна тэр хэмжээгээр олно, энэ бол зарчим. Шашинд буянтай байвал хойд насандаа дээд албан тушаалын хүн, эсвэл их баян чинээлэг хүн болно гэдэг. Бага буянтай бол тэр хүн хоол гуйсан ч амар олдохгүй, учир нь солих буян байхгүй. Алдахгүй бол олдохгүй! Жоохон ч буян байхгүй бол бие сүнс нь хоёулаа устах болно, тэр бол жинхэнэ үхэл.

Урьд нэг чигон багш байсан, хүмүүсийн дунд анх гарч ирэхдээ түүний түвшин их өндөр байсан. Дараа нь тэр чигон багш нэр хүнд, хувийн ашиг сонирхолд автсан. Тэгээд Багш нь түүний Дэд сүнсийг дагуулаад явсан, учир нь тэр Дэд сүнс бясалгадаг бясалгалд харъяалагддаг байсан. Түүний Дэд сүнс нь байх үед тэр Дэд сүнсэндээ удирдуулдаг байсан. Жишээ нь, нэг өдөр түүний ажлын газар орон сууцны байр хуваарилсан. Дарга нь хэлсэн: Байргүй хүмүүс энд ирээд нөхцөл байдлаа танилцуул, яагаад байранд орох хэрэгтэй байгаа шалтгаанаа тайлбарла. Хүн болгон өөрсдийнхөө байдлыг танилцуулсан, тэр хүн л дугараагүй. Эцэст нь дарга нь түүнийг бусдаас илүү хүнд байдалтай гэж үзэн байрыг түүнд өгөх ёстой гэсэн. Нэг нь хэлсэн: Үгүй, байрыг түүнд битгий өг, надад өг, би бүхнээс илүү байрны гачигдалтай. Тэр, “тэгвэл чи ав ав” гэсэн. Энгийн хүнд бол

тэр тэнэг харагдана. Зарим хүн түүнийг бясалгадаг гэдгийг нь мэддэг, тэгээд ингэж асуусан: Чи бясалгадаг болохоор юу ч авахгүй, тэгвэл чамд юу хэрэгтэй юм? Тэр хариулсан: Бусад хүмүүс юу авахгүй байна, би тэрийг авна. Үнэндээ тэр бол огтхон ч тэнэг биш, харин их ухаалаг. Зөвхөн хувийн ашиг сонирхол дээр ингэж хандана. Тэр юманд жам ёсыг дага гэдэгт итгэдэг. Өөр хүн түүнээс дахин асуусан: Одоогийн хүмүүст авахгүй зүйл гэж байх юм уу? Тэр ингэж хариулсан: Газар дээр хүний хөлд ийш тийшээ өшиглөгддөг чулууг хэн ч авахгүй. Тэгвэл би тэр чулууг түүж авна. Энгийн хүн бясалгагч хүнийг ойлгохгүй, ойлгох ч арга байхгүй, тэдний ухаанд багтахгүй. Тэдний үзэл санаа маш ялгаатай, мөн тэдний түвшин хэтэрхий хол зөрөөтэй. Тэр мэдээж чулуу түүхгүй, тэр энгийн хүний ухамсарлахгүй зарчмыг л хэлсэн. Би энгийн хүний зүйлээр хөөцөлдөхгүй. Энэ чулууны талаар ярьж, та бүгд Буддын сударт Диваажинд мод нь алтан, газар нь алтан, шувууд нь алтан, цэцгүүд нь алтан, байшин нь алтан, мөн Буддын бие нь хүртэл алтан гялалзсан гэж бичсэн байдгийг мэднэ. Тэнд ширхэг чулуу ч олдохгүй. Хэрэглэдэг мөнгө нь чулуу гэгддэг. Тэр мэдээж чулуу авч тэнд очихгүй, харин энгийн хүмүүсийн ойлгодоггүй энэ зарчмыг л хэлсэн юм. Үнэндээ бясалгадаг хүн ингэж хэлдэг: Энгийн хүнд энгийн хүний хөөцөлддөг зүйл байдаг, бид түүгээр хөөцөлдөхгүй, энгийн хүнд байдаг зүйлийг бид ч сонирхохгүй. Харин бидэнд байдаг зүйлийг энгийн хүн хүссэн ч олж авч чадахгүй.

Үнэндээ бидний саяхан ярьсан ухамсар бол бясалгалын явц дахь ухамсар юм. Энэ нь энгийн хүний ухамсраас яг эсрэг. Бидний ярьж байгаа ухамсар нь Багшийн ярьсан Номыг, Дао-гийн багшийн ярьсан Дао-г бясалгах явцад бэрхшээлтэй учрахдаа өөрийгээ бясалгагч хүн гэж ухамсарлаж чадах чадахгүйн асуудал, үүнийг ойлгож чадах чадахгүйн асуудал, хүлээн авч чадах чадахгүйн асуудал, мөн Номын дагуу мөрдөж чадах чадахгүйн асуудал юм.

Зарим хүнд яаж ч ярьсан тэр итгэхгүй, энгийн хүний бодит ашгийг илүүд үзсэн хэвээр байх болно. Тэд гөжүүд үзэл бодолдоо зууралдаад л орхиж чадахгүй, энэ нь тэднийг итгэж үнэмшихгүй байдалд хүргэнэ. Зарим хүн зөвхөн өвчнөө эдгээх хүсэлтэй, чигон бол үндсэндээ өвчин эдгээх зорилготой биш гэж хэлэнгүүт тэд дотроо дургүйцнэ, тэгээд цааш миний ярьсан зүйлд итгэхгүй болдог.

Зарим хүний ухамсар нь яагаад ч дээшилдэггүй. Тэд миний номон дээр хамаагүй зурна, тэмдэглэгээ хийнэ. Манай тэнгэрийн мэлмий нээгдсэн хүн болгон энэ номыг их өнгөлөг, алтлаг, туяарсан гэрэлтэй болохыг хардаг. Үсэг болгон миний Номын биений дүрстэй. Хэрэв би худлаа хэлбэл хүн болгоныг хуурч мэхэлсэн болно. Чиний зурсан тэр зураас тэмдэглэгээ хав хар харагддаг. Чи үүн дээр хамаагүй зурж зүрхэлнэ гэж үү? Бид энд юу хийж байгаа вэ? Бид чамайг дагуулан дээш бясалгуулж байгаа биш гэж үү? Зарим зүйлийг чи бас бодох хэрэгтэй. Энэ ном чиний бясалгалыг удирдаж чадна. Чи үүнийг нандин гэж бодохгүй байна уу? Чи Буддад мөрөгснөөр жинхэнэ бясалгаж чадах юм уу? Чи тэр Буддын хөрөг, барималд маш их сүжигтэй, зөөлөн ч хүрч зүрхлэхгүй өдөр болгон урд нь хүж өргөнө, харин чамайг жинхэнэ бясалгахад удирдаж чадах Дафа-г бохирлож зүрхэлнэ гэж үү.

Хүний ухамсрын асуудал гэдэг нь бясалгалын явцад өөр өөр түвшинд гарсан байдлыг, багшийн ярьсан ямар нэг зүйлийг, ямар нэг номыг чиний яаж ойлгох чадавхи юм. Гэхдээ энэ нь бидний ярьдаг гэгээрэл бас биш. Бидний ярьдаг гэгээрэл бол хүн энэ насандаа бясалгалын эхнээс тасралтгүйгээр дээш ахих, хүний зууралдсан сэтгэл янз бүрийн хүслийг орхих, мөн бясалгалын хамгийн сүүлчийн алхам хүртэл гон нь тасралтгүй дээш өсөх явц юм. Буяны энэ бие бодь гон болж бүрэн хувирч багшийн төлөвлөсөн бясалгалын зам төгсгөлдөө хүрэх тэр агшинд “пад” гээд бүх

түгжээнүүд дэлбэрч нээгдэнэ. Тэнгэрийн мэлмий нь түүний байгаа түвшний хамгийн дээд цэгт хүрнэ, тэр өөрийнхөө түвшинд орон зай болгоны үнэн байдлыг, цаг хугацааны орон зай болгонд байгаа янз бүрийн амь бодийн орших хэлбэр, бие бодийн орших хэлбэр, бидний орчлон ертөнцийн үнэнг харна. Түүний эгнэшгүй увидас чадвар илэрч гарна, мөн төрөл бүрийн амь бодьтой харьцаж чадна. Ийм хэмжээнд хүрвэл аугаа гэгээрэгч биш гэж үү? Бясалгалаар гэгээрсэн хүн биш гэж үү? Эртний Энэтхэг хэлэнд орчуулбал- Будда.

Бидний ярьж байгаа энэ гэгээрэл бол гэнэт гэгээрэх хэлбэрт харьяалагдана. Гэнэт гэгээрэх гэдэг нь хүн амьдралынхаа турш бясалгахдаа түгжээтэй байдаг, тэр өөрийнхөө гон-ыг хэр өндөрт хүрснийг болон түүний бясалгаж гаргасан гон ямар хэлбэртэйг мэдэхгүй. Үнэндээ юу ч мэдрэхгүй, тэр ч байтугай түүний биений эс нь хүртэл бүгд түгжээтэй байдаг. Бясалгаж гаргасан гон бүгд түгжээтэй байдаг, бясалгаад эцэст нь хүрэхэд нээгдэнэ. Үүнийг зөвхөн аугаа төрөлхийн суурьтай хүн л хийж чадна, ингэж бясалгахад маш их хэцүү. Сайн хүн болохоос эхэлж хийнэ, өөрийн зан чанарыг байнга дээшлүүлэх хэрэгтэй, үргэлж зовлон бэрхшээл амсана, бясалгалдаа тасралтгүйгээр дээшлэнэ, зан чанараа тасралтгүй дээшлүүлэхийг шаарддаг, гэхдээ өөрийнхөө гон-ыг харж чадахгүй. Ийм хүн бясалгахад хамгийн хэцүү, аугаа төрөлхийн суурьтай байх ёстой, олон жилийн турш юу ч мэдэхгүйгээр бясалгана.

Бас өөр нэг төрлийн аажмаар гэгээрэх хэлбэр байдаг. Хамгийн анх эхлээд л их олон хүн Фалуень эргэлдэж байхыг мэдэрсэн. Мөн түүнчлэн би та бүгдэд тэнгэрийн мэлмийг нээж өгнө. Зарим хүн одоо янз бүрийн шалтгаанаас болж харж чадахгүй бол ирээдүйд харах болно, юмыг бүдэг хардаг байснаа улам тод хардаг болно, хэрэглэж чаддаггүй байснаа яаж хэрэглэхийг мэддэг болно, түвшин нь

тасралтгүй дээшилнэ. Чиний зан чанар дээшилж янз бүрийн зууралдсан сэтгэлээ орхиход янз бүрийн ер бусын чадвар гарч ирнэ. Бясалгалын бүхий л хувьсах явц ба бие бодийн хувирах явц нь бүгд чамд харагдах эсвэл мэдрэгдэх байдлаар явагдана. Ингээд эцсийн алхамд хүрэхэд орчлон ертөнцийн үнэнийг бүрэн ойлгоно, чиний бясалгалын түвшин хүрэх ёстой хамгийн дээд цэгтээ хүрнэ. Биеийн хувиралт ба ер бусын чадварын бэхжилт тодорхой хэмжээндээ хүрэхэд аажим энэ зорилгодоо хүрнэ. Энэ бол аажим гэгээрэхэд харъяалагдана. Энэ аажмаар гэгээрэх бясалгалын арга бас амар биш. Ер бусын чадвартай болсны дараа зарим хүн зууралдсан сэтгэлээсээ салж чадахгүйгээс гайхуулна, амархан муу зүйл хийнэ. Тэгвэл чиний гон доош унана, чиний бясалгал үр дүнгүй болно, эцэст нь сүйрнэ. Зарим хүн янз бүрийн түвшин дэх төрөл бүрийн амь бодийн илрэх байдлыг харж чаддаг. Нэг нь чамайг ийм тийм зүйл хий гэж магад, тэр магадгүй чамайг өөрийнхөө зүйлийг бясалга гэнэ, чамайг шавиа болгоно. Гэхдээ тэр чамайг гэгээрлийн хутагт хүргэж чадахгүй, яагаад гэвэл тэр өөрөө ч гэгээрлийн хутгийг олоогүй.

Түүнээс гадна, дээд орон зайн хүмүүс бүгд бурхан, маш том болж хувирч, эгнэшгүй увидас чадвар гаргаж чадна. Сэтгэл чинь зөв тууштай биш бол чи түүнийг дагаад явчихгүй гэж үү? Чи түүнийг дагавал дорхноо үр дүнгүй бясалгачихна. Тэр амь бодь жинхэнэ Будда эсвэл жинхэнэ Дао байсан ч гэсэн чи дахиад л эхнээс нь бясалгах болно. Тэнгэрийн тэр олон давхаргын хүмүүс бүгд бурхан биш гэж үү? Зөвхөн бясалгаад маш өндөр түвшинд хүрч зорилгондоо хүрэх тэр үед бүрмөсөн сугаран гарч чадна. Тэдгээр тэнгэрийн бурхан энгийн хүний нүдэнд үнэхээр өндөр, аугаа том бас их чадвартай илэрдэг. Гэхдээ тэр магадгүй гэгээрлийн хутаг олж чадаагүй. Янз бүрийн мэдээлэл үймүүллийн дор, янз бүрийн үзэгдэл байдалд сатааран татагдахад чиний сэтгэл хөдлөхгүй байж чадах уу? Иймээс

тэнгэрийн мэлмий нээлттэй бясалгахад бас хэцүү, мөн зан чанараа барихад бүр ч хэцүү. Гэхдээ завшаантай нь манай зарим сурагчид бясалгалын явцад ер бусын чадвар нээж өгдөгт харъяалагдана, тэгээд аажим гэгээрэх байдалд орно. Тэнгэрийн мэлмийг хүн болгонд нээж өгнө, гэхдээ маш олон хүнд ер бусын чадвар гаргуулахгүй. Чиний зан чанар аажмаар дээшлээд нэг тодорхой түвшинд хүрэхэд, сэтгэл санаа чинь тогтворжиход, чи өөрийгөө сайн барьж чаддаг болоход гэнэт дэлбэрч нээгдэнэ. Нэг түвшинд чамайг аажим гэгээрэх байдалд оруулна, тэр үед өөрийгөө сайн барьж чадна, янз бүрийн ер бусын чадвар бүгд гарч ирнэ. Өөрөө бясалгаж дээшилсээр эцэст нь бүгд нээгдэнэ. Бясалгалын явцын дунд үеэс чамд тэдгээрийг гаргуулна, бидний маш олон хүн энэ харъяалалд багтана, тэгэхээр чи юм харах гэж битгий яар.

Та нар магадгүй Даяаны шашинд гэнэт гэгээрэх, аажим гэгээрэхийн талаар ярьдгийг дуулсан байх. Даяаны шашны зургаа дахь хамба Хуйнэн гэнэт гэгээрэхийг номлосон, харин Даяаны Хойд бүлгийн Шэншиу аажмаар гэгээрэхийг номлосон. Түүхэнд тэр хоёрын Буддын номлолын маргаан их удаан хугацаагаар үргэлжилсэн. Би энэ маргааныг утга учиргүй гэж хэлнэ. Яагаад вэ? Учир нь тэдний ярьж байгаа нь зөвхөн бясалгалын явц дахь нэг зарчмыг яаж ойлгох асуудал юм. Зарим хүн энэ зарчмыг гэнэт ухамсарладаг, тэгэхэд зарим хүн аажмаар ухамсарладаг. Яаж ухамсарласан ч болох юм биш үү? Гэнэт ухамсарлавал бүр сайн, аажмаар ухамсарласан ч бас болно. Аль нь ч адилхан гэгээрэл биз дээ? Хоёулаа л гэгээрэл, иймээс аль нь ч буруу биш.

Төрөлхийн аугаа суурьтай хүн

Төрөлхийн аугаа суурьтай хүн гэж ямар хүнийг хэлдэг вэ?
Төрөлхийн аугаа суурьтай хүн төрөлхийн суурь нь сайн

эсвэл суурь нь муу хүнээс ялгаатай байдаг. Төрөлхийн аугаа суурьтай хүнийг олоход маш хэцүү, түүхийн маш урт хугацаанд нэг ийм хүн төрдөг. Мэдээж төрөлхийн аугаа суурьтай хүн юуны түрүүнд заавал маш их буянтай байх ёстой, энэ цагаан бие бодийн хүрээ нь их том, энэ бол гарцаагүй юм. Түүнчлэн энэ хүн зовлон дундын зовлонг дааж чаддаг, бас сэтгэл санааны аугаа тэвчээртэй, өөрийгээ зориулж чаддаг, мөн буянаа сахиж чаддаг, ухамсар сайтай гэх мэт байх ёстой.

Зовлон дундын зовлон гэж юу вэ? Буддын шашинд, хүн байх юм бол зовлонтой гэдэг, чи хүн бол зовлон амсах ёстой. Бусад орон зайн амь бодь бүгдэд бидний энгийн хүний ийм бие байдаггүй, иймээс тэд өвчин тусахгүй, мөн төрөх, хөгшрөх, өвчлөх, үхэх асуудал байхгүй, ийм зовлон байдаггүй гэж үздэг. Өөр орон зайны хүн нисч чадна, жингүй, их гайхамшигтай сайхан. Энгийн хүн ийм биетэй учраас асуудал гардаг: Даарч, халууцаж, цангаж, өлсөж, бас ядарч чадахгүй, түүнээс гадна төрөх, хөгшрөх, өвчлөх, мөн үхэх асуудал байдаг. Ямар ч байсан чамд таатай байхгүй.

Би нэг сонин дээрээс Таншаньд болсон газар хөдлөлтийн үеэр олон хүн нас барсан, бас зарим нь аврагдаж амь орсон тухай уншсан. Энэ хэсэг хүмүүсийн дунд тусгай социологийн судалгаа, асуулга явуулсан. Тэднээс үхлийн байдалд байхдаа ямар мэдрэмжтэй байсан бэ? гэж асуусан. Гайхалтай нь тэдгээр хүмүүс бүгд адил онцгой нэг байдалд орсноо санаа нэгтэй ярьцгаасан. Энэ байдлыг хэлбэл, яг үхэх мөчид тэдэнд ямар ч айх мэдрэмж төрөөгүй, харин эсрэгээр тэдэнд гэнэт нэг ангижрах мэдрэмж төрсөн, сэтгэл нь цаагуураа баяртай байсан. Зарим хүн өөрөө гэнэт биеийн хүлээснээс чөлөөлөгдсөнөө мэдэрсэн, мөн гайхалтай хөнгөхөн хөөрч чадаж байсан, тэд бас өөрсдийнхөө биеийг харж болж байсан. Зарим нь бас өөр орон зайн амь бодийг харсан, зарим хүн бүр хаа нэгтээ

очиж үзсэн. Бүгд яг тэр агшинд нэгэн ангижрах байдал мэдэрсэн ба сэтгэлд нь ямар ч зовлонгүй, харин дотоод хөөрөл төрсөн гэж ярьсан. Хүн энэ махан биетэй байхад зовлонтой байдаг гэсэн үг, гэхдээ хүн болгон эхийн хэвлийгээс ингэж төрдөг болохоор хэн ч үүнийг зовж байна гэж мэдэрдэггүй болчихсон.

Хүн зовлон дундын зовлонг даадаг байх ёстой гэж би хэлнэ. Хүн төрөлхтний энэ цаг хугацааны орон зайн ухагдхуун бусад том хэмжээний цаг хугацааны орон зайн ухагдахуунаас ялгаатай гэж дээр хэлсэн. Энд нэг шичэнь хоёр цагтай тэнцдэг, харин тэр орон зайд бол нэг жил юм. Хүн ийм хэцүү орчинд бясалгахад түүнийг үнэхээр мундаг гэнэ. Энэ хүн Дао-г хүсэх сэтгэлтэй, бясалгах хүсэлтэй байвал ёстой сайн. Энэ хэцүү зовлон дунд тэр хүн өөрийнхөө төрөлх зан байдлаа алдаагүй, мөн бясалгаад буцаж харихыг хүсч байна. Яагаад бясалгаж байгаа хүнд болзол нөхцөлгүйгээр тусалж болдог вэ? Энэ бол учир нь юм. Энэ хүн энгийн хүний орон зайд шөнөжингөө бясалгаж суухад, тэндээс харахад түүнийг ёстой мундаг, тэр тэнд зургаан жил суучихлаа гэж ярина. Яагаад гэвэл манай нэг шичэнь тэндхийн нэг жилтэй тэнцэнэ. Манай хүн төрөлхтний орон зай бол маш онцгой юм.

Яаж зовлон дундын зовлонг даах вэ? Жишээ ярья, нэг хүн ажилдаа очиход ажил дээр нь байдал тааруухан байсан. Хэрэв хүмүүс ажлаа сайн хийхгүй бол ийм байдал удаан үргэлжлэхгүй, ажлын газар нь өөрчлөлт хийж гэрээт ажилчдыг авч ажиллуулна. Илүүдэл ажилчид халагдахад тэр хүн бас цомхотгогдсон хүний тоонд орсон, идэх хоолноосоо гэнэт салсан. Түүний сэтгэл ямар байх вэ? Мөнгө олох өөр газар байхгүй. Тэр яаж амьдрах юм? Өөр зүйл хийе гэсэн ч чадахгүй, гунигтайгаар гэртээ харина. Дөнгөж гэртээ орж ирэхэд настай эцэг нь өвдчихсөн хүнд байдалтай, тэр сандран хөгшнийг эмнэлэгт хүргэж өгөх гэж

яарна. Тэр арай гэж мөнгө зээлдэж түүнийг эмнэлэгт хэвтүүлнэ. Дараа нь гэртээ харьж эцэгтээ ойр зуурын юм бэлдэнэ. Дөнгөж гэртээ орж ирмэгц сургуулийн багш хаалгыг нь тогшино, “Танай хүү зодоон хийгээд нэг хүүхдийг гэмтээчихлээ, хурдан очиж юу болсныг нь хар” Дөнгөж энэ хэргийг зохицуулж дуусаад гэртээ орж ирээд суухад утас дуугарна: “Танай эхнэр өөр хүнтэй болчихож” гэнэ. Мэдээж та бүгдэд ийм байдал тохиолдохгүй. Жирийн хүн ийм зовлонг дааж чадахгүй ингэж бодно, “Би яах гэж амьдарч байгаа юм? Олс олоод өөрийгээ дүүжилчихвэл бүх зүйл амар болох юм биш үү?” Хүн бол зовлон дундын зовлонг дааж чаддаг байх ёстой гэж би хэлнэ, мэдээж тэдгээр нь яг ийм байх албагүй. Хэдийгээр хүн хүний хоорондох зөрчил, чиний зан чанарыг сорьсон хүнд асуудлууд, мөн хувийн ашиг хонжооны төлөөх өрсөлдөөн нь эдгээр асуудлаас амаргүй зүйл. Олон хүн, хүний дор орохгүйн төлөө амьдардаг, тэгээд санаснаар болохгүй бол өөрсдийгээ боож үхдэг. Гиймээс бид ийм хэцүү төвөгтэй орчинд бясалгах ёстой, мөн зовлон дундах зовлонг дааж чаддаг байх хэрэгтэй. Түүнчлэн бид сэтгэлийн аугаа тэвчээртэй байх ёстой.

Сэтгэлийн аугаа тэвчээр гэж юу вэ? Бясалгаж байгаа хүний хувьд юуны түрүүнд зодуулсан ч хариу зодолдохгүй, загнуулсан ч эргүүлээд хэрэлдэхгүй байж чаддаг байх хэрэгтэй, тэвчих ёстой. Тэгэхгүй бол, чамайг ямар бясалгагч хүн гэх юм? Зарим хүн ингэж ярьдаг: Тэвчээртэй байх нь үнэхээр хэцүү, би түргэн ааштай. Хэрэв чиний зан ааш муу бол засах хэрэгтэй, бясалгагч хүн заавал тэвчээртэй байх ёстой. Зарим хүн хүүхдээ хүмүүжүүлэхдээ өөрийгээ барьж чаддаггүй хашгирна зандарна, ёстой сүйд болдог. Та нар ийм байдлаар хүүхдээ хүмүүжүүлж болохгүй, бас өөрийгөө ч тэгтлээ бухимдуулах хэрэггүй. Та нар хүүхэддээ шалтгааныг учирлан ойлгуулах хэрэгтэй, тэгвэл хүүхдийг үнэхээр сайн сургаж болно. Ялихгүй жижиг зүйлийг хүртэл

давж чадахгүй амархан уурлаад байвал гон чинь өснө гэж юунд найдах юм? Зарим хүн, хэрэв гудамжинд явж байхад хэн нэгэн намайг өшиглөхөд эргэн тойронд таньдаг хүн байхгүй бол би тэвчиж чадна гэж хэлнэ. Би үүнийг хангалттай биш гэж хэлнэ. Магадгүй чи ирээдүйд ичгэвтэр харагдахаас эмээдэг хүнийхээ өмнө хоёр хацартаа алгадуулж харагдвал нүүрээ хийх газаргүй болно, чамайг ийм асуудалд яаж хандахыг чинь харна, тэвчиж чадах үгүйг чинь харна. Хэрэв чи тэвчиж өнгөрөөсөн ч дотроо тайван байж чадахгүй бол бас хангалттай биш. Та бүгд мэднэ, Архад түвшинд хүрэхэд ямар ч зүйл тохиолдсон сэтгэлдээ эмзэг хүлээн авдаггүй тайван байдаг. Тэр сэтгэлдээ ямар ч энгийн хүний асуудлыг хадгалдаггүй, үргэлж инээмсэглэж сэтгэл өөдрөг байдаг. Тэр яаж хохирол амссан ч инээмсэглэсэн хэвээр өөдрөг сэтгэлтэй, тоохгүй байдаг. Үнэхээр чи тийм байж чадвал аль хэдийн Архадын анхан шатны бүтээлийн оронд хүрсэн юм.

Зарим хүн ингэж ярьдаг, ийм хэмжээнд хүртэл тэвчвэл энгийн хүмүүс биднийг хулчгар гэнэ, тийм байвал амархан дээрэлхүүлнэ. Би үүнийг хулчгар гэж хэлэхгүй. Та бүгд боддоо, энгийн хүмүүсийн дунд зарим ахмад настай, өндөр боловсролтой хүмүүс хүртэл биеэ барихыг чухалчилдаг, тэд бусадтай хэрэлдэхийг цээрлэдэг, тэгвэл манай бясалгагчдын хувьд тэднээс улам дээр байх ёстой биш үү? Үүнийг хулчгар гэж үзэж яаж болох юм? Энэ бол аугаа тэвчээрийн илрэл гэж би хэлнэ, мөн сэтгэлийн тэнхээний хүчтэй илрэл юм. Зөвхөн бясалгадаг хүн л ийм аугаа тэвчээртэй байж чадна. Ийм нэг үг байдаг: Жирийн хүн доромжлуулбал сэлмээ сугалаад тэмцэлдэнэ. Энгийн хүн мэдээж чи намайг загнавал, би чамтай хэрэлдэнэ, чи намайг цохивол, би чамайг бас эргүүлээд цохино гэдэг. Тэр бол зүгээр л нэг энгийн хүн, түүнийг бясалгагч гэж хэлж болох уу? Бясалгагч хүний хувьд, хэрэв чамд сэтгэлийн тэнхээ

байхгүй бол, чи өөрийгөө барьж чадахгүй бол үүнийг хийж чадахгүй.

Та бүгд мэднэ, дээр үед нэг Хан Шин гэдэг хүн байсан, тэр Лиу Бан⁴⁵ жанжны тэргүүн генерал, улсын ноён нуруу, их чадвартай хүн байсан. Тэр яаж ийм том хариуцлагатай тушаалд хүрч чадсан бэ? Хан Шин-ыг бүр бага насандаа хүртэл жирийн хүн байгаагүй гэж ярьдаг. Хан Шин нэг хүний салтаан доогуур мөлхөж гарч доромжлуулсан тухай түүх байдаг. Хан Шин бага насандаа ушу-гаар хичээллэдэг байсан, ушу-гаар хичээллэдэг хүн үргэлж сэлэм зүүж явна. Нэг өдөр түүнийг гудамжинд явж байхад нь тэндхийн нэг танхай эр хоёр гараа ташаандаа тулан замыг нь хааж зогсоод хэлсэн: “Чи ямар хэрэгтэй сэлэм зүүж яваад байгаа юм? Чи хүн алж зүрхлэх юм уу? Тэгвэл чи миний толгойг цавччих.” Тэр ярингаа хүзүүгээ сунгаж өгсөн. Хан Шин бодсон: “Надад чиний толгойг авах ямар хэрэг байгаа юм?” Тэр үед хүн албал шүүхээр орж амиараа төлнө. Хэн нэгнийг хамаагүй алж болох юм уу? Тэр эр Хан Шин түүнийг алж зүрхлэхгүйг нь хараад “Чи намайг алж зүрхлэхгүй бол миний салтаан доогуур мөлхөж гар” гэсэн. Хан Шин үнэхээр түүний салтаан доогуур мөлхөж гарсан. Энэ нь Хан Шин аугаа их сэтгэлийн тэвчээртэй хүн байсныг харуулж байна. Тэр энгийн хүнтэй адилгүй байсан учраас түүхэн том үйл хэрэг хийж чадсан. Нэр хүндийн төлөө амьдрах гэдэг нь энгийн хүний зан юм. Та бүгд боддоо, хүн нэр хүндийн төлөө амьдрах нь зовлонтой бас ядаргаатай биш гэж үү? Ингэх нь хэрэгтэй юм уу? Хан Шин ямар ч байлаа гэсэн энгийн л хүн байсан. Бясалгагч хүний хувьд бид түүнээс хавьгүй дээр байх ёстой. Бидний зорилго бол энгийн хүний давхаргаас гарах, бүр дээд түвшинд хүрэх явдал юм. Бидэнд ийм тохиолдол гарахгүй. Гэхдээ

⁴⁵ Лиу Бан-Хан гүрнийг үүсгэн байгуулагч хаан

бясалгагч хүний энгийн хүмүүсийн дунд доромжлуулах нь магадгүй энэ тохиолдлоос ч илүү. Би хэлбэл, хүн хүний зан чанарын хоорондын зөрчил нь үүнээс амаргүй, бүр ч хэцүү байж болно, энэ нь бас их ярвигтай.

Мөн түүнчлэн, бясалгаж байгаа хүн бас юугаа ч золиосолж чаддаг, энгийн хүний янз бүрийн зууралдах сэтгэл, хүслээ орхиж чаддаг байх ёстой. Тэр дороо үүнд хүрч чадахгүй, бид аажмаар хийнэ. Чи өнөөдөр гэнэт үүнд хүрч чадвал өнөөдөр Будда болчихно. Бясалгалд аажмаар хүрнэ, гэхдээ чи өөрийгээ сул тавьж болохгүй. Чи ингэж хэлнэ: Багш бясалгалд аажмаар хүрнэ гэсэн, тэгэхээр аажмаар хийе. Тэр болохгүй! Чи өөртөө хатуу шаардлагатай байх ёстой. Буддын номын бясалгалд шаргуу урагшлах хэрэгтэй.

Бас буянаа сахиж, зан чанараа барих ёстой, дураараа байж болохгүй. Чи хүссэн болгоноо хамаагүй хийж болохгүй, мөн өөрийнхөө зан чанараа барьж чаддаг байх ёстой. Энгийн хүмүүсийн дунд ийм нэг үг их сонсогддог, Сайн үйл хийвэл буян хураана. Бясалгаж байгаа хүн буян хураахыг онцолдоггүй, харин бид буянаа хадгалахыг эрхэмлэдэг. Яагаад бид буянаа хадгалахыг эрхэмлэдэг вэ? Учир нь бид ийм нэг байдлыг харсан: Буян хураахыг энгийн хүний дунд ярьдаг, тэд сайн үйл хийж буян хурааж хойд насандаа сайхан амьдарна гэдэг. Харин бидэнд тийм асуудал байхгүй. Чи төгс бясалгаад Дао-д хүрвэл хойд насны асуудал гэж байхгүй болно. Бид энд буянаа хадгалах гэж ярьж байгаа нь өөр далд утгатай юм. Өөрөөр хэлбэл, бидний биен дээр байдаг хоёр янзын бие бодь бол амьдралын нэг насанд хуримтлагддаггүй, харин урт удаан хугацааны туршид хуримтлагдаж ирдэг. Чи дугуй унаад хотыг бүтэн тойрсон ч магадгүй хийх сайн зүйл олохгүй. Өдөр болгон ингэж явсан ч тийм боломж чамд тааралдахгүй байж магад.

Энд бас өөр нэг утга учир бий, буян хураахын тулд чи ямар нэгэн зүйлийг сайн үйл гэж бодно, гэхдээ чи хийвэл магадгүй тэр нь муу зүйл хийсэн болно. Чи ямар нэгэн зүйлийг муу хэрэг гэж бодно, чи оролцсон гэхдээ тэр нь магадгүй сайн үйл болно. Яагаад вэ? Учир нь чи түүний үйлийн үрийн барилдлагыг харж чадахгүй. Хуулиар энгийн хүний хэрэг явдлыг зохицуулдаг, энэ бол асуудалгүй. Бясалгагч хүн байх нь ер бусын, чи ер бусын хүний хувьд чамайг ер бусын зарчмаар шаардах ёстой, харин энгийн хүний зарчмаар цэгнэж болохгүй. Чи түүний үйлийн үрийн барилдлагыг мэдэхгүй бол тэр зүйлд буруугаар хандах нь амархан. Тиймээс бид үйлдэлгүй байхыг сургадаг, чи хүссэн зоргоороо ямар нэгэн зүйлийг хамаагүй хийж болохгүй. Зарим хүн ингэж ярьдаг: Би болдоггүй хүмүүсийг хүмүүжүүлэхийг хүсдэг. Тэгвэл би чамд цагдаа болбол дээр гэж хэлье. Гэхдээ бид чамайг хүн амины хэрэг, гал түймэр тавьж байхтай тааралдаад ийм зүйлээс хол бай гэж байгаа юм биш. Миний хэлж байгаа бол хүн хүний хоорондын зөрчил гарахад, нэг нь нөгөөгөө өшиглөх юмуу цохиход энэ нь магадгүй тэд урьд нь хоорондоо өгөө аваатай байсных, тэгээд тооцоогоо цайруулж байгаа хэрэг. Чи оролцвол тэдний хоорондын тооцоо дуусахгүй тэд дараа дахин үргэлжлүүлэх хэрэгтэй болно. Энэ нь чи үйлийн үрийн барилдлагыг харахгүй бол амархан муу зүйл хийж улмаар буянаа алдана гэсэн үг.

Жирийн хүн энгийн хүний хоорондын асуудалд хөндлөнгөөс оролцвол өөр хэрэг, тэр зөвхөн энгийн хүний зарчмаар юмыг цэгнэнэ. Чи бол ер бусын зарчмаар юманд хандах ёстой. Гэхдээ чи хүн алах, эсвэл гал түймэр тавих гэж байхыг харчихаад зогсооход оролцохгүй бол энэ нь зан чанарын асуудал, тэгэхгүй бол сайн хүн гэж яаж харагдах юм? Чи хүн алах, эсвэл гал түймэр тавих гэж байхыг харчихаад болиулахад оролцохгүй бол өөр юунд оролцох юм? Гэхдээ нэг асуудал байдаг, эдгээр зүйлс бидний

бясалгадаг хүнд ямар ч хамаагүй. Тийм явдал тохиолдохыг магадгүй чамд гаргуулахгүй. Бид буян сахих гэж ярьдаг, энэ нь чамайг муу зүйл хийхээс зайлуулж байгаа юм. Магадгүй зарим нэг жоохон зүйлд оролцоход чи муу зүйл хийсэн болчихно, тэгвэл чи буянаа алдана. Чи буянаа алдахад яаж түвшнээ дээшлүүлэх юм? Чи яаж өөрийнхөө эцсийн зорилгод хүрч чадах юм? Үүнд ийм асуудал гардаг. Үүнээс гадна, ухамсарлах чадвар сайн байх ёстой. Төрөлхийн суурь сайтай хүний магадгүй ухамсар нь ч сайн, орчин ч бас нөлөө үзүүлдэг.

Бид бас ингэж ярьдаг, бид дотогшоо бясалгавал хүн болгон өөрийнхөө зан чанараас хай, муу хийсэн шалтгааныг өөрөөсөө ол, дараагийн удаа сайн хий, мөн аливаа зүйл хийхдээ бусдыг эхлээд бод. Тэгвэл хүн төрөлхтний нийгэм сайнаар өөрчлөгдөнө, ёс суртахуун дахин дээшилнэ, соён гэгээрэл сайжирна, тэгэхээр бас нийтийн хэв журам дагаад сайжирна. Магадгүй цагдаа байх ч шаардлагагүй болно. Хэн ч захиргаадуулах хэрэггүй болно, хүн болгон өөрийгээ барина, өөрийнхээ дотрыг шинжинэ. Чи хэлдээ ийм байвал ямар сайн байх вэ. Та бүгд одоогийн хууль дүрэм улам нарийн боловсронгуй болж байгааг мэднэ. Гэтэл зарим хүн яагаад муу зүйл хийсээр байна вэ? Яагаад хуулийг дагахгүй байна? Үүний учир нь бол түүний сэтгэлийг захирч чадахгүй, хүн хараагүй үед тэр бас л муу зүйлээ хийнэ. Хэрэв хүн болгон сэтгэлээ бясалгавал, энэ байдал эрс өөрчлөгдөнө. Чамд шударга ёсны төлөө зүтгэх хэрэг байхгүй болно.

Номоо зөвхөн энэ түвшинд хүртэл ярилаа. Үүнээс дээш чи өөрийн бясалгалаар хүрнэ. Зарим хүн тэр болгон бодит зүйлийг асууж байна, би чиний өдөр тутмын амьдралын бүх асуудлыг тайлбарлаж өгвөл чи юуг бясалгах юм? Чи өөрөө бясалгах ёстой, өөрөө ухамсарлах ёстой. Би чамд бүх зүйлийг хэлээд өгчихвөл чамд бясалгах зүйл байхгүй болно.

Завшаан болоход Дафа аль хэдийн нийтийн дунд дэлгэрлээ, чи Дафа-гийн дагуу хийж болно.

Миний Ном тараах хугацаа үндсэндээ дуусах гэж байна. Иймээс жинхэнэ зүйлээ та бүгдэд үлдээхийг хүсч байна, үүнээс хойш бясалгахдаа та бүгд удирдуулах Номтой боллоо. Ном тараах бүхий л явцад би та бүхэнд болон нийгэмд хариуцлагатай хандаж ирсэн, бодит байдал дээр бид энэ зарчмыг баримталсан. Үр дүнгийн хувьд би ярихгүй, үүнийг бол нийтийн санал мэднэ. Миний зорилт бол Дафа-г олон түмний хүртээл болгох, тэгснээр олон хүн үүнээс ашиг тусыг олох, жинхэнэ бясалгахыг хүссэн хүнд Аугаа номын дагуу бясалгаж дээшлэх боломж олгох явдал юм. Түүнчлэн бид Аугаа ном заах явцад хүн өөрийгөө яаж авч явбал зохих ёсыг ярьсан, мөн энэ лекцийн дараа хэрэв чи энэ Дафа дагуу бясалгаж чадахгүй байсан ч чи наад зах нь сайн хүн байж чадна. Тэгвэл манай нийгэмд тустай. Үнэндээ чи яаж сайн хүн байхыг аль хэдийн ойлгосон. Энэ лекцүүдийн дараа чи сайн хүн болж чадна.

Аугаа номыг тараах явцад болж бүтэхгүй зарим зүйлс бас тохиолдож байсан, мөн тал талын үймүүлэл их хүчтэй байсан. Зохион байгуулж байгаа газар болон янз бүрийн байгууллагын албаны хүмүүсийн тус дэмжлэг, зохион байгуулах бүрэлдхүүний шаргуу ажиллагааны үр дүнд бидний лекцүүд нилээд амжилттай явагдаж ирлээ.

Миний лекцүүдээр яригдсан эдгээр зүйл бол та бүгдийг удирдаж дээд түвшин лүү бясалгуулах зүйл юм. Урьдны номонд эдгээр зүйлсийг ярих хүн байгаагүй. Бидний ярьсан зүйл бол маш тодорхой бөгөөд орчин үеийн шинжлэх ухаан болон өнөөгийн анагаах ухаантай уялдуулж ярьсан, түүнчлэн ярьсан зүйлүүд маш өндөр түвшинд юм. Миний үндсэн санаа бол ирээдүйд та бүхнийг жинхэнэ Ном олж дээш бясалгуулах явдал юм. Аугаа ном болон гон заах

явцад олон хүн энэ номыг сайн гэдгийг ойлгосон, гэхдээ дагаж хийхэд их хэцүү гэдэг. Үнэндээ энэ нь хэцүү байх үгүй нь хувь хүнээс хамаардаг гэж би боддог. Бясалгахыг хүсдэггүй энгийн хүнд бол бясалгал хэтэрхий хэцүү, санаанд багтамгүй эсвэл бясалгаад үр дүнд хүрэх боломжгүй санагдана. Тэр бол энгийн хүн, тэр бясалгахыг хүсэхгүй, тэр үүнийг маш хэцүү гэж үзнэ. Лаози ингэж хэлсэн: Гэгээлэг хүн Дао-г сонсвол, чармайн суралцана. Дундаж ухамсартай хүн сонсвол яасан ч яахав гэнэ. Ухамсар муутай хүн сонсвол инээд алдана. Инээд алдахгүй бол энэ нь Дао биш”. Жинхэнэ бясалгадаг хүнд энэ нь тун амархан, хүрэхийн аргагүй хол зүйл биш гэж би хэлнэ. Үнэндээ энд сууж байгаа олон хуучин сурагчид болон энд ирээгүй хуучин сурагчид бясалгалаараа аль хэдийн их өндөр түвшинд хүрчихсэн. Би чамд энэ талаар хэлээгүйн учир нь бол чамд зууралдсан сэтгэл гаргуулахгүйн тулд, сэтгэлийг чинь ханаж омогших байдалд оруулахгүйн тулд юм, чиний гон хүчний өсөлтөнд саад учрах болно. Тууштай бясалгахаар зорьсон хүн бол юуг ч тэвчиж чадна, мөн янз бүрийн хувийн ашгин дээрх зууралдсан сэтгэлийг орхиж чадна, түүнийг хөнгөн авч үзэж чадна. Ийм байж чадвал хэцүү биш. Хэцүү гэж хэлдэг хүн бол эдгээр зүйлийг орхиж чаддаггүй хүн. Бясалгал бол угтаа хэцүү биш, өөрийнхөө түвшинг дээшлүүлэх бас хэцүү биш. Зөвхөн хүний сэтгэлийг орхиж чадахгүйгээс тэр хэцүү гэж хэлдэг. Яагаад гэвэл бодит ашиг орлого өмнө нь байхад түүнээс татгалзахад их хэцүү, энэ ашиг орлого чамд байхад чи тэр сэтгэлээ яаж орхиж чадах юм? Үнэндээ ийм учраас энэ нь хэцүү санагддаг. Хүн хүний хооронд зөрчил гарахад чи уураа барьж чадахгүй, тэр ч байтугай асуудлыг шийдэхдээ өөрийгөө бясалгагч хүн гэж үзэж чадахгүй бол би ийм байж болохгүй гэж хэлнэ. Би урьд бясалгалаар хичээллэж байхад олон аугаа Багш нар надад ийм үг хэлдэг байсан: “Тэвчихэд хэцүү байсан ч, чи тэвчиж чадна. Хийхэд хэцүү байсан ч, чи хийж чадна.” Үнэндээ ийм л байдаг. Та нар хариад туршиж

үз. Жинхэнэ бэрхшээл зовлонг давахдаа туршаад үз, тэвчихэд хэцүү байсан ч тэвчээд үз, боломжгүй, маш хэцүү санагдсан ч болох үгүйг нь үзээд алд. Хэрэв чи үнэхээр ингэж хийж чадвал хүнд байдлаас гарах зам өмнө чинь нээгдэхийг үзнэ!

Би ийм их ярьчихлаа, та бүхэнд энэ бүгдийг тогтооход тун амаргүй. Би үндсэн хэдхэн шаардлага тавья: Хүн болгон цаашдын бясалгалдаа өөртөө бясалгагч хүний байр сууринаас хандаж жинхэнэ бясалгахыг хүсье. Би шинэ хуучин сурагчиддаа бүгдэд нь Дафа-гаар бясалгаад төгс гэгээрэлд хүрэхийг хүсье! Хариад хүн болгон цагаа шамдуулан жинхэнэ бясалгахыг хүсье.

* * *

“Жуан Фалунь” номын хэллэг өнгөн дээрээ тийм гоёмсог биш, тэр ч байтугай орчин үеийн хэл зүйд таарахгүй байж мэднэ. Гэхдээ, хэрвээ би орчин үеийн хэл зүйн байдлаар энэ Дафа номыг эмхэтгэвэл маш ноцтой асуудал гарна. Номны хэл зүйн бүтэц, дүрмийн хувьд хэвшмэл сайн болсон ч бүр гүн ухагдахууны зүйлийг багтааж чадахгүйд хүрнэ. Яагаад гэвэл орчин үеийн үгийн сан үндсэндээ Дафа-гийн бүр дээд янз бүрийн түвшин дэх удирдах нөлөө, Номын түвшин болгоны илрэх хэлбэрийг илтгэж чадахгүй, түүнчлэн сурагчийн бие болон гон-ы хувирах явц, дээшлэх энэ үндсэн өөрчлөлтүүдийг дагуулж чадахгүйд хүрнэ.

Ли Хонжи
1996 оны 1 сарын 5